



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

NEDL TRANSFER



HN 5XJF Q

KC10990

HARVARD COLLEGE LIBRARY

*From the Library of*

EDWARD KENNARD RAND

Class of 1894

Pope Professor of Latin, 1931-1945





**L. ANNAEI SENECAE**  
**TRAGEDIAE.**

---

**AD**  
**OPTIMORUM LIBRORUM FIDEM**

**ACCURATE EDITAE.**

---

**EDITIONIS STEREOTYPÆ C. TAUCHNITIANÆ**

**NOVA IMPRESSIO.**

---

**LIPSIAE**  
**SUMPTIBUS SUCC. OTTONIS HOLTZE.**  
**1894.**

Rands KC 10990

HARVARD  
UNIVERSITY  
LIBRARY  
046784

IMPRESSERUNT OSCAR BRANDSTETTER, LIPSIAE.

# **H E R C U L E S**

**F U R E N S.**

---

## **DRAMATIS PERSONAE.**

***IUNO.***

***HERCULES.***

***LYCUS.***

***MEGARA***

***AMPHITRYON.***

***THESEUS.***

***CHORUS THEBANORUM.***

---



## ARGUMENTUM.

Lycus a Creonte, Herculis socero, rege Thebano, propter scelera in exsilium missus, absente iam Hercule apud Inferos, ut inde Eurysthei iussu peteret Cerberum (ubi et Theseum in vinculis detentum, qui cum Pirithoo descenderat ad rapiendam Proserpinam, liberavit) occasionem oblatam arripit, et, per seditionem Creonte cum duobus filiis caeso, regnum Thebanum occupat. Megaram Herculis uxorem ad nuptias sollicitat, abnuenti vim parat. Opportune reversus, Hercules Lycum ceterosque illius factionis interficit. Haec tam feliciter gesta Iuno non ferens immittit illi furorem, quo correptus uxorem suam cum liberis interficit. Quod ubi ad se reversus intellexit, doloris impatientiâ vix Amphitryonis atque Thesei precibus detentus, ne sibi mortem inferret, cum Theseo Athenas purgandus proficiscitur.

---

## ALIUD ARGUMENTUM

### *HIERONYMI BALBI.*

- Maximus Alcides Stygio remeabat ab orbe  
Victor, Tartareumque canem sub vincla trahebat.  
Sed Iuno, irarum nondum veterumque dolorum  
Immemor, anguiferam nigranti sede Megaeram  
5 Excitat: illa faces Phlegethontis ab amne petitas  
Corpus in Herculeum iacit, instillatque venenum.  
Tum vero Alcides, furiis accensus amaris,  
Saevit, inops animi, et geminos cum coniuge natos  
(Proh scelus!) ante aras indignâ morte peremit.  
10 Aut ubi Gorgoneos male sanâ mente furores  
Expulit, et dirum novit mens conscia crimen:  
Ingemit, invisam cupiens abrumpere vitam.
-

## ACTUS PRIMUS.

IUNO sola.

*Immo Iovis furta, pellices, nothos, Herculem autem maxime stomachatur, qui ab Inferis reversus obiectâ insaniâ uxorem et liberos occidit.*

**S**OROR Tonantis (hoc enim solum mihi  
Nomen relictum est), semper alienum Jovem  
Ac templa summi vidua deserui aetheris  
Locumque, coelo pulsa, pellicibus dedi  
Tellus colenda est: pellices coelum tenent. 5  
Hinc Arctos altâ parte glacialis poli  
Sublime classes sidus Argolicas agit;  
Hinc, quâ tepenti vere laxatur dies,  
Tyriae per undas vector Europae nitet;  
Illinc timendum ratibus ac ponto gregem 10  
Passim vagantes exserunt Atlantides.  
Ferro minaci hinc terret Orion deos:  
Suasque Perseus aureus stellas habet.  
Hinc clara gemini signa Tyndaridae micant,  
Quibusque natis mobilis tellus stetit. 15  
Nec ipse tantum Bacchus, aut Bacchi parens,  
Adiere Superos: ne qua pars probro vacet,  
Mundus puellae sarta Gnoissiacae gerit.  
Sed vetera querimur: una me dira ac fera  
Thebana nuribus sparsa tellus impiis 20  
Quoties novercam fecit? Escendat licet,  
Meumque victrix teneat Alcmene locum;  
Pariterque natus astra promissa occupet,  
In cuius ortus mundus impendit diem,  
Tardusque Eoo Phoebus effulsit mari, 25  
Retinere mersum iussus Oceano iubar

Non sic abibunt odia: vivaces aget  
Violentus iras animus, et saevus dolor  
Aeterna bella pace sublata geret. —

- 30 Quae bella? Quidquid horridum tellus creat  
Inimica; quidquid pontus aut aër tulit  
Terribile, dirum, pestilens, atrox, ferum;  
Fractum atque domitum est; superat et crescit  
malis,  
Iraque nostrā fruitur; in laudes suas
- 35 Mea vertit odia. Dum nimis saeva impero:  
Patrem probavi, gloriae feci locum.  
Quā Sol reducens, quāque deponens diem  
Binos propinquā tingit Aethiopas face,  
Indomita virtus colitur, et toto deus
- 40 Narratur orbe. Monstra iam desunt mihi;  
Minorque labor est Herculi iussa exequi,  
Quam mihi iubere; laetus imperia excipit.  
Quae fera tyranni iussa violento queant  
Nocere iuveni? Nempe pro telis gerit,
- 45 Quae timuit et quae fudit: armatus venit  
Leone et hydra. Nec satis terrae patent:  
Effregit ecce! limen inferni Iovis,  
Et opima victi regis ad Superos refert.  
Parum est reverti: foedus Umbrarum perit.
- 50 Vidi ipsa, vidi, nocte discussa Inferum  
Et Dite domito, spolia iactantem patri  
Fraterna. Cur non victum et oppressum trahit  
Ipsam catenis paria sortitum Iovi,  
Ereboque capto potitur et reteggit Styga?
- 55 Patefacta ab imis Manibus retro via est,  
Et sacra dirae Mortis in aperto iacent.  
At ille, rupto carcere Umbrarum, ferox  
De me triumphat, et superbificā manu  
Atrum per urbes ducit Argolicas canem.
- 60 Viso labantem Cerbero vidi diem,  
Pavidumque solem; me quoque invasit tremor,

Et terna monstri colla devicti intuens,  
 Timui imperasse. Levia sed nimium queror;  
 Coelo timendum est, regna ne summa occupet,  
 Qui vicit ima. Sceptra praeripiet patri, 65  
 Nec in astra lentâ veniet, ut Bacchus, viâ:  
 Iter ruinâ quaeret, et vacuo volet  
 Regnare mundo. Robore experto tamen,  
 Et posse coelum viribus vinci suis  
 Didicit ferendo: subdidit mundo caput, 70  
 Nec flexit humeros molis immensae labor,  
 Mediusque collo sedit Herculeo polus;  
 Immota cervix sidera et coelum tulit,  
 Et me prementem. Quaerit ad Superos viam.  
 Perge, ira, perge, et magna meditantem opprime! 75  
 Congredere! manibus ipsa dilacera tuâ!  
 Quid tanta mandas edia? Discedant ferae;  
 Ipse imperando fessus Eurystheus vacet;  
 Titanas ausos rumpere imperium Iovis  
 Emitte; Siculi verticis laxa specum: 80  
 Tellus gigante Doris excusso tremens  
 Supposita monstri colla terrifici levât;  
 Sublimis alias Luna concipiat feras.  
 Sed vicit ista. Quaeris Alcidae parem?  
 Nemo est, nisi ipse: bella iam secum gerat. 85  
 Adsint ab imo Tartari fundo excitae  
 Eumenides; ignem flammæ spargant comæ;  
 Viperea saevæ verbera incutiant manus.  
 I nunc, superbe, coelitem sedes pete!  
 Humana temne! Iam Styga et Manes, ferox, 90  
 Fugisse credis? Hic tibi ostendam Inferos!  
 Revocabo in altâ conditam caligine  
 Ultra nocentum exilia discordem deam,  
 Quam munit ingens montis oppositi specus!  
 Educam et imo Ditis e regno extraham, 95  
 Quidquid relictum est! Veniat invisum Scelus,  
 Suumque lambens sanguinem Impietas ferox,

- Errorque, et in se semper armatus Furoi  
 Hoc, hoc ministro noster utatur dolor.
- 100 Incipite, famulae Ditis: ardentem citae  
 Concutite pinum, et agmen horrendum anguibus  
 Megaera ducat, atque luctificā manu  
 Vastam rogo flagrante corripiat trabem!  
 Hoc agite: poenas petite violatae Stygis!
- 105 Concutite pectus! acrior mentem excoquat,  
 Quam qui caminis ignis Aetnaeis furit! *II 5, 25*  
 Ut possit animum captus Alcides agi,  
 Magno furore percitus: nobis prius  
 Insaniendum est. Iuno, cur nondum furis?
- 110 Me, me, sorores, mente deiectam meā  
 Versate primam, facere si quidquam adparo  
 Dignum novercā. Iam odia mutantur mea  
 Gnatos reversus videat incolumes, precor, *II 13*  
 Manuque fortis redeat. Inveni diem,
- 115 Invisa quo nos Herculis virtus iuvet:  
 Me pariter et se vincat, et cupiat mori  
 Ab Inferis reversus. Hic prosit mihi,  
 Iove esse genitum. Stabo, et, ut certo exeant  
 Emissa nervo tela, librabo manum,
- 120 Regam furentis arma, pugnanti Herculi  
 Tandem favebo. Scelere perfecto licet  
 Admittat illas genitor in coelum manus.  
 Movenda iam sunt bella: clarescit dies,  
 Ortuque Titan lucidus croceo subit.

### CHORUS THEBANORUM.

*Chorus e Thebanis a descriptione ortus diei, magnatum curas studiaque damnat, Herculem audaciae in laboribus subeundis taxat, vitae denique humilis laudat tranquillitatem optatque.*

- 125 Iam rara micant sidera prono  
 Languida mundo; nox victa vagos  
 Contrahit ignes luce renatā;

Cogit nitidum Phosphoros agmen,  
Signum celsi glaciale poli  
Septem stellis Arcades ursae  
Lucem verso temone vocant;  
Iam caeruleis evectus aquis  
Titan summâ prospicit Oetâ;  
Iam Cadmeis inclyta Bacchis  
Adspersa die dumeta rubent,  
Phoebique fugit reditura soror  
Labor exoritur durus, et omnes  
Agitat curas, aperitque domos.  
Pastor gelidâ cana pruina  
Grege dimisso pabula carpit,  
Ludit prato liber aperto  
Nondum ruptâ fronte iuvençus;  
Vacuae reparant ubera matres;  
Errat cursu levis incerto  
Molli petulans hoedus in herbâ;  
Pendet summo stridula ramo  
Pennasque novo tradere soli  
Gestit, querulos inter nidos  
Thracia pellex: turbaque circa  
Confusa sonat, murmure mixto  
Testata diem; carbasa ventis  
Credit dubius navita vitae,  
Laxos aurâ complente sinus;  
Hic, exesis pendens scopulis,  
Aut deceptos instruit hamos;  
Aut suspensus spectat pressâ  
Praemia dextrâ: sentit tremulum  
Linea piscem.  
Haec, innocuae quibus est vitae  
Tranquilla quies, et laeta suo  
Parvoque domus, spes et in agris.  
Turbine magno Spes sollicitae  
Urbibus errant trepidique Metus

130

135

140

145

150

155

160

- Ille superbos aditus regum  
 165 Durasque fores, expers somni,  
 Colit; hic nullo fine beatas  
 Componit opes, gazis inhians,  
 Et congesto pauper in auro est.  
 Illum populi favor attonitum,  
 170 Fluctuque magis mobile vulgus,  
 Aurā tumidum tollit inani:  
 Hic, clamosi rabiosa fori  
 Iurgia vendens, improbus iras  
 Et verba locat. Novit paucos  
 175 Secura quies, qui, velocis  
 Memores aevi, tempora nunquam  
 Reditura tenent. Dum fata sinunt,  
 Vivite laeti: properat curvu  
 Vita citato, volucrique Die  
 180 Rota praecipitis vertitur anni.  
 Durae peragunt pensa Sorores,  
 Nec sua retro fila revolvunt.  
 At gens hominum fertur rapidis  
 Obvia fati, incerta sui;  
 185 Stygias ultro quaerimus undas.  
 Nimium, Alcide, pectore forti  
 Properas moestos visere Manes:  
 Certo veniunt ordine Parcae.  
 Nulli iusso cessare licet,  
 190 Nulli scriptum proferre diem:  
 Recipit populus urna citatos.  
 Alium multis gloria terris  
 Tradat, et omnes fama per urbes  
 Garrula laudet, coeloque parem/  
 195 Tollat et astris; altus curru  
 Sublimis eat: me mea tellus  
 Lare secreto tutoque tegat.  
 Venit ad pigros cana senectus;  
 Humillique loco, sed certa, sedet

Sordida parvae fortuna domus 200  
 Alte virtus animosa cadit.

Sed moesta venit crine soluto  
 Megara, parvum comitata gregem.  
 Tardusque senio graditur Alcidae parens.

## ACTUS SECUNDUS.

## MEGARA, AMPHITRYON.

*Megara absentiam Herculis deflet enumeratis ipsius aerumnis. Lyci vim et insolentiam conqueritur. Despondentem animum Megaram et desperantem consolatur Amphitryon.*

MEG. O magne Olympi rector et mundi arbiter, 205  
 iam statue tandem gravibus aerumnis modum,  
 Finemque cladi! Nulla lux unquam mihi  
 Secura fulsit; finis alterius mali  
 Gradus est futuri. Protinus reduci novus  
 Paratur hostis. Antequam laetam domum 210  
 Contingat, aliud iussus ad bellum meat.  
 Nec ulla requies, tempus aut ullum vacat,  
 Nisi dum iubetur. Sequitur a primo statim  
 Infesta Iuno: numquid immunis fuit  
 Infantis aetas? Monstra superavit prius, 215  
 Quam nosse posset. Gemina cristati caput  
 Angues ferebant ora; quos contra obvis  
 Reptavit infans; igneos serpentium  
 Oculos remisso lumine ac placido intuens,  
 Artos serenis vultibus nodos tulit, 220  
 Et, tumida tenera guttura elidens manu,  
 Prolusit hydrae. Maenali pernix fera,  
 Multo decorum praeferens auro caput,  
 Deprensa cursu est. Maximus Nemeae timor  
 Pressus lacertis gemit Herculeis leo. 225



- Quid stabula memorem dira Bistonii gregis,  
Suisque regem pabulum armentis datum?  
Solitumque densis hispidum Erymanthi iugis  
Arcadia quater nemora Maenaliū suem?
- 230 Taurumque centum non levem populis metum?  
Inter remotos gentis Hesperiae greges  
Pastor triformis littoris Tartessii  
Peremtus, acta est praeda ab occasu ultimo;  
Notum Cithaeron pavit Oceano pecus.
- 235 Penetrare iussus solis aestivi plagas,  
Et adusta medius regna quae torret dies,  
Utrisque montes solvit: abrupto obice  
Latam ruenti fecit Oceano viam.  
Post haec, adortus nemoris opulenti domos,
- 240 Aurifera vigilis spolia serpentis tulit.  
Quid? saeva Lernae monstra, numerosum malum,  
Non igne demum vicit et docuit mori?  
Solitasque pennas condere obductis diem  
Petiit ab ipsis nubibus Stympthalidas?
- 245 Non vicit illum caelibis semper tori  
Regina gentis vidua Thermodontiae:  
Nec ad omne clarum facinus audaces manus  
Stabulis fugavit turpis Augiae labor.  
Quid ista prosunt? Orbe defenso caret.
- 250 Sensere terrae pacis auctorem suae  
Abesse terris. Prosperum ac felix scelus  
Virtus vocatur; sontibus parent boni;  
Ius est in armis, opprimit leges timor.  
Ante ora vidi nostra truculentā manu
- 255 Gnatos paterni cadere regni vindices,  
Ipsamque Cadmi nobilis stirpem ultimam  
Occidere; vidi regium capitis decus  
Cum capite raptum. Quis satis Thebas fleat?  
Ferax deorum terra, quem dominum tremis,
- 260 E cuius arvis eque foecundo sinu  
Stricto iuventus orta cum ferro stetit;

Cuiusque muros natus Amphion Iove  
 Struxit, canoro saxa modulatu trahens;  
 In cuius urbem non semel divum parens  
 Coelo relicto venit? Haec, quae coelites 265  
 Recepit, et quae fecit, et (fas sit loqui)  
 Fortasse faciet, sordido premitur iugo!  
 Cadmea proles civitasque Amphionis,  
 Quo decidistis? tremitis ignavum exulem,  
 Suis carentem finibus, nostris gravem? 270  
 Qui scelera terrâ quique persequitur mari,  
 Ac saeva iustâ sceptrâ confringit manu,  
 Nunc servit absens, fertque quae ferri vetat,  
 Tenetque Thebas exul Herculeas Lycus.  
 Sed non tenebit: aderit et poenas petet, 275  
 Subitusque ad astra emerget! Inveniet viam,  
 Aut faciet! Adsis sospes et remeas, precor,  
 Tandemque venias victor ad victam domum!  
 Emerge, conflux, atque dispulsa manu  
 Abrumpe tenebras! Nulla si retro via, 280  
 Iterque clausum est: orbe diducto redi,  
 Et quidquid atrâ nocte possessum latet,  
 Emitte tecum! Dirutis qualis iugis  
 Praeceptis citato flumini quaerens iter  
 Quondam stetisti, scissa cum vasto impetu 285  
 Patuere Tempe (pectore impulsus tuo  
 Huc mons et illuc cecidit, et rupto aggere  
 Novâ cucurrit Thessalus torrens viâ):  
 Talis parentes, liberos, patriam petens,  
 Erumpe, rerum terminos tecum efferens; 290  
 Et quidquid avida tot per annorum gradus  
 Abscondit aetas, redde; et oblitos sui  
 Lucisque pavidos ante te populos age.  
 Indigna te sunt spolia, si tantum refers,  
 Quantum imperatum est. Magna sed nimium loquor 295  
 Ignara nostrae sortis. Unde illum mihi,  
 Quo te tuamque dexteram amplectar, diem,

- Reditusque lentos nec mei memores querar?  
 Tibi, o deorum ductor, indomiti ferent
- 300 Centena tauri colla; tibi, frugum potens,  
 Secreta reddam sacra; tibi mutâ fide  
 Longas Eleusia tacita lactabit faeces  
 Tum restitutas fratribus rebor meis  
 Animas, et ipsum regna moderantem sua
- 305 Florere patrem. Si qua te maior tenet  
 Clausum potestas; sequimur. Aut omnes tuo  
 Defende reditu sospes, aut omnes trahe! —  
 Trahes, nec ullus eriget fractos deus.  
 AMPH. O socia nostri sanguinis, castâ fide
- 310 Servans torum natosque magnanimi Herculis,  
 Meliora mente concipe, atque animum excita!  
 Aderit profecto, qualis ex omni solet  
 Labore, maior. MEG. Quod nimis miseri volunt,  
 Hoc facile credunt. AMPH. Imo quod metuant  
 nimis,
- 315 Nunquam moveri posse nec tolli putant:  
 Prona est timori semper in peius fides.  
 MEG. Demersus ac defossus et toto insuper  
 Oppressus orbe, quam viam ad Superos habet?  
 AMPH. Quam tunc habebat, cum per arentem  
 plagam
- 320 Et fluctuantes more turbati maris  
 Abiit arenas, bisque discedens fretum  
 Et bis recurrens; omni que desertâ rate  
 Deprensus haesit syrtium brevibus vadis,  
 Et puppe fixâ maria superavit pedes.
- 325 MEG. Iniqua raro maximis virtutibus  
 Fortuna parcit. Nemo se tuto diu  
 Periculis offerre tam crebris potest.  
 Quem saepe transit casus, aliquando invenit  
 Sed ecce! saevus ac minas vultu gerens
- 330 Et qualis animo est, talis incessu venit,  
 Aliena dextrâ sceptrâ concutiens Lycus.

## LYCUS. MEGARA. AMPHITRYON.

*Lycus, Thebis a Creonte in castrum missus, Hercule ad Inferos profecto, caeso Creonte cum filiis, quo regnum occupatum sibi firmet, Megaras nuptias ambit, abnuenti vim minatur.*

LYC. Urbis regens opulenta Thebanas loca,  
 Et omne quidquid uberi cingit solo  
 Obliqua Phocis, quidquid Iammos rigat,  
 Quidquid Cithaeron vertice excelsus videt, 335  
 Et hinc findens Isthmos exilis freta,  
 Non vetera patrias iura posideo domus  
 Ignarus heros: nobiles non sunt mihi  
 Avi, nec altis inclytum titulis genus;  
 Sed clara virtus. Qui genus iactat suum, 340  
 Aliena laudat. Rapta sed trepidâ manu  
 Sceptra obtinentur; omnis in ferro est salus.  
 Quod civibus tenere te invitis scias,  
 Strictus tuetur ensis. Alieno in loco  
 Haud stabile regnum est; una sed nostras potest 345  
 Fundare vires, iuncta regali face.  
 Thalamisque, Megara: ducet e genere inclyto  
 Novitas colorem: nostra. Non equidem reor  
 Fore ut recuset ac meos spernat toros.  
 Quod si impotenti pertinax animo abnuet 350  
 Stat tollere omnem penitus Herculeam domum.  
 Invidia factum ac sermo popularis promet?  
 Ars prima regni posse ad invidiam pati.  
 Tentemus igitur: fors dedit nobis locum:  
 Namque ipsa, tristi vestis obtentu caput 355  
 Velata, iuxta praedides adstat deos,  
 Laterique adhaeret verus Alcidae sator.  
 ME. Quidnam iste, nostri generis exitium ac lues,  
 Novi parat? Quid tentat? LYC. O clarum trahens  
 A stirpe nomen regia, facilis mea 360  
 Parumper aure verba patienti excipe.

- Si aeterna semper odia mortales gerant,  
 Nec coeptus unquam cedat ex animis furor,  
 Sed arma felix teneat, infelix paret:
- 365 Nihil relinquunt bella; tum vastis ager  
 Squalebit arvis; subditâ tectis face  
 Altus sepultas obruet gentes cinis.  
 Pacem reduci velle victori expedit,  
 Victo necesse est: particeps regno veni
- 370 Sociemur animis! pignus hoc fidei cape:  
 Continge dextram! — Quid truci vultu siles?  
 MEG. Egone ut parentis sanguine adpersam  
 manum  
 Fratrumque geminâ caede contingam? Prius  
 Extinguet Ortus, referet Occasus diem
- 375 Pax ante fida nivibus et flammis erit,  
 Et Scylla Siculum iunget Ausonio latus;  
 Priusque multo vicibus alternis fugax  
 Euripus undâ stabit Euboicâ piger.  
 Patrem abstulisti, regna, germanos, larem,
- 380 Patriam: quid ultra est? Una res superest mihi,  
 Fratre ac parente carior, regno ac lare:  
 Odium tui, quod esse cum populo mihi  
 Commune doleo: pars quota ex illo mea est?  
 Dominare tumidus! spiritus altos gere!
- 385 Sequitur superbos ultor a tergo deus.  
 Thebana noxi regna. Quid matres loquar  
 Passas et ausas scelera? quid geminum nefas,  
 Mixtumque nomen coniugis, gnati, patris?  
 Quid bina fratrum castra? quid totidem rogos?
- 390 Riget superba Tantalus luctu parens,  
 Moestusque Phrygio manat in Sipylo lapis.  
 Quin ipse, torvum subrigens cristâ caput,  
 Illyria Cadmus regna permensus fugâ,  
 Longas reliquit corporis tracti notas.
- 395 Haec te manent exempla. Dominare, ut lubet,  
 Dum solita regni fata te nostri vocent.

LYC. Agedum, efferatas, rabida, voces amove,  
Et disce regum imperia ab Alcide pati.

Ego rapta quamvis sceptrā victricī geram  
Dextrā, regamque cuncta sine legum metu, 400  
Quas arma vincunt: pauca pro causā loquar  
Nostrā. Cruento cecidit in bello pater?

Cecidere fratres? Arma non servant modum,  
Nec temperari facile nec reprimi potest  
Stricti ensis ira; bella delectat cruor. — 405

Sed ille regno pro suo, nos improbā  
Cupidine acti. — Quaeritur belli exitus,  
Non causa. Sed nunc pereat omnis memoria.  
Cum victor arma posuit, et victum decet  
Deponere odia. Non ut inflexo genu 410

Regnantem adores, petimus; hoc ipsum placet,  
Animo ruinas quod capis magno tuas.  
Es rege coniux digna: sociemus toros.

MEG. Gelidus per artus vadit exsanguis tremor.  
Quod facinus aures pepulit? Haud equidem horruī, 415  
Cum pace ruptā bellicus muros fragor

Circumsonaret; pertuli intrepide omnia:  
Thalamos tremisco; capta nunc videor mihi.

Gravent catenae corpus, et longā fame  
Mors protrahatur lenta: non vincet fidem 420  
Vis ulla nostram; moriar, Alcide, tua!

LYC. Animosne mersus Inferis coniux facit?

MEG. Inferna tetigit, posset ut supera adsequi.

LYC. Telluris illum pondus immensae premit.

MEG. Nullo premetur onere, qui coelum tulit. 425

LYC. Cogere. MEG. Cogi qui potest, nescit mori.

LYC. Effare, thalamis quod novis potius parem  
Regale munus? MEG. Aut tuam mortem, aut meam.

LYC. Morière, demens? MEG. Coniugi occur-  
ram meo.

LYC. Scepтрone nostropotior est famulus tibi? 430

MEG. Quot iste famulus tradidit reges neci!

- LYC. Cur ergo regi servit, et patitur iugum?  
 — MEG. Imperia dura tolle, quid virtus erit?  
 LYC. Obici feris monstrisque virtutem putas?  
 435 MEG. Virtutis est domare; quae cuncti pavent,  
 LYC. Tenebrae loquentem magna Tartareae  
 premunt.  
 MEG. Non est ad astra mollis e terris via.  
 LYC. Quo patre genitus coelitum sperat domos?  
 AMPH. Miseranda coniux Herculis magni sile:  
 440 Partes meae sunt reddere Alcidae patrem  
 Genusque verum. Post tot ingentis viri  
 Memoranda facta, postque pacatum manu,  
 Quodcunque Titan ortus et labens videt,  
 Post monstra tot perdomita, post Phlegram impio  
 445 Sparsam crubere, postque defensos deos,  
 Nondum liquet de patre? mentimur Iovem?  
 Iunonis odio crede. LYC. Quid violas Iovem?  
 Mortale coelo non potest iungi genus.  
 AMPH. Communis ista pluribus causa est deis.  
 450 LYC. Famuline fuerant ante quam fierent dei?  
 AMPH. Pastor Pheraeos Delius pavit greges....  
 LYC. Sed non per omnes exul erravit plagas....  
 AMPH. Quem profuga terra mater errante edidit.  
 LYC. Non monstra saevas Phoebus aut timuit feras:  
 455 AMPH. Primus sagittas imbuit Phoebi draco.  
 LYC. Quam gravia parvus tulerit ignoras mala?  
 AMPH. E matris utero fulmine eiectus puer  
 Mox fulminanti proximus patri stetit.  
 Quid, qui gubernat astra, qui nubes quatit?  
 460 Non latuit infans rupis Idaeae specu?  
 Sollicita tanti pretia natales habent,  
 Semperque magno constitit nasci deum.  
 LYC. Quemcunque miserum videris, hominem  
 scias.  
 AMPH. Quemcunque fortem videris, miserum  
 neges.

LYC. Fortem vocemus, cuius ex humeris leo, 465  
 Donum puellae factus; et clava excidit,  
 Fulsitque pictum veste Sidonæ latus?  
 Fortem vocemus, cuius horrentes comæ  
 Maduere nardo? Laude qui notas manus  
 Ad non virilem tympani movit sonum. 470  
 Mitrà ferocem barbarā frontem premens?  
 AMPH. Non erubescit Bacchus effusus tener  
 Sparsisse crines, nec manu molli levem  
 Vibrare thyrsū, cum parum forti gradu  
 Auro decorum syrma barbarico trahit: 475  
 Post multa virtus opera laxari solet.  
 LYC. Teuthrantis hoc fatetur eversi domus,  
 Pecorumque ritu virginum oppressi greges.  
 Hoc nulla Iuno, nullus Eurystheus iubat:  
 Ipsius hæc sunt opera. AMPH. Non nosti omnia: 480  
 Ipsius opus est caestibus fractus suis  
 Eryx, et Eryci iunctus Antæus Libys, **IV** 7.25  
 Et qui hospitali caede manantes foci  
 Bibere iustum sanguinem Busiridis.  
 Ipsius opus est, vulnere et ferro obviis, 485  
 Mortem coactus integer Cycnus pati;  
 Nec unus unā Geryon victus manu.  
 Eris inter istos, qui tamen nullo stupro  
 Laesere thalamos. LYC. Quod Iovi, hoc regi licet:  
 Iovi dedisti coniugem: regi dabis, 490  
 Et te magistro non novum hoc discet nurus,  
 Etiam viro probante meliorem sequi.  
 Sin copulari pertinax taedis negat:  
 Vel ex coactā nobilem partum feram.  
 MEA. Umbrae Creontis et penates Labdaci, 495  
 Et nuptiales impii Oedipodæ faces;  
 Nunc solita vestro fata coniugio date!  
 Nunc, nunc, cruentas regis Aegypti nurus,  
 Adeste, multo sanguine infectae manus!  
 Deest una numero Danaïs: explebo nefas. 500



- LYC. Coniugia quoniam pervicax nostra abnuis,  
 Regemque terras: sceptrā quid possint, scies.  
 Complectere aras: nullus eripiet deus  
 Te mihi; nec, orbe si remolito queat
- 505 Ad supera victor numina, Alcides, vehi.  
 Congerite silvas! templa supplicibus suis  
 Iniecta flagrent! coniugem et totum gregem  
 Consumat unus igne subiecto rogos!
- AMPH. Hoc munus a te, genitor Alcidae, peto,  
 510 Rogare quod me deceat: ut primus cadam.
- LYC. Qui morte cunctos luere supplicium iubet,  
 Nescit tyrannus esse. Diversa inroga:  
 Miserum veta perire, felicem iube.  
 Ego, dum cremandis trabibus adcrevit rogos,
- 515 Sacro regentem maria votivo colam.
- AMPH. Proh numinum vis summa, proh coelestium  
 Rector parensque, cuius excussis tremunt  
 Humana telis, impiam regis feri
- Compesce dextram! — Quid deos frustra precor?  
 520 Ubicunque es, audi, gnate! — Cur subito labant  
 Agitata motu templa? cur mugit solum?  
 Infernus imo tonuit e fundo fragor.  
 Audimur: est, est sonitus Herculei gradus!

## CHORUS THEBANORUM.

*Actoris partes Chorus officiumque viriliter defendit, precibus Amphitryonis adspirans Hercules reditum vovet, idque arguit Orphei exemplo.*

- O fortuna viris invida fortibus,  
 525 Quam non aequa bonis praemia dividis!  
 „Eurystheus facile regnet in otio;  
 „Alcmena genitus bella per omnia  
 „Monstris exagitet coeliferam manum:  
 „Serpentis reseceat colla feracia;  
 530 „Deceptis referat mala sororibus,

„Cum somno dederit pervigiles genas  
 „Pomis divitibus praepositus draco.“  
 Intravit Scythiae multivagas domos,  
 Et gentes patriis sedibus hospitas;  
 Calcavitque freti terga rigentia, 535  
 Et mutis tacitum littoribus mare.  
 Illic dura carent aequora fluctibus;  
 Et quâ plena rates carbasa tenderant,  
 Intonsis teritur semita Sarmatis.  
 Stat pontus vicibus mobilis annuis, 540  
 Navem nunc facilis, nunc equitem, pati.  
 Illic, quae viduis gentibus imperat,  
 Aurato religans ilia balteo,  
 Detraxit spolium nobile corpori  
 Et peltam et nivei vincula pectoris, 545  
 Victorem posito suspiciens genu.  
 Quâ spe praecipites actus ad Inferos,  
 Audax ire vias irremeabiles,  
 Vidisti Siculae regna Proserpinae?  
 Illic nulla Noto, nulla Favonio 550  
 Consurgunt tumidis fluctibus aequora;  
 Non illic geminum Tyndaridae genus  
 Succurunt timidis sidera navibus:  
 Stat nigro pelagus gurgite languidum;  
 Et cum Mors avidis pallida dentibus 555  
 Gentes innumeras Manibus intulit,  
 Uno tot populi remige transeunt.  
 Evincas utinam iura ferae Stygis,  
 Parcarumque colos non revocabiles!  
 Hic qui rex populis pluribus imperat, 560  
 Bello cum peteres Nestoream Pylon,  
 Tecum conseruit pestiferas manus,  
 Telum tergeminâ cuspide praeferens;  
 Effugit tenui vulnere saucius,  
 Et mortis dominus pertimuit mori. 565  
 Fatum rumpe manu: tristibus Inferis

- Prospectus pateat lucis, et inuius  
 Limes det faciles ad Superos vias!  
 Immites potuit flectere cantibus —
- 570 Umbrarum domines et prece supplici  
 Orpheus, Eurydicen dum repetit suam.  
 Quae silvas et aves saxaque traxerat,  
 Ars, quae prae buerat fluminibus moras  
 Ad cuius sonitum constiterant ferae:
- 575 Mulcet non solitis vocibus Inferos,  
 Et surdis resonat clarius in locis.  
 Deslent Eurydicen Threïciae nurus?  
 Deslent et lacrimis difficiles dei,  
 Et, qui fronte nimis crimina tetrica
- 580 Quaerunt, ac veteres excutunt reos,  
 Flentes Eurydicen iuridici sedent.  
 Tandem mortis, ait „Vincimur,“ arbiter:  
 „Evade ad Superos; lege tamen data:  
 „Tu post terga tui perge viri comes;
- 585 „Tu non ante tuam respice coniugem,  
 „Quam cum clara deos obtulerit dies,  
 „Spartanique aderit ianua Taenari.“  
 Odit verus amor nec patitur moras:  
 Munus dūm properat cernere, perdidit.
- 590 Quae vinci potuit regia cantibus,  
 Haec vinci poterit regia viribus.

## ACTUS TERTIUS.

## HERCULES.

*Solem ceterosque deos precatur veniam Hercules, quod iussus Cerberum Superis invisum transierit.*

O lucis almae rector et cœli decus,  
 Qui alterna curru spatia flammifero ambiens,

Illustre laetis exaeris terris caput,  
 Da, Phoebe, veniam, si quid illicitum tui 595  
 Videre vultus: iussus in lucem extuli  
 Arcana mundi. Tuque, coelestam arbiter  
 Parensque, visus fulmine opposito tæge;  
 Et tu, secunda maria qui sceptro regis,  
 Imas pete undas! Quisquis ex alto adspicit 600  
 Terræ, facie pollui metuens novâ,  
 Aciem reflectat, oraque in coelum erigat,  
 Portenta fugiens. Hoc nefas cernant duo,  
 Qui advexit et quæ iussit. In poenas meas  
 Atque in labores non satis terræ patent: 605  
 Iuppitis odio vidi inaccessa omnibus,  
 Ignota Phoebo, quæque deterior polus,  
 Obscura, diro spatia concessit Iovi;  
 Et, si placerent tertiæ sortis loca,  
 Regnare potui. Noctia æternæ chaos 610  
 Et nocte quiddam gravius, et tristes deos  
 Et fata, vici; mortem contemptâ redi.  
 Quid restat aliud? Vidi et ostendi Inferos.  
 Da, si quid ultra est. Tam diu pateris manus  
 Cessare nostras, Iuno? Quæ vinci iubes? 615  
 Sed templa quare miles infestus tenet,  
 Limenque sacrum terror armorum obsidet?

MEGARA, AMPHITRYON, HERCULES,  
 THESEUS.

*Herculem reducem gratatur Amphitryon. Illi quaerenti narrat, quo in loco res sint. Dum Hercules proficiscitur ad occidendum Lycum, Theseus rogatus ab Amphitryone exponit, quæ apud Inferos gesserit Hercules.*

AMPH. Utrumne visus vota decipiunt meos,  
 An ille dormitor orbis et Graidm decus  
 Tristi silentem nubilo liquit domum? 620  
 Estne ille natus? Membra lætitiâ stupent.

- O gnate, certa, at sera, Thebarum salus,  
Teneone in auras editum, an vanâ fruor  
Deceptus umbrâ? tune es? — Agnosco toros
- 625 Humerosque, et alto nobilem trunco manum.  
HERC. Unde iste, genitor, squalor, et lugubribus  
Amicta coniux? Unde tam foedo obsiti  
Paedore nati? quae domum clades gravat?  
AMPH. Socer est peremtus; regna possedit Lycus?
- 630 Gnatos, parentem, coniugem leto petit.  
HERC. Ingrata tellus, nemo ad Herculeae domus  
Auxilia venit? vidit hoc tantum nefas  
Defensus orbis? Cur diem questu tero?  
Mactetur hostis. THES. Hanc ferat virtus notam,
- 7, 29 635 Fiatque summus hostis Alcidae Lycus?  
Ad hauriendum sanguinem inimicum feror.  
HERC. Theseu, resiste: ne qua vis subita ingruat.  
Me bella poscunt. Differ amplexus, parens;  
Coniuxque, differ: nunciet Diti Lycus,
- 640 Me iam redissee. THES. Flebilem ex oculis fuga,  
Regina, vultum; tuque natosospite  
Lacrimas cadentes reprime: si novi Herculem,  
Lycus Creonti debitas poenas dabit.  
Lentum est, dabit: dat; hoc quoque est lentum:  
dedit,
- 645 AMPH. Votum secundet, qui potest, nostrum deus,  
Rebusque lapsis adsit! O magni comes  
Magnanime nati, pande virtutum ordinem:  
Quam longa moestos ducat ad Manes via;  
Ut vincla tulerit dura Tartareus canis.
- 650 THES. Memorare cogis acta securae quoque  
Horrenda menti. Vix adhuc certa est fides  
Vitalis aurae, torpet acies luminum,  
Hebetesque visus vix diem insuetum ferunt.  
AMPH. Pervince, Theseu, quidquid alto in pectore
- 655 Remanet pavoris, neve te fructu optimo  
Frauda laborum. Quae fuit durum pati,

*Meminisse dulce est: fare casus horridos.*

THES. Fas omne mundi, teque dominantem, precor,  
Regno capaci; teque, quam totâ irrita  
Quaesivit Aetnâ mater: ut iura abdita 660

Et operta terris liceat impune eloqui.  
Spartana tellus nobile attollit iugum,  
Densis ubi aequor Taenarus silvis premit;  
Hic ora solvit Ditis invisi domus,  
Hiatque rupes alta, et immenso specu 665

Ingens vorago faucibus vastis patet,  
Latumque pandit omnibus populis iter.  
Non caeca tenebris incipit primo via:  
Tenuis relictæ lucis a tergo nitor  
Fulgorque dubius solis afflicti cadit, 670

Et ludit aciem. Nocte sic mixtâ solet  
Præbere lumen primus aut serus dies.  
Hinc ampla vacuis spatia laxantur locis,  
In quæ omne mersum pereat humanum genus,  
Nec ire labor est: ipsa deducit via. 675

Ut saepe puppes aestus invitas rapit:  
Sic pronus aër urget atque avidum chaos,  
Gradumque retro flectere haud unquam sinunt  
Umbrae tenaces. Intus immensi sinus  
Placido quieta labitur Lethe vado, 680

Demitque curas; neve remeandi amplius  
Pateat facultas, fletibus multis gravem  
Involvit amnem, qualis incertâ vagus  
Maeander unda ludit, et cedit sibi  
Instatque, dubius, littus an fontem petat. 685

Palus inertis foeda Cocyti iacet.  
Hic vultur, illic luctifer bubo gemit,  
Omenque triste resonat infaustae strigis;  
Horrent opacâ fronde nigrantes comae,  
Taxo imminente; quam tenet segnis Sopor, 690

Famesque moesta tabido rictu iacens;  
Pudorque serus conscios vultus tegit;

- Metus, Pavorque, Funus, et frendens Dolor,  
 Aterque Luctus sequitur, et Morbus tremens,  
 695 Et cincta ferro Bella; in extremo abdita  
 Iners Senectus adiuvat baculo gradum.  
 AMPH. Estne aliqua tellus Cereris aut Bacchi ferax?  
 THES. Non praeata viridi laeta facie germinant;  
 Nec adulta leni fluctuat Zephyro seges;  
 700 Non ulla ramos silva pomiferos habet:  
 Sterilis profundi vastitas squalet soli,  
 Et foeda tellus torpet aeterno situ,  
 Rerumque moestus finis et mundi ultima;  
 Immotus aër haeret, et pigro sedet  
 705 Nox atra mundo; cuncta moerore horrida,  
 Ipsaque Morte peior est Mortis locus.  
 AMPH. Quid? ille, opaca qui regit sceptro loca,  
 Quâ sede positus temperat populos leves?  
 THES. Est in recessu Tartari obscuro locus,  
 710 Quem gravibus umbris spissa caligo adligat.  
 A fonte discors manat hinc uno latex:  
 Alter quieto similis (hunc iurant dei),  
 Tacente sacram devehens fluvio Styga:  
 At hic tumultu rapitur ingenti ferox,  
 715 Et saxa fluctu volvit, Acheron, invius  
 Renavigari. Cingitur duplici vado  
 Adversa Ditis regia, atque ingens domus  
 Umbrante luco tegitur. Hic vasto specu  
 Pendent tyranni limina; hac umbris iter;  
 720 Haec porta regni. Campus hanc circa iacet,  
 In quo superbo digereit vultu sedens  
 Animas recentes. Dira maiestas deo,  
 Frons torva, fratrum quae tamen speciem gerat  
 Gentisque tantae: vultus est illi Iovis,  
 725 Sed fulminantis. Magna pars regni trucidis  
 Est ipse dominus, cuius adspectum timet,  
 Quidquid timetur. AMPH. Verane est fama, Inferis  
 Tam sera reddi iura, et oblitos sui

Sceleris nocentes debitas poenas dare?  
 Quis iste veri rector atque aequi arbiter? 730

THE S. Non unus altâ sede quaesitor sedens  
 ludicia trepidis sera sortitur reis.  
 Aditur illo Gnaeus Minos foro;  
 Rhadamanthus illo; Thetidis hoc audit socer.  
 Quod quisque fecit, patitur: auctorem scelus 735  
 Repetit, saeque promitur exemplo nocens.

Vidi cruentos carcere includi duces,  
 Et impotentis terga plebeâ manu  
 Scindi tyranni. Quisquis est placide potens,  
 Dominusque vitae servat innocuas manus, 740  
 Et incruentum mitis imperium regit,

Animaeque parcit: longa permensus diu  
 Felicis aevi spatia, vel coelum petit,  
 Vel laeta felix nemoris Elysii loca,  
 Iudex futurus. Sanguine humano abstine, 745  
 Quicumque regnas: scelera taxantur modo

Maiore vestra. AMPH. Certus inclusos tenet  
 Locus nocentes? utque fert fama, impios  
 Supplicia vincissae perpetuis domant?  
 THE S. Rapitur volucris tortus Ixion rota; 750  
 Cervice saxum grande Sisyphiâ sedet;

In amne medio faucibus siccis senex  
 Sectatur undas: adluit mentum latex;  
 Fidemque cum iam saepe decepto dedit,  
 Perit unda in ore; poma destituunt famem; 755  
 Praebet volucris Tityos aeternas dapes;

Urnasque frustra Danaïdes plenas gerunt;  
 Errant furentes impiae Cadmeïdes;  
 Terretque mensas avida Phineas avis.

AMPH. Nunc ede nati nobilem pugnam mei. 760  
 Patruï volentis munus an spoliū refert?

THE S. Ferale tardis imminet saxum vadis,  
 Stupent ubi undae, segne torpescit fretum.  
 Hunc servat amnem cultu et adspectu horridus,



- 165 Pavidosque Manes squalidus gestat, senex.  
 Impexa pendet barba; deformem sinum  
 Nodus coercet; concavae lurent genae,  
 Regit ipse conto portitor longo ratem.  
 Hic onere vacuam littori puppim adplicans  
 770 Repetebat umbras: poseit Alcides viam,  
 Cedente turba. Dirus exclamat Charon:  
 „ Quo pergis audax? Siste properantem gradum! “  
 Non passus ullas gnatus Alcmena moras.  
 Proprio coactum navidam conto domat,  
 775 Scanditque puppem. Cymba populorum capax  
 Succubuit uni: sidit, et gravior ratis  
 Utrisque Lethen latere titubanti bibit.  
 Tum victa trepidant monstra, Centauri truces  
 Lapithaeque multo in bella succensi mero.  
 780 Stygiae paludis ultimos quaerens sinus,  
 Foecunda mergit capita Lernaes labos. IV 7  
 Post haec avari Ditis adparet domus.  
 Hic saevus umbras territat Stygius canis,  
 Qui trina vasto capita concutiens sono  
 785 Regnum tuetur. Sordidum dabo caput 2 t  
 Lambunt colubrae; viperis torrent iubae;  
 Longusque tortâ sibilat caudâ draco;  
 Par ira formae. Sensit ut motus pedum  
 Attollit hirtas angue vibrato comas,  
 790 Missumque captat aure subrecta sonum,  
 Sentire et umbras solitus. Ut propior stetit  
 Iove natus: antro sedit incertus canis,  
 Et uterque timuit. Ecce! latratu gravi  
 Loca muta terret; sibilat totos minax  
 795 Serpens per armos; vocis horrendae fragor  
 Per ora missus terna felices quoque  
 Exterret umbras. Solvit a laevâ feros  
 Tunc ipse rictus, et Cleonaeum caput  
 Opponit, ac se tegmine ingenti clepit;  
 800 Victrice magnum dextera robur gerens

Huc nunc et illuc verbere adsiduo rotat,  
 Ingeminat ictus. Domitus infregit minas  
 Et cuncta lassus capita submisit canis,  
 Antroque toto cessit. Extimuit sedens  
 Uterque solio dominus, et duci iubet; 805  
 Me quoque petenti munus Alcidae dedit.  
 Tunc gravia monstri colla permulcens manu  
 Adamante texto vinxit. Oblitus sui  
 Custos opaci pervigil regni canis  
 Componit aures timidus, et patiens trahi, 810  
 Herumque fassus, ore submisso obsequens,  
 Utrumque cauda pulsat anguifera latus.  
 Postquam est ad oras Taenari ventum, et nitor  
 Percussit oculos lucis ignotae bono,  
 Resumit animos vinctus; et vastas furens 815  
 Quassat catenas; pene victorem abstulit,  
 Pronumque retro vexit et movit gradu.  
 Tunc et meas respexit Alcides manus:  
 Geminis uterque viribus tractum canem,  
 Ira furentem et bella tentantem irrita, 820  
 Intulimus orbi. Vidit ut clarum aethera,  
 Et pura nitidi spatia conspexit poli,  
 [Oborta nox est, lumina in terram dedit,]  
 Compressit oculos et diem invisum expulit  
 Aciemque retro flexit, atque omni petit 825  
 Cervice terram; tum sub Herculea caput  
 Abscondit umbra.

Densa sed laeto venit  
 Clamore turba, frontibus laurum gerens,  
 Magnique meritas Herculis laudes canit.

CHORUS THEBANORUM.

*Chorus Herculis victoriam ex inferis reportatam canit, et  
 ceteras illius laudes admiscet.*

Natus Eurystheus properante partu 830

lusserat mundi penetrare fundum:  
Deerat hoc solum numero laborum,  
Tertiae regem spoliare sortis.  
Ausus est coecos aditus inire;

- 835 Ducit ad Manes via qua remotos  
Tristis, et silva metuenda nigra, †  
Sed frequens magna comitante turba.  
Quantus incedit populus per urbes.  
Ad novi ludos avidus theatri:

- 840 Quantus Elëum ruit ad Tonantem,  
Quinta cum sacrum revocavit aestas;  
Quanta, cum longae redit hora nocti,  
Crescere et somnos cupiens quietos  
Libra Phoebeos tenet aequa currus,

- 845 Turba secretam Cererem frequentat,  
Et citi tectis properant relictis  
Attici noctem celebrare mystae:  
Tanta per campos agitur silentes  
Turba; pars tarda: gradiens senecta

- 850 Tristis, et longa satiata vita;  
Pars adhuc currit melioris aevi,  
Virgines nondum thalamis iugatae,  
Et comis nondum positis ephebi,  
Matris et numen modo doctus infans.

- 855 His datum solis, minus ut timerent,  
Igne praelato relevare noctem:  
Ceteri vadunt per opaca tristes;  
Qualis est nobis animus, remota  
Luce cum moestus sibi quisque sentit

- 860 Obrutum tota caput esse terrae  
Stat chaos densum tenebraeque turpes,  
Et color noctis malus, ac silentis  
Otium mundi vacuaeque nubes.  
Sera nos illo referat senectus!

- 865 Nemo ad id sero venit, unde nunquam,  
Cum semel venit, poterit reverti.

Quid iuvat durum properare fatum?  
 Omnis haec magnis vaga turba terris  
 Ibit ad Manes, facietque inertī  
 Vela Cocyto. Tibi crescit omne,  
 Et quod Occasus videt, et quod Ortus:  
 Parce venturis: tibi, Mors, paramur.  
 Sis licet seguis: properamus ipsi.  
 Prima quae vitam dedit hora, carpit.  
 Thebis laeta dies adest: 870  
 Aras tangite supplices!  
 Pingues caedite victimas!  
 Permixtae maribus nurus  
 Solemnes agitent choros!  
 Cessent deposito iugo 880  
 Arvi fertilis incolae!  
 Pax est Herculeae manu  
 Auroram inter et Hesperum  
 Et qua sol medium tenens  
 Umbras corporibus negat. 885  
 Quodcumque adluitur solum  
 Longo Tethyos ambitu,  
 Alcidae domuit labor.  
 Transvectus vada Tartari,  
 Pacatis redit Inferis: 890  
 Iam nullus superest timor  
 Nil ultra iacet Inferos.  
 Stantes, sacrificus, comas  
 Dilecta tege populo!

---

## ACTUS QUARTUS.

HERCULES, THESEUS, AMPH-  
TRYON, MEGARA.

*Hercules a caede Lyci reversus advocatis diis sacra factur-  
us in furorem vertitur, et suam uxorem cum liberis occidit.  
deinde in somnum labitur.*

- 895 HERC. Ultrice dextra fusus adverso Lycus  
Terram cecidit ore; tum quisquis comes  
Fuerat tyranni, iacuit et poenae comes  
Nunc sacra patri victor et Superis feram  
Caesisque meritas victimis aras colam.
- 900 Te, te, laborum socia et adiutrix, precor,  
Belligera Pallas, cuius in laeva ciet  
Aegis feroces ore saxifico minas!  
Adsit Lycurgi domitor et rubri maris,  
Tectam virenti cuspidem thyrso gerens;
- 905 Geminumque numen, Phoebus et Phoebi soror,  
Soror sagittis aptior, Phoebus lyrae;  
Fraterque quisquis incolit coelum meus, III 139  
Non ex noverca frater, huc adpellite  
Greges opimos! Quidquid Indorum seges,
- 910 Arabesque odoris quidquid arboribus legunt,  
Conferte in aras: pinguis exundet vapor.  
Populea nostras arbor exornet comas;  
Te ramus oleae fronde gentili tegat,  
Theseu. Tonantem nostra adorabit manus;
- 915 Tu conditores urbis, et silvestria  
Trucis antra Zethi, nobilis Dirce aquae,  
Laremque regis advenae Tyrium coles.  
Date tura flammis! AMPH. Gnate, manantes prius  
Manus cruenta caede et hostili expia.
- 920 HERC. Utinam cruorem capitis invisi deis  
Libare possem! Gravior nullus liquor

Tinxisset aras: victima haud ulla amplior  
 Potest magisque opima mactari Iovi,  
 Quam rex iniquus. AMPH. Finiat genitor tuos  
 Opta labores; detur aliquando otium 925  
 Quiesque fessis. HERC. Ipse concipiam preces  
 Iove meque dignas. Stet suo coelum loco  
 Tellusque et aether; astra inoffensos agant  
 Aeterna cursus; alta pax gentes alat;  
 Ferrum omne teneat ruris innocui labor, 930  
 Ensesque lateant; nulla tempestas fretum  
 Violenta turbet; nullus irato Iove  
 Exiliat, ignis; nullus hiberna nive  
 Nutritus agros amnis eversos trahat;  
 Venena cessent: nulla nocituro gravis 935  
 Succo tumescat herba; non saevi ac truces  
 Regnent tyranni. Si quod etiamnum est scelus  
 Latura tellus, properet; et si quod parat  
 Monstrum, meum sit. Sed quid hoc? Medium diem  
 Cinxere tenebrae; Phoebus obscuro meat 940  
 Sine nube vultu! Quis diem retro fugat,  
 Agitque in ortus? unde nox atrum caput  
 Ignota profert? unde tot stellae polum  
 Implent diurnae? Primus en! noster labor  
 Coeli refulget parte non minima, Leo, 945  
 Iraque totus fervet et morsus parat.  
 Iam rapiet aliquod sidus: ingenti minax  
 Stat ore, et ignes efflat, et rutilat, iubam  
 Cervice iactans. Quidquid autumnus gravis  
 Hiemsque gelido frigida spatium refert, 950  
 Uno impetu transiliet, et verni petet  
 Frangetque Tauri colla. AMPH. Quod subitum  
 hoc malum est?  
 Quo, gnate, vultus huc et huc acres refers,  
 Acieque falsum turbida coelum vides?  
 HERC. Perdomita tellus, tumida cesserunt freta; 955  
 Inferna nostros regna sensere impetus:  
 SEN. TRAG. C

Immune coelum est, dignus Alcidae labor.  
In alta mundi spatia sublimis ferar,  
Petatur aether: astra promittit pater:

960 Quid, si negaret? Non capit terra Herculem,  
Tandemque Superis reddit. En! ultro vocat  
Omnis deorum coetus, et laxat fores,  
Una vetante. Recipis, et reseras polum,  
An contumacis ianuam mundi traho?

965 Dubitatur etiam? Vincula Saturno exuam,  
Contraque patris impii regnum impotens  
Avum resolvam! hella Titanes parent  
Me duce furentes! saxa cum silvis feram,  
Rapiamque dextra plena Centauris iuga!

970 Iam monte gemino limitem ad Superos agam!  
Videat sub Ossa Pelion Chiron auum;  
In coelum Olympus, tertio positus gradu,  
Perveniet, aut mittetur. AMPH. Infandos procul  
Averte sensus; pectoris sani parum,

975 Magni tamen, compesce dementem impetum.  
HERC. Quid hoc? Gigantes arma pestiferi movent  
Profugit umbras Tityos, ac, lacerum gerens  
Et inane pectus, quam prope a coelo stetit!  
Labat Cithaeron, alta Pallene tremit,

980 Macetumque Tempe. Rapuit hic Pindi iuga;  
Hic rapuit Oeten; saevit horrendum Mimas;  
Flammifera Erinnys verberare excusso sonat,  
Rogisque adustas propius ac propius sudes  
In ora tendit; saeva Tisiphone, caput

985 Serpentibus vallata, post raptum canem  
Portam vacantem clausit opposita face. —  
Sed ecce! proles regis inimici latet,  
Lyci nefandum semen! Inviso patri  
Haec dextra iam vos reddet! Exentiat leves

990 Nervus sagittas! Tela sic mitti decet  
Herculeae. AMPH. Quo se coecus impegit furor?  
Vastum coactis flexit arcum cornibus,

Pharetramque solvit; stridet emissæ impetu  
 Arundo: medio spiculum collo fugit  
 Vulnere relicto. **HERC.** Ceteram prolem eruum 995  
 Omnesque latebris. Quid moror? maius mihi  
 Bellum Mycenis restat: ut Cyclopea  
 Eversa manibus saxa nostris concidant  
 Huc eat et illuc aula disiecto abluce,  
 Rumpatque postes; columen impulsu labet! — 1000  
 Perlucet omnis regia: hic video abditum  
 Natum scelesti patris! **AMPH.** Ea, blandas manus  
 Ad genua tendens, voce miseranda rogat!  
 Scelus nefandam, triste, et adspectu horridum:  
 Dextra precantem rapuit, et circa furens 1005  
 Bis ter rotatum misit; ast illi caput  
 Sonuit; cerebro tecta disperso madent.  
 At misera, parvum protegens gnatum sinu,  
 Megara furenti similis e latebris fugit.  
**HERC.** Licet Tonantis profuga condaris sinu, 1010  
 Petet undecunque temet hæc dextra, et feret.  
**AMPH.** Quo, misera, pergis? quam fugam aut late-  
 bram petis?  
 Nullus salutis Hercule infesto est locus:  
 Amplexere ipsum potius et blanda prece  
 Lenire tenta. **MEG.** Parce iam, coniux, precor! 1015  
 Agnosce Megaram! Gnatus hic vultus tuos  
 Habitusque reddit. Cernis, ut tendat manus?  
**HERC.** Teneo novercam! Sequere! da poenas  
 mihi,  
 Iugoque pressum libera turpi Iovem!  
 Sed ante matrem parvulum hoc monstrum oc-  
 cidat. 1020  
**MEG.** Quo tendis, amens? sanguinem fundes  
 tuum?  
**AMPH.** Pavefactus infans igneo vultu patris  
 Perit ante vulnus: spiritum eripuit timor.  
 In coniugem nunc clava libratur gravis.



- 1025 **Perfregit ossa; corpori trunco caput**  
**Abest, nec usquam est. Cernere hoc audes, nimis**  
**Vivax senectus? Si piget luctus, habes**  
**Mortem paratam. Pectus in tela indue;**  
**Vel stipitem istum, caede monstrorum illitum,**
- 1030 **Converte: falsum ac nomini turpem tuo**  
**Remove parentem, ne tuae laudi obstrepat.**  
**THES. Quo te ipse, senior, obvium morti ingeris?**  
**Quo pergis amens? Profuge et obtectus late,**  
**Unumque manibus aufer Herculeis scelus.**
- 1035 **HERC. Bene habet: pudendi regis excisa est do-**  
**mus.**  
**Tibi hunc dicatum, maximi coniux Iovis,**  
**Gregem cecidi. Vota persolvi libens**  
**Te digna; et Argos victimas alias dabit.**  
**AMPH. Nondum litasti, gnate: consummas sacrum,**
- 1040 **Stat, ecce, ad aras hostia; exspectat manum**  
**Cervice prona; praebeo, occurro, insequor:**  
**Macta! Quid hoc est? Errat acies luminum,**  
**Visusque moeror hebetat. An video Herculis**  
**Manus trementes? Vultus in somnum cadit,**
- 1045 **Et fessa cervix capite submisso labat;**  
**Flexo genu iam totus ad terram ruit,**  
**Ut caesa silvis ornus, aut portus mari**  
**Datura moles. Vivis, an leto dedit**  
**Idem, tuos qui misit ad mortem, furor?**
- 1050 **Sopor est: reciprocos spiritus motus agit.**  
**Detur quieti tempus: ut somno gravi**  
**Vis victa morbi pectus oppressum levet.**  
**Removete, famuli, tela, ne repetat furens.**

## CHORUS THEBANORUM.

*Deos, sidera et elementa, quae lymphatis, lunaticis et mente captis dominantur, in luctum, commiserationem et auxilium Hercules Chorus advocat; somnum, qui furorē sedare solet, precatur, ut gravi sopore pressum Herculem menti restituat; pueros denique caesos deflet.*

Lugeat aether, magnusque parens  
 Aetheris alti, tellusque ferax, 1055  
 Et vaga ponti mobilis unda  
 Tuque ante omnes, qui per terras  
 Tractusque maris fundis radios,  
 Noctemque fugas ore decoro,  
 Fervide Titan! Obitus pariter 1060  
 Tecum Alcides vidit et ortus,  
 Novitque tuas utrasque domos.  
 Solvite tantis animum monstribus,  
 Solvite, Superi! rectam in melius  
 Flectite mentem! tuque, o domitor 1065  
 Somne malorum, requies animi,  
 Pars humanae melior vitae,  
 Volucer, matris genus Astraeae,  
 Frater durae languide Mortis,  
 Veris miscens falsa, futuri 1070  
 Certus et idem pessimus auctor,  
 Pater o rerum, portus vitae, III. 10. 4  
 Lucis requies, noctisque comes,  
 Qui par regi famuloque venis:  
 Placidus fessum lenisque fove 1075  
 Pavidum leti genus humanum  
 Cogis longam discere mortem:  
 Preme devictum torpore gravi.  
 Sopor indomitos adliget artus;  
 Nec torva prius pectora linquat,  
 Quam mens repetat pristina cursum. III. 2. 3 4 1080  
 En, fusus humi saeva feroci

- Corde volutat somnia (nondum est  
Tanti pestis superata mali),  
1085 Clavaeque gravi lassum solitus  
Mandare caput, quaerit vacua  
Pondera dextra, motu iactans  
Brachia vano, nec adhuc omnes  
Expulit aestus; sed ut ingenti  
1090 Vexata Noto servat longos  
Unda tumultus, et iam vento  
Cessante tumet. Pelle insanos  
Fluctus animi: redeat pietas  
Virtusque viro. Vel sit potius  
1095 Mens vesano concita metu;  
Error coecus, qua coepit, eat.  
Solutus te iam praestare potest  
Furor insontem. Proxima puris  
Sors est manibus nescire nefas.  
1100 Nunc Herculeis percussa sonent  
Pectora palmis; mundum solitos  
Ferre lacertos verbera pulsent  
Victrice manu: gemitus vastos  
Audiat aether, audiat atri  
1105 Regina poli, vastisque ferox  
Qui colla gerit vineta catenis,  
Imo latitans Cerberus antro;  
Resonet moestum clamore chaos,  
Lateque patens unda profundum,  
1110 Et, qui melius tua tela tamen  
Senserat, aër.  
Pectora tantis obsessa malis  
Non sunt ictu ferienda levi:  
Uno planctu tria regna sonent.  
1115 Et tu, collo, decus ac telum,  
Suspensa diu, fortis arundo,  
Phaetraeque graves, date saeva fero  
Verbera tergo; caedant humeros

## HERCULES FURENS. ACT. IV. 39

Robora fortes, stipesque potens  
 Duris oneret pectora nodis; 1120  
 Plangant tantos arma dolores.  
 Non, vos, patriae laudis comites,  
 Ulti saeves vulnere reges;  
 Non Argiva membra palaestra  
 Flectere docti, fortes caestu 1125  
 Fortesque manu; iam tamen ausi  
 Telum Scythicis leve corytis  
 Missum certa librare manu, [ 1127 7. . .  
 Tutosque fuga figere cervos,  
 Nondumque ferae terga iubatae, 1130  
 Ite ad Stygios, umbrae, portus,  
 Ite, innocuae, quas in primo  
 Limine vitae scelus oppressit  
 Patriusque furor!  
 Ite, infaustum genus, o pueri 1135  
 Noti per iter triste laboris!  
 Ite, iratos visite reges!

## ACTUS QUINTUS.

*HERCULES, AMPHITRYON, THESEUS.*

*Hercules exspectatus et menti restitutus, postquam suos a se interfectos comperit, manus sibi inferre parat; patris precibus victus sibi parcat, Athenasque Thesei consilio purgandus proficiscitur.*

Quis hic locus, quae regio, quae mundi plaga?  
 Ubi sum? sub ortu solis, an sub cardine  
 Glacialis Ursae? numquid Hesperii maris 1140  
 Extrema tellus hunc dat Oceano modum?  
 Quas trahimus auras? quod solum fesso subest?  
 Certe rediimus. Unde prostrata a domo

- Video cruenta corpora? an nondum exiit  
 1145 Simulacra mens inferna? Post reditus quoque  
 Oberrat oculos turba feralis meos.  
 Pudet fateri: paveo nescio quid; mihi  
 Nescio quod animus grande praesagit malum.  
 Ubi est parens? ubi illa natorum grege  
 1150 Animosa coniux? cur latus laevum vacat  
 Spolio leonis? quonam abit tegimen meum,  
 Idemque somno mollis Herculeo torus?  
 Ubi tela? ubi arcus? arma quis vivo mihi  
 Detrahare potuit? spolia quis tanta abstulit?  
 1155 Ipsumque quis non Herculis somnum horruit?  
 Libet meum videre victorem, libet!  
 Exsurge, Virtus, quem novum coelo pater  
 Genuit relicto; cuius in foetu stetit  
 Nox longior, quam nostra! — Quod cerno nefas?  
 1160 Gnati cruenta caede confecti iacent:  
 Peremta coniux. Quis Lycus regnum obtinet,  
 Quis tanta Thebis scelera moliri ausus est  
 Hercule reverso? Quisquis Ismeni loca,  
 Actaea quisquis arva, qui gemino mari  
 1165 Pulsata Pelopis regna Dardanii colis,  
 Succurre! saevae cladis auctorem indica!  
 Ruat ira in omnes: hostis est, quisquis mihi  
 Non monstrat hostem. Victor Alcidae, lates?  
 Procede, seu tu vindicas currus truces  
 1170 Thracis cruenti: sive Geryonae pecus,  
 Libyaeve dominos! nulla pugnandi mora est.  
 En, nudus adsto! vel meis armis licet  
 Petas inermem. Cur meos Theseus fugit  
 Paterque vultus? ora cur condunt sua?  
 1175 Differte fletus! Quis meos dederit neci  
 Omnes simul, profare! — Quid, genitor, siles?  
 At tu ede, Theseu; sed tua, Theseu, fide.  
 Uterque tacitus ora pudibunda obtegit,  
 Furtimque lacrimas fundit. In tantis malis

Quid est pudendum? numquid Argivae impotens 1180  
 Dominator urbis, numquid infestum Lyci  
 Pereuntis agmen clade nos tanta obruit?  
 Per te meorum facinorum laudem precor,  
 Genitor, tuique nominis semper mihi  
 Numen secundum: fare, quis fudit domum? 1185  
 Cui praeda iacui? AMPH. Tacita sic abeant  
 mala.

HERC. Ut inultus ego sim? AMPH. Saepe vindicta obfuit.

HERC. Quisquamne segnis tanta toleravit mala?

AMPH. Maiora quisquis timuit. HERC. His etiam, pater,

Quidquam timeri maius aut gravius potest? 1190  
 AMPH. Cladis tuae pars ista, quam nosti, quota est?

HERC. Miserere, genitor! supplices tendo manus.

Quid hoc? manus refugit. Hic errat scelus.

Unde hic cruor? Quid? illa puerili madens

Arundo leto? — Tincta Lernaea nece 1195

Iam tela video nostra: non quaero manum:

Quis potuit arcum flectere, aut quae dextera

Sinuare nervum iusta cedentem mihi?

Ad vos revertor, genitor. Hoc nostrum est scelus?

Tacuere: nostrum est. AMPH. Luctus est istic tuus, 1200

Crimen novercae; casus hic culpa caret.

HERC. Nunc parte ab omni, genitor, iratus tona,

Oblite nostri; vindica sera manu

Saltem nepotes; stelliger mundus sonet,

Flammasque et hic et ille iaculetur polus; 1205

Rupes ligatum Caspiae corpus trahant

Atque ales avida! cur Promethei vacant

Scopuli? Paretur vertice immenso feras

Volucresque pascens Caucasi abruptum latus,

Nudumque silvis! illa, quae pontum Scythen, 1210

Symplegas, arctat, hinc et hinc vinctas manus

**1215 Ego inquieta montium iaceam mora.**

**Cruore corpus impio sparsum cremo?**

**Sic, sic agendum est: Inferis reddam Herculem.**

АМФН. Nondum tumultu pectus attonito caret.

**1220 Mutavit iras, quodque habet proprium furor,**

**In se ipse saevit. HERC.** Dira Furiarum loca

**Et Inferorum carcer et sonti plaga**

**Decreta turbæ, et si quod exilium latet**

**Ulterius Erebo, Cerbero ignotum et mihi:**

**1225 Huc me abde tellus! Tartari ad finem ultimum**

**Mansurus ibo. Pectus o nimium ferum!**

**Quis vos per omnem, liberi, sparsos domum**

**Deflere digne poterit? hic durus malis**

**Lacrimare vultus nescit. Huc ensem date,**

**1230 Date huc sagittas, stipitem huc vastum date:**

**Tibi tela frangam nostra; tibi nostros, puer,**

**Rumpemus arcus, ac tuis stipes gravis**

**Ardebit umbris; ipsa Lernaeis frequens**

**Pharetra telis in tuos ibit rogos.**

**1235 Dent arma poenas! vos quoque infaustas meis**

**Cremabo taēdis, o novercālēs manus!**

**THE S. Quis nomen unquam sceleris errori ad-**  
**didit.**

**HERC. Saepe error ingens sceleris obtinuit locum.**

**THE S. Nunc Hercule opus est: perfer hanc molem mali.**

**1240 HERC. Non sic furore cessit extinctus pudor,**

**Populos ut omnes impio adspectu fugem.**

**Arma, arma, Theseu, flagito propere mihi**

**Subtracta reddi. Sana si mens est mihi;**

*Act. I 9 - fine Act. I*

**HERCULES FURENS. ACT. V. 43**

**Referte manibus tela; si remanet furor:**  
**Pater, recede; mortis inveniam viam. 1245**

**AMPH.** Per sancta generis sacra, per ius nominis  
 Utrumque nostri, sive me alto rem vocas  
 Seu tu parentem, perque venerandos piis  
 Canos: senectae parce desertae, precor,  
 Annisque fessis! unicum lapsae domus 1250

**Firmamen, unum lumen adflicto malis**  
**Temet reserva! Nullus ex te contigit**  
**Fructus laborum: semper aut dubium mare,**  
**Aut monstra timui; quisquis in toto farit**  
**Rex saevus orbe, manibus aut aris nocens, 1255**

**A me timetur; semper absentis pater**  
**Fructum tui tactumque et adspectum peto.**

**HERC.** Cur animam in ista luce detineam amplius  
 Morerque, nihil est: cuncta iam amisi bona,

**Mentem, arma, famam, coniugem, gætos, manus; 1260**  
**Etiam furorem: nemo polluto queat**

**Animo mederi: morte sanandum est scelus.**

**AMPH.** Perimes parentem? **HERC.** Facere ne  
 possim, occidam.

**AMPH.** Genitore coram? **HERC.** Cernere hunc  
 docui nefas.

**AMPH.** Memoranda potius omnibus facta intuens 1265  
 Unius a te criminis veniam pete.

**HERC.** Veniam dabit sibi ipse, qui nulli dedit!

**Laudanda feci iussus; hoc unum meum est.**

**Succurre, genitor, sive te pietas movet,**  
**Seu triste fatum, sive violatae decus 1270**

**Virtutis: effer arma! vincatur mea**

**Fortuna dextra. THEB.** Sant quidem patriae  
 preces

**Satis efficaces; sed tamen nostro quoque**

**Moveare fletu. Surge, et adversa impetu**

**Perfringe solito! nunc tuum nulli imparem 1275**

**Animum malò resume! nunc magna tibi**



Virtute agendum est: Herculem irasci veta.  
 HERC. Si vivo: feci scelera; si morior: tuli.  
 Purgare terras propero: iamdudum mihi  
 Monstrum impium saevumque et immite ac fe-  
 rum

1280

Oberrat. Agedum, dextra, conare adgredi  
 Ingens opus, labore bisseño amplius! —

*Definitive*

Ignava, cessas, fortis in pueros modo  
 Pavidasque matres? Arma nisi dantur mihi,  
 1285 Aut omne Pindi Thracis exscindam nemus,  
 Bacchique lucos, et Cithaeronis iuga  
 Mecum cremabo; aut tota cum domibus suis  
 Dominisque tecta, cum deis templa omnibus  
 Thebana, supra corpus excipiam meum,

1290 Atque urbe versa condar; et, si fortibus  
 Leve pondus humeris moenia immissa incident,  
 Septemque opertus non satis portis premar:  
 Onus omne, media parte quod mundi sedet,  
 Dirimitque Superos, in meum vertam caput!

1295 AMPH. Reddo arma. HERC. Vox est digna ge-  
 nitore Herculis.

Hoc, en, peremptus spiculo cecidit puer...

AMPH. Hoc luno telum manibus emisit tuis

HERC. Hoc nunc ego utar. AMPH. Ecce, quam  
 miserum metu

Cor palpitat, corpusque sollicitum ferit!

1300 HERC. Aptata arundo est. AMPH. Ecce, iam  
 facies scelus

Volens sciensque! HERC. Pande: quid fieri  
 iubes?

AMPH. Nihil rogamus; noster in tuto est dolor.

Gnatum potes servare tu solus mihi,

Eripere nec tu. Maximum evasi metum.

1305 Miserum haud potes me facere, felicem potes.  
 Sic statue, quidquid statuis, ut causam tuam  
 Famamque in arto stare et ancipiti scias.

Aut vivis, aut occidis: hanc animam levem,  
 Fessamque senio, nec minus quassam malis,  
 In ore primo teneo. — Tam tarde patri 1310  
 Vitam dat aliquis? Non feram ulterius moram:  
 Letale ferro pectus impresso induam!  
 Hic, hic iacebit Herculis sani scelus.  
 HERC. Iam parce, genitor, parce! Iam revoca  
 manum!

Succumbe, virtus! perfer imperium patris! 1315  
 Eat ad labores hic quoque Herculeos labor  
 Vivamus. Artus adleva adflictos solo,  
 Theseu, parentis: dextra contactus pios  
 Scelerata refugit. AMPH. Hanc manum ample-  
 ctor libens;

Hac nixus ibo; pectori hanc aegro admovens 1320  
 Pellam dolores. HERC. Quem locum profugus  
 petam?

Ubi me recondam, quave tellure obruar?  
 Quis Tanais, aut quis Nilus, aut quis Persica  
 Violentus unda Tigris, aut Rhenus ferox, 1325  
 Tagusve Ibera turbidus gaza fluens,

Abluere dextram poterit? Arctoum licet  
 Maeotis in me gelida transfundat mare,  
 Et tota Tethys per meas currat manus:  
 Haerebit altum facinus. In quas impius  
 Terras recedes? ortum an occasum petes? 1330  
 Ubique notus perdidit exilio locum.

Me refugit orbis; astra transversos agunt  
 Obliqua cursus; ipse Titan Cerberum  
 Meliore vultu vidit. O fidum caput,  
 Theseu, latebram quaere longinquam, abditam; 1335  
 Quoniamque semper sceleris alieni arbiter  
 Amas nocentes: gratiam meritis refer  
 Vicemque nostris: redde me infernis, precor,  
 Umbris reductum, meque subiectum tuis

46 L. ANN. SENECA. HERC. FUR. ACT. V.

1340 Restitue vinculis! Ille me abscondet locus.

Sed et ille novit. THE S. Nostra te tellus manet:

Illic solutam caede Gradivus manum

Restituit armis. Illa te, Alcida, vocat,

Facere innocentes terra quae Superos solet.

*he-oh my  
allegorizing  
about here.*

*The 'Encler' style indeed.*

# T H Y E S T E S.

---

## DRAMATIS PERSONAE.

*THYESTES.*

*ATREUS.*

*TANTALUS.*

*MEGAERA.*

*PLISTHENES THYESTIS F.*

*CHORUS SENUM MYCENAEORUM.*

*TANTALUS THYESTIS F.* } Mutae personae.  
*ALIUS THYESTIS F.* }

*SATELLES, NUNCIUS.*

---

## ARGUMENTUM.

Alternis annis regnandi vices pacti Atreus et Thyestes, Pelopis ex Hippodamia filii, Argis imperabant. Thyestes, adiuuante Aërope, fratris uxore, quam in adulterium pellexerat, aureum arietem, in cuius possessione erat fatum regni, amovet, et male conscius in exilium abit. Atreus, evasisse dolens, missis suis filiis, velle se in gratiam redire simulat, oblata regni parte reditum illi persuadet. Tres Thyestis liberos, quos obsides acceperat, ad aras immolatos, partim assos, partim elixos patri nescienti epulandos apponit, mixtumque vino cruorem illi praebet. Sub finem nefandi convivii (quod Sol, ne videret, refugit) capita illi et manus filiorum ostendit, quasque dapes absumserit, narrat, insultans fratris luctui, dolori et imprecationibus.

---

## ALIUD ARGUMENTUM

### *HIERONYMI BALBI.*

- Sedibus expulsus patriis regnoque Thyestes  
Dignas infando pendebat crimine poenas:  
Namque olim, furiis foedoque incensus amore,  
Fraternum invasit thalamum et vetitos hymenaeos.
- 5 Necdum Atrei mens dira odiis expleta quierat.  
Saevit, et ingentes acuit dolor improbus iras;  
Accinctusque dolis fratrem remeare Mycenae  
Iussit, et in regno simulata pace locavit.  
Proh scelus indignum! parvos mactare nepotes
- 10 Sustinet, et patriis epulandos ponere mensis.  
Ille amens mandit natorum dentibus artus,  
Immixtumque haurit cognato sanguine Bacchum.  
Haec ne monstra pio spectaret lumine Phoebus,  
Adversos Graio deflexit ab orbe iugales.
-

## ACTUS PRIMUS.

### UMBRA TANTALI, MEGAERA.

*Adducitur ab Inferis Tantalus a Furia, cogiturque miscere nefaria odia inter suos ex Pelope nepotes Atreum et Thyestem.*

TANT. Quis me Inferorum sede abinfausta extrahit,

Avido fugaces ore captantem cibos?  
Quis male deorum Tantalò visas domos  
Ostendit iterum? Peius inventum est siti  
Arente in undis aliquid, et peius fame  
Hiante semper? Sisyphi numquid lapis  
Gestandus humeris lubricus nostris venit?  
Aut membra celeri differens cursu rota?  
Aut poena Tityi, qui specu vasto patens  
Visceribus atras pascit effossis aves,  
Et nocte reparans, quidquid amisit die,  
Plenum recenti pabulum monstro iacet?  
In quod malum transcribor? O quisquis nova  
Supplicia functis durus umbrarum arbiter  
Disponis, addi si quid ad poenas potest,  
Quod ipse custos carceris diri horreat,  
Quod moestus Acheron paveat, ad cuius metum  
Nos quoque tremamus, quaere: iam nostra subit  
E stirpe turba, quae suum vincat genus,  
Ac me innocentem faciat, et inausa audeat.  
Regione quidquid impia cessat loci,  
Complebo; nunquam stante Pelopea domo  
Minos vacabit. MEG. Perge, detestabilis  
Umbra, et penates impios furiis age!  
Certetur omni scelere, et alterna vice  
Stringantur enses. Ne sit irarum modus

SEN. TRAG.

D

5

10

40

15

20

25

# L. ANNAEI SENECAE

50

*Traduciansem  
with a ven-  
geance. This is  
of 660 by 660  
of 660 by 660*

Pudorve; mentes caecus instiget furor;  
Rabies parentum duret, et longum nefas:  
Eat in nepotes; nec vacet cuiquam vetus  
Odisse crimen: semper oriatur novum,  
Nec unum in uno; dumque punitur scelus,  
Crescat. Superbis fratribus regna excidant,  
Repetantque profugos; dubia violentae domus  
Fortuna reges inter incertos labet;

- 5 Miser ex potente fiat, ex misero potens;  
Fluctuque regnum casus adsiduo ferat.  
Ob scelera pulsi, cum dabit patriam deus,  
In scelera redeant; sintque tam invisi omnibus  
Quam sibi. Nihil sit, ira quod vetitum putet:
- 40 Fratrem expavescat frater, et gnatum parens  
Gnatusque patrem; liberi pereant male  
Peius tamen nascentur; immineat viro  
Infesta coniux; bella trans pontum vehant;  
Effusus omnes irriget terras cruor,
- 45 Supraque magnos gentium exultet duces  
Libido victrix; impia stuprum in domo  
Levissimum sit fratris: et fas et fides  
Iusque omne pereat. Non sit a vestris malis  
Immune coelum. Cur micant stellae polo,
- 50 Flammaeque servant debitum mundo decus?  
Nox atra fiat! Excidat coelo dies!  
Misce penates; odia, caedes, funera  
Arcesse, et imple Tantalo totam domum!  
Ornetur altum columen, et lauro fores
- 55 Laetae virescant; dignus adventu tuo  
Splendescat ignis. Thracium fiat nefas  
Maiore numero. Dextra cur patrui vacat?  
Nondum Thyestes liberos deflet suos:  
Ecquando tollet? Ignibus iam subditis
- 60 Spument athena; membra per partes eant  
Discerpta; patruos polluat sanguis focos;  
Epulae instruantur. Non novi sceleris tibi

Conviva venies. Liberum dedimus diem,  
Tuamque ad ista solvimus mensas famem: II 5.5

Ieiunia exple; mixtus in Bacchum crûor  
Spectante te potetur. ~~laxari dapes.~~ 65

Quas ipse fugeres. ~~Siste!~~ quo praeceps ruis? addi...

TANT. Ad stagna et amnes et recedentes aquas,  
Labrisque ab ipsis arboris plenae fugas.

Abire in atrum carceris liceat mihi 70

Cubile; liceat, si parum videor miser,

Mutare ripas: alveo medius tuo,

Phlegethon, relinquer, igneo cinctus freto.

Quicumque poenas lege fatorum datas 75

Pati iuberis; quisquis exeso iaces

Pavidus sub antro, iamque venturi times

Montis ruinam; quisquis avidorum feros

Rictus leonum et dira Furiarum agmina

Implicitus horres; quisquis immissas face. 80

Semiustus abigis: Tantali vocem excipe

Properantis ad vos! credite experto mihi:

Amate poenas! Quando continget mihi

Effugere Superos? M. E. Ante perturba domum,

Inferque tecum proelia et ferri malum

Regibus amorem; concute insano ferum 85

Pectus tumultu. TANT. Me pati poenas decet,

Non esse poenam. Mittor, ut dirus vapor

Tellure rupta, vel gravem populis luem

Sparsura pestis. Ducam in horrendum nefas

Avus nepotes? Magne divorum parens 90

Nosterque, quamvis pudeat, ingenti licet

Taxata poena lingua crucietur loquax:

Nec hoc tacebo: moneo, ne sacra manus

Violate caede, neve furiali malo

Adspergite aras! Stabo et arcebo, scelus. 95

Quid ora terras verbere, et tortos ferox

Minaris angues? quid famem fixam intimis

Agitas medullis? Flagrat incensum, siti



Cor, et perustis flamma visceribus micat.

100 Sequor.

MEG. Hunc, o, furorem divide in totam domum!  
Sic, sic ferantur, et suum infensi invicem  
Sitiant cruorem! Sensit introitus tuos  
Domus, et nefando tota contactu horruit.

105 Actum est abunde. Gradere ad infernos specus  
Annemque notum: iam tuum moestae pedem  
Terrae gravantur. Cernis, ut fontes liquor  
Introrsus actus linquat, ut ripae vacent,  
Ventusque raras igneus nubes ferat?

110 Pallescit omnis arbor, ac nudus stetit  
Fugiente pomo ramus; et qui fluctibus  
Illinc propinquis Isthmos atque illinc fremit,  
Vicina gracili dividens terra vada,  
Longe remotos latus exaudit sonos.

115 Iam Lerna retro cessit, et Phoronides  
Latuere venae; nec suas profert sacer  
Alpheos undas, et Cithaeronis iuga  
Stant parte nulla cana, deposita nive,  
Timentque veterem nobilis Argi sitim.

120 En! ipse Titan dubitat, an iubeat sequi  
Cogatque habenis ire peritulum diem.

### CHORUS.

*Chorus ex senibus Mycenaeis vel Argivis constans (Argos enim cum Mycenis confundunt poetas) deos urbium in Peloponneso praesides, ut mala et scelera in domo Pelopis concepta et imminencia prohibeant avertantque, precatur, et Tantali impium facinus ac poenam canit.*

Argos de Superis si quis Achaicum  
Pisaeisque domos curribus inclitas,  
Isthmi si quis amat regna Corinthii

125 Et portus geminos et mare dissidens;  
Si quis Taygeti conspicuas nives,

Quas, cum Sarmaticus tempore frigido  
 In summis Boreas composuit iugis,  
 Aestas veliferis solvit Etesiiis  
 (Quem tangit gelido flumine lucidus 130  
 Alpheos, stadio notus Olympico):  
 Advertat placidum numen, et arceat,  
 Alternae scelerum ne redeant vices,  
 Neu succedat avo deterior nepos,  
 Et maior placeat culpa minoribus. 135  
 Tandem lassa feros exuat impetus  
 Siccæ progenies impia Tantalæ.  
 Peccatum satis est. Fas valuit nihil  
 Ad commune nefas. Proditus occidit  
 Deceptor domini Myrtilus, et fide 140  
 Vectus, qua tulerat, nobile reddidit  
 Mutato pelagus nomine. Notior  
 Nulla est Ionis fabula navibus.  
 Exceptus gladio parvulus impio  
 Dum currit patrium gnatus ad osculum, 145  
 Immatura focis victima concidit,  
 Divisusque tua est, Tantale, dextera;  
 Mensas ut strueres hospitibus deis.  
 Hos aeterna fames prosequitur cibos,  
 Hos aeterna sitis; nec dapibus feris 150  
 Decerni potuit poena decentior.  
 Stat lusus vacuo gutture Tantalus:  
 Impendit capiti plurima noxio  
 Phineis avibus præda fugacior;  
 Hinc illinc gravidis frondibus incubat 155  
 Et curvata suis foetibus, ac tremens  
 Adludit patulis arbor hiatibus.  
 Haec, quamvis avidus nec patiens morae,  
 Deceptus toties tangere negligit,  
 Obliquatque oculos, oraque comprimit, 160  
 Inclusisque famem dentibus adligat;  
 Sed tunc divitias omne nemus suas

- Demittit propius, pomaeque desuper  
 Insultant foliis mitia languidis,  
 165 Accenduntque famem, quae iubet irritas  
 Exercere manus. Has ubi protulit,  
 Et falli libuit: totus in arduum  
 Autumnus rapitur silvae mobilis.  
 Instat deinde sitis non fevior fame;  
 170 Qua cum percaluit sanguis et igneis  
 Exarsit facibus: stat miser obvios  
 Fluctus ore vocans, quos profugus latex  
 Avertit, sterili deficiens vado,  
 Conantemque sequi, deserit; hic bibit  
 175 Altum de rapido gurgite pulverem.
- 

## ACTUS SECUNDUS.

## ATREUS, SATELLES.

*Atræus, ulciscendi fratrem certus, de vindictæ ratione cum satellite deliberat, quem honesta consulentem non audit; impiam tandem et infandam ultionis rationem excogitat.*

- ATR. Ignave, iners, enervis, et (quod maximum  
 Probrum tyranno rebus in summis reor)  
 Inulte, post tot scelera, post fratris dolos  
 Fasque omne ruptum, questibus vanis agis  
 180 Iratus, Atreus? Fremere iam totus tuis  
 Debebat armis orbis, et geminum mare  
 Utrimque classes agere; iam flammis agros  
 Lucere et urbes decuit, ac strictum undique  
 Micare ferrum. Totâ sub nostro sonet  
 185 Argolica tellus equite; non silvæ tegant  
 Hostem, nec altis montium structae iugis  
 Arces; relictis bellicum totus canat  
 Populus Mycenis; quisquis invisum caput

Tegit ac tuetur, clade funesta occidat.  
Haec ipsa pollens inclyti Pelopis domus 190  
Ruat vel in me, dummodo in fratrem ruat.

Age, anime, fac, quod nulla posteritas probet,  
Sed nulla taceat! aliquod audendum est nefas  
Atrox, cruentum; tale, quod frater meus  
Suum esse malit. Scelera non ulcisceris, 195

Nisi vincis. — Ecquid esse tam saevum potest,  
Quod superet illum? numquid ablectus iacet?  
Numquid secundis patitur in rebus modum,  
Fessis quietem? Novi ego ingenium viri  
Indocile: flecti non potest, frangi potest. 200

Proin, antequam se firmet aut vires paret,  
Petatur ultro: ne quiescentem petat.  
Aut perdet, aut peribit; in medio est scelus  
Positum occupanti. SAT. Fama te populi nihil  
Adversa terret? ATR. Maximum hoc regni bo-  
num est, 205

Quod facta domini cogitur populus sui  
Tam ferre, quam laudare. SAT. Quos cogit metus  
Laudare, eosdem reddit inimicos metus.

At qui favoris gloriam veri petit,  
Animo magis quam voce laudari volet. 210

ATR. Laus vera et humili saepe contingit viro;  
Non nisi potenti falsa. Quod nolunt, veniunt.

SAT. Rex velit honesta: nemo non eadem volet.

ATR. Ubicunque tantum honesta dominantilicent,  
Precario regnatur. SAT. Ubi non est pudor, 215

Nec cura iuris, sanctitas, pietas, fides:

Instabile regnum est. ATR. Sanctitas, pietas, fides,

Privata bona sunt; qua fuvat, reges eant.

SAT. Nefas nocere vel malo fratri puta.

ATR. Fas est in illo, quidquid in fratre est nefas: 220

Quid enim reliquit crimine intactum, aut ubi  
Sceleri pepercit? Coniugem stupro abstulit,  
Regnumque furto. Specimen antiquum imperi

- Fraude est adeptus; fraude turbavit domum.
- 225 Est Pelopis altis nobile in stabulis pecus,  
 Arcanus aries, ductor opulenti gregis,  
 Cuius per omne corpus effuso coma  
 Dependet auro, cuius e tergo novi  
 Aurata reges sceptrā Tantalici gerunt.
- 230 Possessor huius regnat; hunc cunctae domus  
 Fortuna sequitur. Tuta seposita sacer  
 In parte carpit prata, quae claudit lapis,  
 Fatale saxeo pascuum muro tegens.  
 Hunc, facinus ingens ausus, adsumta in scelus
- 235 Consorte nostri perfidus thalami avehit.  
 Hinc omne cladis mutuae fluxit malum  
 Per regna trepidus exul erravit; mea  
 Pars nulla generis tuta ab insidiis vacat;  
 Corrupta coniux, imperi quassa est fides;
- 240 Domus aegra, dubius sanguis est; certi nihil  
 Nisi frater hostis. Quid stupes? Tandem incipe,  
 Animoque sume Tantalum, et Pelopem adspice.  
 Ad haec manus exempla poscuntur meae.  
 Profare, dirum qua caput mactem via!
- 245 S A T. Ferro peremtus spiritum inimicum exspuat.  
 A T R. De fine poenae loqueris; ego poenam volo.  
 Perimat tyrannus lenis; in regno meo  
 Mors impetratur. S A T. Nulla te pietas movet?  
 A T R. Excede, Pietas, si modo in nostra domo
- 250 Unquam fuisti! Dira Furiarum cohors  
 Discorsque Erinnyes veniat et geminas faces  
 Megaera quatiens; non satis magno meum  
 Ardet furore pectus; impleri iuvat  
 Maiore monstro. S A T. Quid novi rabidus struis?
- 255 A T R. Nil quod doloris capiat adsueta modum.  
 Nullum relinquam facinus, et nullum est satis.  
 S A T. Ferrum? A T R. Parum est. S A T. Quid ignis?  
 A T R. Etiamnum parum est.  
 S A T. Quonam ergo telo tantus utetur dolor?

**ATR.** Ipso Thyeste. **SAT.** Maius hoc ira est malum.  
**ATR.** Fateor. Tumultus pectora attonitus quatit, 260  
 Penitusque volvit; rapior, et quo nescio;  
 Sed rapior. Imo mugit e fundo solum,  
 Tonat dies serenus, ac totis domus  
 Ut fracta tectis crepuit, et moti lares  
 Vertere vultum: fiat hoc, fiat nefas, 265  
 Quod, di, timetis. **SAT.** Facere quid tandem paras?  
**ATR.** Nescio quid animus maius et solito amplius  
 Supraque fines moris humani tumet,  
 Instatque pigris manibus. Haud quid sit scio;  
 Sed grande quiddam est. Ita sit! hoc, anime, occu-  
 pa! 270  
 Dignum est Thyeste facinus, et dignum Atreo:  
 Uterque faciat. — Vidit infandas domus  
 Odrysia mensas. — Fateor, immane est scelus;  
 Sed occupatum: maius hoc aliquid dolor  
 Inveniat. Animum Daulis inspira parens, 275  
 Sororque! Causa est similis: adsiste, et manum  
 Impelle nostram! — Liberos avidus patēr  
 Gaudensque laceret, et suos artus edat.  
 Bene est! abunde est! hic placet poenae modus  
 Tantisper. Ubinam est? tam diu cur innocens 280  
 Versatur Atreus? Tota iam ante oculos meos  
 Imago caedis errat, ingesta orbitas  
 In ora patris. Anime, quid rursus times,  
 Et ante rem subsidis? Audendum est, age!  
 Quod est in isto scelere praecipuum nefas, 285  
 Hoc ipse faciet. **SAT.** Sed quibus captus dolis  
 Nostros dabit, perductus, in laqueos pedem?  
 Inimica credit cuncta. **ATR.** Non poterat capi,  
 Nisi capere vellet. Regna nunc sperat mea.  
 Hac spe minanti fulmen occurret Iovi; 290  
 Hac spe subibit gurgitis tumidi minas,  
 Dubiumque Libycae Syrtis intrabit fretum;  
 Hac spe, quod esse maximum retur malum,

- Fratrem videbit. S A T. Quis fidem pacis dabit?
- 295 Cui tanta credet? A T R. Credula est spes improba.  
Gnatis tamen mandata, quae patruo ferant,  
Dabimus: relictis exul hospitiiis vagus  
Regno ut miserias mutet, atque Argos regat,  
Ex parte dominus. Si nimis durus preces
- 300 Spernet Thyestes: liberos eius rudes  
Malisque fessos gravibus et faciles capi  
Praecommovebunt. Hinc vetus regni furor,  
Illinc egestas tristis ac durus labor,  
Quamvis rigentem tot malis subigent virum.
- 305 S A T. Iam tempus illi fecit aerumnas leves.  
A T R. Erras: maiorum sensus adcrevit die.  
Leve est miserias ferre, perferre est grave.  
S A T. Alios ministros consili tristis lege:  
Peiora iuvenes facile praecepta audiunt;
- 310 In patre facient, quidquid in patruo doces.  
Saepe in magistrum scelera redierunt sua.  
A T R. Ut nemo doceat fraudis et sceleris vias:  
Regnum docebit. Ne mali fiant, times?  
Nascuntur istud. Quod vocas saevum, asperum,
- 315 Agique dire credis et nimium impie,  
Fortasse et illic agitur. S A T. Hanc fraudem scient  
Gnati parari? Tacita tam rudibus fides  
Non est in annis; detegent forsitan dolos:  
Tacere multis discitur vitae malis.
- 320 Ipsosne, per quos fallere alium cogitas,  
Falles, ut ipsi crimine et culpa vacent?  
A T R. Quid enim necesse est liberos sceleri meo  
Inserere? Per nos odia se nostra explicent. —  
Male agis, recedis, anime! Si parcis tuis,
- 325 Parce et illi: consili Agamemnon mei  
Sciens minister fiat, et patri sciens  
Menelaus adsit. Prolis incertae fides  
Ex hoc petatur scelere. Si bella abnuunt  
Et gerere nolunt odia, si patrum vocant:

Pater est. Eatur. — Multa sed trepidus solet 330  
 Detegere vultus; magna nolentem quoque  
 Consilia produnt: nesciant, quanta rei  
 Fiant ministri. Nostra tu coepta occules.  
 SAT. Haud sum monendus: ista nostro in pectore  
 Fides timorque, sed magis claudet fides. 335

CHORUS.

*A dissidiis fratrum, qui ad tempus minas componunt, sumta occasione, Chorus regum ambitionem tacet, quis vere rex sit docet, vitam denique latentem collaudat.*

Tandem regia nobilis,  
 Antiqui genus Inachi,  
 Fratrum composuit minas.  
 Quis vos exagitat furor,  
 Alternis dare sanguinem 340  
 Et sceptrum scelere adgredi?  
 Nescitis, cupidi arcium,  
 Regnum quo iaceat loco.  
 Regem non faciunt opes,  
 Non vestis Tyriae color, II 4.1 345  
 Non frontis nota regiae,  
 Non auro nitidae fores:  
 Rex est, qui posuit metus  
 Et diri mala pectoris,  
 Quem non ambitio impotens I 1 350  
 Et nunquam stabilis favor  
 Vulgi praecipitis movet,  
 Non quicquid fodit Occidens, III 10.7  
 Aut unda Tagus aurea  
 Claro devehit alveo; 355  
 Non quicquid Libycis terit  
 Fervens area messibus;  
 Quem non concutiet cadens  
 Obliqui via fulminis,



- 360 Non Eurus rapiens mare,  
 Aut saevo rabidus freto  
 Ventosi tumor Adriae;  
 Quem non lancea militis,  
 Non strictus domuit chalybs;  
 365 Qui tuto positus loco,  
 Infra se videt omnia,  
 Occurritque suo libens  
 Fato, nec queritur mori.  
 Reges convenient licet,  
 370 Qui sparsos agitant Dahas,  
 Qui rubri vada litoris,  
 Et gemmis mare lucidum  
 Late sanguineum tenent,  
 Aut qui Caspia fortibus  
 375 Recludunt iuga Sarmatis;  
 Certet, Danubui vadum  
 Audet qui pedes ingredi,  
 Et (quocunque loco iacent)  
 Seres vellere nobiles:  
 380 Mens regnum bona possidet.  
 Nil ullis opus est equis;  
 Nil armis et inertibus  
 Telis, quae procul ingerit  
 Parthus, cum simulat fugas:  
 385 Admotis nihil est opus  
 Urbes sternere machinis,  
 Longe saxa rotantibus:  
 Rex est, qui metuit nihil  
 Rex est, qui cupiet nihil.  
 390 Hoc regnum sibi quisque dat.  
 Stet, quicunque volet, potens  
 Aulae culmine lubrico:  
 Me dulcis saturet quies  
 Obscuro positus loco,  
 395 Leni perfruar otio;

Nullis nota Quiritibus  
Aetas per tacitum fluat.  
Sic cum transierint mei  
Nullo cum strepitu dies,  
Plebeius moriar senex.  
Illi mors gravis incubat,  
Qui, notus nimis omnibus,  
Ignotus moritur sibi.

400

ACTUS TERTIUS.

THYESTES, PLISTHENES,

TANTALUS iunior et } Mutae personas  
FRATER tertius }

*Thyesti a fratre Atreo per huius filios revocato, redeuntique in patriam, non sine diffidentia ac mente malum praesagiente, revertendi fiduciam addunt ipsius filii.*

THY. Optata patriae tecta et Argolicas opes,  
Miserisque summum ac maximum exulibus bonum, 405  
Tractum soli natalis et patrios deos  
(Si sunt tamen di) cerno, Cyclopum sacras  
Turres, labore maius humano decus,  
Celebrata iuveni stadia, per quae nobilis  
Palmam paterno non semel curru tuli. 410  
Occurret Argos, populus occurret frequens;  
Sed nempe et Atreus. Repete silvestres fugas  
Saltusque densos potius et mixtam feris  
Similemque vitam! Clarus hic regni nitor  
Fulgore non est quod oculos falso auferat. 415  
Cum quod datur spectabis, et dantem adspice!  
Modo inter illa, quae putant cuncti aspera,  
Fortis fui laetusque; nunc contra in metus

- Revolvor, animus haeret ac nescio, cupio  
 420 Corpus referre, moveo nolentem gradum.  
 PLISTH. Pigro (quid hoc est?) genitor incessu  
 stupet,  
 Vultumque versat, seque in incerto tenet.  
 THY. Quid, anime, pendes, quidve consilium diu  
 Tam facile torques? Rebus incertissimis,  
 425 Fratri atque regno, credis, ac metuis mala  
 iam victa, iam mansueta, et aerumnas fugis  
 Bene collocatas? Esse iam miserum iuvat.  
 Reflecte gressum, dum licet, teque eripe!  
 PLISTH. Quae causa cogit, genitor, a patria gra-  
 dum  
 430 Referre visa? cur bonis tantis sinum  
 Subducis? Ira frater abiecta redit;  
 Partemque regni reddit, et lacerae domus  
 Componit artus, teque restituit tibi  
 THY. Causam timoris, ipse quam ignoro, exis.  
 435 Nihil timendum video; sed timeo tamen.  
 Placet ire; pigris membra sed genibus labant,  
 Alioque quam quo nitor abductus feror.  
 Sic concitatam remige et velo ratem  
 Aestus, resistens remigi et velo, refert.  
 440 PLISTH. Evince, quidquid obstat et mentem im-  
 pedit,  
 Reducemque quanta praemia expectent vide.  
 Pater, potes regnare. THY. Cum possim mori.  
 PLISTH. Summa est potestas... THY. Nulla, si  
 cupias nihil.  
 PLISTH. Gnatis relinques. THY. Non capit  
 regnum duos.  
 445 PLIST. Miser esse mavult, esse qui felix potest?  
 THY. Mihi crede, falsis magna nominibus placent.  
 Frustra timentur dura. Dum excelsus steti,  
 Nunquam pavere destiti atque ipsum mei  
 Ferrum timere lateris. O quantum bonum est

*It is a pity to murther  
philosophic will a man*

THYESTES. ACT. III.

450

Obstare nulli, capere securas dapes  
Humi iacentem! Scelera non intrant casas,  
Tutusque mensa capitur angusta cibus;  
Venenum in auro bibitur. Expertus loquor:  
Malam bonae praeferre fortunam licet.

455

Non vertice alti montis impositam domum  
Eteminentem civitas humilis tremit,  
Nec fulget altis splendidum tectis ebur,  
Somnosque non defendit excubitor meos;  
Non classibus piscamur et retro mare  
Iacta fugamus mole; non ventrem improbum

460

Alimus tributo gentium: nullus mihi  
Ultra Getas metatur et Parthos ager;  
Non ture colimur, nec meae, excluso love,  
Ornantur arae; nulla culminibus meis  
Imposita mutat silva, nec fumant manu  
Succensa multa stagna, nec somno dies,  
Bacchoque nox iungenda pervigili datur:  
Sed non timemur; tuta sine telo est domus,  
Rebusque parvis alta praestatur quies.

465

Immane regnum est posse sine regno pati.

470

FLIST. Nec abnuendum est, si dat imperium deus.

THY. Nec adpetendum. FLIST. Frater, ut re-  
gnes, rogat.

THY. Rogat? Timendum est. Erraticus aliquis dolus.

FLIST. Redire pietas, unde submota est, solet,  
Reparatque vires iustus amissas amor.

475

THY. Amat Thyesten frater? Aethereas prius

Perfundet Arctos pontus, et Siculi rapax

Consistet aestus unda, et Ionio seges

Matura pelago surget, et lucem dabit

Nox atra terris; ante cum flammis aquae,

480

Cum morte vita, cum mari ventus fidem

Foedusque furgent. FLIST. Quam tamen frau-  
dem times?

THY. Omnem: timeri quem meo statuum modum?

*Hand  
written  
notes*

Tantum potest, quantum odit. PLIST. In te  
quid potest?

485 THY. Pro me nihil iam metuo; vos facitis mihi  
Atrea timendum. PLIST. Decipi captus times?  
Serum est cavendi tempus in mediis malis.

THY. Eatur. Unum genitor hoc testor tamen:  
Ego vos sequor, non duco. PLIST. Respiciet deus  
490 Bene cogitata. I! — Perge non dubio gradu!

ATREUS, THYESTES,

TANTALUS F. et } Mutae personae.  
TERTIUS FRATER }

*Tacite sibi applaudit Atreus, irretitum fratrem, cui obviam  
procedit, et simulata in gratiam reditiōis eum circumvenit.*

ATR. Plagis tenetur clusa dispositis fera:  
Et ipsum, et una generis invisi indolem  
Iunctam parenti cerno. Iam tuto in loco  
Versantur odia: venit in nostras manus  
495 Tandem Thyestes; venit, et totus quidem  
Vix tempero animo, vix dolor frenos capit.  
Sic, cum feras vestigat et longo sagax  
Loro tenetur Umber, ac presso vias  
Scrutatur ore, dum procul lento suem  
500 Odore sentit: paret, et tacito locum  
Rostro pererrat; praeda cum propior fuit:  
Cervice tota pugnat, et gemitu vocat  
Dominum morantem, seque retinenti eripit.  
Cum spirat ira sanguinem, nescit tegi;  
505 Tamen tegatur. THY. Adspice, ut multo gravis  
Squalore vultus obruat moestos coma,  
Quam foeda iaceat barba. Praestetur fides.  
ATR. Fratrem iuvat videre. Complexus mihi  
Redde expetitos! Quidquid irarum fuit,  
510 Transierit. Ex hoc sanguis ac pietas die

Colantur; animis odia damnata excidant.  
 THY. Diluere possem cuncta, nisi talis fores.  
 Sed fateor, Atreu, fateor, admisi omnia,  
 Quae credidisti. Pessimam causam meam  
 Hodierna pietas fecit. Est prorsus nocens, 515  
 Quicumque visus tam bono fratri est nocens.  
 Lacrimis agendum est: supplicem primus vides;  
 Hae te precantur pedibus intactae manus:  
 Ponatur omnis ira, et ex animo tumor  
 Erasmus abeat. Obsides fidei accipe 520  
 Hos innocentes! ATR. Frater, a genubus manus  
 Aufer, meosque potius amplexus pete!  
 Vos quoque, senum praesidia, tot iuvenes, meo  
 Pendete collo! Squalidam vestem exue,  
 Oculisque nostris parce, et ornatus cape 525  
 Pares meis, laetusque fraterni imperi  
 Capesse partem! Maior haec laus est mea,  
 Fratri paternum reddere incolumi decus.  
 Habere regnum casus est; virtus dare.  
 THY. Di paria, frater, pretia pro tantis tibi 530  
 Meritis rependant. Regiam capitis notam  
 Squalor recusat noster, et sceptrum manus  
 Infausta refugit. Liceat in media mihi  
 Latere turba. ATR. Recipit hoc regnum duos.  
 THY. Meum esse credo, quidquid est, frater, tuum. 535  
 ATR. Quis influentis dona fortunae abnuvit?  
 THY. Expertus est quicumque, quam facile effluant.  
 ATR. Fratrem potiri gloria ingenti vetas?  
 THY. Tua iam peracta gloria est; restat mea: 540  
 Respuere certum est regna consilium mihi.  
 ATR. Meam relinquam, nisi tuam partem accipis.  
 THY. Accipio. Regni nomen impositi feram;  
 Sed iura et arma servient mecum tibi.  
 ATR. Imposita capiti vincla venerando gere;  
 Ego destinatas victimas Superis dabo. 545

## CHORUS.

*Inseruiens actui praecedenti Chorus Atrei collaudat pietatem, qua simultates et dissidia fratrum composuit, non secus ac serenitas tempestatem secuta.*

- Credat hoc quisquam ? ferus ille et acer,  
 Nec potens mentis, truculentus Atreus  
 Fratris adspectu stupefactus haesit,  
 Nulla vis maior pietate vera est.  
 550 Iurgia externis inimica durant;  
 Quos amor verus tenuit, tenebit.  
 Ira cum magnis agitata causis  
 Gratiam rupit, cecinitque bellum;  
 Cum leves frenis sonuere turmae,  
 555 Fulsit hinc illinc agitatus ensis,  
 Quem movet crebro furibundus ictu  
 Sanguinem Mavors cupiens recentem:  
 Opprimit ferrum, manibusque iunctis  
 Ducit ad pacem Pietas negantes.  
 560 Otium tanto subitum e tumultu  
 Quis deus fecit? Modo per Mycenae  
 Arma civilis crepuere belli;  
 Pallidae natos tenuere matres;  
 Uxor armato timuit marito,  
 565 Cum manum invitus sequeretur ensis,  
 Sordidus pacis vitio quietae.  
 Ille labentes renovare muros,  
 Hic situ quassas stabilire turres,  
 Ferreis portas cohibere claustris  
 570 Ille certabat; pavidusque pinnis  
 Anxiae noctis vigil incubabat.  
 Peior est bello timor ipse belli.  
 Iam minae saevi cecidere ferri,  
 Iam silet murmur grave classicorum,  
 575 Iam tacet stridor litui strepentis:

aff. I  
 " 711  
 " 712  
 " 713  
 " 714  
 " 715  
 " 716  
 " 717  
 " 718  
 " 719  
 " 720  
 " 721  
 " 722  
 " 723  
 " 724  
 " 725  
 " 726  
 " 727  
 " 728  
 " 729  
 " 730  
 " 731  
 " 732  
 " 733  
 " 734  
 " 735  
 " 736  
 " 737  
 " 738  
 " 739  
 " 740  
 " 741  
 " 742  
 " 743  
 " 744  
 " 745  
 " 746  
 " 747  
 " 748  
 " 749  
 " 750  
 " 751  
 " 752  
 " 753  
 " 754  
 " 755  
 " 756  
 " 757  
 " 758  
 " 759  
 " 760  
 " 761  
 " 762  
 " 763  
 " 764  
 " 765  
 " 766  
 " 767  
 " 768  
 " 769  
 " 770  
 " 771  
 " 772  
 " 773  
 " 774  
 " 775  
 " 776  
 " 777  
 " 778  
 " 779  
 " 780  
 " 781  
 " 782  
 " 783  
 " 784  
 " 785  
 " 786  
 " 787  
 " 788  
 " 789  
 " 790  
 " 791  
 " 792  
 " 793  
 " 794  
 " 795  
 " 796  
 " 797  
 " 798  
 " 799  
 " 800

Alta pax urbi revocata laetae est  
 Sic, ubi ex alto tumuere fluctus,  
 Bruttium Coro feriente pontum,  
 Scylla pulsatis resonat cavernis;  
 Ac mare in portu timuere nautae, 580  
 Quod rapax haustum revomit Charybdis;  
 Et ferus Cyclops metuit parentem  
 Rupe ferventis residens in Aetnae, II 5.25  
 Ne superfusus violetur undis  
 Ignis aeternis resonans caminis; 585  
 Et putat mergi sua posse pauper  
 Regna Laërtes Ithaca tremente.  
 Si suae ventis cecidere vires,  
 Mitius stagno pelagus recumbit:  
 Alta, quae navis timuit secare 590  
 Hinc et hinc fasis spatiosa velis,  
 Strata ludenti patuere cymbae;  
 Et vacat mersos numerare pisces  
 Hic, ubi ingenti modo sub procella  
 Cyclades pontum timuere motae. 595  
 Nulla sors longa est: dolor ac voluptas  
 Invicem cedunt; brevior voluptas.  
 Ima permutat levis hora summis. —  
 Ille, qui donat diadema fronti,  
 Quem genu nixae tremuere gentes, 600  
 Cuius ad nutum posuere bella  
 Medus et Phœbi propioris Indus III 10.9  
 Et Dahae Parthis equitem minati,  
 Anxius sceptrum tenet, et moventes  
 Cuncta divinat, metuitque casus 605  
 Mobiles rerum dubiumque tempus.  
 Vos, quibus rector maris atque terrae  
 Ius dedit magnum necis atque vitae,  
 Ponite inflatos tumidosque vultus:  
 Quidquid a vobis minor extimescit, 610  
 Maior hoc vobis dominus minatur.



Omne sub regno graviore regnum est;  
 Quem dies vidit veniens superbum,  
 Hunc dies vidit fugiens iacentem.

615 Nemo confidat nimium secundis,  
 Nemo desperet meliora lapsis:  
 Miscet haec illis, prohibetque Clotho  
 Stare fortunam; rotat omne fatum.  
 Nemo tam divos habuit faventes,

620 Crastinum ut posset sibi polliceri:  
 Res deus nostras celeri citatas  
 Turbine versat.

## ACTUS QUARTUS.

### NUNTIUS, CHORUS.

*Crudele Atræi facinus et epulas nefandas, in quibus apponebantur Thyestæ sui liberi, digna, quæ ex oculis spectatorum sublata intus gererentur, narrat nuntii facundia præsens.*

NUNT. Quis me per auras turbo præcipitem vehet

Atraque nube involvet, ut tantum nefas  
 625 Eripiat oculis? O domus Pelopi quoque  
 Et Tantalo pudenda! CHOR. Quid portas novi?  
 NUNT. Quænam ista regio est, Argos et Sparte,

prios  
 Sortita fratres, et maris gemini premens  
 Fauces Corinthos, an feris Ister fugam

630 Præbens Alanis, an sub æterna nive  
 Hyrcana tellus, an vagi passim Scythæ?  
 Quis hic nefandi est conscius monstri locus?  
 CHOR. Effare et istud pande, quodcunque est,

malum.

NUNT. Si steterit animus, si metu corpus rigens  
 635 Remittet artus. Haeret in vultu trucid  
 Imago facti. Ferte me insanae procul

Illo procellae, ferte, quo fertur dies  
 Hinc raptus! CHOR. Animos gravius incertos tenes  
 Quid sit, quod horres, ede, et auctorem indica.  
 Non quaero, quis sit, sed uter. Effare ocius! 640  
 MUNT. In arce summa Pelopiae pars est domus  
 conversa ad Austros, cuius extremum latus  
 Aequale monti crescit, atque urbem premit  
 Et contumacem regibus populum suis  
 Habet sub ictu; fulget hic turbae capax 645  
 Immane tectum, cuius auratas trabes  
 Variis columnae nobiles maculis ferunt.  
 Post ista vulgo nota, quae populi colunt,  
 In multa dives spatia discedit domus.  
 Arcana in imo regia secessu patet, 650  
 Alta vetustum valle compescens nemus,  
 Penetrabile regni; nulla qua laetos solet  
 Praebere ramós arbor, aut ferro coli;  
 Sed taxus et cupressus et nigra ilice  
 Obscura nutat silva, quam supra eminens 655  
 Despectat alte quercus, et vincit nemus.  
 Hinc auspicari regna Tantalidae solent,  
 Hinc petere lapsis rebus et dubiis opem.  
 Adfixa inhaerent dona, vocales tubae,  
 Fractique currus, spolia Myrtoi maris, 660  
 Victaeque falsis axibus pendent rotae,  
 Et omne gentis facinus; hoc Phrygius loco  
 Fixus tiaras Pelopis, hic praeda hostium.  
 Et de triumpho picta barbarico chlamys  
 Fons stat sub umbra tristis, et nigra piger 665  
 Haeret palude. Talis est dirae Stygis  
 Deformis unda, quae facit coelo fidem.  
 Hic nocte coeca gemere ferales deos  
 Fama est; catenis lucus excussis sonat,  
 Ululantque Manes. Quidquid audire est metus, 670  
 Illic videtur: errat antiquis vetus  
 Emissa bustis turba, et insultant loco

- Maiora notis monstra; quin tota solet  
Micare flamma silva, et excelsae trabes  
675 Ardent sine igni. Saepe latratu nemus  
Trino remugit; saepe simulacris domus  
Attonita magnis. Nec dies sedat metum;  
Nox propria luctu est, et superstitio Inferum  
In luce media regnat. Hinc orantibus  
680 Responsa dantur certa, cum ingenti sono  
Laxantur adyto fata, et immugit specus  
Vocem deo solvente. Quo postquam furens  
Intravit Atreus, liberos fratris trahens:  
Ornantur arae. Quis queat digne eloqui?  
685 Post terga iuvenum nobiles revocat manus,  
Et moesta vitta capita purpurea ligat;  
Non tura desunt, non sacer Bacchi liquor,  
Tangensve fusa victimam culter mola.  
Servatur omnis ordo, ne tantum nefas  
690 Non rite fiat. CHOR. Quis manum ferro admovet?  
NUNT. Ipse est sacerdos; ipse funesta prece  
Letale carmen ore violento canit;  
Stat ipse ad aras; ipse devotos neci  
Contrectat, et componit, et ferro admovet;  
695 Attendit ipse: nulla pars sacri perit.  
Lucus tremiscit; tota succusso solo  
Nutavit aula, dubia; quo pondus daret,  
Ac fluctuanti similis; e laevo aethere  
Atrum cucurrit limitem sidus trahens;  
700 Libata in ignes vina mutato fluunt  
Cruenta Baccho; regium capiti decus  
Bis terque lapsum est; flevit in templis ebur.  
Movere cunctos monstra; sed solus sibi  
Immotus Atreus constat, atque ultro deos  
705 Terret minantes. Iamque dimissa mora  
Adsiluit aris, torvum et obliquum intuens.  
Ieiuna silvis qualis in Gangeticis  
Inter iuvencos tigris erravit duos,

# THYESTES. ACT. IV.

Utriusque praedae cupida (quo primos ferat

Incerta morsus, flectit huc rictus suos,

Illo reflectit, et famem dubiam tenet),

Sic dirus Atreus capita devota impiae

Speculatur irae. Quem prius mactet sibi,

Dubitatur; secunda deinde quem caede immolet.

Nec interest; sed dubitat, et saevum scelus

luvat ordinare. CHOR. Quem tamen ferro occupat?

NUNT. Primus locus (ne deesse pietatem putes)

Avo dicatur; Tantalus prima hostia est.

CHOR. Quo iuvenis animo, quo tulit vultu necem?

NUNT. Stetit sui securus, et non est preces

Perire frustra passus. Ast illi ferus

In vulnere ense abscondit, et penitus premens

Iugulo manum commisit. Educto stetit

Ferro cadaver; cumque dubitasset diu,

Hac parte, an illa caderet, in patrum cadit.

Tunc ille ad aras Plisthenem saevus trahit

Adicitque fratri; colla percussa amputat;

Cervice caesa truncus in primum ruit,

Querulum cucurrit murmure incerto caput.

CHOR. Quid deinde gemina caede perfunctus facit?

Puerone parcat? an scelus sceleri ingerit?

NUNT. silva inbatus qualis Armenia leo

In caede multa victor armento incubat

(Cruore rictus madidus et pulsa fame

Non ponit iras: hinc et hinc tauros premens

Vitulis minatur, dente iam lasso piger):

Non aliter Atreus saevit atque ira tumet;

Ferrumque gemina caede perfusum tenens,

Oblitus in quem rueret, infesta manu

Exegit ultra corpus. At pueri statim

Pectore receptus ensis in tergo exitit.

Cadit ille, et aras sanguine extinguens suo,

Per utrumque vulnus moritur. CHOR. O saevum

scelus!

NUNT. Exhorruistis? Hactenus sistat nefas:

745 Pius est. CHOR. An ultra maius aut atrocius  
Natura recipit? NUNT. Sceleris hunc finem putas?  
Gradus est. CHOR. Quid ultra potuit? Abiecit feris  
Lanianda fors corpora, atque igne arcuit.  
NUNT. Utinam arcuisset! Ne tegat functos humus,

750 Ne solvat ignis, avibus epulandos licet  
Ferisque triste pabulum saevis trahat.  
Votum est sub hoc, quod esse supplicium solet:  
Pater insepultos spectet. O nullo scelus  
Credibile in aevo, quodque posteritas neget

755 Erepta vivis exta pectoribus tremunt,  
Spirantque venae, corque adhuc pavidum salit.

At ille fibras tractat, ac fata inspicit,  
Et adhuc calentes viscerum venas notat.  
Postquam hostiae placuere: securus vacat

760 Iam fratris epulis. Ipse divisum secat  
In membra corpus: amputat trunco tenus  
Humeros patentes et lacertorum moras,  
Denudat artus dirus atque ossa amputat;  
Tantum ora servat et datas fidei manus.

765 Haec verubus haerent viscera, et lentis data  
Stillant caminis; illa flammatus latex,  
Candente ahen, iactat. Impositas dapes  
Transiluit ignis, inque trepidantes focos  
Bis ter regestus et pati iussus moram,

770 Invitus ardet. Stridit in verubus iecur;  
Nec facile dicam, corpora an flammae gemant.  
Gemuere. Piceos ignis in fumos abit;  
Et ipse fumus, tristis ac nebula gravis,  
Non rectus exit, seque in excelsum levans

775 Ipsos penates nube deformi obsidet.  
O Phoebe patiens, fugeris retro licet,  
Medioque ruptum merseis coelo diem,  
Sero occidisti. Lancinat gnatos pater,  
Artusque mandit ore funesto suos.

Nitet fluente madidus unguento comam, 780  
 Gravisque vino. Saepe praecclusae cibum  
 Tenuere fauces. In malis unum hoc tuis  
 Bonum est, Thyesta, quod mala ignoras tua;  
 Sed et hoc peribit. Verterit currus licet  
 Sibi ipse Titan obvium ducens iter, 785  
 Tenebrisque facinus obruat tetrum novis  
 Nox missa ab ortu tempore alieno gravis:  
 Tamen videndum est; tota patefient mala.

CHORUS.

*Videns Chorus solem retrocedere obstupescit, veritus, ne  
 dissoluta mundi machina omnia in antiquum chaos recidant.*

Quo terrarum Superumque parens,  
 Cuius ad ortus noctis opacae 790  
 Decus omne fugit, quo vertis iter,  
 Medioque diem perdis Olympo?  
 Cur, Phoebe, tuos rapis adspectus?  
 Nondum serae nuntius horae  
 Nocturna vocat lumina Vesper 795  
 Nondum Hesperiae flexura rotae  
 lubet emeritos solvere currus:  
 Nondum in noctem vergente die  
 Tertia misit buccina signum;  
 Stupet ad subitae tempora coenae  
 Nondum fessis bubus arator. 800  
 Quid te aetherio pepulit cursu?  
 Quae causa tuos limite certo  
 Deiecit equos? numquid aperto  
 Carcere Ditis victi tentant  
 805  
 Bella gigantes? numquid Tityos  
 Pectore fesso renovat veteres  
 Saucius iras? num relecto  
 Latus explicuit monte Typhoeus?  
 Numquid struitur via Phlegraeos 810

Alta per hostes, et Thessalicum

Thressa premitur Pelion Ossa?

Solitae mundi periere vices:

Nihil Occasus, nihil Ortus erit.

815 Stupet, Eoos adsueta deo

Tradere frenos, genitrix primae

Roscida lucis, perversa sui

Limina regni; nescit fessos

Tingere currus, nec fumantes

820 Sudore iubas mergere ponto.

Ipse insueto novus hospitio

Sol auroram videt occiduus,

Tenebrasque iubet surgere nondum

Nocte parata. Non succedunt

825 Astra, nec ullo micat igne polus,

Nec Luna graves digerit umbras.

Sed quidquid id est, utinam nox sit!

Trepidant, trepidant pectora magno

Percussa metu, ne fatali

830 Cuncta ruina quassata labent,

Iterumque deos hominesque premat

Deforme chaos,

Iterum terras et mare et ignes

Et vaga picti sidera mundi

835 Natura tegat.

Non aeternae facis exortu

Dux astrorum secula ducens

Dabit aestatis brumaeque notas.

Non Phoebeis obvia flammis

840 Demet Nocti Luna timores,

Vincetque sui fratris habenas,

Curvo brevius limite currens.

Ibit in unum congesta sinum

Turba deorum.

845 Hic, qui sacris pervius astris

Secat obliquo tramite zonas,

IV 6, 10

IV 6, 12

IS. 6

Flectens longos Signifer annos,  
 Lapsa videbit sidera labens.  
 Hic, qui nondum vere benigno  
 Reddit Zephyro vela tepenti, 850  
 Aries praeceps ibit in undas,  
 Per quas pavidam vexerat Hellen.  
 Hic, qui nitido Taurus cornu  
 Praefert Hyadas, secum Geminos  
 Trahet et curvi brachia Cancri. 855  
 Leo flammiferis aestibus ardens  
 Iterum e coelo cadet Herculeus,  
 Cadet in terras Virgo relictas,  
 Iustaeque cadent pondera Librae,  
 Secumque trahent Scorpion acrem; 860  
 Et, qui nervo tenet Haemonio  
 Pennata senex spicula Chiron,  
 Rupto perdet spicula nervo.  
 Pigram referens hiemem gelidus  
 Cadet Aegoceros, frangetque tuam, 865  
 Quisquis es, Urnam. Tecum excedent  
 Ultima coeli sidera Pisces;  
 Monstraque nunquam perfusa mari  
 Merget condens omnia gurgis;  
 Et qui medias dividit Urras, 870  
 Fluminis instar, lubricus Anguis,  
 Magnoque minor iuncta Draconi  
 Frigida duro Cynosura gelu,  
 Custosque sui tardus plaustrum IV. 5. 2  
 Iam non stabilis ruet Arctophylax. 875  
 Nos e tanto visi populo  
 Digni, premeret quos everso  
 Cardine mundus;  
 In nos aetas ultima venit. 880  
 O nos dura sorte creatos,  
 Seu perdidimus solem miseri,  
 Sive expulimus!



Abeant questus; discede, Timor!  
 Vitae est avidus, quisquis non vult  
 885 Mundo secum moriente mori.

## ACTUS QUINTUS.

### ATREUS.

*Exultans impius Atreus nefariam de fratre vindictam sibi gratulatur, dirisque apposis dapibus de natorum sanguine praebendo deliberat.*

- Aequalis astris gradior, et cunctos super  
 Altum superbo vertice attingens polum!  
 Nunc decora regni teneo, nunc solium patris.  
 Dimitto Superos: summa votorum attigi.
- 890 Bene est; abunde est; iam sat est etiam mihi.  
 Sed cur satis sit? pergam, et implebo patrem  
 Funere suorum. Ne quid obstaret pudor,  
 Dies recessit: perge, dum coelum vacat.  
 Utinam quidem tenere fugientes deos
- 895 Possem, et coactos trahere, ut ultricem dapem  
 Omnes viderent! Quod sat est, videat pater.  
 Etiam die nolente discutiam tibi  
 Tenebras, miseriae sub quibus latitant tuae.  
 Nimis diu conviva securo iaces
- 900 Hilarique vultu; iam satis mensis datum est,  
 Satisque Baccho; sobrio tanta ad mala  
 Opus est Thyeste. Turba famularis fores  
 Templi relaxa; festa patefiat domus.  
 Libet videre, capita natorum intuens
- 905 Quos det colores, verba quae primus dolor  
 Effundat, aut ut spiritu expulso stupens  
 Corpus rigescat. Fructus hic operis mei est.  
 Miserum videre nolo; sed, dum fit miser. —  
 Aperta multa tecta collucent face.

*Perhaps  
 the original  
 of Pliny's  
 reflections*

± 3 1

77

**THYESTES. ACT. V**

Resupinus ipse purpurae atque auro incubat, 910  
 Vino gravatum fulciens laeva caput.  
 Eructat. O me coelitum excelsissimum,  
 Regumque regem! vota transcendendi mea!  
 Satur est, capaci ducit argento merum.  
 Ne parce potu: restat etiamnum cruor 915  
 Tot hostiarum. Veteris hunc Bacchi color  
 Abscendet. Hoc haec mensa claudatur scypho.  
 Mixtum suorum sanguinem genitor bibat;  
 Meum bibisset. Ecce, iam cantus ciet  
 Festasque voces, nec satis menti imperat. 920

**THYESTES.**

*Thyestis epulantis cantus: quo invitat se ad laetitiam, quam tamen mens ejus praesaga mali non admittit.*

Pectora longis hebetata malis,  
 Iam sollicitas ponite curas!  
 Fugiat moeror, fugiatque pavor.  
 Fugiat trepidi comes exilii  
 Tristis egestas, rebusque gravis 925  
 Pudor adfluctis. Magis unde cadas,  
 Quam quo, refert. Magnum, ex alto  
 Culmine lapsum stabilem in plano  
 Figere gressum; magnum, ingenti  
 Strage malorum pressum fracti 930  
 Pondera regni non inflexa  
 Cervice pati, nec degenerem  
 Victumque malis rectum impositas  
 Ferre ruinas. Sed iam saevi  
 Nubila fati pelle, ac miseri 935  
 Tempore in omni dimitte notas;  
 Redeant vultus ad laeta boni;  
 Veterem ex animo mitte Thyesten! —  
 Proprium hoc miseros sequitur vitium  
 Nunquam rebus credere laetis. 940  
 Redeat felix Fortuna licet,

- Tamen adflictos gaudere piget.  
 Quid me revocas, festumque vetas  
 Celebrare diem? quid flere iubes  
 945 Nulla surgens dolor ex causa?  
 Quis me prohibet flore recenti  
 Vincere comam? Prohibet, prohibet!  
 Vernae capiti fluxere rosae;  
 Pingui madidus crispis amomo  
 950 Inter subitos stetit horrores;  
 Imber vultu nolente cadit;  
 Venit in medias voces gemitus.  
 Moeror lacrimas amat adsuetas;  
 Flendi miseris dira cupido est.  
 955 Libet infaustos mittere questus;  
 Libet et Tyrio saturas ostro III 4, 1  
 Rumpere vestes; ululare libet!  
 Mittit luctus signa futuri  
 Mens, ante sui praesaga mali.  
 960 Instat nautis fera tempestas,  
 Cum sine vento tranquilla tument. —  
 Quos tibi luctus quosve tumultus  
 Fingis, demens?  
 Credula praesta pectora fratri!  
 965 Iam, quidquid id est, vel sine causa,  
 Vel sero times. — Nolo infelix;  
 Sed vagus intra terror oberrat,  
 Subitos fundunt oculi fletus,  
 Nec causa subest. Dolor, an metus est?  
 970 An habet lacrimas magna voluptas? —

### A T R E U S , T H Y E S T E S .

*Atræus, festivitatem simulans, fratrem ad poculum invitat. Cupienti illi videre liberos, quo plenius gauderet, ostendit capita et palmas, et quid actum sit aperit; hinc dolor, ira, convicia, execrationes ortae.*

A T R. Festum diem, germane, consensu pari

Celebremus: hic est, sceptrum qui firmet mea,  
Solidamque pacis adliget certae fidem.

THY. Satias dapis me, nec minus Bacchi tenet.

Augere cumulus hic voluptatem potest, 975  
Si cum meis gaudere felici datur.

ATR. Hic esse natos crede in amplexu patris.

Hic sunt eruntque; nulla pars proles tuae  
Tibi subtrahetur. Ora, quae exoptas, dabo,  
Totumque turba iam sua implebo patrem. 980

Satiaberis, ne metue! Nunc mixti meis  
Iucunda mensae sacra iuvenilis colunt;

Sed accientur. Poculum infuso cape  
Gentile Baccho! THY. Capiam fraternae dapis  
Donum. Paternis vina libentur deis, 985

Tunc hauriantur. Sed quid hoc? Nolunt manus

Parere; crescit pondus, et dextram gravat;

Admotus ipsis Bacchus a labris fugit,

Circaque rictus ore decepto effluit.

En, ipsa trepido mensa subiluit solo! 990

Vix lucet ignis. Ipse quin aether gravis

Inter diem noctemque desertus stupet.

Quid hoc? magis magisque concussi labant

Convexa coeli; spissior densis coit

Caligo tenebris, neque se in noctem addidit; 995

Fugit omne sidus. Quidquid est, fratri, precor,

Gnatisque parcat; omnis in vile hoc caput

Abeat procella! Redde iam gnatos mihi!

ATR. Reddam, et tibi illos nullus eripiet dies.

THY. Quis hic tumultus viscera exagitat mea? 1000

Quid tremuit intus? Sentio impatiens onus,

Meumque gemitu non meo pectus gemit.

Adeste, nati! gemitor infelix vocat;

Adeste! visis fugiet hic vobis dolor. —

Unde obloquantur? ATR. Expedi amplexus, pater: 1005

Venere. Natos eoquid agnoscis tuos?

THY. Agnosco fratrem. Sustines tantum nefas

- Gestare, tellus? non ad infernam Styga  
Te nosque mergis, rupta et ingenti via  
1010 Ad chaos inane regna cum rege abripis?  
Non tota ab imo tecta convellens solo  
Vertis Mycenae? Stare circa Tantalum  
Uterque iam debuimus: hinc compagibus  
Et hinc revulsis, si quid infra Tartara est  
1015 Avosque nostros, huc tuam immani sinu  
Demitte vallem, nosque defossos tege  
Acheronte toto! noxiae supra caput  
Animae vagentur nostrum, et ardenti freto  
Phlegethon arenas igneus totas agens  
1020 Exitia supra nostra violentus fluat.  
Immota, tellus, pondus ignavum, iaces?  
Fugere Superi. A T R. At accipe hos potius libens  
Diu expetitos! Nulla per fratrem est mora:  
Fruere, osculare, divide amplexus tribus!  
1025 T H. Hoc foedus? haec est gratia? haec fratris fides?  
Sic odia ponis? Non peto, incolumes pater  
Gnatos ut habeam; scelere quod salvo dari  
Odioque possit, frater hoc fratrem rogo:  
Sepelire liceat. Redde, quod cernas statim  
1030 Uri. Nihil te genitor habiturus rogo,  
Sed perditurus. A T R. Quidquid e gnatis tuis  
Superest, habebis; quodque non superest, habes  
T H Y. Utrumne saevis pabulum alitibus iacent,  
An belluis servantur? an pascunt feras  
1035 Epulatus ipse es impia gnatos dape.  
T H Y. Hoc est, deos quod puduit! hoc egit diem  
Aversum in ortus! Quas miser voces dabo,  
Questusque quos? quae verba sufficient mihi?  
Abscissa cerno capita et avulsas manus,  
1040 Et rupta fractis cruribus vestigia.  
Hoc est, quod avidus capere non potui pater.  
Volvuntur intus viscera, et clausum nefas  
Sine exitu luctatur, et quaerit fugam.

Da, frater, ensem (sanguinis multum mei  
Habet ille): ferro liberis detur via. — 1045  
Negatur ensis? Pectora illiso sonent  
Contusa planctu! ATR. Sustine, infelix, manum:  
Parcamus umbria. THY. Tale quis vidit nefas?  
Quis inhospitalis Caucasi rupem asperam  
Heniochus habitans? quisve Cecropiis metus 1050  
Terris Procrustes? Genitor, en, natos premo,  
Premorque natis! Sceleris est aliquis modus.  
ATR. Sceleri modus debetur, ubi facias scelus;  
Non, ubi reponas. Hoc quoque exiguum est mihi.  
Ex vulnere ipso sanguinem calidum in tua 1055  
Diffundere ora debui: ut viventium  
Biberes cruorem. Verba sunt irae data,  
Dum propero: ferro vulnera impresso dedi;  
Cecidi ad aras; caede votiva focos  
Placavi, et artus corpore exanimo amputans 1060  
In parva carpsi frustra, et haec ferventibus  
Demersi ahenis; illa lentis ignibus  
Stillare iussi; membra nervosque abscidi  
Viventibus, gracilique traiectas veru  
Mugire fibras vidi, et adgessi manu 1065  
Mea ipse flammis. Omnia haec melius pater  
Fecisse potuit; cecidit incassum dolor:  
Scidit ore natos impio, sed nesciens,  
Sed nescientes. THY. Clusa littoribus vagis  
Audite maria! vos quoque audite hoc scelus, 1070  
Quocunque, di, fugistis! audite, Inferi!  
Audite, Terrae! Noxque Tartarea gravis  
Et atra nube, vocibus nostris vaca!  
Tibi sum relictus; sola tu miserum vides,  
Tu quoque sine astris. Vota non faciam improba: 1075  
Pro me nihil precabor: ecquid iam potest  
Pro me esse? vobis vota prospicient mea.  
Tu, summe coeli rector, aetheriae potens  
Dominator aulae, nubibus totum horridis

82 L. ANNAEI SENECAE THYESTES. ACT. V.

- 1080 Convolv mundum; bella ventorum undique  
Committe, et omni parte violentum intona;  
Manuque, non qua tecta et immeritas domos  
Telo petis minore, sed qua montium  
Tergemina moles cecidit, et qui montibus
- 1085 Stabant pares gigantes, hac arma expedi;  
Ignesque torque! vindica amissum diem!  
Iaculare flammis: lumen ereptum polo  
Fulminibus exple. Causa, ne dubites diu,  
Utriusque mala sit; si minus, mala sit mea:
- 1090 Me pete! trisulco flammeam telo facem  
Per pectus hoc trans mitte! si gnatos pater  
Humare, et igni tradere extremo volo,  
Ego sum cremandus. Si nihil Superos movet,  
Nullumque telis impios numen petit:
- 1095 Aeterna nox permaneat, et tenebris tegat  
Immensa longis scelera! Nil, Titan, queror,  
Si perseveras. ATR. Nunc meas laudo manus,  
Nunc parta vera est palma. Perdideram scelus,  
Nisi sic doleres. Liberos nasci mihi
- 1100 Nunc credo, castis nunc fidem reddi toris.  
THY. Quid liberi meruere? ATR. Quod fuerant tui.  
THY. Gnatos parenti! ATR. Fateor, et, quod me  
iuvat,  
Certos. THY. Piorum praesides testor deos.  
ATR. Quid? coniugales? THY. Scelere quis pen-  
sat scelus?
- 1105 ATR. Scio, quid queraris: scelere praerepto doles,  
Nec, quod nefandas hauseris, angit, dapes;  
Quod non pararis: fuerat hic animus tibi  
Instruere similes in scio fratri cibos,  
Et adiuvante liberos matre adgredi,
- 1110 Similique leto sternere. Hoc unum obstitit,  
Tuos putasti. THY. Vindices aderunt dei;  
His puniendum vota te tradunt mea.  
ATR. Te puniendum liberis trado tuis.
-

# **P H O E N I S S A E.**

---

## **DRAMATIS PERSONÆ.**

***OEDIPUS.***

***ANTIGONE***

***NUNTIUS.***

***IOCASTA.***

***POLYNCEUS.***

---



## ARGUMENTUM.

Oedipus, sibi oculis, ubi scelus suum (de quo vide argumentum Oedipi) agnovisset, erutis, in exilium spontaneum profectus, amolitur a se filiam Antigonen, quae patri vitales auras pertaeso ducem se viae offert, utque mortis cupidinem deponat, multis precibus tandem exorat. Cuius interea filios Eteoclem et Polynicem, violato regnandi per vices foedere, impia moventes arma, incassum laborat mater Iocasta in gratiam reducere. Desunt mutilae huic Tragoediae cetera.

---

## ALIUD ARGUMENTUM

### *HIERONYMI BALBI.*

Hauserat obscuras damnata luce tenebras  
Oedipodes, tristemque animam sub nocte premebat.  
Natorum interea dominandi dira cupido  
Occupat haec mentes: Thebanaque regna tue.  
5 Alternis statuunt vicibus. Iamque annua iura  
Ille dabat populo; hic patriis semotus ab oris  
Argolicas urbes externaque tecta petebat.  
Iam vagus exactum sol circumvolverat annum.  
Sceptra exul repetit; negat ille excedere regno  
10 Perfidus: arma parant: tristi concurrere bello  
Praeceptis ira iubet. Cruor undique et undique caedes  
Cernitur, hostilique exundant sanguine rupes.  
Tandem Graiugenum post funera longa necesque  
Mutua Thebani senserunt vulnere fratres.

---

## ACTUS PRIMUS.

### OEDIPUS, ANTIGONE.

*Oedipum ab instituta morte revocat, persuadetque filia  
Antigone dux patris coeci*

OEDIP. Coeci parentis regimen, ac fessi unicum  
Patris levamen, gnata, quam tanti est mihi  
Genuisse vel sic, desere infaustum patrem!  
In recta quid deflectis errantem gradum?  
Permitte labi! Melius inveniam viam, 5  
Quam quaero, solus, quae me ab hac vita extrahat,  
Et hoc nefandi capitis adspectu levet  
Coelum atque terras. Quantulum hac egi manu?  
Non video noxae conscium nostrae diem;  
Sed videor. Hinc iam solve inhaerentem manum, 10  
Et patere coecum, qua volet, ferri pedem!  
Ibo, ibo, qua praerupta protendit iuga  
Meus Cithaeron; qua peragrati celer  
Per saxa montis iacuit Actaeon, suis  
Nova praeda canibus; qua per obscurum nemus 15  
Silvamque opacae vallis instinctas deo  
Egit sorores mater, et gaudens malo  
Vibrante fixum praetulit thyrsos caput;  
Vel qua cucurrit corpus invisum trahens  
Zethi iuventus, qua per horrentes rubos 20  
Tauri ferocis sanguis ostentat fugas;  
Vel qua alta maria vertice immenso premit  
Minora rupes, qua scelus fugiens ferum,  
Novumque faciens, mater insiluit freto,  
Mensura natum seque! Felices, quibus 25  
Fortuna melior tam bonas matres dedit!

- Est alius istis noster in silvis locus,  
 Qui me reposcit; hunc petam cursu incito  
 Non haesitabit gressus; huc omni duce  
 30 Spoliatus ibo. Quid moror? Sedes meas  
 Montem, Cithaeron, redde, et hospitium mihi  
 Illud meum restitue: ut expirem senex,  
 Ubi debui infans! recipe supplicium vetus,  
 Semper cruenta, saeve, crudelis, ferox,  
 35 Cum occidis, et cum parcis! Olim iam tuum  
 Est hoc cadaver: perage mandatum patris,  
 Iam et matris. Animus gestit antiqua exequi  
 Supplicia. Quid me, gnata, pestifero tenes  
 Amore vinctum? quid tenes? Genitor vocat.  
 40 Sequor, sequor! iam parce! Sanguineum gerens  
 Insigne regni Laius rapti furit,  
 Et, ecce, inanes manibus infestis petit  
 Foditque vultus! Gnata, genitorem vides?  
 Ego video. Tandem spiritum inimicum exspue,  
 45 Desertor animi, fortis in partem tui!  
 Omitte poenae languidas longae, moras,  
 Mortemque totam admitte! Quid segnis traho,  
 Quod vivo? Nullum facere iam possum scelus. --  
 Possum miser: praedico, discede a patre,  
 50 Discede, virgo: timeo post matrem omnia.  
 ANT. Vis nulla, genitor, a tuo nostram manum  
 Corpore resolvet; nemo me comitem tibi  
 Eripiet unquam. Labdaci claram domum,  
 Opulenta ferro regna germani petant;  
 55 Pars summa magni patris e regno, mea est  
 Pater ipse. Non hunc auferet frater mihi,  
 Thebana rapti sceptrum qui regno tenet;  
 Non hunc catervas alter Argolicas, agens!  
 Non si revulso Iuppiter mundo tonet,  
 60 Mediumque nostros fulmen in nexus cadat,  
 Manum hanc remittam! Prohibeas, genitor, licet:  
 Regam abnuentem, diligam invitum, patrem.

In plana tendis? vado. Praerupta adpetis?  
 Non obsto, sed praecedo. Quovis utere  
 Duce me! Duobus omnis eligitur via. 65  
 Perire sine me non potes, mecum potes.  
 Hic alta rupes arduo surgit iugo,  
 Spectatque longe spatia subiecti maris;  
 Vis hanc petamus? Nudus hic pendet silex.  
 Hic scissa tellus faucibus ruptis hiat; 70  
 Vis hanc petamus? Hic rapax torrens cadit,  
 Partesque lapsi montis exesas rotat;  
 In hunc ruamus. Dum prior, quo vis, eo;  
 Non deprecor, non hortor. Extingui cupis,  
 Votumque, genitor, maximum mors est tibi? 75  
 Si moreris, antecedo; si vivis, sequor.  
 Sed flecte mentem, pectus antiquum advoca,  
 Victasque magno robore aerumnas doma!  
 Resiste: tantis in malis vinci mori est.  
 OEDIP. Unde in nefanda specimen egregium domo? 80  
 Unde ista generi virgo dissimilis suo?  
 Fortuna, credis? aliquis est ex me pius.  
 Non esset unquam (fata bene novi mea),  
 Nisi ut noceret. Ipsa se in leges novas  
 Natura vertet, regeret in fontem citas 85  
 Revolutus undas amnis, et noctem adferet  
 Phoebea lampas, Hesperus faciet diem.  
 Ut ad miseras aliquid accedat meas,  
 Pii quoque erimus. Unica Oedipodae est salus  
 Non esse salvum. Liceat ulcisci patrem 90  
 Adhuc inultum. Dextra, quid cessas iners  
 Exigere poenas? Quidquid exactum est adhuc,  
 Matri dedisti. Mitte genitoris manum  
 Animosa virgo: funus extendis meum,  
 Longasque vivi ducis exequias patris. 95  
 Aliquando terra corpus invisum tege!  
 Peccas honesta mente; pietatem vocas,  
 Patrem insepultum trahere. Qui cogit mori

Nolentem, in aequo est, quique properantem impedit.

- 100 Occidere est vetare cupientem mori.  
Nec tamen in aequo est: alterum gravius reor:  
Malo imperari, quam eripi mortem mihi.  
Desiste coepto, virgo: ius vitae ac necis  
Meae penes me est. Regna deserui libens;
- 105 Regnum mei retineo. Si fida es comes:  
Ensem parenti trade; sed notum nece  
Ensem paterna. Tradis, an nati tenent  
Cum regno et illum? Faciet, ubicunque est, opus.  
Ibi sit; relinquo; natus hunc habeat meus,
- 110 Sed uterque. Flammas potius et vastum aggerem  
Compone; in altos ipse me immittam rogos.  
Haerebo ad ignes, funebrem escendens struem,  
Pectusque solvam durum, et in cineres dabo  
Hoc, quidquid in me vivit. — Ubi saevum est mare?
- 115 Duc, ubi sit altis prorutum saxis iugum,  
Ubi curva rapidus ducat Ismenos vada!  
Duc, ubi ferae sint, ubi fretum, ubi praecipuus  
locus,  
Si dux es! Illuc ire morituro placet  
Ubi sedit alta rupe semifero dolos
- 120 Sphinx ore nectens. Dirige huc gressus pedum;  
Hic siste patrem! Dira ne sedes vacet,  
Monstrum repone maius! Hoc saxum insidens  
Obscura nostrae verba fortunae loquar,  
Quae nemo solvat. Quisquis Assyrio loca
- 125 Possessa regi scindis, et Cadmi nemus  
Serpente notum, sacra quo Dirce scatet,  
Supplex adoras; quisquis Eurotan bibis,  
Spartenque fratre nobilem gemino colis;  
Quique Elin et Parnason et Boeotios
- 130 Colonus agros uberis tondes soli;  
Adverte mentem: saeva Thebarum lues  
Luctifica coecis verba committens modis,

Quid simile posuit? quid tam inextricabile?  
 Avi gener, patrisque rivalis sui,  
 Frater suorum liberum, et fratrum parens. 135  
 Uno avia partu liberos peperit viro,  
 Ac sibi nepotes. Monstra quis tanta explicet?  
 Ego ipse, victae spolia qui Sphingis tuli,  
 Haerebo, fati tardus interpres mei. —  
 Quid perdis ultra verba? quid pectus ferum 140  
 Mollire tentas precibus? Hoc animo sedet,  
 Effundere hanc cum morte luctantem diu  
 Animam, et tenebras petere: nam scelerei haec meo  
 Parum alta nox est; Tartaro condi iuvat,  
 Et si quid ultra Tartarum est. Tandem libet, 145  
 Quod olim oportet. Morte prohiberi haud queo.  
 Ferrum negabis? noxias lapso vias  
 Cludes, et arctis colla laqueis inseri  
 Prohibebis? herbas, quae ferunt letum, auferes?  
 Quid ista tandem cura proficiet tua? 150  
 Ubique mors est. Optime hoc cavit deus.  
 Eripere vitam nemo non homini potest;  
 At nemo mortem: mille ad hanc aditus patent.  
 Nil quaero: dextra noster et nuda solet  
 Bene animus uti. Dextra, nunc toto impetu, 155  
 Toto dolore, viribus totis veni!  
 Non destino unum vulnerei nostro locum:  
 Totus nocens sum: qua voles, mortem exige!  
 Effringe corpus, corque tot scelerum capax  
 Evelle; totos viscerum nuda sinus! 160  
 Fractum incitatis ictibus guttur sonet,  
 Laceraeve fixis unguibus venae fluant.  
 Aut dirige iras, quo soles; haec vulnera  
 Rescissa multo sanguine ac tabo irriga;  
 Hac extrahe animam, duram, inexpugnabilem! 165  
 Et tu, parens, ubicunque poenarum arbiter  
 Adstas mearum (non ego hoc tantum scelus  
 Ulla expiari credidi poena satis

- Unquam, nec ista morte contentus fui  
170 Nec me redemi parte; membratim tibi  
Volui perire), debitum tandem exige!  
Nunc solvo poenas; tunc tibi inferias dedi.  
Ades, atque inertem dexteram introrsus preme,  
Magisque merge! timida tum parvo caput  
175 Libavit haustu, vixque cupientes sequi  
Eduxit oculos. Haeret etiam nunc mihi  
Ille animus, haeret, cum recusantem manum  
Pressere vultus. Audies verum, Oedipe:  
Minus eruisti lumina audacter tua,  
180 Quam praestitisti. Nunc manum cerebro indue;  
Hac parte mortem perage, qua coepi mori!  
ANT. Pauca, o parens magnanime, miserandae  
precor  
Ut verba natae mente placata audias.  
Non te ut reducam veteris ad speciem domus,  
185 Habitumque regni flore pollentem inclito  
Peto; ast ut iras, tempore aut ipsa mora  
Fractas, remisso pectore ac placido feras.  
Et hoc decebat roboris tanti virum,  
Non esse sub dolore, nec victum malis  
190 Dare terga. Non est, ut putas, virtus, pater,  
Timere vitam, sed malis ingentibus  
Obstare, nec se vertere ac retro dare.  
Qui fata proculcavit, ac vitae bona  
Proiecit atque abscidit, et casus suos  
195 Oneravit ipse, cui deo nullo est opus,  
Quare ille mortem cupiat, aut quare petat?  
Utrumque timidi est. Nemo contempsit mori,  
Qui concupivit; cuius haud ultra mala  
Exire possunt, in loco tuto est situs.  
200 Quis iam decorum (velle fac) quidquam potest  
Malis tuis adiicere? Iam nec tu potes,  
Nisi hoc, ut esse te putes dignum nece.  
Non es, nec ulla pectus hoc culpa attigit.

Et hoc magis te, genitor, insontem voca,  
 Quod innocens es dis quoque invitis. Quid est, 205  
 Quod te efferarit, quod novos subfixerit  
 Stimulos dolori? quid te in infernas agit  
 Sedes? quid ex his pellit? Ut careas die? —  
 Cares. — Ut altis nobilem muris domum  
 Patriamque fugias? — Patria tibi vivo perit. — 210  
 Gnatos fugis, matremque? — Ab aspectu omnium  
 Fortuna te submovit; et quidquid potest  
 Auferre cuiquam mors, tibi hoc vita abstulit;  
 Regni tumultus, turba fortunae prior  
 Abscessit a te iussa. Quem, genitor, fugis? 215  
 OEDIP. Me fugio; fugio conscium scelerum omnium  
 Pectus; manumque hanc fugio et hoc coelum et deos;  
 Et dira fugio scelera, quae feci innocens.  
 Ego hoc solum, frugifera quo surgit Ceres,  
 Premo? has ego auras ore pestifero traho? 220  
 Ego laticis haustu satior, aut ullo fruor  
 Almae parentis munere? ego castam manum,  
 Nefandus, incestificus, execrabilis,  
 Attrecto? ego ullos aure concipio sonos,  
 Per quos parentis nomen aut nati audiam 225  
 Utinam quidem rescindere has quirem vias,  
 Manibusque adactis omne, qua voces meant,  
 Aditusque verbis tramite angusto patet,  
 Eruere possem, gnata! iam sensum tui,  
 Quae pars meorum es criminum, infelix pater 230  
 Fugissem. Inhaeret ac recrudescit nefas  
 Subinde; et aures ingerunt, quidquid mihi  
 Donastis oculi. Cur caput tenebris grave  
 Non mitto ad umbras Ditis aeternas? quid hic  
 Manes meos detineo? quid terram gravo? 235  
 Mixtusque Superis erro? quid restat mali?  
 Regnum, parentes, liberi, virtus quoque,  
 Et ingeni sollertis eximium decus  
 Periere: cuncta sors mihi infesta abstulit.



- 240 Lacrimae supererant; has quoque eripuit mihi. —  
Absiste! nullas animus admittit preces,  
Novamque poenam sceleribus quaerit parem.  
Et esse par quae poterit? Infanti quoque  
Decreta mors est. Fata quis tam tristia
- 245 Sortitus unquam? Videram nondum diem,  
Uterque nondum solveram clusi moras:  
Et iam timebar. Protinus quosdam editos  
Nox occupavit, et novae luci abstulit;  
Mors me antecessit. Aliquis intra viscera
- 250 Materna letum praecoquis fati tulit;  
Sed numquid et peccavit? Abstrusum, abditum,  
Dubiumque an essem, sceleris infandi reum  
Deus egit. Illo teste damnavit parens,  
Calidoque teneros transiit ferro pedes,
- 255 Et in alta nemora pabulum misit feris  
Avibusque saevis, quas Cithaeron noxius  
Cruore saepe regio tinctas alit.  
Sed quem deus damnavit, abiecit pater,  
Mors quoque refugit. Praestiti Delphis fidem:
- 260 Genitorem adortus impia stravi nece.  
Hoc aliqua pietas redimet? — Occidi patrem;  
Sed matrem amavi. Proloqui hymenaeum pudeat  
Taedasque nostras; has quoque invitum pati  
Te coge poenas. Facinus ignotum, efferum,
- 265 Inusitatum effare, quod populi horreant,  
Quod esse factum nulla non aetas neget,  
Quod patricidam pudeat. In patrios toros  
Tuli paterno sanguine adpersas manus,  
Scelerisque pretium maius accepi scelus.
- 270 Leve est paternum facinus; in thalamos meos  
Deducta mater, ne parum sceleris foret,  
Foecunda. Nullum crimen hoc maius potest  
Natura ferre. Si quod etiamnum est tamen:  
Qui facere possint, dedimus. Abieci necis
- 275 Pretium paternae sceptrum, et hoc iterum manus

Armavit aliis. Optime regni mei  
 Fatum ipse novi: nemo sine sacro feret  
 Illud cruore. Magna praesagit mala  
 Paternus animus. Iacta iam sunt semina  
 Cladis futurae: spernitur pacti fides; 280  
 Hic occupato cedere imperio negat;  
 Ius ille et icti foederis testes deos  
 Invocat, et Argos exul atque urbes movet  
 Graias in arma. Non levis fessis venit  
 Ruina Thebis: tela, flammae, vulnera 285  
 Instant, et istis si quod est maius malum:  
 Ut esse genitos nemo non ex me sciat.  
 ANT. Si nulla, genitor, causa vivendi tibi est,  
 Haec una abunde est, ut pater gnatos regas  
 Graviter furentes. Tu impii belli minas 290  
 Avertere unus, tuque vecordes potes  
 Inhibere iuvenes, civibus pacem dare,  
 Patriae quietem, foederi laeso fidem.  
 Vitam tibi ipse si negas, multis negas.  
 OEDIP. Illis parentis ullus aut aequi est amor, 295  
 Avidis cruoris, imperi, armorum, doli,  
 Diris, scelestis, breviter ut dicam: meis?  
 Certant in omne facinus, et pensi nihil  
 Ducunt, ubi illos ira praecipites agat;  
 Nefasque nullum, per nefas nati, putant. 300  
 Non patris illos tangit adflicti pudor,  
 Non patria; regno pectus attonitum furit.  
 Scio, quo ferantur, quanta moliri parent;  
 Ideoque leti quaero maturam viam,  
 Morique propero, dum in domo nemo est mea 305  
 Nocentior me. Gnata, quid genubus meis  
 Fles advoluta? quid prece indomitum domas?  
 Unum hoc habet Fortuna, quo possim capi,  
 Invictus aliis: sola tu adfectus potes  
 Mollire duos, sola pietatem in domo 310  
 Docere nostra. Nil grave aut miserum est mihi,

- Quod te sciam voluisse. Tu tantum impetra:  
 Hic Oedipus Aegaea tranabit freta  
 Iubente te; flammisque, quas Siculo vomit  
 315 De monte tellus igneos volvens globos,  
 Excipiet ore; seque serpenti offeret,  
 Quae saeva furto nemoris Herculeo fuit;  
 Iubente te praebebit alitibus iecur;  
 Iubente te vel vivet: . . .
- 

## ACTUS SECUNDUS.

### NUNTIUS, OEDIPUS, ANTIGONE.

*Nuntius, a Thebanis missus, Oedipum obsecrat, ut rediens componat filios. Abiit Oedipus, et in silvas se recipiens filiis diras imprecatur.*

- 320 NUNT. Exemplum iringens regia stirpe editè,  
 Thebae, paventes arma fraterna, invocant;  
 Rogantque tectis arceas patriis faces.  
 Non sunt minae; iam propius accessit malum  
 Nam regna repetens frater et pactas vices  
 325 In bella cunctos Graeciae populos agit;  
 Septena muros castra Thebanos premunt.  
 Succurre; prohibe pariter et bellum et nefas!  
 OEDIP. Ego ille sum, qui scelera committi vetem  
 Et abstinere sanguine a caro manus  
 330 Doceam? magister iuris et amoris pii  
 Ego sum? Meorum facinorum exempla adpetunt;  
 Me nunc sequuntur. Laudo, et agnosco libens.  
 Exhortor, aliquid ut patre hoc dignum gerant!  
 Agite, o propago cara, generosam indolèm  
 335 Probate factis; gloriam ac laudes meas  
 Superate, et aliquid facite, propter quod patrem

Adhuc iuuet vixisse! Facietis, scio:  
 Sic estis orti. Scelere defungi haud levi  
 Aut usitato tanta nobilitas potest;  
 Ferte arma! facibus petite penetrales deos, 340  
 Frugemque flamma metite natalis soli!  
 Miscete cuncta, rapite in exitum omnia!  
 Disiicite passim moenia, in planum date!  
 Templis deos obruite; maculatos lares  
 Conflate! ab imo tota consadat domus! 345  
 Urbs concremetur! primus a thalamis meis  
 Incipiat ignis! ANT. Mitte violentum impetum  
 Doloris, ac te publica exorent mala,  
 Auctorque placidae liberis pacis veni:  
 OEDIP. Vides modestae deditum menti senem, 350  
 Placidaeque amantem pacis ad partes vocas?  
 Tumet animus ira, fervet immensum dolor,  
 Maiusque, quam quod casus et iuvenum furor  
 Conatur, aliquid cupio. Non satis est adhuc  
 Civile bellum: frater in fratrem ruat; 355  
 Nec hoc sat est: quod debet, ut fiat nefas  
 De more nostro, quod meos deceat toros:  
 Date arma patri! — Nemo me ex his eruat  
 Silvis: latebo rupis exesae cavo,  
 Aut sepe densa corpus abstrusum tegam. 360  
 Hinc aucupabor verba rumoris vagi,  
 Et saeva fratrum bella, quod possum, audiam.

## ACTUS TERTIUS.

Ἀνέφελος.

IOCASTA, ANTIGONE, NUNTIUS.

*Iocasta, audito in procinctu stare utramque aciem propere fertur, filios (si fieri possit) in gratiam reductura.*

10 c. **F**elix Agaue: facinus horrendum manu

- Qua fecerat, gestavit et spoliū tulit  
365 Cruenta nati Maenas in partes dati.  
Fecit scelus, sed misera non ultra suum  
Scelus hoc cucurrit. Hoc leve est, quod sum nocens;  
Feci nocentes. Hoc quoque etiamnum leve est;  
Peperi nocentes. Deerat aerumnis meis,  
370 Ut et hostem amarem. Bruma ter posuit nives,  
Et tertia iam falce decubuit Ceres,  
Ut exul errat gnatus et patria caret,  
Profugusque regum auxilia Graiorum rogat.  
Gener est Adrasti, cuius imperio mare,  
375 Quod cingit Isthmos, regitur; hic gentes suas  
Septemque secum regna ad auxilium trahit  
Genero. Quid optem, quidve decernam, haud scio  
Regnum reposcit. Causa repetentis bona est;  
Mala sic petentis. Vota quae faciam parens?  
380 Utrumque natum video: nil possum pie  
Pietate salva facere; quodcunque alteri  
Optabo nato, fiet alterius malo.  
Sed utrumque quamvis diligam adfectu pari:  
Quo causa melior sorsque deterior trahit,  
385 Inclinat animus, semper infirmo favens.  
Miseros magis fortuna conciliat suis.  
NUNT. Regina, dum tu flebiles questus cies,  
Terisque tempus salva, nudatis adest  
Acies in armis; aera iam bellum cient,  
390 Aquilaeque pugnam signifer mota vocat.  
Septena reges bella dispositi parant;  
Animo pari Cadmea progenies subit;  
Cursu citato miles hinc illinc ruit.  
Vide, ut atra nubes pulvere abscondat diem,  
395 Fumoque similes campus in coelum erigat  
Nebulas, equestri fracta quas tellus pede  
Submittit; et, si vera metuentes vident,  
Infesta fulgent signa; subrectis adest

Frons prima telis; aurea clarum nota  
 Nomen ducum vexilla praescriptum ferunt. 400  
 I, redde amorem fratribus, pacem omnibus,  
 Et impia arma matris oppositu impedi!  
 ANT. Perge, o parens, et concita celerem gradum!  
 Compesce tela; fratribus ferrum excute;  
 Nudum inter enses pectus infestos tene; 405  
 Aut solve bellum, mater, aut prima excipe!  
 IO C. Ibo, ibo, et armis obvium opponam caput;  
 Stabo inter arma. Petere qui fratrem volet,  
 Petat ante matrem. Tela, qui fuerit pius,  
 Rogante ponat matre; qui non est pius, 410  
 Incipiat a me. Fervidos iuvenes anus  
 Tenebo. Nullum teste me fiet nefas;  
 Aut si aliquod et me teste committi potest,  
 Non fiet unum. ANT. Signa collatis micant  
 Vicina signis; clamor hostilis fremit. 415  
 Scelus in propinquo est: occupa, mater, preces.  
 Et ecce! motos fletibus credas meis  
 Sic agmen armis segne compositis venit.  
 NUNT. Procedit acies tarda, sed properant duces.  
 IO C. Quis me procellae turbine insano vehens 420  
 Volucer per auras ventus aetherias aget?  
 Quae Sphinx, vel atra nube subtexens diem  
 Stymphalis, avidis praepetem pennis feret?  
 Aut quae per altas aëris rapiet vias  
 Harpyia, saevi regis observans famem, 425  
 Et inter acies proiciet raptam duas?  
 NUNT. Vadit furenti similis, aut etiam furit!  
 Sagitta qualis Parthica velox manu  
 Excussa fertur; qualis insano ratis  
 Premente vento rapitur; aut qualis cadit 430  
 Delapsa coelo stella, cum stringens polum  
 Rectam citatis ignibus rumpit viam  
 Attonita cursu fugit, et binas statim  
 Diduxit acies. Victa maternâ prece

- 435 Haesere bella, iamque in alternam necem  
 Illinc et hinc miscere cupientes manum  
 Vibrata dextra tela suspensa tenent.  
 Paci favetur; omnium ferrum iacet  
 Cessatve tectum, vibrat in fratrum manu.
- 440 Laniata canas mater ostendit comas;  
 Rogat abnuentes; irrigat fletu genas.  
 Negare matri, qui diu dubitat, potest.
- 

## ACTUS QUARTUS.

*IOCASTA, POLYNICES, ETEOCLES.*

*Iocasta utrumque filium serio precatur, ut similitate posita  
 in gratiam et amorem redire velint. Eteocles impie respondet.*

- 10 c. In me arma et ignes vertite! in me omnis ruat  
 Unam iuventus, quaeque ab Inachio venit
- 445 Animosa muro, quaeque Thebana ferox  
 Descendit arce! civis atque hostis simul  
 Hunc petite ventrem, qui dedit fratres viro!  
 Haec membra passim spargite ac divellite:  
 Ego utrumque peperī. Ponitis ferrum ocus?
- 450 An dico, et ex quo? Dexteras matri date!  
 Date, dum piaē sunt! Error invitos adhuc  
 Fecit nocentes; omne Fortunae fuit  
 Peccantis in nos crimen: hoc primum nefas  
 Inter scientes geritur. In vestra manu est,
- 455 Utrum velitis. Sancta si pietas placet:  
 Donate matrem pace; si placuit scelus:  
 Maius paratum est: media se opponit parens.  
 Proinde bellum tollite, aut belli moram.  
 Sollicita nunc cui mater alterna prece
- 460 Verba admovebo? misera quem amplectar prius?

In utramque partem ducor adfectu pari.  
 Hic abfuit; sed pacta si fratrum valent,  
 Nunc alter aberit. Ergo iam nunquam duos,  
 Nisi sic, videbo? lunge complexus prior  
 'Tu, qui, labores totque perpessus mala, 465  
 Longo parentem fessus exilio vides!  
 Accede propius; clude vagina impium  
 Ensem, et trementem iamque cupientem excuti  
 Hastam solo defige! Maternum tuo  
 Coire pectus pectori clypeus vetat: 470  
 Hunc quoque repone. Vinculo frontem exue,  
 Tegimenque capitis triste belligeri leva,  
 Et ora matri redde! Quo vultus refers,  
 Acieque pavida fratris observas manum?  
 Adfusa totum corpus amplexu tegam; 475  
 Tuo cruori per meum fiet via.  
 Quid dubius haeres? an times matris fidem?  
 P O L. Timeo: nihil iam iura naturae valent.  
 Post ista fratrum exempla ne matri quidem  
 Fides habenda est. I O C. Redde iam capulo manum, 480  
 Adstringe galeam, laeva se clypeo ingerat;  
 Dum frater exarmatur, armatus mane.  
 Tu pone ferrum, causa qui es ferri prior.  
 Si pacis odium est, furere si bello placet:  
 Inducias te mater exiguas rogat, 485  
 Ferat ut reverso post fugam gnato oscula  
 Vel prima, vel suprema. Dum pacem peto,  
 Audite inermes: ille te, tu illum times;  
 Ego utrumque, sed pro utroque. Quid strictum  
 abnuis  
 Recondere enses? Qualibet gaude mora: 490  
 Id gerere bellum cupitis, in quo est optimum  
 Vinci. Vereris fratris infesti dolos?  
 Quoties necesse est fallere aut falli a suis,  
 Patiari potius ipse, quam facias, scelus.  
 Sed ne verere: mater insidias et hinc 495



- Et rursus illinc abiget. Exoro, an patri  
Invideo vestro? veni, ut arcerem nefas,  
An ut viderem propius? — Hic ferrum abdidit,  
Reclinis hastam, et arma defixa incubans.
- 500 Ad te preces nunc, gnate, maternas feram;  
Sed ante lacrimas. Teneo longo tempore  
Petita votis ora. Te profugum solo  
Patrio penates regis externi tegunt:  
Te maria tot diversa, tot casus vagum
- 505 Egere: non te duxit in thalamos parens  
Comitata primos, nec sua festas manu  
Ornavit aedes, nec sua laetas faces  
Vitta revinxit; dona non auro graves  
Gazas socer, non arva, non urbes dedit:
- 510 Dotale bellum est. Hostium es factus gener,  
Patria remotus, hospes alieni laris,  
Externa consecutus, expulsus tuis,  
Sine crimine exul. Ne quid e fatis tibi  
Deesset paternis, hoc quoque ex illis habes,
- 515 Errasse thalamis. Gnate, post multos mihi  
Remisse soles; gnate suspensae metus  
Et spes parentis, cuius adspectum deos  
Semper rogavi; cum tuus reditus mihi  
Tantum esset erepturus adventu tuo,
- 520 Quantum daturus: „Quando pro te desinam,“  
Dixi, „timere?“ Dixit irridens deus:  
Ipsam timebis. Nempe nisi bellum foret,  
Ego te carerem; nempe si tu non fores,  
Bello carerem. Triste conspectus datur
- 525 Pretium tui durumque; sed matri placet.  
Hinc modo recedant arma, dum nullum nefas  
Mars saevus audet. Hoc quoque est magnum nefas,  
Tam prope fuisse. Stupeo et exanguis tremo,  
Cum stare fratres hinc et hinc video duos
- 530 Sceleris sub ictu; membra quassantur metu.  
Quam paene mater maius adspexi nefas,

Quam quod miser videre non potuit pater!  
Licet timore facinoris tanti vacem,  
Videamque iam nil tale, sum infelix tamen,  
Quod paene vidi. Per decem mensum graves 535  
Uteri labores, perque pietatem inclitae  
Precor sororis, et per irati sibi  
Genas parentis, scelere quas nullo nocens,  
Erroris a se dira supplicia exigens,  
Hausit: nefandas moenibus patriis faces 540  
Averte; signa bellici retro agminis  
Flecte! ut recedas, magna pars sceleris tamen  
Vestri peracta est: vidit hostili grege  
Campos repleri patria; fulgentes procul  
Armis catervas vidit. Equitatu levi 545  
Cadmea frangi prata, et excelsos rotis  
Volitare procures; igne flagrantes trabes  
Fumare, cineri quae petunt nostras domos;  
Fratresque (facinus quod novum et Thebis fuit)  
In se ruentes — totus hoc exercitus, 550  
Hoc utrinque populus omnis, hoc vidit soror,  
Genitrixque vidi: nam pater debet sibi,  
Quod ista non spectavit. Occurrat tibi  
Nunc Oedipus, quo iudice erroris quoque  
Poenae petuntur. Ne, precor, ferro erue 555  
Patriam ac penates; neve, quas regere expetis,  
Everte Thebas! Quis tenet mentem furor?  
Patriam petendo perdis? ut fiat tua,  
Vis esse nullam? Quin tuae causae nocet  
Ipsam hoc, quod armis uris infestis solum, 560  
Segetesque adultas sternis, et totos fugam  
Edis per agros: nemo sic vastat sua.  
Quae corripi igne, quae meti gladio iubes,  
Aliena credis? Rex sit e vobis uter,  
Manente regno quaerite. Haec telis petes 565  
Flammisque tecta? poteris has Amphionis  
Quassare moles, nulla quas struxit manus,

- Stridente tardum machina ducens onus;  
Sed convocatus vocis et citharae sono  
570 Per se ipse turres venit in summas lapis?  
Haec saxa franges victor? hinc spolia auferes.  
Vinctosque duces patris aequales tui?  
Matres ab ipso coniugum raptas sinu  
Saevus catena miles imposita trahet?  
575 Ut adulta virgo mixta captivo gregi  
Thebana nuribus munus Argolicis eat?  
An et ipsa palmas vincta post tergum datas  
Mater triumphi praeda fraterni vehar?  
Potesne cives laetus exitio datos  
580 Videre passim? moenibus caris potes  
Hostem admovere? sanguine et flamma potes  
Implere Thebas? Tam ferum et durum geris  
Saevumque in iras pectus, et nondum imperas  
Quid sceptrum facient? Pone vesanos, precor,  
585 Animi tumores, teque pietati refer!  
POL. Ut profugus errem semper? ut patria arctar,  
Opemque gentis hospes externae sequar?  
Quid paterer aliud, si fefellissem fidem,  
Si peierassem? Fraudis alienae dabo  
590 Poenas, at ille praemium scelerum feret?  
Iubes abire: matris imperio obsequor  
Da, quo revertar. Regia frater mea  
Habitet superbus; parva me abscondat casa.  
Hanc date repulso! Liceat exiguo lare  
595 Pensare regnum! Coniugi donum datus,  
Arbitria thalami dura felicitis feram,  
Humilisque socerum lixa dominantem sequar?  
In servitutem cadere de regno grave est.  
10 C. Si regna quaeris, nec potest sceptro manus  
600 Vacare saevo: multa, quae possunt peti  
In orbe toto, quaelibet tellus dabit.  
Hinc nota Baccho Tmolos attollit iuga,  
Qua lata terris spatia frugiferis iacent,

Et qua trahens opulenta Pactolus vada  
 Inundat auro rura. Nec laetis minus 605  
 Maeandros arvis flectit errantes aquas;  
 Rapidusque campos fertiles Hebrus secat.  
 Hinc grata Cœteri Gargara et dives solum,  
 Quod Xanthus ambit nivibus Idaeis tumens;  
 Hinc, qua relinquit nomen, Ionii maris 610  
 Fauces Abydo Sestos opposita premit.  
 Aut, qua latus iam propius Orienti dedit,  
 Tutamque crebris portubus Lyciam videt:  
 Haec regna ferro quaere; in hos populos ferat  
 Socer arma fortis; has paret sceptro tuo 615  
 Tradatque gentes. Hoc adhuc regimen puta  
 Tenere patrem. Melius exilium est tibi,  
 Quam reditus iste: crimine alieno exulas,  
 Tuo redibis. Melius istis viribus  
 Nova regna nullo scelere maculata adpetes. 620  
 Quin ipse frater, arma comitatus tua,  
 Tibi militabit. Vade et id bellum gere,  
 In quo pater materque pugnanti tibi  
 Favere possint! regna cum scelere omnibus  
 Sunt exilis graviora. Nunc belli mala 625  
 Propone, dubias Martis incerti vices.  
 Licet omne tecum Graeciae robur trahas;  
 Licet arma longe miles ac late explicet;  
 Fortuna belli semper ancipiti in loco est.  
 Quodcunque Mars decrevit: exaequat duos, 630  
 Licet impares sint, gladius, et spes et metus  
 Sors coeca versat. Praemium incertum petis,  
 Certum scelus. Favisce fac votis deos  
 Omnes tuis: cessere et aversi fugam  
 Petiere cives; clade funesta iacent; 635  
 Obtexit agros miles. Exultes licet,  
 Victorque fratris spolia deiecti geras  
 Frangenda palma est. Quale tu hoc bellum putas,  
 In quo execrandum victor admittit nefas,

104 L. ANN. SENECAE PHOENISSAE. ACT. IV.

- 640 Si gaudet? Hunc, quem vincere infelix cupis,  
Cum viceris, lugebis. Infaustas, age,  
Dimitte pugnas; libera patriam metu,  
Luctu parentes. P O L. Sceleris et fraudis suae  
Poenas nefandus frater ut nullas ferat?
- 645 I O C. Ne metue: poenas, et quidem solvet graves:  
Regnabit. P O L. Haecne est poena? I O C. Si du-  
bitas, avo  
Patrique crede; Cadmus hoc dicet tibi,  
Cadmique proles. Sceptra Thebarum fuit  
Impune nulli gerere; nec quisquam fide
- 650 Rupta tenebat illa. Iam numeres licet  
Fratrem inter istos. P O L. Numero. E T E. At est  
tanti mihi  
Cum regibus iacere. Te turbae exulum  
Adscribo. P O L. Regna, dummodo invisus tuis!  
E T E. Regnare non vult, esse qui invisus timet.
- 655 Simul ista mundi conditor posuit deus,  
Odium atque regnum. Regis hoc magni reor,  
Odia ista premere. Multa dominantem vetat  
Amor suorum; plus in iratos licet.  
P O L. Qui vult amari, languida regnet manu.
- 660 Invisa nunquam imperia retinentur diu.  
E T E. Praecepta melius imperi reges dabunt;  
Exilia tu dispone. Pro regno velim  
Patriam, penates, coniugem flammis dare.  
Imperia pretio quolibet constant bene.

---

*Deest, et magna pars huius Tragoediae intercidit.*

# H I P P O L Y T U S.

---

## DRAMATIS PERSONAE.

*HIPPOLYTUS.*

*PHAEDRA.*

*THESEUS.*

*CHORUS CIVIUM ATHENIEN-  
SIUM.*

*NUNTIUS.*

*NUTRIX.*

*FAMULI.*

---

## ARGUMENTUM.

Hippolyti, Thesei ex Antiope Amazone filii, Dianam virginem ac venatricem colentis, absente apud Inferos Theseo, noverca Phaedra castitatem oppugnat. Repulsa impudica mulier Theseo reduci privignum oblata per vim stupri insimulat. Ille credulus filio, qui domo fugerat, e votis quod restabat tertio fretus, absenti mortem imprecatur. Ratum facit votum Neptunus emissio tauro marino, qui equos Hippolyti consternat, unde per vepres et saxa distractus auriga dilaniatur. Quod ubi rescivit male sibi conscia mulier, scelus suum falsumque crimen apud maritum confessa gladio se transfigit. Theseus innoxii filii casum lugens, iramque suam detestatus, collectos passim artus composuit.

---

## ALIUD ARGUMENTUM

### *HIERONYMI BALBI.*

- Pirithoum Theseus Stygia comitatus ab unda est,  
Tartareo dominam cupiens abducere regno.  
Concipit interea validas in pectore flammās  
Phaedra furens, vetito privigni et carpitur igne.
- 5 Ille novercalem generosa mente furorem  
Sustinet, et tenerum servat sine labe pudorem.  
Nusquam tuta homini probitas: heu! crimine foedo  
Thesidem insimulat fallaci corde noverca.  
Hippolyte infelix, sacro damnatus et acri
- 10 Exitio, immeritas solvisti sanguine poenas.  
Haec ubi rescivit, stimulis accensa profanis,  
Phaedra, suum vertit polluta in pectora ferrum.
-

## ACTUS PRIMUS.

### HIPPOLYTUS.

*Hippolytus varia loca et munera ministris et venationis comitibus dispertit; Dianamque venationis deam invocat.*

Ite, umbrosas cingite silvas,  
Summaque montis iuga Cecropii!  
Celeri planta lustrate vagi,  
Quae saxoso loca Parnethi  
Subiecta iacent; quae Thriasiiis 5  
Vallibus amnis rapida currens  
Verberat unda! scandite colles  
Semper canos nive Rhiphaea!  
Hac, hac alii, qua nemus alta  
Textitur alno; qua prata iacent, 10  
Quae rorifera mulcens aura  
Zephyrus vernas evocat herbas;  
Ubi per graciles lenis Ilissus,  
Ut Maeander super aequales,  
Labitur agros piger, et steriles 15  
Amne maligno radit arenas!  
Vos, qua Marathon tramite laevo  
Saltus aperit; qua comitatae  
Gregibus parvis nocturna petunt  
Pabula foetae! vos, qua, tepidis 20  
Subditus austris, frigora mollit  
Durus Acharneus! alius rupem  
Dulcis Hymetti, parvas alius  
Calcet Aphidnas. Pars illa diu  
Vacat immunis, qua curvati 25  
Littora ponti Sunion urget.  
Si quem tangit gloria silvae,  
Vocat hunc Phlyeus: hic versatur



- Metus agricolis, vulnere multo  
30 Iam notus aper. At vos laxas  
Canibus tacitis mittite habenas;  
Teneant acres lora Molossos,  
Et pugnaces tendant Cretes  
Fortia trito vincula collo;  
35 At Spartanos (genus est audax  
Avidumque ferae) nodo cautus  
Propiore liga. Veniet tempus,  
Cum latratu cava saxa sonent:  
Nunc dimissi nare sagaci  
40 Captent auras, lustraque presso  
Quaerant rostro, dum lux dubia est,  
Dum signa pedum roscida tellus  
Impressa tenet. Alius raras  
Cervice gravi portare plagas,  
45 Alius teretes properet laqueos.  
Picta rubenti linea penna  
Vano cludat terrore feras.  
Tibi libretur missile telum.  
Tu grave dextra laevaue simul  
50 Robur lato dirige ferro.  
Tu praecipites clamore feras  
Subsessor ages; tu iam victor  
Curvo solves viscera cultro.  
Ades en comiti, diva virago,  
55 Cuius regno pars terrarum  
Secreta vacat;  
Cuius certis petitur telis. IV 7. 16  
Fera, quae gelidum potat Araxen,  
Et quae stanti ludit in Istro.  
60 Tua Gaetulos dextra leones,  
Tua Cretaeas sequitur cervas;  
Nunc veloces figis damas  
Leviore manu.  
Tibi dant variae pectora tigres,

# HIPPOLYTUS. ACT. I.

109

Tibi villosi terga bisontes,	63
Latisque feri cornibus uri.	
Quidquid solis pascitur arvis,	
Sive illud inops novit Garamas,	
Sive illud Arabs divite silva,	
Sive ferocis iuga Pyrenes,	70
Sive Hyrcani celant saltus,	
Vacuisque vagus Sarmata campis:	
Arcus metuit, Diana, tuos.	
Tua si gratus numina cultor	
Tulit in saltus:	75
Retia vinctas tenuere feras	
Nulli laqueum rupere pedes,	
Fertur plaustro praeda gementi;	
Tum rostra canes sanguine multo	
Rubicunda gerunt, repetitque casas	80
Rustica longo turba triumpho.	
En, diva, faves;	
Signum arguti misere canes:	
Vocor in silvas. Hac, hac pergam,	
Qua via longum compensat iter!	85

## PHAEDRA, NUTRIX.

*Phaedra amore Hippolyti ardere se fatetur apud nutricem, frustra eam a tam nefando amore dehortantem.*

PH. O magna vasti Creta dominatrix freti,	
Cuius per omne littus innumerae rates	
Tenuere pontum, quidquid Assyria tenuis	
Tellure Nereus pervium rostris secat,	
Cur me in penates obsidem invisos datam,	90
Hostique nuptam, degere aetatem in malis	
Lacrimisque cogis? Profugus en! coniux abest,	
Praestatque nuptae, quam solet, Theseus fidem.	
Fortis per altas invii retro lacus	
Vadit tenebras miles audacis proci	95

- Solio ut revulsam regis inferni abstrahat,  
Pergit furoris socius. Haud illum timor,  
Pudorque tenuit: stupra et illicitos toros  
Acheronte in imo quaerit Hippolyti pater.
- 100 Sed maior alius incubat moestae dolor.  
Non me quies nocturna, non altus sopor  
Solvere curis: alitur et crescit malum,  
Et ardet intus, qualis Aetnaeo vapor  
Exundat antro. Palladis telae vacant,
- 105 Et inter ipsas pensa labuntur manus;  
Non colere donis templa votivis libet;  
Non inter aras, Atthidum mixtam choris,  
Iactare tacitis conscias sacris faces;  
Nec adire castis precibus aut ritu pio
- 110 Adiudicatae praesidem terrae deam:  
Iuvat excitatas consequi cursu feras,  
Et rigida molli gaesa iaculari manu.  
Quo tendis, anime? quid furens saltus amas?  
Fatale miserae matris agnosco malum
- 115 Peccare noster novit in silvis amor.  
Genitrix, tui me miseret: infando malo  
Correpta, pecoris efferi saevum ducem  
Audax amasti. Torvus, impatiens iugi,  
Adulter ille, ductor indomiti gregis;
- 120 Sed amabat aliquid: quis meas miserae deus,  
Aut quis iuvare Daedalus flammam queat?  
Non, si ille remeet arte Mopsopia potens,  
Qui nostra coeca monstra conclusit domo,  
Promittat ullam casibus nostris opem.
- 125 Stirpem perosa Solis invisi Venus  
Per nos catenas vindicat Martis sui  
Suasque; probris omne Phoebeum genus  
Onerat nefandis. Nulla Minois levi  
Defuncta amore est; iungitur semper nefas.
- 130 NUTR. Thesea confux, clara progenies Iovis,  
Nefanda casto pectore exturba ocios!

Extingue flammās, neve te dirae spei  
 Praebe obsequentem. Quisquis in primo obstitit,  
 Populitque amorem, tutus ac victor fuit;  
 Qui blandiendo dulce nutrit malum, 135  
 Sero recusat ferre, quod subiit, iugum.  
 Nec me fugit, quam durus et veri insolens  
 Ad recta flecti regius nolit tumor.  
 Quemcunque dederit exitum casus, feram:  
 Fortem facit vicina libertas senem. 140  
 Honestā primum est velle, nec labi via;  
 Pudor est secundus, nosse peccandi modum.  
 Quo, misera, pergis? quid domum infamem adgravas,  
 Superasque matrem? maius est monstro nefas:  
 Nam monstra fato, moribus scelera imputes. 145  
 Si, quod maritus supera non cernit loca,  
 Tutum esse facinus credis, et vacuum metu:  
 Erras. Teneri crede Lethaeo abditum  
 Thesea profundo, et ferre perpetuam Styga:  
 Quid ille, lato maria qui regno premit, 150  
 Populisque reddit iura centenis pater?  
 Latere tantum facinus occultum sinet?  
 Sagax parentum est cura. Credamus tamen  
 Astu doloque tegere nos tantum nefas:  
 Quid ille, rebus lumen infundens suum, 155  
 Matris parens? quid ille, qui mundum quatit,  
 Vibrans corusca fulmen Aetnaeum manu,  
 Sator deorum? credis hoc posse effici,  
 Inter videntes omnia ut lateas avos?  
 Sed, ut secundus numinum abscondat favor 160  
 Coitus nefandos, utque contingat stupro  
 Negata magnis sceleribus semper fides:  
 Quid poena praesens, consciae noctis pavor,  
 Animusque culpa plenus et semet timens?  
 Scelus aliqua tutum, nulla securum tulit. 165  
 Compesce amoris impii flammās, precor,  
 Nefasque, quod non ulla tellus barbara

- Commisit unquam, non vagi campis Getae,  
 Nec inhospitalis Taurus, aut sparsus Scythes!
- 170 Expelle facinus mente castifica horridum;  
 Memorque matris, metue concubitus novos.  
 Miscere thalamos patris et gnati adparas,  
 Uteroque prolem capere confusam impio?  
 Perge, et nefandis verte naturam ignibus!
- 175 Cur monstra cessant? aula cur fratris vacat?  
 Prodigia toties orbis insueta audiet,  
 Natura toties legibus cedit suis,  
 Quoties amabit Cressa? P.H. Quae memoras, scio  
 Vera esse, nutrix; sed furor cogit sequi
- 180 Peiora. Vadit animus in praeceps sciens  
 Remeatque, frustra sane consilia adpetens.  
 Sic cum gravatam navita adversa ratem  
 Propellit unda, cedit in vanum labor,  
 Et victa prono puppis aufertur vado.
- 185 Quid ratio possit? Vicit ac regnat furor,  
 Potiensque tota mente dominatur deus.  
 Hic, volucer, omni pollet in terra potens,  
 Laesumque flammis torret indomitis Iovem;  
 Gradivus istas belliger sensit faces;
- 190 Opifex trisulci fulminis sensit deus,  
 Et, qui furentes semper Aetnaeis iugis  
 Versat caminos, igne tam parvo calet;  
 Ipsumque Phoebum, tela qui nervo regit,  
 Figit sagitta certior missa puer,
- 195 Volitatque coelo pariter et terrae gravis.  
 NUTR. Deum esse amorem, turpis et vitio favens  
 Finxit libido; quæque liberior foret,  
 Titulum furori numinis falsi addidit.  
 Natum per omnes scilicet terras vagum
- 200 Erycina mittit! Ille per coelum volans  
 Proterva tenera tela molitur manu,  
 Regnumque tantum minimus e Superis habet!  
 Vana ista demens animus adscivit sibi,

Venerisque numen finxit atque arcus dei.

Quisquis secundis rebus exultat nimis, 205

Fluitque luxu, semper insolita adpetit.

Tunc illa magnae dira fortunae comes

Subit libido: non placent suetae dapes,

Non tecta sani moris, aut vilis cibus.

Cur in penates rarius tenues subit 210

Haec delicatas eligens pestis domos?

Cur sancta parvis habitat in tectis Venus,

Mediumque sanos vulgus adfectus tenet,

Et se coercent modica? Contra divites

Regnoque fulti plura, quam fas est, petunt? 215

Quod non potest, vult posse, qui nimium potest.

Quid deceat alto praeditam solio, vides:

Metue ac verere sceptrā remeantis viri.

P H. Amoris in me maximum regnum puto,

Reditusque nullos metuo: non unquam amplius 220

Convexa tetigit supera, qui mersus semel

Adiit silentem nocte perpetua domum.

N U T R. Ne crede Diti. Cluserit regnum licet,

Canisque diras Stygius observet fores:

Solus negatas invenit Theseus vias. 225

P H. Veniam ille amori forsitan nostro dabit.

N U T R. Immitis etiam coniugi castae fuit:

Experta saevam est barbara Antiope manum.

Sed posse flecti coniugem iratum puta:

Quis huius animum flectet intractabilem? 230

Exosus omne feminae nomen fugit,

Immitis annos coelibī vitae dicat,

Connubia vitat: genus Amazonium scias.

P H. Hunc in nivosi collis haerentem iugis,

Et aspera agili saxa calcantem pede, 235

Sequi per alta nemora, per montes, placet!

N U T R. Resistet ille, seque mulcendum dabit,

Castosque ritus venere non casta exuet?

Tibi ponet odium, cuius odio forsitan

240 Persequitur omnes? P H. Precibus haud vinci potest?

NUTR. Ferus est. P H. Amore didicimus vinci feros.

NUTR. Fugiet. P H. Per ipsa maria, si fugiat, sequar.

NUTR. Patris memento. P H. Meminimus matris simul.

NUTR. Genus omne profugit. P H. Pellicis careo metu.

245 NUTR. Aderit maritus ... P H. Nemp Pirithoi comes.

NUTR. Aderitque genitor. P H. Mitis Ariadnae pater.

NUTR. Per has senectae splendoras supplex comas

Fessumque curis pectus et cara ubera

Precor, furorem siste teque ipsa adiuva!

250 Pars sanitatis velle sanari fuit.

P H. Non omnis animo cessit ingenuo pudor:

Paremus, altrix. Qui regi non vult amor,

Vincatur. Haud te, fama, maculari sinam.

Haec sola ratio est, unicum effugium mali:

255 Virum sequamur, morte praevertam nefas.

NUTR. Moderare, alumna, mentis effrenae impetus:

Animos coerce! Dignam ob hoc vita reor,

Quod esse temet autumas dignam nece.

P H. Decreta mors est: quaeritur fati genus.

260 Laqueone vitam finiam, an ferro incubem?

An missa praeceps arce Palladia cadam?

Pro castitatis vindice armemus manum!

NUTR. Sic te senectus nostra praecipiti sinat

Perire leto? Siste furibundum impetum!

{ 265 Haud facile quisquam ad vitam revocari potest.

P H. Prohibere ratio nulla perituum potest

Ubi, qui mori constituit, et debet mori.

NUTR. Solamen annis unicum fessis, hera,

Si tam protervus incubat menti furor:

! 270 Contemne famam. Fama vix vero favet,

Peius merenti melior, at peior bono.

Tentemus animum tristem et intractabilem.  
 Meus iste labor est adgredi iuvenem ferum,  
 Mentemque saevam flectere immitis viri.

CHORUS.

*Omnia amoris cedere, homines omnis loci, aetatis, conditionis, ipsos deos superos ac inferos, quin et bruta animalia terrestria, aquatilia, aëria.*

Diva, non miti generata ponto, 275  
 Quam vocat matrem geminus Cupido,  
 Impotens flammis simul et sagittis,  
 Iste lascivus Puer ac renidens  
 Tela quam certo moderatur arcu! *IV. 7, 16*  
 [Labitur totas furor in medullas, 280  
 Igne furtivo populante venas.]  
 Non habet latum data plaga frontem,  
 Sed vorat tectas penitus medullas.  
 Nulla pax isti Puero: per orbem  
 Spargit effusas agilis sagittas; 285  
 Quaeque nascentem videt ora solem,  
 Quaeque ad Hesperias facit ora metas,  
 Si qua ferventi subiecta Cancro est,  
 Si qua Parrhasiae glacialis Ursae  
 Semper errantes patitur colonos, 290  
 Novit hos aestus. Iuvenum feroces  
 Concitat flammis, senibusque fessis  
 Rursus extinctos revocat calores;  
 Virginum ignoto ferit igne pectus.  
 Et iubet coelo Superos relicto 295  
 Vultibus falsis habitare terras.  
 Thessali Phoebus pecoris magister  
 Egit armentum, positoque plectro  
 Impari tauros calamo vocavit.  
 Induit formas quoties minores 300  
 Ipse, qui coelum nebulasque ducit!



- Candidas ales modo movit alas,  
 Dulcior vocem moriente cygno;  
 Fronte nunc torva petulans iuvenus  
 305 Virginum stravit sua terga ludo,  
 Perque fraternos, nova regna, fluctus,  
 Ungula lentos imitante remos,  
 Pectore adverso domuit profundum,  
 Pro sua vector timidus rapina.  
 310 Arsit obscuri dea clara mundi  
 Nocte deserta nitidosque fratri  
 Tradidit currus aliter regendos:  
 Ille nocturnas agitare bigas  
 Discit, et gyro brevior flecti;  
 315 Nec suum tempus tenuere noctes,  
 Et dies tardo remeavit ortu,  
 Dum tremunt axes graviore curru.  
 Natus Alcmena posuit pharetram,  
 Et minax vasti spolium leonis,  
 320 Passus aptari digitis zmaragdus,  
 Et dari legem rudibus capillis;  
 Crura distincto religavit auro,  
 Luteo plantas cohibente socco;  
 Et manu, clavam modo qua gerebat,  
 325 Fila deduxit properante fuso.  
 Vidit Persis, ditique ferox  
 Lydia regno, deiecta feri  
 Terga leonis; humerisque, quibus  
 Sederat alti regia coeli,  
 330 Tenuem Tyrjo stamine pallam.  
 Sacer est ignis (credite laesis!)  
 Nimiumque potens. Qua terra salo  
 Cingitur alto, quaque aetherio  
 Candida mundo sidera currunt,  
 335 Hac regna tenet Puer immitis,  
 Spicula cuius sentit in imis  
 Caerulus undis grex Nereïdum,

7.15  
 7.15

7.37  
 7.37

III 4.1  
 III 4.1

Flammamque nequit relevare mari;  
 Ignes sentit genus aligerum.  
 Venere instincti quam magna gerunt 340  
 Grege pro toto bella iuveni!  
 Si coniugio timuere suo,  
 Poscunt timidi proelia carvi,  
 Et mugitu dant concepti  
 Signa furoris. Tunc virgatas 345  
 India tigres decolor horret;  
 Tunc vulnificos acuit dentes  
 Aper, et toto spumeus ore est.  
 Poeni quatiunt colla leones, } III 2.7  
 Cum movit amor. Tum silva gemit 350  
 Murmure saevo.  
 Amat insani bellua ponti,  
 Lucaeque boves. Vindicat omnes  
 Natura sibi; nihil immune est;  
 Odiumque perit, cum iussit amor; 355  
 Veteres cedunt ignibus irae.  
 Quid plura canam?  
 Vincit saevas cura novercas.

## ACTUS SECUNDUS.

CHORUS, NUTRIX, PHAEDRA.

*Amoris morbum, impatientiam et aestum conqueritur nutrix.  
 Mox ipsa prodit Phaedra mutatis vestibis in cinctum Amazonis seu venatricis, ut Hippolyto placeat.*

CHOR. Altrix, profare, quid feras? quonam in  
 loco est  
 Regina? saevis ecquis est flammis modus? 360

- NUTR. Spes nulla, tantum posse leniri malum;  
 Finisque flammis nullus insanis erit.  
 Torretur aestu tacito, et inclusus quoque,  
 Quamvis tegatur, proditur vultu furor;  
 365 Erumpit oculis ignis, et lapsae genae  
 Lucem recusant. Nihil idem dubiae placet,  
 Artusque varie iactat incertus dolor.  
 Nunc, ut soluto, labitur, moriens gradu,  
 Et vix labante sustinet collo caput;  
 370 Nunc se quieti reddit, et somni immemor  
 Noctem querelis ducit. Attolli iubet,  
 Iterumque poni, corpus; et solvi comas,  
 Rursusque fingi. Semper impatiens sui  
 Mutatur habitus. Nulla iam Cereris subit  
 375 Cura, aut salutis. Vadit incerto pede,  
 Iam viribus defecta. Non idem vigor,  
 Non ora tingens nitida purpureus rubor:  
 Populatur artus cura; iam gressus tremunt  
 Tenerque nitidi corporis cecidit decor;  
 380 Et, qui ferebant signa Phoebeae facis,  
 Oculi nihil gentile nec patrium micant.  
 Lacrimae cadunt per ora, et adsiduo genae  
 Rore irrigantur, qualiter Tauri iugis  
 Tepido madescunt imbre percussae nives.  
 385 Sed, en, patescunt regiae fastigia!  
 Reclinis ipsa sedis auratae toro  
 Solitos amictus mente non sana abnuit.  
 RH. Removete, famulae, purpura atque auro illitas  
 Vestes! procul sit muricis Tyrii rubor,  
 390 Quae fila ramis ultimi Seres legunt:  
 Brevis expeditos zona constringat sinus.  
 Cervix monili vacua; nec niveus lapis  
 Deducat aures, Indici donum maris.  
 Odore crinis sparsus Assyrio vacet:  
 395 Sic temere iactae colla perfundant comae  
 Humerosque summos; cursibus motae citis

III 2.3

II 4, 2  
III 8, 11

Ventos sequantur. Laeva se pharetrae dabit:  
 Hastile vibret dextra Thessalicum manus.  
 Talis severi mater Hippolyti fuit.  
 Qualis, relictis frigidi ponti plagis, 400  
 Egit catervas, Atticum pulsans solum,  
 Tanaitis aut Maeotis, et nodo comas  
 Coegit emisitque, lunata latus  
 Protecta pelta: talis in silvas ferar!  
 N U T R. Sepone questus: non levat miseros dolor; 405  
 Agreste placa virginis numen deae.  
 Regina nemorum, sola quae montes colis,  
 Et una solis montibus coleris dea,  
 Convertite tristes ominum in melius minas!  
 O magna silvas inter et lucos dea, 410  
 Clarumque coeli sidus et noctis decus,  
 Cuius relucet mundus alterna face,  
 Hecate triformis, en, ades coeptis favens!  
 Animum rigentem tristis Hippolyti doma!  
 Amare discat, mutuos ignes ferat, 415  
 Det facilis aures! Mitiga pectus ferum;  
 Innecte mentem. Torvus, aversus, ferox,  
 In iura Veneris redeat. Huc vires tuas  
 Intende. Sic te lucidi vultus ferant,  
 Et nube rupta cornibus puris eas. 420  
 Sic te, regentem frena nocturni aetheris,  
 Detrahare nunquam Thessali cantus queant,  
 Nullusque de te gloriam pastor ferat.  
 Ades invocata; iam faves votis, dea:  
 Ipsum intuo solempne venerantem sacrum, 425  
 Nullo latus comitante. Quid dubitas? dedit  
 Tempus locumque casus: utendum artibus.  
 Trepidamus? Haud est facile mandatum scelus  
 Audere; verum iusta, qui reges timet,  
 Deponat; omne pellat ex animo decus: 430  
 Malus est minister regii imperii pudor.

*HIPPOLYTUS, NUTRIX.*

*Nutrix Hippolyti animum mollire, et ad nuptias et delicias urbanas flectere callide tentat. Ille vitæ coelibis et rusticæ (quæ urbanæ collatæ præfert) institutum immotus tenet.*

HIPP. Quid huc seniles fessa moliris gradus,  
O fida nutrix, turbidam frontem gerens,  
Et moesta vultus? Sospes est certe parens,  
435 Sospesque Phaedra, stirpis et geminae iugum.  
NUTR. Metus remitte: prospero regnum in statu  
est.

Domusque florens sorte felici viget.  
Sed tu beatissimior rebus veni:  
Namque anxiam me cura sollicitat tui,  
440 Quod te ipse poenis gravibus infestus domas.  
Quem fata cogunt, ille cum venia est miser;  
At si quis ultro se malis offert volens,  
Seque ipse torquet, perdere est dignus bona,  
Quis nescit uti. Potius annorum memor  
445 Mentem relaxa: noctibus festis facem  
Attolle; curas Bacchus exoneret graves;  
Aetate fruire: mobili cursu fugit.  
Nunc facile pectus, grata nunc iuveni Venus:  
Exultet animus. Cur toro viduo iaces?  
450 Tristem iuventam solve; nunc lusus rape;  
Effunde habenas; optimos vitae dies  
Effluere prohibe! Propria descripsit deus  
Officia, et aevum per suos ducit gradus.  
Laetitia iuvenem, frons decet tristis senem.  
455 Quid te coerces, et necas rectam indolem?  
Seges illa magnum foenus agricolae dabit,  
Quaecunque laetis tenera luxuriat satis;  
Arborque celso vertice evincet nemus,  
Quam non maligna caedit aut resecat manus.  
460 Ingenia melius recta se in laudes ferunt,

Si nobilem animum vegeta libertas alit.  
 Truculentus et silvester et vitae inscius,  
 Tristem iuventam Venere deserta colis.  
 Hoc esse munus credis indictum viris,  
 Ut dura tolerant, cursibus domitent equos, 465  
 Et saeva bella Marte sanguineo gerant?  
 Providit ille maximus mundi parens,  
 Cum tam rapaces cerneret Fati manus,  
 Ut damna semper sobole repararet nova.  
 Excedat, agedum, rebus humanis Venus, 470  
 Quae supplet ac restituit exhaustum genus:  
 Orbis iacebit squalido turpis situ;  
 Vacuum sine ullis classibus stabit mare;  
 Alesque coelo deerit, et silvis fera,  
 Solis et aër pervius ventis erit. 475  
 Quem varia leti genera mortalem trahunt  
 Carpuntque turbam, pontus, et ferrum, et do<sup>11</sup>  
 Sed fata credas deesse: sic atram Styga  
 Iam petimus ultro. Coelibem vitam probet  
 Sterilis iuventus: hoc erit, quidquid vides, 480  
 Unius aevi turba, et in semet ruet.  
 Proinde vitae sequere Naturam ducem:  
 Urbem frequenta, civium coetus cole.  
 HIPP. Non alia magis est libera et vitio carens,  
 Ritusque melius vita quae priscos colat, 485  
 Quam quae relictis moenibus silvas amat.  
 Non illum avarae mentis inflamat furor,  
 Qui se dicavit montium insontem iugis;  
 Non aura populi et vulgus infidum bonis,  
 Non pestilens invidia, non fragilis favor, 490  
 Non ille regno servit, aut, regno imminens,  
 Vanos honores sequitur, aut fluxas opes  
 Spei metusque liber. Haud illum niger  
 Edaxque Livor dente degeneri petit;  
 Nec scelera populos inter atque urbes sita 495  
 Novit; nec omnes conscius strepitus pavet,

- Aut verba fingit. Mille non quaerit tegi  
 Dives columnis, nec trabes multo insolens  
 Suffigit auro. Non cruor largus pias  
 500 Inundat aras, fruge nec sparsi sacra &  
 Centena nivei colla submitunt boves;  
 Sed rure vacuo potitur, et aperto aethere  
 Innocuus errat. Callidas tantum feris  
 Struxisse fraudes novit; et fessus gravi  
 505 Labore, niveo corpus Ilisso foveat.  
 Nunc ille ripam celeris Alphei legit;  
 Nunc nemoris alti densa metatur loca,  
 Ubi Lerna puro gelida perlucet vado;  
 Sedemque mutat. Hic aves querulae fremunt  
 510 Ramique ventis lene percussi tremunt,  
 Veteresque fagi. Iuvat aut amnis vagi  
 Pressisse ripas, caespitem aut nudo leves II 5, 10  
 Duxisse somnos, sive fons largus citas  
 Defundit undas, sive per flores novos  
 515 Fugiente dulcis murmurat rivo sonus,  
 Excussa silvis poma compescunt famem,  
 Et fraga parvis vulsa dumetis cibos  
 Faciles ministrant. Regios luxur procul  
 Est impetus fugisse. Sollicito bibant  
 520 Auro superbi; quam iuvat nuda manu  
 Captasse fontem! Certior somnus premit  
 Secura duro membra versantem toro.  
 Non in recessu furta et obscuro improbus  
 Quaerit cubili, seque multiplici timens  
 525 Domo recondit; aethera ac lucem petit,  
 Et teste coelo vivit. Hoc equidem reor  
 Vixisse ritum, prima quos mixtos deis  
 Profudit aetas. Nullus his auri fuit  
 Coecus cupido. Nullus in campo sacer  
 530 Divisit agros arbiter populis lapis. II 5, 13  
 Nondum secabant credulae pontum rates:  
 Sua quisque norat maria. Non vasto aggere

Crebraque turri cinxerant urbes latus.  
 Non arma saeva miles aptabat manu  
 Nec torta clusas fregerat saxo gravi 535  
 Balista portas; iussa nec dominum pati  
 Iuncto ferebat terra servitium bove:  
 Sed arva per se foeta poscentes nihil  
 Pavere gentes; silva nativas opes,  
 Et opaca dederunt antra nativas domos. 540  
 Rupere foedus impius lucri furor  
 Et ira praeceps, quaeque succensas agit | IV 2, 11  
 Libido mentes; venit imperii sitis  
 Cruenta; factus praeda maiori minor;  
 Pro iure vires esse. Tum primum manu 545  
 Bellare nuda, saxaque et ramos rudes  
 Vertere in arma. Non erat gracili levis  
 Armata ferro cornus, aut longo latus  
 Mucrone cingens ensis, aut crista procul  
 Galeae comantes: tela faciebat dolor. 550  
 Invenit artes bellicus Mavors novas  
 Et mille formas mortis. Hinc terras cruor  
 Infecit omnes fusus, et rubuit mare.  
 Tum scelera demto fine per cunctas domos  
 Iere; nullum caruit exemplo nefas; 555  
 A fratre frater, dextera nati parens  
 Cecidit, maritus coniugis ferro iacet,  
 Perimuntque foetus impiae matres suos.  
 Taceo novercas. Mitius nihil est feris.  
 Sed dux malorum femina; haec scelerum artifex 560  
 Obsedit animos, cuius incestae stupris  
 Fumant tot urbes, bella tot gentes gerunt,  
 Et versa ab imo regna tot populos premunt.  
 Sileantur aliae: sola coniux Aegel  
 Medea reddit feminas dirum genus. 565  
 NUTR. Cur omnium sit culpa paucarum scelus?  
 HIP. Detestor omnes, horreo, fugio, execror.  
 Sit ratio, sit natura, sit dirus furor



- Odisse placuit. Ignibus iunges aquas,  
 570 Et amica ratibus ante promittet vada  
 Incerta Syrtis, ante ab extremo sinu  
 Hesperia Tethys lucidum attollet diem,  
 Et ora damis blanda praebebunt lupi,  
 Quam victus animum feminae mitem geram.  
 575 NUTR. Saepe obstinatis induit frenos Amor,  
 Et odia mutat. Regna materna adspice:  
 Illae feroces sentiunt Veneris iugum.  
 Testaris istud unicus gentis puer.  
 HIPP. Solamen unum matris amissae fero,  
 580 Odisse quod iam feminas omnes licet.  
 NUTR. Ut dura cautes undique intractabilis  
 Resistit undis, et lacessentes aquas  
 Longe remittit, verba sic spernit mea.  
 Sed Phaedra praeceps graditur, impatiens morae  
 585 Quo se dabit fortuna? quo verget furor?  
 Terrae repente corpus exanimum accidit,  
 Et ora morti similis obduxit color.  
 Attolle vultus, dimove vocis moras:  
 Tuus en, alumna, temet Hippolytus tenet!

*PHAEDRA, HIPPOLYTUS, NUTRIX,  
 FAMULI.*

*Iuvenis pudicitiam omni arte oppugnant, sed frustra: ad fraudem itaque confugiunt et calumnias.*

- 590 PH. Quis me dolori reddit, atque aestus graves  
 Reponit animo? Quam bene excideram mihi! —  
 HIPP. Cur dulce munus redditae lucis fugis?  
 PH. Aude, anime! tenta! perage mandatum tuum.  
 Intrepida constant verba: qui timide rogat,  
 595 Docet negare. Magna pars sceleris mei  
 Olim peracta est: serus est nobis pudor:  
 Amavimus nefanda: si coepta exequor,

Forsan iugali crimen abscondam face.

Honesta quaedam scelera successus facit.

En, incipe, anime! — Commodos paulum, precor, 600

Secretus aures. Si quis est, abeat, comes.

HIPP. En, locus ab omni liber arbitrio vacat!

P.H. Sed ora coeptis transitum verbis negant.

Vis magna vocem emittit, at maior tenet.

Vos testor omnes, coelites, hoc, quod volo, 605

Me nolle!

HIPP. Animusne cupiens aliquid effari nequit?

P.H. Curae leves loquuntur, ingentes stupent

HIPP. Committe curas auribus, mater, meis.

P.H. Matris superbum est nomen et nimium potens; 610

Nostros humiliter nomen adfectus decet.

Me vel sororem, Hippolyte, vel famulam voca.

Famulamque potius: omne servitium feram.

Non me, per altas ire si iubeas nives,

Pigeat gelatis ingredi Pindi iugis; 615

Non, si per ignes ire et infesta agmina,

Cuncter paratis ensibus pectus dare.

Mandata recipe sceptris, me famulam accipe:

Te imperia regere, me decet iussa exequi.

Muliebri non est regna tutari urbium; 620

Tu, qui iuventae flore primaevae viges,

Cives paterno fortis imperio rege.

Sinu receptam supplicem ac servam tege!

Miserere viduae! HIPP. Summus hoc omen deus

Avertat! aderit sospes actutum parens. 625

P.H. Regni tenacis dominus et tacitae Stygis,

Nullam relictos fecit ad Superos viam.

Thalami remittet ille raptorem sui?

Nisi forte amor placidus et Pluton sedet.

HIPP. Illum quidem aequi coelites reducem

dabunt.

630

Sed dum tenebit vota in incerto deus:

Pietate caros debita fratres colam,

Et te merebor esse ne viduam putes  
Ac tibi parentis ipse supplebo locum.

- 635 P H. O spes amantum credula! o fallax amor!  
Satisne dixit? Precibus admotis agam. —  
Miserere! tacitae mentis exaudi preces!  
Libet loqui, pigetque. HIPP. Quodnam istud ma-  
lum est?

P H. Quod in novercam cadere vix credas malum.

- 640 HIPP. Ambigua voce verba perplexa iacis:  
Effare aperte. P H. Pectus insanum vapor  
Amorque torret. Intimis saevus vorat  
Visceribus ignis mersus, et venas latens,  
Ut agilis altas flamma, percurrit, trabes.

- 645 HIPP. Amore nempe Thesei casto furis?  
P H. Hippolyte, sic est: Thesei vultus amo  
Illos priores, quos tulit quondam puer,  
Cum prima puras barba signaret genas,  
Monstrique coecam Gnessii vidit domum,

- 650 Et longa curva fila collegit via  
Quis tum ille fulsit! Presserant vittae comam,  
Et ora flavus tenera tingebat Pudor;  
Inerant lacertis mollibus fortes tori,  
Tuaeque Phoebes vultus, aut Phoebi mei,

- 655 Tuusve potius. Talis, en, talis fuit,  
Cum placuit hosti; sic tulit celsum caput,  
In te magis refulget incomtus decor.  
Est genitor in te totus; et torvae tamen  
Pars aliqua matris miscet ex aequo decus:

- 660 In ore Graio Scythicus adparet rigor.  
Si cum parente Creticum intrasses fretum  
Tibi fila potius nostra nevisset soror.  
Te, te, soror, quacunque siderei poli  
In parte fulges, invoco ad causam parem!

- 665 Domus sorores una corripuit duas;  
Te genitor, at me gnatus. En, supplex iacet  
Adlapsa genibus regiae proles domus!

Respersa labe nulla, et intacta, innocens;  
 Tibi mutor uni. Certa descendi ad preces:  
 Finem hic dolori faciet aut vitae dies. 670  
 Miserere amantis! HIPPO. Magne regnator deum,  
 Tam lentus audis scelera? tam lentus vides?  
 Ecquando saeva fulmen emittes manu,  
 Si nunc serenum est? Omnis impulsus ruat  
 Aether, et atris nubibus condat diem. 675 *I 7. 1*  
 Ac versa retro sidera obliquos agant  
 Retorta cursus! tuque sidereum caput,  
 Radiate Titan, ne nefas stirpis tuae  
 Speculere luci, merge, et in tenebras fuge!  
 Cur dextra, divum rector atque hominum, vacat 680  
 Tua, nec trisulca mundus ardescit face?  
 In me tona! me fige! me velox cremet  
 Transactus ignis! sum nocens; merui mori:  
 Placui novercae. — Dignus en stupris ego  
 Scelereque tanto visus? ego solus tibi 685  
 Materia facilis? hoc meus meruit rigor?  
 O scelere vincens omne femineum genus!  
 [O maius ausa matre monstrifera malum,]  
 Genitrice peior! Illa se tantum stupro  
 Contaminavit, et tamen tacitum diu 690  
 Crimen biformi partus exhibuit nota,  
 Scelusque matris arguit vultu truci  
 Ambiguus infans. Ille te venter tulit.  
 O ter quaterque prospero fato dati,  
 Quos hausit et peremit et leto dedit 695  
 Odium dolusque! Genitor, invideo tibi:  
 Colchide noverca maius hoc, maius malum est.  
 PH. Et ipsa nostrae fata cognosco domus:  
 Fugienda petimus; sed mei non sum potens.  
 Te vel per ignes, per mare insanum sequar, 700  
 Rupesque, et amnes, unda quos torrens rapit;  
 Quacunque gressus tuleris, hac amens agar!  
 Iterum, superbe, genubus advolvor tuis

- HIPP. Procul impudicos corpore a casto amove  
705 Tactus! Quid hoc est? etiam in amplexus ruit?  
Stringatur ensis: merita supplicia exigit.  
En, impudicum crine contorto caput  
Laeva reflexi: iustior nunquam focis  
Datus tuis est sanguis, arcitenens dea!
- 710 PH. Hippolyte, nunc me compotem voti facis:  
Sanas furem. Maius hoc voto meo est,  
Salvo ut pudore manibus immoriar tuis.  
HIPP. Abscede! vive: ne quid exores; et hic  
Contactus ensis deserat castum latus!
- 715 Quis eluet me Tanais? aut quae barbaris  
Maeotis undis Pontico incumbens mari?  
Non ipse toto magnus Oceano pater  
Tantum expiarit sceleris. O silvae! o ferae!  
PH. Deprensa culpa est, anime! — NUTR. Quid  
segnis stupes?
- 720 Regeramus ipsi crimen, atque ultro impiam  
Venerem arguamus. Scelere velandum est scelus.  
Tutissimum est inferre, cum timeas, gradum.  
Ausae priores simus, an passae nefas,  
Secreta cum sit culpa, quis testis sciet?
- 725 Adeste, Athenae! fida famulorum manus,  
Fer opem! nefandi raptor Hippolytus stupri  
Instat, premitque; mortis intentat metum;  
Ferro pudicam terret! En, praeceps abit,  
Ensemque trepida liquit attonitus fuga!
- 730 Pignus tenemus sceleris. Hanc moestam prius  
Recreate! Crinis tractus et lacerae comae,  
Ut sunt, remaneant, facinoris tanti notae.  
Perferte in urbem! — Recipe iam sensus, hera!  
Quid te ipsa lacerans omnium adspectus fugis?
- 735 Mens impudicam facere, non casus, solet

## CHORUS.

*Precatur Chorus, ut bene cedat Hippolyto forma, quae ple-  
risque fuit exitio. Thesi reditum prospicit.*

Fugit insanae similis procellae,  
Ocior nubes glomerante Coro,  
Ocior cursum rapiente flamma,  
Stella cum ventis agitata longos  
Porrigit ignes.

740

Conferat tecum decus omne priscum  
Fama, miratrix senioris aevi.

Pulcrior tanto tua forma lucet,  
Clarior quanto micat orbe pleno,  
Cum suos ignes coeunte cornu

745

Iunxit, et curru properante pernox  
Exerit vultus, rubicunda Phoebe,  
Nec tenent stellae faciem minores;  
Qualis est primas referens tenebras  
Nuntius noctis, modo lotus undis,  
Hesperus, pulsus iterum tenebris  
Lucifer idem.

750

Et tu thyrsigera Liber ab India,  
Intonsa iuvenis perpetuum coma,

Tigres pampinea cuspide territans,

755

Ac mitra cohibens cornigerum caput,

Non vinces rigidas Hippolyti comas.

Neu vultus nimium suspicias tuos:

Omnes per populos fabula distulit,

Phaedrae quem Bromio praetulerit soror.

760

Anceps forma bonum mortalibus,

Exigui donum breve temporis,

Ut velox celeri pede laberis!

Non sic prata novo vere decentia

Aestatis solidae despoliat vapor,

765

Saevit solstitio cum medius dies,

- Et noctes brevibus praecipitat rotis  
 (Languescunt folio lilia pallido,  
 Et gratae capiti deficiunt rosae),  
 770 Ut fulgor, teneris qui radiat genis,  
 Momento rapitur, nullaque non dies  
 Formosi spoliū corporis abstulit.  
 Res est forma fugax : quis sapiens bono  
 Confidat fragili? Dum licet, utere.  
 775 Tempus te tacitum subruet, horaque  
 Semper praeterita deterior subit.  
 Quid deserta petis? Tutior aviis  
 Non est forma locis. Te nemore abdito,  
 Cum Titan medium constituit diem,  
 780 Cinget turba licens, Naidēs improbae,  
 Formosos solitae claudere fontibus;  
 Et somnis facient insidias tuis  
 Lascivae nemorum deae,  
 Montivagique Panes;  
 785 Aut, te stellifero despiciens polo, | III 8. 17  
 Sidus post veteres Arcadas editum  
 Currus non poterit flectere candidos  
 Et nuper rubuit, nullaque lucidis  
 Nubes sordidior vultibus obstitit;  
 790 At nos solliciti lumine turbido,  
 Tractam Thessalicis carminibus rati,  
 Tinnitus dedimus: tu fueras labor,  
 Et tu causa morae; te dea noctium  
 Dum spectat, celeres sustinuit vias.  
 795 Vexent hanc faciem frigora parcius,  
 Haec solem facies rarius adpetat:  
 Lucebit Pario marmore clarius.  
 Quam grata est facies torva viriliter,  
 Et pondus veteris triste supercili  
 800 Phoebo colla licet splendida compares.  
 Illum caesaries, nescia colligi,  
 Perfundens humeros, ornat et integit;

Te frons hirta decet, te brevior coma  
 Nulla lege iacens. Tu licet asperos  
 Pugnaesque deos viribus arceas 805  
 Et vasti spatii vincere corporis:  
 Aequas Herculeos nam iuvenis toros,  
 Martis belligeri pectore latior.  
 Si dorso libeat cornipedis vehi:  
 Frenis Castorea mobilior manu 810  
 Spartanum poteris flectere Cyllaron.  
 Amentum digitis tende prioribus,  
 Et totis iaculum dirige viribus:  
 Tam longe, dociles spicula figere,  
 Non mittent gracilem Cretas arundinem. 815  
 Aut si tela modo spargere Parthico  
 In coelum placeat: nulla sine alite  
 Descendent, tepido viscere condita;  
 Praedam de mediis nubibus auferent.  
 Raris forma viris (secula prospice!) 820  
 Impunita fuit. Te melior deus  
 Tutum praetereat, formaque nobilis  
 Deformis senii monstret imaginem.  
 Quid sinat inausum feminae praeceps furor?  
 Nefanda iuveni crimina insonti parat. 825  
 En scelera! quaerit crine lacerato fidem,  
 Decus omne turbat capitis, humectat genas;  
 Instruitur omnis fraude feminea dolus.  
 Sed iste quisnam est, regium vultu decus  
 Gerens, et alto vertice attollens caput? 830  
 Ut ora iuveni paria Pirithoo gerit,  
 Ni languido pallore canderent genae,  
 Staretque recta squalor incultus coma.  
 En, ipse Theseus redditus terris adest!



## ACTUS TERTIUS.

## THESEUS, NUTRIX.

*Reversus ab Inferis Theseus aomestici luctus causam a nutrice obvia sciscitatur. Illa se hoc tantum seire respondet, Phaedram necis consilium iniisse.*

- 835 **THE S.** Tandem profugi noctis aeternae plagam,  
 Vastoque manes carcere umbrantem polum.  
 Ut vix cupitum subferunt oculi diem!  
 Iam quarta Eleusin dona Triptolemi secat  
 Paremque toties Libra composuit diem,
- 840 Ambiguus ut me sortis ignotae labor  
 Detinuit inter mortis et vitae mala.  
 Pars una vitae mansit extincto mihi,  
 Sensus. Malorum finis Alcides fuit,  
 Qui cum revulso Tartaro extraheret canem,
- 845 Me quoque supernas pariter ad sedes tulit.  
 Sed fessa virtus robore antiquo caret,  
 Trepidantque gressus. Heu, labor quantus fuit  
 Phlegethonte ab imo petere longinquum aethera,  
 Pariterque mortem fugere et Alciden sequi!
- 850 Quis fremitus aures flebilis pepulit meas?  
 Expromat aliquis! Luctus et lacrimae et dolor,  
 In limine ipso moesta lamentatio,  
 Auspicia digna prorsus inferno hospite.
- NUTR.** Tenet obstinatum Phaedra consilium necis,
- 855 Fletusque nostros spernit, ac morti imminet.  
**THE S.** Quae causa leti? reduce cur moritur viro?  
**NUTR.** Haec ipsa letum causa maturum attulit.  
**THE S.** Perplexa magnum verba nescio quid tegunt.  
 Effare aperte, quis gravet mentem dolor.
- 860 **NUTR.** Haud pandit ulli. Moesta secretum occultit,

Statuitque secum ferre, quo moritur, malum.  
Iam perge, quaeso, perge: properato est opus.  
THE S. Reserate clusos regii postes laris!

THESEUS, PHAEDRA, FAMULI.

*Primum simulat Phaedra morise malle, quam vim sibi illatam revelare Theseo; cui deinde nutrici cruciatum minitanti ostendit gladium, quem Hippolytus abiectum reliquisset*

THE S. O socia thalami, siccine adventum viri  
Et expetiti coniugis vultum excipis? 865

Quin ense viduas dexteram, atque animum mihi  
Restituis, et, te quidquid e vita fugat,  
Expromis? PH. Heu heu, per tui sceptrum imperi,  
Magnanime Theseu, perque natorum indolem,  
Tuosque redivit, perque iam cineres meos, 870

Permitte mortem! THE S. Causa quae cogit mori?

PH. Si causa leti dicitur, fructus perit.

THE S. Nemo istud alius, me quidem excepto, audiet.

PH. Aures pudica coniugis solas timet.

THE S. Effare: fido pectore arcana oculam. 875

PH. Alium silere quod voles, primus sile.

THE S. Leti facultas nulla continget tibi.

PH. Mori volenti deesse mors nunquam potest.

THE S. Quod sit luendum morte delictum, indica.

PH. Quod vivo. THE S. Lacrimae nonne te no-  
strae movent? 880

PH. Mors optima est perire lacrimandum suis.

THE S. Silere pergit. Verberum ac vinclis anus  
Altrixque prodet, quidquid haec fari abnuat.

Vincite ferro. Verberum vis extrahat  
Secreta mentis. PH. Ipsa iam fabor, mane. 885

THE S. Quidnam ora moesta avertis, et lacrimas  
genis

Subito coortas veste praetenta obtegis?

PH. Te, te, creator coelitem, testem invoco,

- Et te coruscum lucis aetheriae iubar,  
 890 Ex cuius ortu nostra dependet domus,  
 Tentata precibus restiti; ferro ac minis  
 Non cessit animus: vim tamen corpus tulit.  
 Labem hanc pudoris eluet noster cruor.  
 THES. Quis (ede!) nostri decoris eversor fuit?  
 895 PH. Quem rere minime. THES. Quis sit, audire  
 expeto.  
 PH. Hic dicet ensis, quem tumultu territus  
 Liquit stuprator, civium adcursum timens.  
 THES. Quod facinus, heu me! cerno? quod mon-  
 strum intuo?  
 Regale patris asperum signis ebur!  
 900 Capulo refulget generis Actaei decus!  
 Sed ipse quonam evasit? PH. Hi trepidum fuga  
 Videre famuli concitum celeri pede.

### THESSEUS.

*Agnito ense deceptus pater et iratus filio immerito exitium  
 inprecatur.*

- Proh sancta pietas! proh gubernator poli,  
 Et qui secundum fluctibus regnum moves,  
 905 Unde ista venit generis infandi lues?  
 Hunc Graia tellus aluit, an Taurus Scythes,  
 Colchusve Phasis? Redit ad auctores genus,  
 Stirpemque primam degener sanguis refert.  
 Est iste prorsus gentis armiferae furor,  
 910 Odisse Veneris foedera, et castum diu  
 Vulgare populis corpus. O tetrum genus,  
 Nullaque victum lege melioris soli!  
 Ferae quoque ipsae veneris evitant nefas,  
 Generisque leges inscius servat pudor.  
 915 Ubi vultus ille et ficta maiestas viri,  
 Atque habitus horrens, prisca et antiqua adpetens  
 Morumque senium triste, et adfectus graves?

O vita fallax! abditos sensus geris,  
 Animisque pulcram turpibus faciem induis!  
 Pudor impudentem celat, audacem quies, 920  
 Pietas nefandum; vera fallaces probant;  
 Simulantque molles dura. Silvarum incola  
 Ille efferatus, castus, intactus, rudis,  
 Mihi te reservas? a meo primum toro  
 Et scelere tanto placuit ordiri virum? 925  
 Iam iam superno numini grates ago,  
 Quod icta nostra cecidit Antiope manu;  
 Quod non ad antra Stygia descendens tibi  
 Matrem reliqui. Profugus ignotas procul  
 Percurre gentes! Te licet terra ultimo 930  
 Summota mundo dirimat Oceani plagis,  
 Orbemque nostris pedibus obversum colas;  
 Licet in recessu penitus extremo abditus  
 Horrifera celsi regna transieris poli,  
 Hiemesque supra positus et canas nives 935  
 Gelidi frementes liqueris Boreae minas  
 Post te furentes: sceleribus poenas dabis!  
 Profugum per omnes pertinax latebras premam!  
 Longinqua, clausa, abstrusa, diversa, invia  
 Emetiemur! Nullus obstabit locus: 940  
 Scis, unde redeam. Tela quo mitti haud queunt,  
 Huc vota mittam. Genitor aequoreus dedit,  
 Ut vota prono trina concipiam deo,  
 Et invocata munus hoc sanxit Styge.  
 En, perage donum triste, regnator freti! 945  
 Non cernat ultra lucidum Hippolytus diem,  
 Adeatque manes iuvenis iratos patri.  
 Fer abominandam nunc opem gnato, parens  
 Nunquam supremum numinis munus tui  
 Consumeremus, magna ni premerent mala. 950  
 Inter profunda Tartara et Ditem horridum,  
 Et imminentes regis inferni minas,  
 Voto peperci; redde nunc pactam fidem,

Genitor! — Moraris? cur adhuc undae silent?

- 955 Nunc atra ventis nubila impellentibus  
 Subtexe noctem; sidera et coelum eripe  
 Effunde pontum; vulgus aequoreum cie,  
 Fluctusque ab ipso tumidus Oceano voca!

**C H O R U S.**

*Queritur chorus, cum coeli ceterarumque rerum cursus certo  
 regantur consilio, non tamen res humanas iuste ac recte cedere,  
 cum bonis male sit, malis bene.*

- I 5.1  
 O magna parens Natura deum,  
 960 Tuque igniferi rector Olympi,  
 Qui sparsa cito sidera mundo  
 Cursusque vagos rapis astrorum,  
 Celerique polos cardine versas,  
 Cur tanta tibi est cura perennes

- 965 Agitare vias aetheris alti,  
 Ut nunc canae frigora brumae  
 Nudent silvas;  
 Nunc arbustis redeant umbrae,  
 Nunc aestivi colla Leonis

- 970 Cererem magno fervore coquant,  
 Viresque suas temperet annus;  
 Et cur idem, qui tanta regis,  
 Sub quo vasti pondera mundi  
 Librata suos ducunt orbes,

- 975 Hominum nimium securus abes,  
 Non sollicitus prodesse bonis,  
 Nocuisse malis?

- Res humanas ordine nullo  
 Fortuna regit, spargitque manu

- 980 Munera coeca, peiora fovens.  
 Vincit sanctos dira libido;  
 Fraus sublimi regnat in aula.  
 Tradere turpi fasces populus

I 5.14

I 5.18

I 5.32

IV 25

HIPPOLYTUS. ACT. III. IV. 137

Gaudet; eosdem colit atque odit.  
 Tristis virtus perversa tulit / I 5, 35 985  
 Praemia recti:  
 Castos sequitur mala paupertas,  
 Vitioque potens regnat adulter.  
 O vane pudor, falsumque decus!  
 Sed quid citato nuntius portat gradu, 990  
 Rigatque moestis lugubrem vultum genis?

ACTUS QUARTUS.

NUNTIUS, THESEUS, CHORUS.

*Narrat Theseo nuntius, ut perierit Hippolytus discriptus ab equis suis, quos terruerat taurus marinus a Neptuno ex Thesei voto immissus.*

NUNT. O sors acerba et dura famulatus gravis,  
 Cur me ad nefandos nuntium casus vocas?  
 THES. Ne metue clades fortiter fari asperas:  
 Non imparatum pectus aerumnis gero. 995  
 NUNT. Vocem dolori lingua luctificam negat.  
 THES. Proloquere, quae sors adgravet quassam  
 domum.  
 NUNT. Hippolytus, heu me! flebili leto occubat.  
 THES. Gnatum parens obiisse iam pridem scio;  
 Nunc raptor obiit. Mortis effare ordinem. 1000  
 NUNT. Ut profugus urbem liquit infesto gradu,  
 Celerem citatis passibus cursum explicans:  
 Celso sonipedes ocus subigit iugo,  
 Et ora frenis domita substrictis ligat.  
 Tum multa secum effatus, et patrium solum 1005  
 Abominatus, saepe genitorem ciet,  
 Acerque habenis lora permissis quatit

- Cum subito vastum tumuit ex alto mare,  
Crevitque in astra. Nullus inspirat salo  
1010 Ventus; quieti nulla pars coeli strepit,  
Placidumque pelagus propria tempestas agit.  
Non tantus Auster Sicula disturbat freta,  
Nec tam furens Ienius exurgit sinus  
Regnante Coro, saxa cum fluctu tremunt,  
1015 Et cana summum spuma Leucaten ferit.  
Consurgit ingens pontus in vastum aggerem,  
Tumidumque monstro pelagus in terras ruit.  
Nec ista ratibus tanta construitur lues;  
Terris minatur. Fluctus haud cursu levi  
1020 Provolvitur: nescio quid onerato sinu  
Gravis unda portat. Quae novum tellus caput  
Ostendit astris? Cyclas exoritur nova?  
Latuere rupes, numen Epidauri dei,  
Et scelere petrae nobiles Scironides,  
1025 Et quae duobus terra comprimitur fretis.  
Haec dum stupentes querimur: en! totum mare  
Immugit. Omnes undique scopuli adstrepunt.  
Summum cacumen rorat expulso sale,  
Spumat, vomitque vicibus alternis aquas;  
1030 Qualis per alta vehitur Oceani freta  
Fluctus refundens ore phryseter capax.  
Inhorruit concussus undarum globus,  
Solvitque sese, et littori invexit malum  
Maius timore. Pontus in terram ruit,  
1035 Suumque monstrum sequitur. Os quassat tremor:  
THE S. Quis habitus ille corporis vasti fuit?  
NUNT. Herculea taurus colla sublimis gerens  
Erexit altam fronte viridanti iubam;  
Stant hispidae aures; oribus varius color,  
1040 Et quem feri dominator habuisset gregis,  
Et quem subundis natus (hinc flammam vomunt,  
Oculi hinc relucet caerulea insignes nota);  
Optima cervix arduos tollit toros,

Naresque hiulcis haustibus patulae fremunt:  
 Musco tenaci pectus ac palear viret; 1045  
 Longum rubenti spargitur fuco latus;  
 Tum pone tergus ultima in monstrum coit  
 Facies, et ingens bellua immensam trahit  
 Squamosa partem. Talis extremo mari  
 Pistrix citatas sorbet ac frangit rates. 1050  
 Tremuere terrae; fugit attonitum pecus  
 Passim per agros, nec suos pastor sequi  
 Meminit iuvencos; omnis e saltu fera  
 Diffugit, omnis frigido exanguis metu  
 Venator horret. Solus immunis metu 1055  
 Hippolytus arctis continet frenis equos,  
 Pavidosque notae vocis hortatu ciet.  
 Est alta ad Argos collibus ruptis via,  
 Vicina tangens spatia suppositi maris;  
 Hic se illa moles acuit, atque iras parat. 1060  
 Ut cepit animos, seque praetentans satis  
 Prolusit irae: praepeti cursu evolat,  
 Summam citato vix gradu tangens humum,  
 Et torva currus ante trepidantes stetit.  
 Contra feroci gnatus insurgens minax 1065  
 Vultu, nec ora mutat, et magnum intonat:  
 „Haud frangit animum vanus hic terror meum:  
 Nam mihi paternus vincere est tauros labor.“  
 Inobsequentes protinus frenis equi  
 Rapuere currum; iamque deerrantes via, 1070  
 Quacunque rabidos pavidus evexit furor,  
 Hac ire pergunt, seque per scopulos agunt.  
 At ille, qualis turbido rector mari  
 Ratem retentat, ne det obliquum latus,  
 Et arte fluctus fallit, haud aliter citos 1075  
 Currus gubernat: ora nunc pressis trahit  
 Constricta frenis, terga nunc torto frequens  
 Verbere coeracet. Sequitur adsiduus comes,  
 Nunc aequa carpens spatia, nunc contra obvius



- 1080 Oberrat, omni parte terrorem movens.  
Non licuit ultra fugere: nam toto obvius  
Incurrit ore corniger ponti horridus.  
Tum vero pavida sonipedes mente exciti  
Imperia solvunt, seque luctantur iugo
- 1085 Eripere, rectique in pedes iactant onus.  
Praecepse in ora fusus implicuit cadens  
Laqueo tenaci corpus; et quanto magis  
Pugnat, sequaces hoc magis nodos ligat.  
Sensere pecudes facinus, et curru levi,
- 1090 Dominante nullo, qua timor iussit, ruunt.  
Talis per auras non suum agnoscens onus,  
Solique falso creditum indignans diem,  
Phaëthonta currus devio excussit polo.  
Late cruentat arva, et inlisum caput
- 1095 Scopulis resultat. Auferunt dumi comas,  
Et ora durus pulcra populatur lapis,  
Peritque multo vulnere infelix deeor.  
Moribunda celeres membra provolvunt rotae;  
Tandemque raptum truncus ambusta sude
- 1100 Medium per inguen stipite erecto tenet,  
Paulumque domino currus adfixo stetit.  
Haesere biuges vulnere, et pariter moram  
Dominumque rumpunt. Indesemianimem secant  
Virgulta; acutis asperi vepres rubis,
- 1105 Omnisque truncus corporis partem tulit.  
Errant per agros, funebris, famuli, manus,  
Per illa, qua distractus Hippolytus, loca,  
Longum cruenta tramitem signat nota  
Moestaeque domini membra vestigant canes.
- 1110 Necdum dolentum sedulus potuit labor  
Explere corpus. Hoccine est formae decus?  
Qui modo, paterni clarus imperii comes  
Et certus heres, siderum fulsit modo.  
Passim ad supremos ille colligitur rogos,
- 1115 Et funeri confertur. THE S. O nimium potens,

Quanto parentes sanguinis vinclo tenes  
Natura! quam te colimus inviti quoque!  
Occidere volui noxium; amissum fleo. —

CHOR. Haud quisquam honeste flere, quod voluit,  
potest.

THE S. Equidem malorum maximum hunc cumu-  
lum reor, 1120

Si abominanda casus optata efficit.

NUNT. Etsi odia servas, cur madent fletu genae?

THE S. Quod interemi, non quod amisi, fleo

CHORUS.

*Sublimis fortunae instabilitatem et pericula, humilis secu-  
ritatem canit, Hippolyti mortem deflet.*

Quanti casus humana rotant!  
Minor in parvis Fortuna furit, 1125

Leviusque ferit leviora deus;  
Servat placidos obscura quies,  
Praebetque senes casa securos.  
Admota aetheriis culmina sedibus  
Euros excipiunt, excipiunt Notos, 1130  
Insani Boreae minas,  
Imbriferumque Corum.

Humida vallis raros patitur  
Fulminis ictus: tremuit telo  
Iovis altisoni Caucasus ingens. 1135

Phrygiumque nemus matris Cybeles.

Metuens coelo Iupiter alto  
Vicina petit;  
Non capit unquam magnos motus  
Humilis tecti plebeia domus. 1140

[Circa regna tonat.]

Volat ambiguus mobilis alis  
Hora, nec ulli

- Praestat velox Fortuna fidem.  
 Qui clara videt sidera mundi  
 1145 Nitidumque diem nocte relictā,  
 Luget moestos tristis reditus;  
 Ipsoque magis flebile Averno  
 Sedis patriae videt hospitium.  
 Pallas Aetnaeae veneranda genti,  
 1150 Quod tuus coelum Superosque Theseus  
 Spectat, et fugit Stygias paludes,  
 Casta nil debes patruo rapaci:  
 Constat inferno numerus tyranno.  
 Quae vox ab altis flebilis tectis sonat,  
 1155 Strictoque vecors Phaedra quid ferro parat?
- 

## ACTUS QUINTUS.

### THESEUS, PHAEDRA.

*Phaedra Hippolyti innocentiam, suas calumnias revelat, ipsaque sua se manu occidit. Pater non sine luctu filio iusta persolvit, novercae negat.*

- THES. **Q**uis te dolore percitam instigat furor?  
 Quid ensis iste, quidve vociferatio,  
 Planctusque supra corpus invisum volunt?  
 PH. Me, me, profundi saeve dominator freti,  
 1160 Invade, et in me monstra caerulei maris  
 Emitte, quidquid intimo Tethys sinu  
 Extrema gestat, quidquid Oceanus vagis  
 Complexus undis ultimo fluctu tegit!  
 O dire Theseu semper, o nunquam tuis  
 1165 Tuto reverse! Gnatus et genitor nece  
 Reditus tuos luere: pervertis domum,  
 Amore semper coniugum aut odio nocens.

Hippolyte, tales intuoꝝ vultus tuos,  
 Talesque feci? Membra quis saevus Sinis,  
 Aut quis Procrustes sparsit? aut quis Cressius, 1170  
 Daedalea vasto claustra mugitu replens,  
 Taurus biformis, ore cornigero ferox,  
 Divulsit? Heu me! quo tuus fugit decor,  
 Oculique, nostrum sidus? Exanimis iaces?  
 Ades parumper, verbaque exaudi mea! 1175  
 Nil turpe loquimur. Hac manu poenas tibi  
 Solvam, et nefando pectori ferrum inseram,  
 Animaque Phaedram pariter ac scelere exuam;  
 Et te per undas perque Tartareos lacus,  
 Per Styga, per amnes igneos amens sequar! 1180  
 Placemus umbras: capitis exuvias cape,  
 Laceraeque frontis accipe abscissam comam!  
 Non licuit animos iungere; at certe licet  
 lunnisse fata. Morere, si casta es, viro;  
 Si incesta, amor. Coniugis thalamos petar 1185  
 Tanto impiatos facinore? Hoc deerat nefas,  
 Ut vindicato sancta fruereris toro!  
 O mors pudoris maximum laesi decus,  
 O mors amoris una sedamen mali,  
 Confugimus ad te: pande placatos sinus! 1190  
 Audite, Athenas, tuque, funesta pater  
 Peior noverca: falsa memoravi, et nefas,  
 Quod ipsa demens pectore insano hauseram  
 Mentita finxi. Vana punisti pater,  
 Iuvenisque castus crimine incesto iacet. — 1195  
 Pudicus, insons, recipe iam mores tuos! —  
 Mucrone pectus impium iusto patet,  
 Cruorque sancto solvit inferias viro!  
 Quid facere rapto debeas gnato parens,  
 Disce a noverca: condere Acherontis plagis. 1200

**THESEUS, CHORUS.**

**THE 8. Pallidi fauces Averni, vosque Taenarei specus.**

**Unda miseris grata Lethes, vosque, torpentes  
lacus.**

**Impium rapite, atque mersum premitte perpetuis  
malis!**

**Nunc adeste, saeva ponti monstra, nunc vastum  
mare,**

**1205 Ultimo quodcunque Proteus aequorum abscondit  
sinu.**

**Meque ovantem scelere tanto rapite in altos gurgites!**

**Tuque semper, genitor, irae facilis adsensor  
meae.**

**Morte facile dignus haud sum, qui nova gnatum  
nece**

**Segregem sparsi per agros; quique, dum falsum  
nefas**

**1210 Exequor vindex severus, incidi in verum scelus.**

**Sidera et manes et undas scelere complevi meo:**

**Amplius sors nulla restat: regna me norunt tria.**

**In hoc redimus: patuit ad coelum via;**

**Bina ut viderem funera et geminam necem;**

**1215 Coelebs et orbus , funebres una face**

**Ut concremarem prohis ac thalami rogos.**

**Donator atrae lucis, Alcide, tuum**

**Diti remitte munus; ereptos mihi**

**Restitue manes! — Impius frustra invoco**

**1220 Mortem relictam. Crūdus et leti artifex,**

**Exitia machinatus insolita, effera,**

**Nunc ipse tibimet iusta supplicia inroga :**

**Pinus coacta vertice attingens humum**

**Coelo remissum findat in geminas trabes,**

**1225 Mittatve praeceps saxa per Scironia!**

Graviora vidi, quae pati clusos iubet  
 Phlegethon, nocentes igneo cingens vado:  
 Quae poena maneat memet et sedes, scio.  
 Umbrae nocentes cedit, et cervicibus  
 His, his repositum degravet fessas manus 1230  
 Saxum, seni perennis Aeolio labor;  
 Me ludat amnis ora vicina adluens;  
 Vultur relicto transvolet 'Tityo ferus,  
 Meumque poenae semper accrescat iecur;  
 Et tu mei requiesce Pirithoi pater: 1235  
 Haec incitatis membra turbinibus ferat  
 Nusquam resistens orbe revoluta rota.  
 Dehisce, tellus! recipe me, dirum chaos,  
 Recipe! haec ad umbras iustior nobis via est:  
 Gnatum sequor. Ne metus, qui manes regis: 1240  
 Casti venimus. — Recipe me aeterna domo  
 Non exiturum! — Non movent divos preces;  
 At si rogarem scelera, quam proni forent!  
 CHOR. Theseu, querelis tempus aeternum manet.  
 Nunc iusta nato solve, et absconde ocus 1245  
 Dispersa foede membra laniatu effero.  
 THESS. Huc, huc reliquias vehite cari corporis,  
 Pondusque et artus temere congestos date.  
 Hippolytus hic est? Crimen agnosco meum:  
 Ego te peremi; neu nocens tantum semel 1250  
 Solusve fierem: facinus ausurus parens  
 Patrem advocavi. Munere, en, patrio fruor!  
 O triste fractis orbitas annis malum!  
 Complectere artus, quodque de gnato est super,  
 Miserande, moesto pectore incumbens fove! 1255  
 Disiecta genitor membra laceri corporis  
 In ordinem dispone, et errantes loco  
 Restitue partes! Fortis hic dextrae locus;  
 Hic laeva frenis docta moderandis manus  
 Ponenda. Laevi lateris agnosco notas. 1260  
 Quam magna lacrimis pars adhuc nostris abest!

- Durate, trepidæ, lugubri officio, manus,  
 Fletusque largos sistite, arentes genæ,  
 Dum membra nato genitor adnumerat suo  
 1265 Corpusque fingit! Hoc quid est forma carens  
 Et turpe, multo vulnere abruptam undique?  
 Quæ pars tui sit dubito, sed pars est tui.  
 Hic, hic reponere non suo, at vacuo loco.  
 Haecne illa facies igne sidereo nitens,  
 1270 Inimica flectens lumina? huc cecidit decor?  
 O dira fata! numinum o saevus favor.  
 Sic ad parentem gnatus ex voto redit?  
 En, hæc suprema dona genitoris cape,  
 Saepe efferendus! interim hæc ignes ferant.  
 1275 Patefacite acerba caede funestam domum:  
 Mopsopia clavis tota lamenti sonet.  
 Vos adparate regis flammam rogi;  
 At vos per agros corporis partes vagas  
 Anquirite! Istam terra defossam premat,  
 1280 Gravisque tellus impio capiti iacubet.
-

# O E D I P U S.

---

## DRAMATIS PERSONAE.

*OEDIPUS.*

*IOCASTA.*

*CREON.*

*CHORUS THEBANORUM.*

*TIRESIAS.*

*MANTO.*

*SENEX.*

*PHORBAS*

*NUNTIUS.*

---



## ARGUMENTUM.

Grassante Thebis dira pestilentia mittitur Delphos Creon consulturus Apollinem. Refert, expiandam Laii necem interfectoris exilio. Qui cum ignoraretur, Tiresias, frustra extispicia aggressus, per necromantiam Laii umbra evocata intelligit, ipsum esse regem Oedipum. Negat primum ille, sed postea disquirens invenit, se filium esse Laii, quem interfecerat, et locastae, quam uxorem duxerat. Effossis itaque prae pudore atque ira oculis in exilium abijt, et Iocasta gladio se confodit.

---

## ALIUD ARGUMENTUM

### *HIERONYMI BALRI.*

- Laius erat duri periturus vulnere nati,  
Ut sortes vatum et Phoebi responsa canebant.  
Id metuens puerum primo de matre cadentem  
Condemnans iubet umbrosis exponere silvis.
- 5 Fata invicta manent, Parcarum immobilis ordo est.  
Infantem, ut perhibent, ad moenia celsa Corinthi  
Sors infensa tulit, regali et sede locavit;  
Ille autem, pergens scitatum oracula Phoebi,  
Unde genus ducat, quis primus sanguinis auctor,
- 10 Incidit in patrem, quem funere mersit acerbo  
Inscius, et Thebas violento Marte subegit.  
Iungitur ecce! nefas: thalamos namque ille parentis  
Invasit, proprios iterum revolutus in ortus.  
Haec ubi fatidici cecinerunt crimina vates:
- 15 Hic latuit densis effosso lumine silvis;  
At genitrix tantos finivit morte dolores.
-

# ACTUS PRIMUS.

*OEDIPUS, IOCASTA.*

*Oedipus de pestis saevitia conqueritur.*

**OED.** Iam nocte Titan dubius expulsa redit,  
Et nube moestum squalida exoritur iubar  
Lumenque flamma triste luctifica gerens  
Prospiciet avida peste solatas domos, 5  
Stragemque, quam nox fecit, ostendet dies.  
Quisquamne regno gaudet? O fallax bonum,  
Quantum malorum fronte quam blanda tegis.  
Ut alta ventos semper excipiunt iuga  
Rupemque saxis vasta dirimentem freta,  
Quamvis quieti, verberant fluctus maris: 10  
Imperia sic excelsa Fortunae obiacent.  
Quam bene parentis sceptrum Polybi fugeram,  
Curis solutus exul, intrepidus, vacans!  
Coelum deosque testor, in regnum incidi.  
Infanda timeo, ne mea genitor manu 15  
Perimatur. Hoc me Delphicae laurus monent,  
Aliudque nobis maius indicunt scelus.  
Est maius aliquod patre mactato nefas?  
Pro misera pietas? eloqui fatum pudet:  
Thalamos parentis Phoebus et diros toros 20  
Gnato minatur: impia incestos face.  
Hic me paternis expulit regnis timor:  
Non ego penates profugus excessi meos;  
Parum ipse fidens mihi met in tuto tua,  
Natura, posui iura. Cum magna horreas: 25  
Quae posse fieri non putes, metuas tamen.  
Cuncta expavesco, meque non credo mihi.  
Iam iam aliquid in nos fata moliri parant:

- Nam quid rear, quod ista Cadmeae lues  
30 Infesta genti strage tam late edita  
Mihi parcit uni? cui reservamur malo?  
Inter ruinas urbis et semper novis  
Deflenda lacrimis funera ac populi struem  
Incolumis adsto. Scilicet Phoebi reus  
35 Sperare poteras sceleribus tantis dari  
Regnum salubre? Fecimus coelum nocens.  
Non aura gelido lenis adflatu foveat  
Anhela flammis corda, non Zephyri leves  
Spirant; sed igne frigit aestiferi Canis  
40 Titan, Leonis terga Nemeaei premens.  
Deseruit annes humor atque herbas color,  
Aretque Dirce; tenuis Ismenos fluit,  
Et tingit inopi nuda vix unda vada.  
Obscura coelo labitur Phoebi soror,  
45 Tristisque mundus núbilo pallet novo.  
Nullum serenis noctibus sidus micat;  
Sed gravis et ater incubat terris vapor.  
Obtexit arces coelitem ac summas domos  
Inferna facies. Denegat fructum Ceres  
50 Adulta; et altis flava cum spicis tremat,  
Arente culmo sterilis emoritur seges.  
Nec ulla pars immunis exitio vacat:  
Sed omnis aetas pariter et sexus ruit,  
Juvenesque senibus iungit, et gnatis patres  
55 Funesta pestis; una fax thalamos cremat;  
Planctuque acerbo funera et questu carent.  
Quin ipsa tanti pervicax clades mali  
Siccavit oculos; quodque in extremis solet,  
Periere lacrimae. Portat hunc aeger parens  
60 Supremum ad ignem; mater hunc amens gerit;  
Properatque, ut alium repetat in eundem rogam.  
Quin luctu in ipso luctus exoritur novus,  
Suaeque circa funus exequiae cadunt.  
Tum propria flammis corpora alienis cremant;



Nodosa sortis verba et implexos dolos  
Ac triste carmen alitis solvi ferae.

10 c. Quid sera mortis vota nunc demens facis?

Licuit perire. Laudis hoc pretium tibi

105 Sceptrum, et peremtae Sphingis haec merces  
datur.

OED. Ille, ille, dirus callidi monstri cinis

In nos rebellat; illa nunc Thebas lues

Peremta perdit. Una iam superest salus,

Si quam salutis Phoebus ostendit viam.

### CHORUS.

*Luis gravitatem deplorat Chorus e Thebanis.*

110 Occidis Cadmi generosa proles

Urbe cum tota! viduas colonis

Respicis terras, miseranda Thebe I 5. 42

Carpitur leto tuus ille, Bacche,

Miles, extremos comes usque ad Indos.

115 Ausus Eois equitare campis,

Figere et mundo tua signa primo.

Cinnami silvis Arabes beatos

Vidit, et versas equitis sagittas

Terga fallacis metuenda Parthi;

120 Littus intravit pelagi rubentis.

Promit hic ortus aperitque lucem

Phoebus, et flamma propiore nudos

Inficit Indos.

Stirpis invictae genus interimus.

125 Labimur saevo rapiente fato.

Ducitur semper nova pompa Morti;

Longus ad manes properatur ordo

Agminis moesti; seriesque tristis

Haeret, et turbae tumulos petenti

130 Non satis septem patuere portae.

Stat gravis strages, premiturque iuncto

Funere funus.

Prima vis tardas tetigit bidentes:

Laniger pingues male carpsit herbas.

Colla tacturus steterat sacerdos;

135

Dum manus certum parat alta vulnus:

Aureo taurus rutilante cornu

Labitur segnis. Patuit sub ictu

Ponderis vasti resoluta cervix?

Ne cruor ferrum maculavit: atra

140

Turpis e plaga sanies profusa est.

Segnior cursu sonipes in ipso

Concidit gyro, dominumque prono

Prodidit armo.

Incubant pratis pecudes relictæ;

145

Taurus armento pereunte marcet.

Deficit pastor grege diminuto,

Tabidos inter moriens iuvenços.

Non lupos cervi metuunt rapaces;

Cessat irati fremitus leonis;

150

Nulla villosis feritas in ursis;

Perdidit pestem latebrosa serpens,

Aret, et sicco moritur veneno.

Non silva sua decorata coma

Fundit opacis montibus umbras;

155

Non rura virent ubere glebae;

Non plena suo vitis laccho

Brachia curvat:

Omnia nostrum sensere malum.

Rupere Erebi claustra profundi

160

Turba sororum face Tartarea;

Phlegethonque sua motam ripa

Miscuit undis Styga Sidoniis

Mors alta avidos oris hiatus

Pandit, et omnes explicat alas.

165

Quique capaci turbida cymba

Flumina servat durus senio

- Navita crudo, vix adsiduo  
Brachia conto lassata refert,  
170 Fessus turbam vectare novam.  
Quin Taenarei vincula ferri  
Rupisse canem fama, et nostris  
Errare locis; mugisse solum:  
Vaga per lucos simulacra virum  
175 Maiora viris; bis Cadmeum  
Nive discussa tremuisse nemus;  
Bis turbatam sanguine Dircen;  
Nocte silenti  
Amphionios ululasse canes.  
180 O dira novi facies leti,  
Gravior leto! Piger ignavos  
Adligat artus languor; et aegro  
Rubor in vultu, maculaeque caput  
Sparsere leves; tum vapor ipsam  
185 Corporis arcem flammeus urit,  
Multoque genas sanguine tendit,  
Oculique rigent, et sacer ignis  
Pascitur artus; resonant aures;  
Stillatque niger naris aduncae  
190 Cruor, et venas rumpit hiantes;  
Intima creber viscera quassat  
Gemitus stridens. Tunc amplexu  
Frigida presso saxa fatigant.  
Quos liberior domus elato  
195 Custode sinit, petitis fontes,  
Aliturque sitis latice ingesto.  
Prostrata iacet turba per aras,  
Oratque mori. Solum hoc faciles  
Tribuere dei. Delubra petunt,  
200 Haud ut voto numina placent,  
Sed iuvat ipsos satiare deos.  
Quisnam ille propero regiam gressu petit?  
Adestne clarus sanguine ac factis Creon,

An aeger animus falsa pro veris videt?

Adest petitus omnibus votis Creon.

205

## ACTUS SECUNDUS.

## OEDIPUS, CREON.

*Reversus Delphis Creon nuntiat, iubere deum, ut mors Laii expurgetur, nec prius cessaturam pestem, quam in exilium mittatur interfector eius; de quo, quia non nominatur, ambigitur.*

OED. Horrore quatior, fata quo vergant timens,  
Trepidumque gemino pectus afflictu labat.

Ubi laeta duris mixta in ambiguo iacent:

Incertus animus scire cum cupiat, timet.

Germane nostrae coniugis, fessis opem 210

Si quam reportas, voce properata edoce.

C.R. Responsa dubia sorte perplexa latent.

OED. Dubiam salutem qui dat afflictis, negat.

C.R. Ambage flexa Delphico mos est deo

Arcana tegere. OED. Fare, sit dubium licet 215

Ambigua soli noscere Oedipodae datur.

C.R. Caedem expiari regiam exilio deus,

Et interemtum Laium ulcisci iubet.

Non ante coelo lucidus curret dies,

Hautusque tutos aetheris puri dabit. 220

OED. Et quis peremtor incliti regis fuit?

Quem memoret, ede, Phoebus: ut poenas luat.

C.R. Sit, precor, dixisse tutum visu et auditu horrida.

Torpor insedit per artus, frigidus sanguis coit.

Ut sacrata templa Phoebi supplici intravi pede, 225

Et pias, numen precatus, rite submissi manus:

Gemina Parnassi nivalis arx trucem fremitum dedit,



- Imminens Phoebea laurus tremuit et movit domum,  
Ac repente sancta fontis lympha Castalii stetit.
- 230 Incipit Lethaea vates spargere horrentes comas,  
Et pati commota Phoebum. Contigit nondum specum;
- Emicat vasto fragore maior humano sonus:  
„Mitia Cadmeis remeabunt sidera Thebis,  
„Si profugus Dircen Ismenida liqueris hospes,  
235 „Regis caede nocens, Phoebus iam notus et infans.  
„Nec tibi longa manent sceleratae gaudia caedis:  
„Tecum bellageres, natis quoque bella relinques,  
„Turpis maternos iterum revolutus in ortus.“
- OED. Quod facere monitu coelitus iussus paro,  
240 Functi cineribus regis hoc decuit dari,  
Ne sancta quisquam sceptrum violaret dolo.  
Regi tuenda maxime regum est salus:  
Queritur peremptum nemo, quem incolumem timet.  
CR. Curam perempti maior excussit timor.
- 245 OED. Pium prohibuit ullus officium metus?  
CR. Sphinx et nefandi carminis tristes minae.  
OED. Nunc expietur numinum imperio scelus.  
Quisquis deorum regna placatus vides;  
Tu, tu, penes quem iura praecipitis poli;  
250 Tuque, o sereni maximum mundi decus,  
Bis sena cursu signa qui vario regis,  
Qui tarda celeri secula evolvis rota;  
Sororque fratri semper occurrens tuo,  
Noctivaga Phoebe; quique ventorum potens
- 255 Aequor per altum caerulos currus agis;  
Et qui carentes luce disponis domos,  
Adeste! Cuius Laus dextra occidit,  
Hunc non quieta tecta, non fidi lares,  
Non hospitalis exulem tellus ferat.
- 260 Thalamis pudendis doleat et prole impia.  
Hic et parentem dextera perimat sua;  
Faciatur (num quid gravius optari potest?)

Quidquid ego fugi. Non erit veniae locus: Per regna iuro, quaeque nunc hospes gero. Et quae reliqui, perque penetrales deos	265
Per te, pater Neptune, qui fluctu brevi Utrique nostro geminus adludis solo; Et ipse nostris vocibus testis veni, Fatidica vatis ora Cirrhaeae movens. Ita molle senium ducat, et summum diem	270
Securus alto reddat in solio, parens, Solasque Merope noverit Polybi faces, Ut nulla sontem gratia eripiet mihi! Sed quo nefandum facinus admissum loco est, Memorato. Aperto Marte, an insidiis iacet?	275
c R. Frondifera sanctae nemora Castaliae vetens, Calcavit arctis obsitum dumis iter, Trigemina qua se spargit in campos via. Secat una gratum Phocidos Baccho solum, Unde altus ima deserit, coelum petens,	280
Clementer acto colle, Parnassos biceps; At una bimares Sisyphi terras adit, Olenia in arva; tertius trames, cava Convallē serpens, tangit errantes aquas, Gelidumque dirimit amnis Elei vadum.	285
Hic pace fretum subita praedonum manus Adgressa ferro facinus occultum tulit. In tempore ipso, sorte Phoebea excitus, Tiresia tremulo tardus adcelerat genu, Comesque Manto luce viduatum trahens.	290

## OEDIPUS, TIRESIAS, MANTO.

*Tiresias per haruspiciū oruere Laii interfectorem tentat, sed re propter tristia extispicia infecta ad necromantiam se convertit.*

OED. Sacrate divis, proximum Phoebō caput,  
Responsa solve; fare, quem poenae petant.

TIR. Quod tarda fatu est lingua, quod quaerit  
moras,

Haud te quidem, magnanime, mirari addeet:

295 Visu carenti magna pars veri latet.

Sed quo vocat me patria, quo Phoebus, sequar:

Fata eruantur. Si foret viridis mihi

Calidusque sanguis. pectore exciperem deum.

Adpellite aris candidum tergo bovem,

300 Curvoque nunquam colla depressum iugo!

Tu, lucis inopem, gnata, genitorem regens,

Manifesta sacri signa fatidici refer.

MAN. Opima sanctas victima ante aras stetit.

TIR. In vota Superos voce solemni voca,

305 Arasque dono tuis Eoi extrus.

MAN. Iam tura sacris coelitus ingessi focis

TIR. Quid flamma? largas iamne comprehendit da  
pes?

MAN. Subito refulsit lumine, et subito occidit.

TIR. Utrumne clarus ignis et nitidus stetit,

310 Rectusque purum verticem coelo tulit,

Et summam in auras fusus explicuit comam;

An latera circumserpit incertus viro,

Et fluctuante turbidus fumo labat

MAN. Non una facies mobili flammae fuit:

315 Imbrifera qualis implicat varios sibi

Iris colores, parte quae magna poli

Curvata pecto nuntiat nimbos sinu.

Quis desit illi, quisve sit, dubites, color:

Caerulea fulvis mixta oberravit notis;

320 Sanguinea rursus; ultima in tenebras abiit.

Sed ecce! pugna ignis in partes duas

Discedit, et se scindit unius sacri

Discors favilla. Genitor, horresco intuens:

Libata Bacchi dona permuta cruor,

325 Ambitque densus regiam famus caput.

Ipsosque circa spissior vultus sedet,

Et nube densa sordidum lucem abdidit.  
 Quid sit, parens, effare! TIR. Quid fari queam  
 Inter tumultus mentis attonitae vagus?  
 Quidnam loquar? Sunt dira, sed in alto, mala. 330  
 Solet ira certis numinum ostendi notis.  
 Quid istud est, quod esse prolatum volent  
 Iterumque nolunt, et truces iras tegunt?  
 Pudet deos nescio quid. Huc propere admove,  
 Et sparge salsa colla taurorum mola. 335  
 Placidone vultu sacra et admotas manus  
 Patiuntur? MAN. Altum taurus attollens caput,  
 Primos ad ortus positus, expavit diem,  
 Trepidusque vultum obliquat, et radios fugit.  
 TIR. Unone terram vulnere adflicti petunt? 340  
 MAN. Iuvenca ferro semet opposito induit,  
 Et vulnere uno cecidit; at taurus, duos  
 Perpressus ictus, huc et huc dubius ruit,  
 Animamque fessus vix reluctantem exprimit.  
 TIR. Utrum citatus vulnere angusto micat, 345  
 An lentus altas irrigat plagas cruor?  
 MAN. Huius per ipsam, qua patet pectus, viam  
 Effusus annis; huius exiguo graves  
 Maculantur ictus imbre, sed versus retro  
 Per ora multus sanguis atque oculos redit. 350  
 TIR. Infausta magnos sacra terrores cient.  
 Sed ede certas viscerum nobis notas.  
 MAN. Genitor, quid hoc est? Non levi motu, ut solent,  
 Agitata trepidant exta; sed totas manus  
 Quatiunt, novaeque prosilit venis cruor. 355  
 Cur marcet aegrum penitus, ac mersum latet,  
 Liventque venae; magna pars fibris abest;  
 Et felle nigro tabidum spumat iecor,  
 Ac (semper omen unico imperio grave)  
 En! capita paribus bina consurgunt toris; 360  
 Sed utramque caesum tenuis abscondit caput  
 Membrana. Latebram rebus occultis negans,

- Hostile valido robore insurgit latus,  
Septemque venas tendit. Has omnes retro  
365 Prohibens reverti limes obliquus secat.  
Mutatus ordo est, sede nil propria iacet;  
Sed acta retro cuncta. Non animae capax  
In parte dextra pulmo sanguineus iacet;  
Non laeva cordis regio; non molli ambitu  
370 Omenta pingues viscera obtendunt sinus.  
Natura versa est; nulla lex utero manet.  
Scrutemur, unde tantus hic extis rigor.  
Quod hoc nefas? Conceptus innuptae bovis,  
Nec more solito positus, alieno in loco  
375 Implet parentem. Membra cum gemitu movet;  
Tremulo rigore debiles artus micant;  
Infecit atras lividus fibras cruor;  
Tentantque turpes mobilem trunci gradum,  
Et inane surgit corpus, ac sacros petit  
380 Cornu ministros; viscera effugiunt manum;  
Neque ipsa, quae te pepulit, armenti gravis  
Vox est, nec usquam territi resonant greges:  
Immugit aris ignis, et trepidant foci.  
OED. Qui ista sacri signa terrifici ferant,  
385 Exprobre: voces aure non timida hauriam.  
Solent suprema facere securos mala.  
TIR. His invidetis, quibus opem quaeris, malis.  
OED. Memora, quod unum scire coelicolae volunt,  
Contaminarit rege quis caeso manus.  
390 TIR. Nec alta coeli quae levi penna secant,  
Nec fibra vivis rapta pectoribus potest  
Ciere nomen: alia tentanda est via.  
Ipse evocandus noctis aeternae plagis:  
Emissus Erebo ut caedis auctorem indicet.  
395 Reseranda tellus, Ditis implacabile  
Numen precandum, populus infernae Stygis  
Huc extrahendus. Ede: cui mandas sacrum?  
Nam te, penes quem summa regnorum est, nefas

**Invisere umbras.** OED. Te, Creó, hic poscit labor,  
 Ad quem secundum regna respiciunt mea. 400  
 TIR. Dum nos profundae claustra laxamus Stygis,  
 Populare Bacchi laudibus carmen sonet.

## CHORUS.

*Canit Chorus dithyrambum, qui Bacchi gesta et inventa continet.*

Effusam redimite comam nutante corymbo,  
 Mollia Nisaeis armate brachia thyrsis,  
 Lucidum coeli decus, huc ades votis, 405  
 Quae tibi nobiles Thebae, Bacche, tuae  
 Palmis supplicibus ferunt!  
 Huc adverte favens virgineum caput!  
 Vultu sidereo discute nubila,  
 Et tristes Erebi minas, avidumque fatum! 410  
 Te decet vernis comam floribus cingi,  
 Te caput Tyria cohibere mitra,  
 Hederave mollem baccifera religare frontem;  
 Spargere effusos sine lege crines;  
 Rursus adducto revocare nodo; 415  
 Qualis iratam metuens novercam  
 Creveras falsos imitatus artus,  
 Crine flaventi simulata virgo,  
 Luteam vestem retinente zona.  
 Inde tam molles placuere cultus, 420  
 Et sinus laxi, fluidumque syrma.  
 Vidit aurato residere curru,  
 Veste cum longa tegeres leones,  
 Omnis Eoae plaga vasta terrae,  
 Qui bibit Gangem, niveumque quisquis 425  
 Frangit Araxen.  
 Te senior turpi sequitur Silenus asello,  
 Turgida pampineis redimitus tempora sertis.  
 Condita lascivi deducunt orgia mystae.

- 430 Te Bassaridum comitata cohors  
Nunc Edoni pede pulsavit  
Sola Pangaei;  
Nunc Threicio vertice Pindi;  
Nunc Cadmeas inter matres
- 435 Impia Maenas  
Comes Ogygio venit Iaccho,  
Nebride sacra praecincta latus.  
Tibi commotae pectora matres  
Fudere comam;
- 440 Thyrsumque levem vibrante manu  
Iam post laceros Pentheos artus  
Thyades, oestro membra remissae,  
Velut ignotum videre nefas.  
Ponti regna tenet nitidi matertera Bacchi,
- 445 Nereidumque choris Cadmeia cingitur Ino;  
Ius habet in fluctus magni puer advena ponti  
Cognatus Bacchi, numen non vile, Palaemon.  
Te Tyrrhena, puer, rapuit manus,  
Et tumidum Nereus posuit mare;
- 450 Caerula cum pratis mutat freta:  
Hinc verno platanus folio viret,  
Et Phoebus laurus carum nemus  
(Garrula per ramos avis obstrepit); | IV 2.17  
Vivaces hederas remus tenet;
- 455 Summa ligat vitis carchesia.  
Idaeus prora fremuit leo;  
Tigris puppe sedet Gangetica.  
Tum pirata freto pavidus natat,  
Et nova demersos facies habet:
- 460 Brachia prima cadunt praedonibus,  
Illisumque utero pectus coit;  
Parvula dependet lateri manus  
Et dorso fluctum curvo subit,  
Lunata scindit cauda mare:
- 465 Et sequitur curvus fugientia carbasa delphin.

Divite Pactolos vexit te Lydius unda,  
 Aurea torrenti deducens flumina ripa.  
 Laxavit victos arcus Geticasque sagittas  
 Lactea Massagetes qui pocula sanguine miscet.  
 Regna securigeri Bacchum sensere Lycurgi; 470  
 Sensere terrae Zalacum feroces,  
 Et quos vicinus Boreas ferit  
 Arva mutantes; quasque Maeotis  
 Adluit gentes frigido fluctu;  
 Quasque despectat vertice summo) 475  
 Sidus Arcadium, geminumque plaustrum.  
 Ille dispersos domuit Gelonos;  
 Arma detraxit trucibus puellis;  
 Ore deiecto petiere terram  
 Thermodontiacae graves catervae, 480  
 Positisque tandem levibus sagittis,  
 Maenades factae.  
 Sacer et Cithaeron sanguine undavit  
 Amphioniaque caede;  
 Proetides silvas petiere, et Argos 485  
 Praesente Bacchum coluit noverca.  
 Naxos Aegaeo redimita ponto  
 Tradidit thalamis virginem relictam,  
 Meliore pensans damna marito.  
 Pumice ex sicco fluxit Nyctelius latex; 490  
 Garruli gramen secuere rivi.  
 Combibit dulces humus alta succos,  
 Niveique lactis candida fontes,  
 Et mixta odoro Lesbia cum thymo.  
 Ducitur magno nova nupta coelo. 495  
 Solemne Phoebus carmen edit,  
 Infusis humero capillis;  
 Concutit taedas geminus Cupido;  
 Telum deposuit Iupiter igneum,  
 Oditque Baccho veniente fulmen. 500  
 Lucida dum current annosi sidera mundi,



- Oceanus clausum dum fluctibus ambiet orbem,  
 Lunaque dimissos dum plena recolliget ignes,  
 Dum matutinos praedicet Lucifer ortus,  
 505 Altaque caeruleum dum Nerea nesciet Arctos:  
 Candida formosi venerabimur ora Lyaei.
- 

## ACTUS TERTIUS.

## OEDIPUS, CREON.

*Indicat regi Creon ex necromantia, seu mavis sciomantia, intellexisse se, interfectorem Laii Oedipum fuisse. Ille fretus opinione sua de Polybo patre negat, et post iurgia Creontem in carcerem coniici iubet.*

- OED. **E**t si ipse vultus flebiles praefert notas,  
 Exprobre, cuius capite placemus deos.  
 CR. Fari iubes, tacere quae suadet metus.  
 510 OED. Si te ruentes non satis Thebae movent,  
 At sceptrum moveant lapsa cognatae domus.  
 CR. Nescisse cupies, nosse quae nimium expetis  
 OED. Iners malorum remedium ignorantia est.  
 Itane et salutis publicae indicium obrues?  
 515 CR. Ubi turpis est medicina, sanari piget.  
 OED. Audita fare; vel malo domitus gravi,  
 Quid arma possint regis irati, scies.  
 CR. Odere reges dicta, quae dici iubent.  
 OED. Mitteris Erebo vile pro cunctis caput,  
 520 Arcana sacri voce ni retegis tua.  
 CR. Tacere liceat. Nulla libertas minor  
 A rege petitur. OED. Saepe vel lingua magis  
 Regi atque regno muta libertas obest.  
 CR. Ubi non licet tacere, quid cuiquam licet?  
 525 OED. Imperia solvit, qui tacet, iussus loqui.  
 CR. Coacta verba placidus accipias, precor.

oED. Ulline poena vocis expressae fuit?	
CR. Est procul ab urbe lucus ilicibus niger, Dircaea circa vallis irriguae loca.	
Cupressus altis exerens silvis caput	530
Virente semper adligat trunco nemus; Curvosque tendit quercus et putres situ Annosa ramos. Huius abruptit latus Edax vetustas; illa, iam fessa cadens Radice, fulta pendet aliena trabe.	535
Amara baccas laurus, et tiliae leves, Et Paphia myrtus, et per immensum mare Motura remos alnus, et Phoebio obvia Enode Zephyris pinus opponens latus, Medio stat ingens arbor, atque umbra gravi	540
Silvas minores urget; et, magno ambitu Diffusa ramos, una defendit nemus. Tristis sub illa lucis et Phoebi inscius Restagnat humor, frigore aeterno rigens;	545
Limosa pigrum circuit fontem palus. Huc ut sacerdos intulit senior gradum: Haud est moratus. Praestitit noctem locus. Tum fossa tellus, et super rapti rogis Iaciuntur ignes. Ipse funesto integit	550
Vates amictu corpus, et frontem quatit. Lugubris imos palla perfundit pedes; Squalente cultu moestus ingreditur senex; Mortifera canam taxus adstringit comam. Nigro bidentes vellere atque atrae boves Retro trahuntur. Flamma praedatur dapes,	555
Vivumque trepidat igne ferali pecus. Vocat inde Manes; teque, qui Manes regis, Et obsidentem claustra letalis lacus; Carmenque magicum volvit, et rabido minax Decantat ore, quidquid aut placat leves	560
Aut cogit umbras. Sanguinem libat focus, Solidasque pecudes urit, et multo specum	

- Saturat cruore. Libat et niveum insuper  
Lactis liquorem; fundit et Bacchum manu  
565 Laeva, canitque rursus, et, terram intuens,  
Graviore Manes voce et attonita citat.  
Latravit Hecates turba; ter valles cavae  
Sonuere moestum; tota succusso solo  
Pulsata tellus. „Audior,“ vates ait;  
570 „Rata verba fudi; rumpitur coecum chaos.  
Iterque populo Ditis ad Superos datur.“  
Subsedit omnis silva, et erexit comas;  
Duxere rimas robora, et totum nemus  
Concussit horror; terra se retro dedit,  
575 Gemuitque penitus: sive tentari abditum  
Acheron profundum mente non aequa tulit;  
Sive ipsa tellus, ut daret functis viam,  
Compagē rupta sonuit; aut ira furens  
Triceps catenas Cerberus movit graves.  
580 Subito dehiscit terra, et immenso sinu  
Laxata patuit. Ipse pallentes deos  
Vidi inter umbras; ipse torpentes lacus  
Noctemque veram. Gelidus in venis stetit  
Haesitque sanguis. Saeva prosiluit cohors,  
585 Et stetit in armis omne vipereum genus  
Fratrum, catervae dente Dircaeο satae;  
Avidumque populi Pestis Ogygii malum.  
Tum torva Erinnyes sonuit, et coecus Furor,  
Horrorque, et una quidquid aeternae creant  
590 Celantque tenebrae: Luctus evellens comam,  
Aegreque lassum sustinens Morbus caput,  
Gravis Senectus sibimet, et pendens Metus.  
Nos liquit animus. Ipsa, quae ritus semis  
Artesque norat, stupuit. Intrepidus parens.  
595 Audaxque damno, convocat Ditis feri  
Exangue vulgus. Illico ut nebulae leves  
Volitant, et auras libero coelo trahunt.  
Non tot caducas educat frondes Eryx;

Nec vere flores Hybla tot medio creat,  
 Cum examen alto nectitur densum globo; 600  
 Fluctusque non tot frangit Ionium mare;  
 Nec tanta gelidi Strymonis fugiens minas  
 Permutat hiemes ales, et coelum secans  
 Tepente Nilo pensat Arctoas nives:  
 Quot ille populos vatis eduxit sonus. 605  
 Pavidæ latebras nemoris umbrosi petunt  
 Animæ trementes. Primus emergit solo  
 Dextra ferocem cornibus taurum premens  
 Zethus; manuque sustinens laeva chelyn,  
 Qui saxa dulci traxit, Amphion, sono. 610  
 Interque natos Tantalus tandem suos  
 Tuto superba fert caput fastu grave,  
 Et numerat umbras. Peior hac genitrix adest,  
 Furibunda Agave, tota quam sequitur manus  
 Partita regem. Sequitur et Bacchas lacer 615  
 Pentheus, tenetque saevus etiam nunc minas.  
 Tandem, vocatus saepe, pudibundum extulit  
 Caput, atque ab omni dissidet turba procul,  
 Celatque semet (instat et Stygias preces  
 Geminat sacerdos, donec in apertum efferat 620  
 Vultus opertos) Laius. Fari horreo:  
 Stetit per artus sanguine effuso horridus,  
 Paedure foedo squalidam obtentus comam,  
 Et ore rabido fatur: O Cadmi effera,  
 Cruore semper laeta cognato domus, 625  
 Vibrate thyrsos! enthea gnatos manu  
 Lacerate potius: maximum Thebis scelus  
 Maternus amor est. Patria, non ira deum,  
 Sed scelere raperis. Non gravi flatu tibi  
 Luctificus Auster, nec parum pluvio aethere 630  
 Satiata tellus halitu sicco nocet:  
 Sed rex cruentus, pretia qui saevae necis  
 Sceptra et nefandos occupat thalamos patris,  
 Invisa proles; sed tamen peior parens,

- 635 Quam natus: utero rursus infausto gravis  
Egit qui in ortus semet, et matri impios  
Foetus regessit; quique vix mos est feris,  
Fratres sibi ipse genuit; implicitum malum,  
Magisque monstrum Sphinge perplexum sua.
- 640 Te, te, cruenta sceptrā qui dextra geris,  
Te pater inultus urbe cum tota petam,  
Et mecum Erinnyū pronubam thalami traham,  
Traham sonantem verberē! incestam domum  
Vertam, et penates impio Marte obteram!
- 645 Proinde pulsum finibus regem ocīus  
Agite exulem! Quodcunque funesto gradu  
Solum relinquet, vere florifero virens  
Reparabit herbas; spiritus puros dabit  
Vitalis aura, veniet et silvis decor;
- 650 Letum, Luesque, Mors, Labor, Tabes, Dolor,  
Comitatus illo dignus, excedent simul.  
Et ipse rapidis gressibus sedes volet  
Effugere nostras; sed graves pedibus moras  
Addam, et tenebo: repet incertus viae,
- 655 Baculo senili triste praetentans iter.  
Eripite terras: auferam coelum pater.  
O E D. Et ossa et artus gelidus invasit tremor:  
Quidquid timebam facere, fecisse arguor  
Tori iugalis abnuit Merope nefas,
- 660 Sociata Polybo; sospes absolvit manus  
Polybus meas; uterque defendit parens  
Caedem, stuprumque: quis locus culpae est super?  
Multo ante Thebae Laïum amissum gemunt,  
Boeota gressu quam meo tetigi loca.
- 665 Falsusne senior, an deus Thebis gravis? —  
Iamiam tenemus callidi socios doli:  
Mentitur ista praeferens fraudi deos  
Vates, tibiue sceptrā despondet mea.  
C R. Egon' ut sororem regia expelli velim?
- 670 Si me fides sacrata cognati laris

Non contineret in meo certum statu:

Tamen ipsa me Fortuna terreret, nimis  
Sollicita semper. Libeat hoc tuto tibi  
Exuere pondus: ne recedentem opprimat.  
Iam te minore tutior pones loco.

675

OED. Hortaris etiam, sponte deponam ut mea  
'Tam gravia regna? C.R. Suadeam hoc illis ego,  
In utrumque quis est liber etiamnum status.  
'Tibi iam necesse est ferre fortunam tuam.

OED. Certissima est regnare cupienti via  
Laudare modica, et otium ac somnum loqui.  
Ab inquieto saepe simulatur quies.

680

C.R. Parumne me tam longa defendit fides?  
OED. Aditum nocendi perfido praestat fides.

C.R. Solutus onere regio regni bonis  
Fruor, domusque civium coetu viget;  
Nec ulla vicibus surgit alternis dies,

685

Qua non propinqui munera ad nostros lares  
Sceptri redundant cultus, opulentae dapes.  
Donata multis gratia nostra salus.

690

Quid tam beatæ deesse fortunæ rear?

OED. Quod deest: secunda non habent unquam  
modum.

C.R. Incognita igitur ut nocens causa cadam?

OED. Num ratio vobis reddita est vitæ meae?

Num audita causa est nostra Tiresiae? tamen  
Sontes videmur. Facitis exemplum: sequor.

695

C.R. Quid, si innocens sum? OED. Dubia pro certis  
solent

'Timere reges. C.R. Qui pavet vanos metus,  
Veros meretur. OED. Quisquis in culpa fuit,  
Dimissus odit omne, quod dubium putat.

700

C.R. Sic odia fiunt. OED. Odia qui nimium timet  
Regnare nescit: regna custodit metus.

C.R. Qui sceptrâ duro saevus imperio regit,  
'Timet timentes; metus in auctorem redit.

- 705 oed. Servate sontem saxeo inclusum specu;  
Ipse ad penates regio referam gradum.

**CHORUS.**

*Excusat Oedipum Chorus, transferendo culpam in mala Thebarum fata, quae ab ipsa inauspicata bove Thebanos usque vexarint.*

- Non tu tantis causa periclis,  
Non haec Labdacidas petunt  
Fata; sed veteres deum  
710 Irae sequuntur. Castalium nemus  
Umbram Sidonio praebuit hospiti,  
Lavitque Dirce Tyrios colonos,  
Ut primum magni natus Agenoris,  
Fessus per orbem furta sequi Iovis,  
715 Sub nostra pavidus constitit arbore,  
Praedonem venerans suum;  
Monituque Phoebi iussus erranti  
Comes ire vaccae, quam non flexerat  
Vomer, aut tardi iuga curva plaustris,  
720 Deseruit fugas, nomenque genti  
Inauspicata de bove tradidit.  
Tempore ex illo nova monstra semper  
Protulit tellus.  
Aut anguis, imis vallibus editus,  
725 Annosa supra robora sibilat,  
Supraque pinus;  
Supra Chaonias celsior arbores  
Caerulum erexit caput,  
Cum maiore sui parte recumberet;  
730 Aut foeta tellus impio partu  
Effudit arma; sonuit reflexo  
Classicum cornu, lituusque adunco  
Stridulos cantus elisit aere  
Ante non linguas agiles, et auram

**OEDIPUS. ACT. III.****171****Vocis ignotae clamore primum****735****Hostico experti,****Agmina, campos, cognata, tenent.****Dignaque iacto semine proles,****Uno aetatem permensa die,****Post Luciferi nata meatus,****740****Ante Hesperios occidit ortus.****Horret tantis advena monstria,****Populique timet bella recentis:****Donec cecidit saeva iuventus,****Genitrixque suo reddi gremio****745****Modo productos vidit alumnos.****Hac transierit civile nefas!****Illa Herculeae norint Thebae****Proelia fratrum!****Quid Cadmei fata nepotis,****750****Cum vivacis cornua cervi****Frontem ramis texere novis,****Dominumque canes egere suum?****Praeceptis silvas montesque fugit****Citus Actaeon, agilique magis****755****Pede per saltus et saxa vagus****Metuit motas zephyro plumas,****Et, quae posuit, retia vitat;****Donec placidi fontis in unda****Cornua vidit vultusque feros,****760****Ubi virgineos foverat artus****Nimium saevi diva pudoris.**

---



## ACTUS QUARTUS.

## OEDIPUS, IOCASTA.

*Susplicari iam incipit Oedipus, ne ille forte, quem olim Delphos petens occidisset, Laius fuerit: quaerit itaque ab Iocasta de Laii aetate, necis tempore, et aliis circumstantiis.*

- OED. Curas revolvit animus, et repetit metus.  
 Obiisse nostro Laium scelere autumant  
 765 Superi Inferique; sed animus contra innocens,  
 Sibi que melius quam deis notus, negat.  
 Redi memoria tenue per vestigium,  
 Cecidisse nostri stipitis pulsu obvium,  
 Datumque Diti, cum prior iuvenem senex  
 770 Curru superbus pelleret, Thebis procul,  
 Phocaea trifidas regio qua scindit vias.  
 Unaninia coniux, explica errorem, precor  
 Quae spatia moriens Laius vitae tulit?  
 Primone in aevo viridis, an fracto occidit?  
 775 IO C. Inter senem iuvenemque; sed propior seni.  
 OED. Frequensne turba regium cinxit latus?  
 IO C. Plures fefellit error ancipitis viae;  
 Paucos fidelis curribus iunxit labor.  
 OED. Aliquisne cecidit regio fato comes?  
 780 IO C. Unum fides virtusque consortem addidit.  
 OED. Teneo nocentem: convenit numerus, locus.  
 Sed tempus adde. IO C. Decima iam metitur seges

## SENEA, OEDIPUS.

*Esene a Merope et Corinthiis musso, qui Oedipum de Polybi morte doceat, rogetque, ad gubernacula regni suscipienda veniat, discit Oedipus, se non vere esse Polybi filium: nimia inque curiositate sua veros invenit parentes.*

SEN. Corinthius te populus in regnum vocat

**Patrium:** quietem Polybus aeternam obtinet.

**OED.** Ut undique in me saeva Fortuna irruit! 785

**Edissere** agedum, quo cadat fato parens.

**SEN.** Animam semilem mollis exsolvit sopor.

**OED.** Genitor sine ulla caede defunctus iacet.

**Testor**, licet iam tollere ad coelum pie

**Puras** nec ulla scelera metuentes manus. 790

**Sed** pars magis metuenda fatorum manet.

**SEN.** Omnem paterna regna discutient metum.

**OED.** Paterna repetam regna; sed matrem horreo.

**SEN.** Metuis parentem, quae tuum reditum expetens

**Sollicita** pendet? **OED.** Ipsa me pietas fugat. 795

**SEN.** Viduam relinques? **OED.** Tangis, en, ipsos  
metus!

**SEN.** Effare, mersus quis premat mentem timor

**Praestare** tacitam regibus soleo fidem.

**OED.** Connubia matris Delphico admonitu tremo.

**SEN.** Timere vana desine, et turpes metus 800

**Depone:** Merope vera non fuerat parens.

**OED.** Quod subditivi praemium gnati petit?

**SEN.** Regnum superbum; liberi adstringunt fidem.

**OED.** Secreta thalami, fare, quo excipias modo.

**SEN.** Hae te parenti parvulum tradunt manus. 805

**OED.** Tu me parenti tradis? at quis me tibi?

**SEN.** Pastor nivoso sub Cithaeronis iugo.

**OED.** In illa temet nemora quis casus tulit?

**SEN.** Illo sequebar monte cornigeros greges.

**OED.** Nunc adice certas corporis nostri notas. 810

**SEN.** Forata ferro gesseras vestigia,

**Tumore** nactus nomen ac vitio pedum.

**OED.** Quis fuerit ille, qui meum dono dedit

**Corpus**, requiro. **SEN.** Regios pavit greges;

**Minor** sub illo turba pastorum fuit. 815

**OED.** Eloquere nomen. **SEN.** Prima languescit  
senum

**Memoria**, longo lassa sublabens situ.

OED. Potesne facie noscere ac vultu virum?

SEN. Fortasse noscam: saepe iam spatio obrutam

820 Levis exoletam memoriam revocat nota.

OED. Ad sacra et aras omne compulsus pecus

Duces sequantur. Ite propere! arcessite,

Famuli, penes quos summa consistit gregum!

SEN. Sive ista ratio sive fortuna occulit:

825 Latere semper patere, quod latuit diu.

Saepe eruentis veritas patuit malo.

OED. Malum timeri maius his aliquid potest?

SEN. Magnum esse, magna mole quod petitur,  
scias.

Concurrit illinc publica, hinc regis salus,

830 Utrunque paria: contine medias manus.

Nihil ut lacessas, ipsa se fata explicant.

Non expedit concutere felicem statum.

OED. Tuto movetur, quidquid extremo in loco est

SEN. Nobilius aliquid genere regali adpetis?

835 Ne te parentis pigeat inventi, vide.

OED. Vel poenitendi sanguinis quaeram fidem,

Si nosse liceat. Ecce, grandaevus senex,

Arbitria sub quo regii fuerant gregis,

Phorbas. Refersne nomen aut vultum senis?

840 SEN. Adridet animo forma; nec notus satis,

Nec rursus iste vultus ignotus mihi.

Regnum obtinente Laio famulus greges

Agitasti opimos sub Cithaeronis plaga?

### PHORBAS, SENEX, OEDIPUS.

PHOR. Laetus Cithaeron pabulo semper novo.

845 Aestiva nostro prata submittit gregi.

SEN. Noscisne memet? PHOR. Dubitat anceps  
memoria.

OED. Huic aliquis a te traditur quondam puer?

Effare! Dubitas? cur genas mutat color?

Quid verba quaeris? Veritas odit moras.

PHOR. Obducta longo temporum tractu moves. 850

OED. Fatere: ne te cogat ad verum dolor.

PHOR. Inutile isti munus infantem dedi:

Non potuit ille luce, non coelo frui.

SEN. Procul sit omen! Vivit, et vivat precor.

OED. Superesse quare traditum infantem negas? 855

PHOR. Ferrum per ambos tenue transactum pedes

Ligabat artus; vulneri innatus tumor

Puerile foeda corpus urebat lue.

SEN. Quid quaeris ultra? Fata iam accedunt prope.

OED. Quis fuerit infans, edoce. PHOR. Prohibet  
fides. 860

OED. Huc aliquis ignem! Flamma iam excutiet fidem.

PHOR. Per tam cruentas vera quaerentur vias?

Ignosce, quaeso! OED. Si ferus videor tibi

Et impotens: iam parta vindicta. In manu est:

Dic vera. Quisnam, quove generatus patre, 865

Qua matre genitus? PHOR. Coniuge est genitus tua.

OED. Dehisce, tellus! tuque tenebrarum potens,

In Tartara ima, rector umbrarum, rape

Retro reversas generis ac stirpis vices!

Congerite, cives, saxa in incestum caput! 870

Mactate telis! me petat ferro parens,

Me gnatus! in me coniuges arment manus,

Fratresque, et aeger populus ereptos rogis

Iaculetur ignes! Seculi crimen vago,

Odium deorum, iuris exitium sacri; 875

Qua luce primum spiritus hausi rudes,

Iam morte dignus. Redde nunc animos pares!

Nunc aliquid aude sceleribus dignum tuis

I, perge, propero regiam gressu pete:

Gratare matri liberis auctam domum. 880

## CHORUS.

*Varietati obnoxium arguit Chorus excelsum statum. mediam itaque fortunam optat. cuius laudes canit, a similitudine mavis modico vento actae, et exemplo Icari.*

- Fata si liceat mihi  
 Fingere arbitrio meo:  
 Temperem Zephyro levi  
 Vela, ne pressae gravi  
 885 Spiritu antennae tremant.  
 Lenis et modice fluens  
 Aura, nec vergens latus,  
 Ducat intrepidam ratem.  
 Tuta me media vehat  
 890 Vita decurrens via.  
 Gnossium regem timens,  
 Astra dum demens petit,  
 Artibus fisus novis,  
 Certat et veras aves  
 895 Vincere, ac falsis nimis  
 Imperat pennis puer,  
 Nomen eripuit freto.  
 Callidus medium senex  
 Daedalus librans iter  
 900 Nube sub media stetit,  
 Alitem expectans scum;  
 Qualis accipitris minas  
 Fugit, et sparsos metu  
 Colligit foetus avis:  
 905 Donec in ponto manus  
 Movit implicitas puer,  
 Comes audacis viae.  
 Quidquid excessit modum,  
 Pendet instabili loco.  
 910 Sed quid hoc? postes sonant.

I 6.20  
 II 4.15

Moestus, en, famulus, manu  
 Regius, quassans caput!  
 Ede, quid portes novi.

## ACTUS QUINTUS.

## NUNTIUS.

*Nuntius Oedipi excoecationis consilium et modum narrat.*

**P**raedicta postquam fata et infandum genus  
 Deprendit, ac se scelere convictum Oedipus 915  
 Damnavit ipse: regiam infestus petens  
 Invisa propero tecta penetravit gradu;  
 Qualis per arva Libycus insanit leo,  
 Fulvam minaci fronte concutiens iubam:  
 Vultus furore torvus atque oculi truces, 920  
 Gemitus et altum murmur, et gelidus fluit  
 Sudor per artus; spumat, et volvit minas,  
 Ac mersus alte magnus exundat dolor.  
 Secum ipse saevus grande nescio quid parat,  
 Suisque fati simile. „Quid poenas moror?“ 925  
 Ait. „Hoc scelestum pectus aut ferro petat,  
 Aut fervido aliquis igne vel saxo domet!  
 Quae tigris, aut quae saeva visceribus meis  
 Incurret ales? Ipse tu scelerum capax,  
 Sacer Cithaeron, vel feras in me tuas 930  
 Emitte silvis, mitte vel rabidos canes!  
 Nunc redde Agauen! Anime, quid mortem times?  
 Mors innocentem sola fortunae eripit.“  
 Haec fatus, aptat impiam capulo manum,  
 Ensemque ducit. „Itane? tam magnis breves 935  
 Poenas sceleribus solvis, atque uno omnia  
 Pensabis ictu? Moreris: hoc patri sat est.  
 Quid deinde matri, quid male in lucem editis

- Gnatis, quid ipsi, quae tuum magna luit  
940 Scelus ruina, flebili patriae dabis?  
Solvendo non es. Illa quae leges ratas  
Natura in uno vertit Oedipoda, novos  
Commenta partus, supplicis eadem meis  
Novetur. Iterum vivere, atque iterum mori  
945 Liceat; renasci semper: ut toties nova  
Supplicia pendas. Utere ingenio, miser!  
Quod saepe fieri non potest, fiat diu.  
Mors eligatur longa. Quaeratur via,  
Qua nec sepultis mixtus, et vivis tamen  
950 Exemtus erres. Morere, sed citra patrem  
Cunctaris, anime? Subitus, en, vultus gravat  
Profusus imber, ac rigat fletu genas.  
Et flere satis est? Hactenus fundent levem  
Oculi liquorem: sedibus pulsi suis  
955 Lacrimae sequantur. Hi maritales statim  
Fodiantur oculi!“ Dixit, atque ira furit.  
Ardent minaces igne truculento genae,  
Oculique vix se sedibus retinent suis.  
Violentus, audax, vultus, iratus, ferox  
960 Tantum eruentis. Gemuit, et dirum fremens  
Manus in ora torsit. At contra truces  
Oculi steterunt, et suam intenti manum  
Ultro insequuntur; vulneri occurrunt suo.  
Scrutatur avidus manibus uncis lumina:  
965 Radice ab ima funditus vulsos simul  
Evolvit orbes. Haeret in vacuo manus,  
Et fixa penitus unguibus lacerat cavos  
Alte recessus luminum et inanes sinus,  
Saevitque frustra; plusque, quam satis est, furit  
970 Tantum est periculum lucis. Attollit caput,  
Cavisque lustrans orbibus coeli plagas,  
Noctem experitur. Quidquid effossis male  
Dependet oculis, rumpit, et victor deos  
Conclamat omnes: „Parcite, heu, patriae, precor:

Iam iussa feci; debitas poenas tuli.  
 Inventa thalamis digna nox tandem meis.  
 Rigat ora foedus imber et lacerum caput;  
 Largum revulsis sanguinem ventis vomit. —

975

## CHORUS.

*Chorus iste ex disciplina Stoicorum (qui omnia, imo deum ipsum, subiciunt inevitabilibus fatis) excusare Oedipum studet.*

Fatis agimur: cedite fatis.  
 Non sollicitae possunt curae 980  
 Mutare rati stamina fusi.  
 Quidquid patimur mortale genus,  
 Quidquid facimus, venit ex alto;  
 Servatque suae decreta colus  
 Lachesis, dura revoluta manu. 985  
 Omnia certo tramite vadunt, / I 7. 24  
 Primusquē dies dedit extremum.  
 Non illa deo vertisse licet,  
 Quae nexa suis currunt causis.  
 It cuique ratus, prece non ulla 990  
 Mobilis ordo.  
 Multis ipsum metuisse nocet.  
 Multi ad fatum venire suum,  
 Dum fata timent. Sonuere fores,  
 Atque ipse suum duce non ullo 995  
 Molitur iter, luminis orbus.

## OEDIPUS, CHORUS, IOCASTA.

*Iocasta se interficit. Oedipus excaecatus in exilium abit*

OED. Bene habet, peractum est: iusta persolvi patri  
 Iuvant tenebrae. Quis deus tandem mihi  
 Placatus atra nube perfundit caput?  
 Quis scelera donat? Consciunt evasi diem. 1000  
 Nil, parricida, dexterarum debet tuarum:



**Lux te refugit. Vultus Oedipoda hic decet.**  
**CHOR.** Et, ecce, rapido saeva prosiluit gradu  
 locasta vecors; qualis attonita et furens

- 1005 **Cadmea mater abstulit gnato caput,**  
**Sensitive raptum. Dubitat, adflictum adloqui**  
**Cupit, pavetque. — Iam malis cessit pudor,**  
**Et haeret ore prima vox. IO C. Quid te vocem?**  
**Gnatumne? — Dubitas? Gnatus es: gnatum pu-**  
**det.**

- 1010 **Invite, loquere, gnate! — Quo avertis caput**  
**Vacuosque vultus? OED. Quis frui et tenebris**  
**vetat?**

**Quis reddit oculos? Matris, heu, matris sonus!**  
**Perdidimus operam! — Congredi fas amplius**  
**Haud est. Nefandos dividat vastum mare,**

- 1015 **Dirimatque tellus abdita; et quisquis sub hoc**  
**In alia versus sidera ac solem avium**  
**Dependet orbis, alterum ex nobis ferat**  
**IO C. Fati ista culpa est: nemo fit fato nocens.**  
**OED. Iam parce verbis, mater, et parco auribus!**

- 1020 **Per has reliquias corporis trunci precor,**  
**Per inauspicatum sanguinis pignus mei,**  
**Per omne nostri nominis fas ac nefas!**  
**IO C. Quid, anime, torpes? socia cur scelerum**  
**dare**

**Poenas recusas? Omne confusum perit,**

- 1025 **Incesta, per te iuris humani decus:**  
**Morere, ac nefastum spiritum ferro exige!**  
**Non, si ipse, mundum concitans, divum sator**  
**Corusca saeva tela iaculetur manu,**  
**Unquam rependam sceleribus poenas pares**

- 1030 **Mater nefanda. Mors placet: mortis via**  
**Quaeratur. Agedum, commoda matri manum,**  
**Si parricida es. Restat hoc operi ultimum. —**  
**Rapiatur ensis! Hoc iacet ferro meus**  
**Coniux. Quid illum nomine haud vero vocas?**

- Socer est. Utrumne pectori infigam meo** 1035  
**Telum, an patenti conditum iugulo imprimam?**  
**Eligere nescis vulnus: hunc, dextra, hunc pete**  
**Uterum pacem, qui virum gnatum tulit!**  
**СНОЯ. lacet perempta. Vulneri immoritur manus**  
**Ferrumque secum nimius elecit cruor.** 1040  
**ОЭД. Fatidice, te, te, praesidem veri deum,**  
**Compello. Solum debui fatis patrem;**  
**Bis parricida, plusque quam timui nocens,**  
**Matrem peremi: scelere confecta est meo.**  
**O Phoebe mendax, fata superavi impia! —** 1045  
**Pavitante gressu sequere fallaces vias,**  
**Suspensa plantis efferens vestigia!**  
**Coecam tremente dextera noctem rege**  
**I, gradere praeceps, lubricos ponens gradus!**  
**I, profuge, vade! — Siste: ne in matrem incidas.** 1050  
**Quicumque fessi corpore et morbo graves**  
**Semianima trahitis pectora, en fugio, exeo:**  
**Relevate colla! mitior coeli status**  
**Post terga sequitur. Quisquis exilem iacens**  
**Animam retentat, vividos haustus levis** 1055  
**Concipiat. Ite, ferte depositis opem:**  
**Mortifera mecum vitia terrarum extraho.**  
**Violenta Fata et horridus Mortis tremor,**  
**Maclesque et atra Pestis et rabidus Dolor,**  
**Mecum ite, mecum! ducibus his uti libet.** 1060
-



# T R O A D E S.

---

## DRAMATIS PERSONAE.

*HECUBA.*

*CHORUS TROADUM.*

*TALTHYBIUS.*

*AGAMEMNON.*

*CALCHAS.*

*HELENA.*

*PYRRHUS.*

*ANDROMACHA.*

*SENE X.*

*ULYSSES.*

*ASTYANAX.*

*NUNTIUS.*

*POLYXENA, muta persona.*

---

## ARGUMENTUM.

Graeci, exciso iam Ilio, reditum in patriam cogitantes contrario vento detinebantur. Apparens noctu Achillis umbra sol vere eos posse negat, nisi sibi debitis inferiis mactata Polyxena, cuius nuptiarum praetextu interfectus est. Non fert Agamemnon sibi amatam Polyxenam mactari. Qua de re orto cum Pyrrho iurgio, intervenit consultus Calchas, qui omnino immolandam pronuntiat unaque necandum Astyanacta, quem a matre absconditum abducit Ulysses, et de Scaea porta deiicit. Polyxenam ab Helena auspice, ritu cultuque sponsae deductam ad patris tumultum, Pyrrhus mactat.

---

## ALIUD ARGUMENTUM

### *HIERONYMI BALBI.*

- Postquam Dardanium non aequo numine regnum  
Evertere dei: patriam optatosque penates  
Argivi remeare instructa classe parabant:  
Cum subito horrissoni consurgunt undique fluctus,  
5 Saevit hiems pelagi, toto tonat aequore murmur.  
Haec quid monstra ferant, rescivit ubi ordine Calchas,  
Edocet esse deos humana caede piandos.  
Mox deducta comis Priameia virgo solutis  
Abluit hostiles effuso sanguine manes.  
10 Iungitur ecce! scelus sceleri: gens impia Graium  
(O facinus!) stantem vix primo in limine vitae  
Hectoream sobolem turri deiicit ab alta.  
Tunc Phrygiae tanto percussae crimine matres  
Collacrimant, longisque implent ululatibus auras.
-

## ACTUS PRIMUS.

### HECUBA.

*Luget Hecuba patriae, domus, suam ipsius calamitatem.*

Quicumque regno fudit, et magna potens  
Dominatur aula, nec leves metuit deos,  
Animumque rebus credulum laetis dedit,  
Me videat et te, Troia: non unquam tulit  
Documenta Fors maiora, quam fragili loco 5  
Starent superbi. Columnen eversum occidit  
Pollentis Asiae, coelitem egregius labor;  
Ad cuius arma venit et qui frigidum  
Septena Tanain ora pandentem bibit,  
Et qui renatum primus excipiens diem 10  
Tepidum rubenti Tigrin immiscet freto,  
Et quae vagos vicina prospiciens Scythas  
Ripam catervis Ponticam viduis ferit.  
Excisa ferro est Pergamum; incubuit sibi.  
En, alta muri decora congesti iacent 15  
Tectis adustis; regiam flammae ambiunt,  
Omnisque late fumat Assaraci domus.  
Non prohibet avidas flamma victoris manus:  
Diripitur ardens Troia. Nec coelum patet  
Undante fumo: nube ceu densa obsitus, 20  
Ater favilla squalet Iliaca dies.  
Stat avidus irae victor, et lentum Ilium  
Metitur oculis, ac decem tandem ferus  
Ignoscit annis. Horret adflictam quoque;  
Victamque quamvis videat, haud credit sibi 25  
Potuisse vinci. Spolia populator rapit  
Dardania; praedam mille non capiunt rates.  
Testor deorum numen adversum mihi,

- Patriaeque cineres, teque rectorem Phrygum  
30 Quem Troia toto conditum regno tegit,  
Tuosque manes, quo stetit stante Ilion,  
Et vos meorum liberum magni greges,  
Umbrae minores: quidquid adversi accidit,  
Quaecunque Phoebas ore lymphato furens,  
35 Credi deo vetante, praedixit mala,  
Prior Hecuba vidi gravida, nec tacui metus,  
Et vana vates ante Cassandram fui.  
Non cautus ignes Ithacus aut Ithaci comes  
Nocturnus in vos sparsit, aut fallax Sinon:  
40 Meus ignis iste est, facibus ardetis meis.  
Sed quid ruinas urbis eversae gemis,  
Vivax senectus? Respice infelix ad hos  
Luctus recentes: Troia iam vetus est malum.  
Vidi execrandum regiae caedis nefas,  
45 Ipsasque ad aras maius admissum scelus  
Aiakis: armis cum ferox, saeva manu  
Coma reflectens regium torta caput,  
Alto nefandum vulnere ferrum abdidit;  
Quod penitus actum cum recepisset libens,  
50 Ensis senili siccus e iugulo redit.  
Placare quem non potuit a caede effera  
Mortalis aevi cardinem extremum premens,  
Superique testes sceleris, et quondam sacrum  
Regni iacentis? Ille tot regum parens  
55 Caret sepulcro Priamus, et flamma indiget  
Ardente Troia. Non tamen Superis sat est:  
Dominum, ecce! Priami nuribus et gnatis legens  
Sortitur urna. Praeda quem vilis sequar?  
Hic Hectoris coniugia despondet sibi;  
60 Hic optat Heleni coniugem; hic Antenoris;  
Nec deest, tuos, Cassandra, qui thalamos petat:  
Mea sors timetur; sola sum Danais metus.  
Lamenta cessant? Turba, captivae, mea,  
Ferite palmis pectora, et planctus date,

**Et iusta Troiae facite! iamdudum sonet  
Fatalis Ide, iudicis diri, domus!**

65

**CHORUS TROADUM, HECUBA.**

*Chorus Iliadam cum Hecuba excidium patriae, Hectoris et Priami mortem lugentium.*

**CHOR.** Non rude vulgus lacrimisque novum

Lugere iubes: hoc continuis

Egimus annis, ex quo tetigi

Phrygius Graias hospes Amyclas,

70

Secuitque fretum

Pinus matri sacra Cybebae.

Decies nivibus canuit Ide,

Ide nostris nudata rogis,

Et Sigeis trepidus campis

75

Decumas secuit messor aristas:

Ut nulla dies moerore caret,

Sed nova fletus causa ministrat.

Ito ad planctus,

Miseramque leva, regina, manum.

80

Vulgus dominam vile sequemur:

Non indociles lugere sumus.

**HEC.** Fidae casus nostri comites

Solvite crinem! per colla fluant

Moesta capilli tepido Troiae

85

Pulvere turpes! paret exertos

Turba lacertos! veste remissa

Substringe sinus, utroque tenus

Pateant artus. Cui coniugio

Pectora velas, captive pudor?

90

Cingat tunicas palla solutas!

Vacet ad crebri verbera planctus

Furibunda manus! Placet hic habitus,

Placet: agnosco Troada turbam.

Iterum luctus redeunt veteres.

95



- Solitum flendi vincite morem:  
 Hectora flemus. **CHOR.** Solvimus omnes  
 Lacerum multo funere crinem;  
 100 Coma demissa est libera nodo,  
 Sparsitque cinis fervidus ora.  
**HEC.** Complete manus: hoc ex Troia  
 Sumsisse licet. **CHOR.** Cadit ex humeris  
 Vestis apertis, imumque tegit  
 105 Suffulta latus. **HEC.** Iam nuda vocant  
 Pectora dextras. Nunc, nunc vires  
 Exprome, dolor!  
 Rhoetea sonent littora planctu;  
 Habitansque cavis montibus Echo  
 110 Non, ut solita est, extrema brevis  
 Verba remittat: totos reddat  
 Troiae gemitus! audiat omnis  
 Pontus et aether. Saevite, manus!  
 Pulsu vasto tundite pectus:  
 115 Non sum solito contenta sono:  
 Hectora flemus.  
**CHOR.** Tibi dextra ferit nostra lacertos,  
 Humerosque ferit tibi sanguineos;  
 Tibi nostra caput dextera pulsat;  
 120 Tibi maternis ubera palmis  
 Laniata iacent; fluit et multo  
 Sanguine manat, quamcunque tuo  
 Funere feci, rupta cicatrix.  
 Columen patriae, mora factorum,  
 125 Tu praesidium Phrygibus fessis,  
 Tu murus eras; humerisque tuis  
 Stetit illa decem fulta per annos;  
 Tecum cecidit, summusque dies  
 Hectoris idem patriaeque fuit.  
 130 **HEC.** Vertite planctus: Priamo vestros  
 Fundite fletus! satis Hector habet.  
**CHOR.** Accipe, rector Phrygiae, planctus!

Accipe fletus, bis capte senex!	
Nil Troia semel te rege tulit:	
Bis pulsata	135
Dardana Graio moenia ferro,	
Bisque pharetras passa Herculeas.	
Post elatos Hecubae partus,	
Regumque gregem,	
Postrema pater funera cludis;	140
Magnoque Iovi victima caesus	
Sigea premis littora truncus.	
НѢ С. Alio lacrimas flectite vestras:	
Non est Priami miseranda mei	
Mors, Iliades.	145
„Felix Priamus,“ dicite cunctae:	
Liber Manes vadit ad imos,	
Nec feret unquam victa Graium	
Cervice iugum.	
Non ille duos videt Atridas,	150
Nec fallacem cernit Ulyssem.	
Non, Argolici praeda triumphi,	
Subiecta feret colla tropaeis.	
Non adsuetas ad sceptras manus	
Post terga dabit; currusque sequens	155
Agamemnonios,	
Aurea dextra vincula gestans,	
Laetis fiet pompa Mycenis.	
С H O R. Felix Priamus, dicimus omnes:	
Secum excedens sua regna tulit;	160
Nunc Elysii nemoris tutis	
Errat in umbris,	
Interque pias felix animas	
Hectora quaerit. Felix Priamus!	
Felix, quisquis bello moriens	165
Omnia secum consumpta videt!	

## ACTUS SECUNDUS.

## TALTHYBIUS, CHORUS TROADUM.

*Narrat Talthybius, apparuisse Achillis umbram, exprobratque Graecis ingrato animo postulasse, ut Polyxena, cuius nuptiarum praetextu ipse interfectus est, ad tumulum suum pro inferiis mactaretur, alias Graecos non habituros ventum ad reditum.*

**TAL.** O longa Danaïs semper in portu mora;  
Seu petere bellum, petere seu patriam voluit!

**CHOR.** Quae causa ratibus faciat et Danaïs moram,

170 Effare; reduces quis deus cludat vias.

**TAL.** Pavet animus; artus horridus quassat tremor  
Maiora veris monstra vix capiunt fidem:  
Vidi, ipse vidi. Summa iam Titan iuga  
Stringebat ortus, vicerat noctem dies:

175 Cum subito coeco terra mugitu fremens  
Concussa totos traxit ex imo sinus;  
Movere silvae capita, et excelsum nemus  
Fragore vasto tonuit et lucus sacer;  
Idaea ruptis saxa ceciderunt iugis.

180 Nec terra solum tremuit: et pontus sinitur  
Adesse Achillen sensit, ac stravit vada:  
Tum scissa vallis aperit immensos specus;  
Et hiatus Erebi pervium ad Superos iter  
Tellure fracta praebet, ac tumultum levat.

185 Emicuit ingens umbra Thessalici ducis,  
Threicia qualis arma proludens tuis  
Iam, Troia, fatis stravit, aut Neptunum  
Cana nitentem perculit iuvenem coma;  
Aut cum, inter acies Marte violento furens,  
190 Corporibus amnes clusit, et quaerens iter  
Tardus cruento Xanthus erravit vado;

Aut cum superbo victor in curru stetit,  
Egitque habenas, Hectorem et Troiam trahens.  
Implevit omne fittus irati sonus:

„Ite, ite inertes! Manibus meis debitos 195

Auferte honores! Solvite ingratas rates

Per nostra ituri maria! Non parvo luit

Iras Achillis Graecia, et magno luet!

Desponsa nostris cineribus Polyxena

Pyrrhi manu mactetur, et tumulum riget.“ 200

Haec fatus alta nocte divisit diem,

Repetensque Ditem, mersus, ingentem specum

Coeunte terra iunxit. Immoti iacent

Tranquilla pelagi, ventus abiecit minas,

Placidumque fluctu murmurat leni mare; 205

Tritonum ab alto cecinit hymenaeum chorus.

### PYRRHUS, AGAMEMNON, CALCHAS.

*Agamemnonis cum Pyrrho iurgia super Polyxena compes-*  
*cit Calchas.*

PYRRH. Cum laeta pelago vela rediturus dares,

Excidit Achilles, cuius unius manu

Impulsa Troia (quidquid adiecit morae

Illo remoto) dubia, quo caderet, stetit. 210

Velis licet, quod petitur, ac properes dare;

Sero es daturus. Iam suum cuncti duces

Tulere pretium. Quae minor merces potest

Tantae dari virtuti? An is meruit parum,

Qui, fugere bellum iussus et longa sedens 215

Aevum senecta degere, ac Pylii senis

Transcendere annos, exuens matris dolos

Falsasque vestes, fassus est armis virum?

Inhospitali Telephus regno impotens

Dum Mysiae ferocis introitus negat, 220

Rudem cruore regio dextram imbuat,

Fortemque eandem sensit et mitem manum.

- Cecidere Thebae. Vidit Eetion capi  
Sua regna victus. Clade subversa est pari  
225 Imposita celso parva Lyrnessos iugo;  
Captaque tellus nobilis Briseide,  
Et, causa litis regibus, Chryse iacet,  
Et nota fama Tenedos, et, quae pascuo  
Foecunda pingui Thracios nutrit greges,  
230 Syros, fretumque Lesbos Aegaeum secans,  
Et cara Phoebæ Cilla. Quid, quas adluit  
Vernis Caycus gurgitem attollens aquis?  
Haec tanta clades gentium ac tantus pavor,  
Sparsae tot urbes, turbinis vasti modo,  
235 Alterius essent gloria ac summum decus;  
Iter est Achilli; sic meus venit pater,  
Et tanta gessit bella, dum bellum parat.  
Ut alia sileam merita, non unus satis  
Hector fuisset? Ilium vicit pater,  
240 Vos diruistis. Inclitas laudes iuvat  
Et facta magni clara genitoris sequi.  
Iacuit peremptus Hector ante oculos patris  
Patruique Memnon, cuius ob luctum parens  
Pallente moestum protulit vultu diem;  
245 Suique victor operis exemplum horruit,  
Didicitque Achilles, et dea natos mori.  
Tum saeva Amazon ultimus cecidit timor.  
Debes Achilli, merita si digne aestimas,  
Etsi Mycenis virginem atque Argis petat.  
250 Dubitatur etiam? placita nunc subito improbas,  
Priamique natam Pelei gnato ferum  
Mactare credis? At tuam gnatam parens  
Helenae immolasti: solita iam et facta expeto.  
A G A M. Iuvenile vitium est regere non posse impe-  
tus.  
255 Aetatis alios fervor hic primae rapit,  
Pyrrhum paternus. Spiritus quondam truces  
Minasque tumidi lentus Aeacidae tuli.

Quo plura possis, plura patienter feras.  
 Quid caede dira nobiles clari ducis  
 Adspergis umbras? Noscere hoc primum decet, 260  
 Quid facere victor debeat, victus pati.  
 Violenta nemo imperia continuit diu;  
 Moderata durant; quoque Fortuna altius  
 Evexit ac levavit humanas opes,  
 Hoc se magis suppressere felicem decet, 265  
 Variosque casus tremere, metuentem deos  
 Nimium faventes. Magna momento obrui  
 Vincendo didici. Troia nos tumidos facit  
 Nimium ac feroces? Stamus hoc Danaï loco,  
 Unde illa cecidit. Fateor, aliquando impotens 270  
 Regno ac superbus altius memet tuli;  
 Sed fregit illos spiritus haec, quae dare  
 Potuisset alii, causa, Fortunae favor.  
 Tu me superbum, Priame, tu timidum facis.  
 Ego esse quidquam sceptræ, nisi vano putem 275  
 Fulgore tectum nomen, et falso comam  
 Vinclo decentem? Casus haec rapiat brevis;  
 Nec mille forsân ratibus, aut annis decem.  
 Non omnibus Fortuna tam lenta imminet:  
 Equidem fatebor (pace dixisse hoc tua 280  
 Argiva tellus, liceat) adfligi Phrygas  
 Vincique volui; ruere et aequari solo  
 Etiam aruisssem. Sed regi frenis nequit  
 Et ira, et ardens hostis, et victoria  
 Commissa nocti. Quidquid indignum aut ferum 285  
 Cuiquam videri potuit, hoc fecit dolor,  
 Tenebraeque, per quas ipse se irritat furor,  
 Gladiusque felix, cuius infecti semel  
 Vecors libido est. Quidquid eversae potest  
 Superesse Troiae, maneat: exactum satis 290  
 Poenarum et ultra est. Regia ut virgo occidat,  
 Tumuloque domum detur et cineres riget,  
 Et facinus atrox caedis ut thalamos vocent?

- Non patiar. In me culpa cunctorum redit;  
 295 Qui non vetat peccare, cum possit, iubet.  
 PYRRH. Nullumne Achillis praemium manes ferent?  
 AGAM. Ferent, et illum laudibus cuncti canent,  
 Magnumque terrae nomen ignotae audient.  
 Quod si levatur sanguine infuso cinis,  
 300 Opima Phrygii colla caedantur gregis,  
 Fluatque nulli flebilis matri cruor.  
 Quis iste mos est, quando in inferias homo  
 Impensus homini est? Detrahe invidiam tuo  
 Odiumque patri, quem coli poena iubes.  
 305 PYRRH. O tumide, rerum dum secundarum status  
 Extollit animos; timide, cum increvit metus!  
 Regum tyranne, iamne flammatum geris  
 Amore subito pectus, ac veneris novae?  
 Solusne toties spolia de nobis feres?  
 310 Hac dextra Achilli victimam reddam suam;  
 Quam si negas retinesque; maiorem dabo,  
 Dignamque, quam det Pyrrhus. Et nimium diu  
 A caede nostra regia cessat manus,  
 Paremque poscit Priamus. AGAM. Haud equidem  
 nego,  
 315 Hoc esse Pyrrhi maximum in bello decus,  
 Saevo peremptus ense quod Priamus iacet,  
 Supplex paternus. PYRRH. Supplices nostri patris  
 Hostesque eosdem novimus. Priamus tamen  
 Praesens rogavit; tu gravi pavidus metu,  
 320 Nec ad rogandum fortis, Aiaci preces  
 Ithacoque mandas clusus atque hostem tremens.  
 AGAM. At non timebat tunc tuus, fateor, parens  
 Interque caedes Graeciae atque uastas rates  
 Segnis iacebat, belli et armorum immemor,  
 325 Levi canoram verberans plectro chelyn.  
 PYRRH. Tunc magnus Hector, arma contemnens  
 tua,

Cantus Achillis timuit, et tanto in metu  
Navalibus pax alta Thessalicis fuit.

AGAM. Nempe isdem in istis Thessalis navalibus  
Pax alta rursus Hectoris patri fuit. 330

PYRRH. Est regis alti, spiritum regi dare.

AGAM. Cur dextra regi spiritum eripuit tua?

PYRRH. Mortem misericors saepe pro vita dabit.

AGAM. Et nunc misericors virgines busto petis!

PYRRH. Iamne immolari virgines credis nefas? 335

AGAM. Praefere patriam liberis regem decet.

PYRRH. Lex nulla capto parcat, aut poenam impedit.

AGAM. Quod non vetat lex, hoc vetat fieri pudor.

PYRRH. Quodcunque libuit facere victori, licet.

AGAM. Minimum decet libere, cui multum licet. 340

PYRRH. His ista iactas, quos decem annorum gravi  
Regno subactos Pyrrhus exsolvit iugo?

AGAM. Hos Scyrus animos ... PYRRH. Scelere  
quae fratrum caret.

AGAM. Inclusa fluctu? PYRRH. Nempe cognatimaris.  
Atrei et Thyestae nobilem novi domum. 345

AGAM. Ex virginis concepte furtivo stupro,  
Et ex Achille nate, sed nondum viro...

PYRRH. Illo ex Achille, genere qui mundum suo,  
Sparsus per omne coelitem regnum, tenet,  
Thetide aequor, umbras Aeaco, coelum Iove... 350

AGAM. Illo ex Achille, qui manu Paridis iacet...

PYRRH. Quem nec deorum cominus quisquam petit.

AGAM. Compescere equidem verba, et audacem malo  
Poteram domare; sed meus captis quoque

Scit parcere ensis. Potius interpres deum 355  
Calchas vocetur. Fata si poscunt: dabo.

Tu, qui Pelasgae vincla solvisti ratis,

Morasque bellis, arte qui reseras polum,

Cui viscerum secreta, cui mundi fragor,

Et stella longa semitam flamma trahens 360

Dant signa fati, cuius ingenti mihi



Mercede constant ora, quid iubeat deus  
Effare, Calcha, nosque consilio rege.

CA L. Dant fata Danaïs, quo solent pretio, viam.

- 365 „Mactanda virgo est Thessali busto ducis;  
„Sed, quo iugari Thessalæ cultu solent,  
„Ionidesve vel Mycenææe nurus,  
„Pyrrhus parenti coniugem tradat suo.  
„Sic rite dabitur. Non tamen nostras tenet  
370 „Haec una puppes causa; nobilior tuo,  
„Polyxene, cruore debetur cruor,  
„Quem fata quaerunt: turre de summa cadat  
„Priami nepos Hectoreus, et letum oppetat.  
„Tum mille velis impleat classis freta.“

#### CHORUS TROADUM.

*Chorus e mulieribus Troianis, quo Achillis animam apparuisse neget, ex Epicuri sententia animam cum corpore interire asserit.*

- 375 Verum est, an timidos fabula decipit,  
Umbras corporibus vivere conditis?  
Cum coniux oculis imposuit manum,  
Supremusque dies solibus obstitit,  
Et tristis cineres urna coercuit:

- 380 Non prodest animam tradere funeri,  
Sed restat miseris vivere longius?  
U 7.17 *h* An toti morimur, nullaque pars manet  
Nostri, cum profugo spiritus halitu  
Immixtus nebulis cessit in aera,

- 385 Et nudum tetigit subdita fax latus?  
Quidquid sol oriens, quidquid et occidens  
Novit; coeruleis Oceanus fretis  
Quidquid vel veniens vel fugiens lavat,  
Aetas Pegaseo corripiet gradu.

- 390 Quo bissena volant sidera turbine;  
Quo cursu properat secula volvere

Astrorum dominus; quo properat modo  
 Obliquis Hecate-currere flexibus:  
 Hoc omnes petimus fata; nec amplius,  
 Iuratos Superis qui tetigit lacus, 395  
 Usquam est. Ut calidis fumus ab ignibus  
 Vanescit spatium per breve sordidus;  
 Ut nubes, gravidas quas modo vidimus,  
 Arctol' Boreae disiicit impetus:  
 Sic hic, quo regimur, spiritus effluet. 400  
 Post mortem nihil est, ipsaque mors nihil,  
 Velocis spatii meta novissima.  
 Spem ponant avidi, solliciti metum.  
 Quaeris, quo iaceas post obitum loco?  
 Quo non nata iacent. 405  
 Tempus nos avidum devorat et chaos.  
 Mors individua est noxia corpori,  
 Nec parcens animae. Taenara, et aspero  
 Regnum sub domino, limen et obsidens  
 Custos non facili Cerberus ostio, 410  
 Rumores vacui verbaque inania,  
 Et par sollicito fabula somnio.

---

## ACTUS TERTIUS.

ANDROMACHA, SENEX, ULYSSES.

*Hectoris uxor, viso territa, filium in tumultu paterno abscondit, quem sagacitate sua Ulysses latebris exutum ad mortem adducit.*

ANDR. Quid, moesta, Phrygiae, turba, laceratis co  
 mas,  
 Miserumque tunsae pectus effuso genas

- 415 Fletu rigatis? Levia perpessae sumus,  
Si flenda patimur. Ilium vobis modo,  
Mihi cecidit olim, cum ferus curru incito  
Mea membra raperet, et gravi gemeret sono  
Peliacus axis pondere Hectoreo tremens.
- 420 Tunc obruta atque eversa, quodcunque accidit,  
Torpens malis rigensque sine sensu fero.  
Iam erepta Danaïs coniugem sequerer meum,  
Nisi hic teneret: hic meos animos domat,  
Morique prohibet; cogit hic aliquid deos
- 425 Adhuc rogare; tempus aerumnae addidit.  
Hic mihi malorum maximum fructum abstulit,  
Nihil timere. Prosperis rebus locus  
Ereptus omnis; dira, qua veniant, habent.  
Miserrimum est timere, cum speres nihil.
- 430 SEN. Quis te repens commovit adflictam metus?  
ANDR. Exoritur aliquod maius e magno malum.  
Nondum ruentis Ilii fatum stetit.  
SEN. Et quas reperiet, ut velit, clades deus?  
Stygis profundae claustra et obscuri specus
- 435 Laxantur; et, ne desit eversis metus,  
Hostes ab imo conditi Dite exeunt.  
Solisne retro pervium est Danaïs iter?  
Certe aequa mors est. ANDR. Turbat atque agitat  
Phrygas  
Communis iste terror; hic proprie meum
- 440 Exterret animum noctis horrendae sopor.  
SEN. Quae visa portent, effer in medium, metus.  
ANDR. Partes fere nox alma transierat duas,  
Clarumque septem verterant stellae iugum;  
Ignota tandem venit adflictae quies,
- 445 Brevisque fessis somnus obrepsit genis;  
Si somnus ille est mentis attonitae stupor:  
Cum subito nostros Hector ante oculos stetit,  
Non qualis ultro bella in Argivos ferens,  
Graias petebat facibus Idaeis rates,

Nec caede multa qualis in Danaos furens	450
Vera ex Achille spolia simulato tulit,	
Non ille, vultus flammeum intendens iubar;	
Sed fessus ac deiectus et fletu gravis,	
Similisque nostro, squalida obtectus coma.	
Iuvat tamen vidisse. Tum quassans caput,	455
„Dispelle somnos,“ inquit, „et gnatum eripe,	
O fida coniux! Lateat: haec una est salus.	
Omitte fletus. Troia quod cecidit, gemis?	
Utinam iaceret tota! Festina! amove	
Quocunque nostrae parvulam stirpem domus!“	460
Mihi gelidus horror ac tremor somnum expulit:	
Oculosque nunc huc pavida, nunc illuc ferens,	
Oblita nati, misera quaesivi Hectorem.	
Fallax per ipsos umbra complexus abit.	
O gnate, magni certa progenies patris;	465
Spes una Phrygibus, unica adflictae domus,	
Veterisque soboles sanguinis nimium incliti,	
Nimiumque patri similis (hos vultus meus	
Habebat Hector; talis incessu fuit,	
Habituque talis; sic tulit fortes manus,	470
Sic celsus humeris, fronte sic torva minax,	
Cervice fusam dissipans iacta comam),	
O gnate, sero Phrygibus et matri, cito	
Eritne tempus illud ac felix dies,	
Quo, Troici defensor et vindex soli,	475
Recidiva ponas Pergama, et sparsos fuga	
Cives reducas, nomen et patriae suum	
Phrygibusque reddas? Sed mei fati memor	
Tam magna timeo vota. Quod captis sat est,	
Vivamus. Heu me, qui locus fidus meo	480
Erit timori, quave te sede oculam?	
Arx illa pollens opibus et muris deum,	
Gentes per omnes clara et invidiae gravis,	
Nunc pulvis altus; strata sunt flamma omnia,	
Superestque vasta ex urbe ne tantum quidem,	485

- Quo lateat infans. Quem locum fraudi legam?  
 Est tumulus ingens coniugis cari sacer,  
 Verendus hosti, mole quem immensa parens  
 Opibusque magnis struxit, in luctus suos  
 490 Rex non avarus: optime credam patri. —  
 Sudor per artus frigidus totos cadit:  
 Omen tremisco misera feralis loci.  
 SEN. Haec causa multos una ab interitu arevit,  
 Credi perisse. ANDR. Vix spei quidquam est super:  
 495 Grave pondus illum magna nobilitas premit.  
 SEN. Ne prodatur aliquis, amove testes doli.  
 ANDR. Si quaeret hostis? SEN. Urbe inversa pe-  
 rit.  
 ANDR. Quid proderit latuisse redituro in manus?  
 SEN. Victor feroces impetus primos habet.  
 500 ANDR. Quid, quod latere sine metu magnonequit?  
 SEN. Miser occupet praesidia, securus legat.  
 ANDR. Quis te locus, quae regio seducta, in via  
 Tuto reponet? quis feret trepidis opem?  
 Quis proteget? Qui semper, etiam nunc tuos,  
 505 Hector, tuere; coniugis sortem pia  
 Serva, et fideli cinere victurum exoipe!  
 Succede tumulo, gnate! Quid retro fugis,  
 Turpesque latebras spernis? Agnosco indolem!  
 Pudet timere. Spiritus magnos fuga  
 510 Animosque vetores; sume, quos casus dedit!  
 En, intueri, turba quae simul super:  
 Tumulus, puer, captiva: cedendum est malis.  
 Sanctas parentis conditi sedes, age,  
 Aude subire. Fata si miseros iuvant:  
 515 Habes salutem; fata si vitam negant:  
 Habes sepulcrum. SEN. Clastra commissum tegunt;  
 Quem ne tuus producat in medium timor,  
 Procul hinc recede, teque diversam amove.  
 ANDR. Levius solet timere, qui propius timet:  
 520 Sed, si placet, referamus hinc alio pedem.

SEN. Cohibe parumper ora, questusque opprime:

Gressus nefandos dux Cephallenum admovet.

ANDR. Dehisce tellas, tuque coniux ultimo

Specu revulsam scinde tellurem, et Stygis

Sinu profundo conde depositum meum!

525

Adest Ulysses, et quidem dubio gradu

Vultuque: nectit pectore astus callidos.

UL. Durae minister sortis, hoc primum peto,

Ut ore quamvis verba dicantur meo,

Non esse credas nostra: Graiorum omnium

530

Procerumque vox est, petere quos seras domos

Hectorea soboles prohibet. Hanc fata empetunt:

Sollicita Danaos pacis incertae fides

Semper tenebit, semper a tergo timor

Respicere coeget, arma nec poni sinet,

535

Dum Phrygiis animos gnatus eversis dabit,

Andromacha. ANDR. Vester augur haec Calchas

canit!

UL. Etsi taceret augur haec Calchas, tamen

Dicebat Hector, cuius et stirpem horreo;

Generosa in ortus semina exurgunt suos.

540

Sic ille magni parvus armenti comes,

Primisque nondum cornibus findens cutem,

Cervice subito celsus et fronte arduus

Gregem paternum ducit, ac pecori imperat.

Quae tenera caeso virga de trunco stetit,

545

Par ipsa matri tempore exiguo subit,

Umbrasque terris reddit et coelo nemus.

Sic male relictus igne de magno cinis

Vires resumit. Est quidem iniustus dolor

Rerum aestimator; si tamen tecum exigas.

550

Veniam dabis, quod bella post hiemes decem

Totidemque messes iam senex miles timet,

Aliasque olades rursus, ac nunquam bene

Troiam iacentem. Magna res Danaos movet,

Futurus Hector: libera Graios metu.

555

Haec una naves causa deductas tenet;  
 Hic classis haeret. Neve crudelem putes,  
 Quod sorte iussus Hectoris natum petam:  
 Petissem Orestem. Patere, quod victor tulit.

560 ANDR. Utinam quidem esses, gnate, materna in  
 manu,

Nossemque, quis te casus ereptum mihi  
 Teneret, aut quae regio! Non hostilibus  
 Confossa telis pectus, aut vinclis manus  
 Secantibus praestricta, non acri latus

565 Utrumque flamma cincta, maternam fidem  
 Unquam exuissem. Gnate, quis te nunc locus,  
 Fortuna quae possedit? errore avio  
 Vagus arva lustras? vastus an patriae vapor  
 Corripuit artus? saevus an victor tuo

570 Lusit cruore? numquid immanis ferae  
 Morsu peremtus pascis Idaeas aves?  
 UL. Simulata remove verba: non facile est tibi  
 Decipere Ulyssen: vicinus matrum dolos  
 Etiam dearum. Cassa consilia amove.

575 Ubinatus est? ANDR. Ubi Hector? ubi cuncti Phry-  
 ges?

Ubi Priamus? Unum quaeris; ego quaero omnia.  
 UL. Coacta dices, sponte quod fari abnuis.

ANDR. Tuta est, perire quae potest, debet, cupit.

UL. Magnifica verba mors prope admota excutit.

580 ANDR. Si vis, Ulysse, cogere Andromacham metu,  
 Vitam minare: nam mori votum est mihi.

UL. Verberibus, igni, morte, cruciatu, eloqui  
 Quodcunque celas, adiget invitam dolor,  
 Et pectore imo condita arcana eruet.

585 necessitas plus posse, quam pietas, solet.

ANDR. Propone flammās, vulnera et diras mali  
 Doloris artes, et famem et saevam sitim,  
 Variasque pestes undique, et ferrum inditum  
 Visceribus ustis, carceris coeci luem,

Et quidquid audet victor iratus, tumens : 590

Animosa nullos mater admittit metus.

u L. Stulta est fides, celare quod prodas statim.

Hic ipse, quo nunc contumax perstas, amor

Consulere parvis liberis Danaos monet.

Post arma tam longinqua, post annos decem, 595

Minus timerem, quos facit Calchas, metus,

Si mihi timerem : bella Telemacho paras.

ANDR. Invita Ulyssi gaudium ac Danaïs dabo :

Dandum est. Fatere, quos premis, luctus, dolor !

Gaudete, Atridae ; tuque laetifica, ut soles, 600

Refer Pelasgis : Hectoris proles obit.

UL. Et esse verum hoc qua probas Danaïs fide ?

ANDR. Ita, quod minari maximum victor potest,

Contingat, et me fata maturo exitu

Facilique solvant, ac meo condant solo, 605

Et patria tellus Hectorem leviter premat,

Ut luce caret, ut inter extinctos iacet,

Datusque tumulo debita exanimis tulit.

UL. Expleta fata stirpe sublata Hectoris,

Solidamque pacem laetus ad Danaos feram. — 610

Quid agis, Ulysse ? Danaïdae credent tibi ;

Tu cui ? Parenti. Fingit an quisquam hoc parens,

Nec abominandae mortis auspiciū pavet ?

Auspicia metuunt, qui nihil maius timent.

Fidem adligavit iureiurando suam. 615

Si peierat ; timere quid gravius potest ?

Nunc advoca astus, anime ; nunc fraudes, dolos ;

Nunc totum Ulyssen ! Veritas nunquam perit.

Scrutare matrem. Moeret : inlacrimat, gemit.

Sed et huc et illuc anxios gressus refert, 620

Missasque voces aure sollicita excipit :

Magis hoc timet, quam moeret. Ingenio est opus. —

Alios parentes adloqui in luctu decet ;

Tibi gratulandum est, misera, quod gnato cares,

Quem mors manebat saeva, praecipitem datum 625



E turre, lapsis sola quae muris manet.

ANDR. Me liquit animus; membra quatiuntur, labant,

Torpetque vinctus frigido sanguis gelu.

UL. Intremuit: hac, hac parte quaerendum est mihi.

630 Matrem timor detexit: iterabo metum.

Ite, ite, celeres, fraude materna abditum

Hostem Pelasgi nominis, pestem ultimam,

Ubicunque latitat, erutam in medium date!

Bene est: tenetur. Perge, festina, attrahe! —

635 Quid respicis trepidasque? Jam certe perit.

ANDR. Utinam timerem! Solitus ex longo est metus.

Bediscit animus sero, quod didicit diu.

UL. Lustrale quoniam debitum muris puer

Sacrum antecessit, nec potest vatem sequi,

640 Meliore fato raptus: hoc Calchas ait

Modo piari posse redivas rates,

Si placet undas Hectoris sparsi cinis,

At tumulus imo totus aequetur solo.

Nunc ille quoniam debitam effugit necem,

645 Erit admovenda sedibus sacris manus.

ANDR. Quid agimus? animum distrahit geminus timor:

Hinc natus, illinc coniugis cari cinis.

Pars utra vincet? Testor immites deos,

Deosque veros, coniugis manes mei,

650 Non aliud, Hector, in meo gnato mihi

Placere, quam te! Vivat, ut possit tuos

Referre vultus. Prorutus tumulo cinis

Mergetur? ossa fluctibus spargi sinam

Disiecta vastis? Potius hic mortem oppetat. —

655 Poteris nefandae deditum mater neci

Videre? poteris celsa per fastigia

Missum rotari? Potero, perpetiar, feram,

Dum non meus post fata victoris manu

lactetur Hector. Hic suam poenam potest  
Sentire; at illum fata iam in tuto locant. — 660:

Quid fluctuaris? Statue, quem poenae extrahas.

Ingrata, dubitas? Hector est illinc tuus. —

Erras: utrinque est Hector; hic sensus potens,

Forsan futurus ultor extincti patris. —

Utrique parci non potest: quidnam facis? 665

Serva e duobus, anime, quem Danaï timent.

UL. Responsa peragam: funditus busta eruam.

ANDR. Quae vendidistis? UL. Pergam, et e summo  
aggere

Traham sepulcra. ANDR. Coelitum adpello-fidem,  
Fidemque Achillis! Pyrrhe, genitoris tui 670

Munus tuere! UL. Tumulus hic campo statim.

Toto iacebit. ANDR. Fuerat hoc prorsus nefas.

Danaïs inausum. Templâ violastis, deos

Etiam faventes; busta transierat furor.

Resistam; inermes offeram armatis manus! 675

Dabit ira vires. Qualis Argolicas ferox.

Turmas Amazon stravit; aut qualis deo

Percussa Maenas entheo silvas gradu,

Armata thyrsos, terret, atque expers sui.

Vulnus dedit, nec sensit, in medios ruam, 680

Tumuloque cineris socia defenso cadam!

UL. Cessatis, et vos flebilis clamor movet

Furorque cassus feminae? Iussa ocuis

Pergite! ANDR. Me, me sternite hic ferro prius!

Repellor? heu me! Rumpe fatorum moras; 685

Molire terras, Hector, ut Ulysses domes!

Vel umbra satis es. Arma concussit manu!

Iaculatur ignes! Cernitis, Danaï, Hectorem,

An sola video? UL. Funditus cuncta eruam!

ANDR. Quid agis? ruina pariter et gnatum et virum 690

Prosternis una? Forsitan Danaos prece

Placare poteris. Conditum elidet statim.

Immane busti pondus. Intereat miser

- Ubicumque potius: ne pater gnatum obruat,  
695 Prematque patrem gnatus. — Ad genua accido  
Supplex, Ulysse; quamque nullius pedes  
Novere dextram, pedibus admoveo tuis.  
Miserere matris, et preces placidus pias  
Patiensque recipe; quoque te celsum altius  
700 Superi levarunt, mitius lapsos preme!  
Misero datur quodcunque, fortunae datur.  
Sic te revisat coniugis sanctae torus;  
Annosque, dum te recipit, extendat suos  
Laerta! sic te iuvenis excipiat tuus,  
705 Et, vota vincens vestra felici indole,  
Aetate avum transcendat, ingenio patrem!  
Miserere matris: unicum adflictae mihi  
Solamen hoc est. UL. Exhibe gnatum, et roga  
ANDR. Huc e latebris procede tuis,  
710 Flebile matris furtum miserae! —  
Hic puer, hic est terror, Ulysse,  
Mille carinis. Submitte manus,  
Dominique pedes supplice dextra  
Stratus adora; nec turpe puta,  
715 Quidquid miseros Fortuna iubet.  
Pone ex animo reges atavos,  
Magnique senis iura per omnes  
Inclita terras; excidat Hector  
Gere captivum; positoque genu,  
720 Si tua nondum funera sentis,  
Matris fletus imitare tuae.  
Vidit pueri regis lacrimas  
Et Troia prior, parvusque minas  
Trucis Alcidae flexit Priamus.  
725 Ille, ille ferox, cuius vastis  
Viribus omnes cessere ferae,  
Qui perfracto limine Ditis  
Coecum retro patefecit iter,  
Hostis parvi victus lacrimis,

TROADES. ACT. III.

207

„Suscipe,“ dixit, „rector habenas,

730

Patrioque sede celsus solio;

Sed sceptrâ fide meliore tene.“

Hoc fuit illo victore capi.

Discite mites Herculis iras.

An sola placent Herculis arma?

735

Iacet ante pedes non minor illo

Supplice supplex, vitamque petit.

Regnum Troiae, quocunque volet,

Fortuna ferat.

ULYSSES, ANDROMACHA, ASTYANAX.

*Precibus minas et diras miscet Andromacha, Ulysses orans  
nec exorans*

UL. Matris quidem me moeror attonitae movet; 740

Magis Pelasgae me tamen matres movent,

Quarum iste magnos crescit in luctus puer.

ANDR. An has ruinas urbis in cinerem datas

Hic excitabit? hae manus Troiam erigent?

Nullas habet spes Troia, si tales habet.

745

Non sic iacemus Troes, ut cuiquam metus

Possimus esse. — Spiritus genitor facit. —

Sed nempe tractus. Ipse post Troiam pater

Posuisset animos, magna quos frangunt mala.

Si poena petitur, quae peti gravior potest?

750

Famulare collo nobili subeat iugum;

Servire liceat. Aliquis hoc regi negat?

UL. Non hoc Ulysses, sed negat Calchas tibi.

ANDR. O machinator fraudis et scelerum artifex,

Virtutis cuius bellica nemo occidit,

755

Dolis et astu maleficae mentis iacent

Etiam Pelasgi; vatem et insontes deos

Praetendis? Hoc est pectoris facinus tui,

Nocturne miles, fortis in pueri necem

Iam solus audes aliquid, et claro die.

760

UL. Virtus Ulyssis Danaidis nota est satis;  
 Nimisque Phrygibus. Non vacat vanis diem  
 Conterere verbis: ancoras classis legit.

ANDR. Brevem moram largire, dum officium pa-  
 rens

765 Gnato supremum reddo, et amplexu ultimo  
 Avidos dolores satio: UL. Misereri tui  
 Utinam liceret! Quod tamen solum licet,  
 Tempus moramque dabimus: Arbitrio tuo  
 Implere lacrimis: fletus aerumnas levati

770 ANDR. O dulce pignus! o decus lapsae domus,  
 Summumque Troiae funus! o Danaum timor!  
 Genitricis o spes vana, cui demens ego  
 Laudes parentis bellicas, annos avi  
 Medios precabar! Vota destituit deus.

775 Iliaca non tu sceptrum regali potens  
 Gestabis aula; iura nec populis dabis,  
 Victasque gentes sub tuum mittes iugum;  
 Non Graia caedes terga, non Pyrrhum trahes;  
 Non arma tenera parva tractabis manu,

780 Sparsasque passim saltibus latis feras  
 Audax sequeris; nec, stato lustris die  
 Solemne referens Troici lusus sacrum,  
 Puer citatas nobilis turmas ages;  
 Non inter aras mobili velox pede,

785 Revocante flexo concitos cornu modos,  
 Barbarica prisca templa saltu coles. —  
 O morte dira tristius leti genus!  
 Flebilius aliquid Hectoris magni nece  
 Muri videbunt. UL. Rumpe iam fletus parens!

790 Magnus sibi ipse non facit finem dolor.  
 ANDR. Lacrimis, Ulysse, parva, quam petimus,  
 mora est.

Concede, parvos ut mea condam manu  
 Viventis oculos! — Occidis parvus quidem,  
 Sed iam timendus Troia te expectat tua.

I, vade liber; liberos Troas vide!

795

AST. Miserere, mater! ANDR. Quid meos retines  
sinus

Manusque matris? Cassa praesidia occupas.

Fremitu leonis qualis audito tener

Timidum iuencus adplicat matri latus;

At ille saevus matre submota leo

800

Praedam minorem morsibus vastis tenens

Frangit, vehitque: talis e nostro sinu

Te rapiet hostis. Oscula et fletus, puer,

Lacerosque crines excipe, et plenus mei

Occurre patri! Pauca maternae tamen

805

Perfer querelae verba: „Si manes habent

Curas priores, nec perit flammis amor,

Servire Graio pateris Andromachen iugo,

Crudelis Hector? Lentus et segnis iaces

Rediit Achilles.“ Sume nunc iterum comas,

810

Et sume lacrimas, quidquid e misero viri

Funere relictum est; sume, quae reddas tuo

Oscula parenti! Matris hanc solatio

Relinque vestem: tumulus hanc tetigit meus

Manesque cari. Si quid hic cineris latet,

815

Scrutabor ore. UL. Nullus est flendi modus:

Abripite propere classis Argolicae moram!

### CHORUS TROADUM.

*Asportandae Troades in varia Graeciae loca, prout sorte  
Achivis dispersitae contigerant, in quamcumque tamen Graeciae  
partem abduci praeoptant, quam in Spartam, Mycenae et Itha-  
cam, Helenae, Agamemnonis et Ulyssis patriam.*

Quae vocat sedes habitanda captas?

Thessali montes et opaca Tempe,

An viros tellus dare militares

820

Aptior Phthie, meliorve foetu

Fortis armenti lapidosa Trachin?

SEN. TRAG.

O

- An maris vasti domitrix Iolcos?  
 Urbibus centum spatiosa Crete,  
 825 Parva Gyrtone, sterilisque Tricce,  
 An frequens ruscis levibus Mothone?  
 Quae sub Oetaeis latebrosa silvis  
 Misit infestos Troiae ruinis  
 Non semel arcus,  
 830 Olenos tectis habitata raris,  
 Virgini Pleuron inimica divae,  
 An maris lati sinuosa Troezen?  
 Pelion regnum Prothoi superbum,  
 Tertius coelo gradus (hic recumbens  
 835 Montis exesi spatiosus antro  
 Iam trucis Chiron pueri magister,  
 Tinnulas plectro feriente chordas,  
 Tum quoque ingentes acuebat iras  
 Bella canendo),  
 840 An ferox varii lapidis Carystos?  
 An premens littus maris inquieti  
 Semper Euripo properante Chalcis?  
 Quolibet vento faciles Calydnae,  
 Ac carens nunquam Gonoessa vento,  
 845 Quaeque formidat Borean Enispe,  
 Attica pendens Peparethos ora,  
 An sacris gaudens tacitis Eleusin?  
 Numquid Aiakis Salamina veram,  
 Aut fera notam Calydonia saeva,  
 850 Quasque perfundit, subiturus aequor  
 Segnibus terras Titaessos undis,  
 Bessan et Scarphen? Pylon an senilem?  
 Pharin, an Pisam, Iovis et coronis  
 Elida claram?  
 855 Quolibet tristis miseras procella  
 Mittat, et donet cuicunque terrae:  
 Dum, luem tantam Troiae atque Achivis  
 Quae tulit, Sparte procul absit; absit

Argos et saevi Pelopis Mycenae;  
 Neritos parva brevior Zacyntho, 860  
 Et nocens saxis Ithace dolosis.  
 Quod manet fatum dominusve quis te  
 Aut quibus terris, Hecabe, videndam  
 Ducet? in cuius moriere regno?

---

## ACTUS QUARTUS.

HELENA, ANDROMACHA, HECUBA.

POLYXENA, PYRRHUS, *mutae personae.*

*Ut manibus Achillis rite inferiae peragantur, excogitata ratio est, qua ut veste, ita animo nuptiali affecta mactetur Polyxena. Vid. supra vers. 366. Quae partes dantur Helenae, ut Polyxenam lactet inani spe nuptiarum cum Pyrrho; quas illa primo simulat, mox Andromachae iurgio excussa dolos fatetur, et rem aperte suadet.*

HEL. Quicunque hymen funestus, illaetabilis, 865  
 Lamenta, caedes, sanguinem, gemitus habet,  
 Est auspice Helena dignus. Eversis quoque  
 Nocere cogor Phrygibus. Ego Pyrrhi toros  
 Narrare falsos iubeor; ego cultus dare  
 Habitusque Graios. Arte capietur mea, 870  
 Meaque fraude concidet Paridis soror  
 Fidenter. Ipsi levius hoc equidem reor:  
 Optanda mors est sine metu mortis mori.  
 Quid iussa cessas agere? Ad auctores redit  
 Sceleris coacti culpa. — Dardaniae domus 875  
 Generosa virgo, melior afflictos deus  
 Respicere coepit; teque felici parat  
 Dotare thalamo. Tale coniugium tibi  
 Non ipsa sospes Troia, non Priamus daret:



- 880 Nam te Pelasgae maximum gentis decus  
 Ad sancta lecti iura legitimi petit,  
 Cui regna campi lata Thessalici patent.  
 Te magna Tethys, teque tot pelagi deae,  
 Placidumque numen aequoris tumidi Thetis,  
 885 Suam vocabunt; te datam Pyrrho socer  
 Peleus nurum vocabit, et Nereus nurum.  
 Depone cultus squalidos, festos cape;  
 Dedisce captam; deprime horrentes comas,  
 Crinemque docta patere distingui manu.
- 890 Hic forsitan te casus excelso magis  
 Solio reponet. Profuit multis capi.  
 ANDR. Hoc deerat unum Phrygibus eversis malum,  
 Gaudere. Flagrant strata passim Pergama.  
 O coniugale tempus! An quisquam audeat  
 895 Negare? quisquam dubius ad thalamos eat,  
 Quos Helena suadet? Pestis, exitium, lues  
 Utriusque populi, cernis hos tumulos ducum,  
 Et nuda totis ossa quae passim iacent  
 Inhumata campis? Haec hymen sparsit tuus.
- 900 Tibi fluxit Asiae, fluxit Europae cruor,  
 Cum dimicantes lenta prospiceret viros,  
 Incerta voti. Perge, thalamos adpara!  
 Taedis quid opus est, quidve solempni face,  
 Quid igne? Thalamis Troia praelucet novis.
- 905 Celebrate Pyrrhi, Troades, connubia;  
 Celebrate digne: planctus et gemitus sonent.  
 HEL. Ratione quamvis careat et flecti neget  
 Magnus dolor, sociosque nonnunquam sui  
 Moeroris ipsos oderit: causam tamen  
 910 Possum tueri iudice infesto meam,  
 Graviores passa. Luget Andromacha Hectorem,  
 Et Hecuba Priamum; solus occulte Paris  
 Lugendus Helenae. Durum et invisum et grave  
 est,  
 Servitia ferre; patior hoc olim iugum

- Annis decem captiva. Prostratum Ilium est, 915  
 Versi penates. Perdere est patriam grave  
 Gravius timere. Vos levat tanti mali  
 Comitatus; in me victus et victor furit.  
 Quam quisque famulam traheret, incerto diu  
 Casu pependit; me meus traxit statim 920  
 Sine sorte dominus. Causa bellorum fui,  
 Tantaque Teucris cladis. Hoc verum puta,  
 Spartana puppis vestra si secuit freta.  
 Sin rapta Phrygiis praeda remigibus fui,  
 Deditque donum iudici victrix dea: 925  
 Ignosce Paridi. Iudicem iratum mea  
 Habitura causa est: ista Menelaum manent  
 Arbitria. Nunc hanc luctibus paulum tuis,  
 Andromacha, omissis flecte: vix lacrimas queo  
 Retinere. ANDR. Quantum est, Helena quod lacri-  
 mat, malum! 930  
 Cur lacrimat autem? Fare, quos Ithacus dolos,  
 Quae scelera nectat! Utrum ab Idaeis iugis  
 lactanda virgo est, arcis an celsae edito  
 Mittenda saxo? num per has vastum in mare  
 Volvenda rupes, latere quas scisso levat 935  
 Altum vadoso Sigeon spectans sinu?  
 Dic, fare, quidquid subdolo vultu tegis.  
 Leviora mala sunt cuncta, quam Priami gener  
 Hecubaeque Pyrrhus. Fare, quam poenam pares,  
 Expromē, et unum hoc deme nostris cladibus, 940  
 Falli. Paratas perpeti mortem vides.  
 HEL. Utinam iuberet me quoque interpret deum  
 Abrumpere ense lucis invisae moras,  
 Vel Achillis ante busta furibunda manu  
 Occidere Pyrrhi, fata comitantem tua, 945  
 Polyxene miseranda, quam tradi sibi,  
 Cineremque Achilles ante mactari suum,  
 Campo maritus ut sit Elysio, iubet!  
 ANDR. Vide, ut animus ingens laetus audierit necem.

- 950 Cultus decoros regiae vestis petit,  
Et admoveri crinibus patitur manum.  
Mortem putabat illud, hoc thalamos putat.  
At misera luctu mater audito stupet;  
Labefacta mens succubuit. Adsurge! adleva
- 955 Animum, et cadentem, misera, firma spiritum!  
Quam tenuis anima vinculo pendet levi!  
Minimum est, quod Hecubam facere felicem potest.  
Spirat: revixit. Prima mors miseros fugit.  
HEC. Adhuc Achilles vivit in poenas Phrygum!
- 960 Adhuc rebellat! O manum Paridis levem!  
Cinis ipse nostrum sanguinem ac tumulus sitit.  
Modo turba felix latera cingebat mea;  
Lassabar in tot oscula, in totum gregem  
Dividere matrem. Sola nunc haec est super,
- 965 Votum, comes, levamen, afflictæ quies.  
Haec totus Hecubæ foetus; hac sola vocor  
Iam voce mater. Dura et infelix, age,  
Elabere anima! denique hoc unum mihi  
Remitte funus! Inrigat fletus genas,
- 970 Imberque victo subitus e vultu cadit.  
Laetare, gaude, gnata! Quam vellet tuos  
Cassandra thalamos, vellet Andromache tuos!  
ANDR. Nos, Hecuba; nos, nos, Hecuba, lugen-  
dae sumus,  
Quas mota classis huc et huc sparsas feret;
- 975 Hanc cara tellus sedibus patriis teget.  
HEL. Magis invidetis, si suam sortem scias.  
ANDR. An aliqua poenae pars meae ignota est mihi?  
HEL. Versata dominos urna captivis dedit.  
ANDR. Cui famula trador? ede! quem dominum  
voco?
- 980 HEL. Te sorte prima Scyrius juvenis tulit.  
ANDR. Cassandra felix, quam furor sorti eximit,  
Phoebusque! HEL. Regum hanc maximus rector  
tenet.

HEC. Estne aliquis, Hecubam qui suam dici velit?  
 HEL. Ithaco obtigisti praeda nolenti brevis.  
 HEC. Quis tam impotens ac dirus et iniquae ferus 985  
 Sortitor urnae regibus reges dedit?  
 Quis tam sinister dividit captas deus?  
 Quis arbiter crudelis et miseris gravis  
 Eligere dominos nescit, et saeva manu  
 Dat iniqua miseris fata? quis matrem Hectoris 990  
 Armis Achillis miscet? Ad Ulyssen vocor?  
 Nunc victa, nunc captiva, nunc cunctis mihi  
 Obsessa videor cladibus! Domini pudet,  
 Non servitutis. Hectoris spoliū feret,  
 Qui tulit Achillis? Sterilis et saevis fretis 995  
 Inclusa tellus non capit tumulos meos.  
 Duc, duc, Ulysse! nil moror; dominum sequor.  
 Me mea sequentur fata: non pelago quies  
 Tranquilla veniet, saeviet ventis mare,  
 Et bella, et ignis, et mea et Priami mala. 1000  
 Dumque ista veniunt, interim hoc poenae loco est:  
 Sortem occupavi, praemium eripui tibi.  
 Sed incitato Pyrrhus adcurrit gradu,  
 Vultuque torvo. Pyrrhe, quid cessas? Age,  
 Reclūde ferro pectus, et Achillis tui 1005  
 Coniunge soceros! Perge, mactator senum:  
 Et hic decet te sanguis. Abreptam trahit!  
 Maculate superos caede funesta deos,  
 Maculate Manes! Quid precer vobis? Precor  
 His digna sacris aequora. Hoc classi accidat 1010  
 Toti Pelasgae, ratibus hoc mille accidat,  
 Meae precabor, cum vehar, quidquid rati!

## CHORUS TROADUM.

*Chorus occasione nata ab Helenae dicto supra vers. 917  
 vos levat tanti mali comitatus, solatur se communi malo; quod  
 tamen solatium ipsis sortito disiunctis ablatum fore.*

Dulce moerenti populus dolentum,

- Dulce lamentis resonare gentes!
- 1015 Lentius luctus lacrimaeque mordent,  
Turba quas fletu similis frequentat.  
Semper, ah, semper dolor est malignus:  
Gaudet in multos sua fata mitti,  
Seque non solum placuisse poenae.
- 1020 Ferre, quam sortem patiuntur omnes,  
Nemo recusat;  
Nemo se credit miserum, licet sit.  
Tolle felices; removeto multo  
Divites auro; removeto centum
- 1025 Rura qui scindunt opulenta bubus: | III 3, 4  
Pauperi surgent animi iacentes.  
Est miser nemo, nisi comparatus.  
Dulce in immensis posito ruinis,  
Neminem laetos habuisse vultus.
- 1030 Ille deplorat queriturque fatum,  
Qui secans fluctum rate singulari  
Nudus in portus cecidit petitos;  
Aequior casum tulit et procellas,  
Mille qui ponto pariter carinas
- 1035 Obrui vidit, tabulaque littus  
Naufraga spargi, mare cum coactis  
Fluctibus Corus prohibet reverti.  
Questus est Hellen cecidisse Phryxus,  
Cum gregis ductor radiante villo
- 1040 Aureo fratrem simul et sororem  
Sustulit tergo, medioque iactum  
Fecit in ponto; tenuit querelas  
Et vir et Pyrrhe, mare cum viderent,  
Et nihil praeter mare cum viderent,
- 1045 Unici terris homines relictī.  
Solvēt hunc coetum, lacrimasque nostras  
Sparget huc illuc agitata classis,  
Et tuba iussi dare vela nautae,  
Cum simul ventis properante remo

Prenderint altum, fugietque littus. 1050  
 Quis status mentis miseris, ubi omnis  
 Terra decrescet, pelagusque crescet?  
 Celsa cum longe latitabit Ide?  
 Tum puer matri, genitrixque nato,  
 Troia qua iaceat regione monstrans, 1055  
 Dicet, et longe digito notabit:  
 „Ilium est illic, ubi fumus alte  
 Serpit in coelum nebulaeque turpes.“  
 Troes hoc signo patriam videbunt.

---

## ACTUS QUINTUS.

*NUNTIUS, ANDROMACHA, HECUBA.*

*Nuntius matribus narrat, ut e turri praecipitatus fuerit A-  
 styanax, et Polyxena ad tumultum Achillis caesa.*

NUNT. O dira fata, saeva, miseranda, horrida, 1060  
 Quod tam ferum, tam triste bis quinis scelus  
 Mars vidit annis? Quid prius referens gemam,  
 Tuosne potius, an tuos luctus, anus?  
 HEC. Quoscunque luctus fleveris, flebis meos  
 Sua quemque tantum, me omnium clades premit. 1065  
 Mihi cuncta pereunt; quisquis est, Hecubae est, miser.  
 NUNT. Mactata virgo est, missus e muris puer;  
 Sed uterque letum mente generosa tulit.  
 ANDR. Expone seriem caedis, et duplex nefas  
 Prosequere: gaudet magnus aerumnas dolor 1070  
 Tractare totas. Ede, et enarra omnia.  
 NUNT. Est una magna turris e Troia super,  
 Adsueta Priamo; cuius e fastigio  
 Summisque pinnis arbiter belli sedens  
 Regebat acies. Turre in hac blando in sinu 1075  
 Fovens nepotem, cum metu versos gravi  
 Danaos fugaret Hector et ferro et face,

- Paterna puero bella monstrabat senex.  
 Haec nota quondam turris et muri decus  
 1080 Nunc saeva cautes, undique adfusa ducum  
 Plebisque turba cingitur; totum coit  
 Ratibus relictis vulgus. His collis procul  
 Aciem patenti liberam praebet loco;  
 His alta rupes, cuius e cacumine  
 1085 Erecta summo turba libravit pedes.  
 Hunc pinus, illum laurus, hunc fagus gerit,  
 Et tota populo silva suspensio tremit.  
 Extrema montis ille praerupti petit:  
 Semiusta at ille tecta, vel saxum imminens  
 1090 Muri cadentis pressit; atque aliquis (nefas!)  
 Tumulo ferus spectator Hectoreo sedet.  
 Per spatia late plena sublimi gradu  
 Incedit Ithacus, parvulum dextra trahens  
 Priami nepotem; nec gradu segni puer  
 1095 Ad alta pergit moenia. Ut summa stetit  
 Pro turre, vultus huc et huc acres tulit,  
 Intrepidus animo. Qualis ingentis ferae  
 Parvus tenerque foetus, et nondum potens  
 Saevire dente, iam tamen tollit minas,  
 1100 Morsusque inanes tentat, atque animis timet:  
 Sic ille dextra pressus hostili puer  
 Ferox, Superne moverat vulgum ac duces,  
 Ipsumque Ulyssen. Non flet e turba omnium,  
 Qui fletur, ac dum verba fatidici et preces  
 1105 Concipit Ulysses vatis, et saevos ciet  
 Ad sacra Superos, sponte desiluit sua  
 In media Priami regna. —  
 ANDR. Quis Colchus hoc, quis sedis incertae Scythae  
 Commisit? aut quae Caspium cingens mare  
 1110 Gens iuris experts ausa? Non Busiridis  
 Puerilis aras sanguis adpersit feri,  
 Nec parva gregibus membra Diomedes suis  
 Epulanda posuit. Quis tuos artus teget,

Tumuloque tradet? NUNT. Quos enim praeceps locus  
Reliquit artus? Ossa disiecta et gravi 1115

Elisa casu, signa clari corporis,  
Et ora et illas nobiles patris notas  
Confudit imam pondus ad terram datum.

Soluta cervix silicis impulsu, caput  
Ruptum, cerebro penitus expresso. Iacet 1120

Deforme corpus. ANDR. Sic quoque est similis patri.

NUNT. Praeceptus ut altis cecidit e muris puer,  
Flevitque Achivum turba, quod fecit, nefas  
Idem ille populus aliud ad facinus redit  
Tumulumque Achillis. Huius extremum latus 1125

Rhoetea leni verberant fluctu vada;  
Adversa cingit campus, et clivo levi  
Erecta medium vallis includens locum  
Crescit theatri more. Concursus frequens  
Implevit omne littus: hi classis moras 1130

Hac morte solvi rentur; hi stirpem hostium  
Gaudent recidi. Magna para vulgi levis IV 5, 20

Odit scelus, spectatque; nec Troes minus  
Suum frequentant funus, et pavidi metu  
Partem ruentis ultimam Troiae vident: 1135

Cum subito thalami more praeoedunt faces.

It pronuba illic Tyndaris, moestum caput  
Demissa. Tali nubat Hermione modo,  
Phryges precantur. Sic viro turpis suo  
Reddatur Helene! Terror attonitos tenet 1140

Utrosque populos. Ipsa deiectos gerit  
Vultus pudore; sed tamen fulgent genae,  
Magisque solito splendet extremus decor;  
Ut esse Phoebi dulcius lumen solet  
Iamiam cadentis; astra cum repetunt vices, 1145

Premiturque dubius nocte vicina dies.  
Stupet omne vulgus; et fere cuncti magis  
Peritura laudant. Hos movet formae decus, IV 5, 20  
Hos mollis aetas, hos vagae rerum vices;



220 L. ANNAEI SENECAE TROADES. ACT. V.

- 1150 Movet animus omnes fortis et leto obvi-  
Pyrrhum antecedit. Omnium mentes tremunt,  
Mirantur, ac miserantur. Ut primum ardui  
Sublime montis tetigit, atque alte edito  
Iuvenis paterni vertice in busti stetit:
- 1155 Audax virago non tulit retro gradum;  
Conversa ad ictum stat truci vultu ferox.  
Tam fortis animus omnium mentes ferit,  
Novumque monstrum est Pyrrhus ad caedem pi-  
ger.  
Ut dextra ferrum penitus exacta abdidit:
- 1160 Subitus recepta morte prorupit cruor  
Per vulnus ingens. Nec tamen moriens adhuc  
Deponit animos: cecidit, ut Achilli gravem  
Factura terram, prona, et irato impetu.  
Uterque flevit coetus; at timidum Phryges
- 1165 Misere gemitum; clarius victor gemit.  
Hic ordo sacri. Non stetit fusus cruor,  
Humove summa fluxit: obduxit statim,  
Saevusque totum sanguinem tumulus bibit.  
Hic. Ite, ite, Danai; petite iam tuti domos;
- 1170 Optata velis maria diffusis secet  
Secura classis: concidit virgo ac puer;  
Bellum peractum est. Quo meas lacrimas feram?  
Ubi hanc anilis exspuam leti moram?  
Gnatam, an nepotem; coniugem, an patriam fleam?
- 1175 An omnia, an me, sola? Mors, votum meum,  
Infantibus violenta, virginibus, venis,  
Ubicunque properas, saeva; me solam times  
Vitasque! gladios inter ac tela et faces  
Quaesita tota nocte, cupientem fugis!
- 1180 Non hostis, aut ruina, non ignis meos  
Absumsit artus: quam prope a Priamo steti!  
NUNT. Repetite celeri maria, captivae, gradu  
Iam vela puppis laxat, et classis movet.
-

M E D E A.

---

DRAMATIS PERSONAE.

*MEDEA.*

*IASON.*

*CREON.*

*NUTRIX.*

*CHORUS CORINTHIORUM.*

*NUNTIUS.*

---

## ARGUMENTUM.

Iason cum uxore et liberis post interfectum Peliam Corinthi exulabat. Ubi cum Creon rex illum generum legisset, Medea res suas sibi habere a marito, ab rege aliud exilium quaerere iubetur. Illa, unius diei impetrata mora, Creusae sponsae pallam et monile magicis venenis infecta mittit; quibus indutis ignem corripuit palla, misereque nova nupta, una cum patre in natae auxilium accurrente, combusta est; Medea denique filiis, quos Iasoni pepererat, in patris conspectu trucidatis, per aera aufugit.

---

## ALIUD ARGUMENTUM *HIERONYMI BALBI*

- Iam manus Argivum surrepto vellere Colcho  
Tandem puppe nova dulces remearat ad Argos  
Medeamque tori sociam praeclarus Iason  
Iunxerat infaustis taedis atque omine laevo.
- 5 Ille etenim thalamos mutata mente priores  
Sprevit, formosae correptus amore Creusae.  
At Medea ferox, stimulis accensa profanis,  
Ira ardet, magicasque amens decurrit ad artes.  
Quid non herba potest! Male concidit ignibus atris
- 10 Regia, cum miseroque usta est genitore Creusa.  
Nec satis est (pronus semper muliebris in iras  
Est animus, scelerisque ferax seges atque malorum).  
Proh pudor! illa suos miserando vulnere natos  
Opprimit, in partesque calentes consecrat artus
- 15 Dein sublimis abit, serpentibus acta, per auras
-

# ACTUS PRIMUS.

## MEDEA.

*Medea deserta superos inferosque Iasonis ultores invocat.*

Di conjugales, tuque genialis tori  
Lucina custos, quæque domitorem freti  
Tiphyn novam frenare docuisti ratem,  
Et tu profundi saeve dominator maris,  
Clarumque Titan dividens orbi diem,  
Tacitisque præbens consciùm sacris iubar,  
Hecate triformis, quosque iuravit mihi  
Deos Iason; quosque Medæe magis  
Fas est precari, noctis æternæ chaos,  
Aversa Superis regna, Manesque impios, 10  
Dominumque regni tristis, et dominam fide  
Meliore raptam, voce non fausta precor:  
Adeste, adeste! Sceleris ultrices deæ, 11 12, 32  
Crinem solutis squalidæ serpentibus,  
Atram cruentis manibus amplexæ facem, 15  
Adeste, thalamis horridæ quondam meis  
Quales stetistis! Coniugi letum novæ,  
Letumque socero et regiae stirpi date!  
In peius aliquid, quod precor sponso malum,  
Vivat: per urbes erret ignotas egens, 20  
Exul, pavens, invisus, incerti laris;  
Me coniugem optet; limen alienum expetat,  
Iam notus hospes, quoque non aliud queam  
Peius precari, liberos similes patri,  
Similesque matri. Parta iam, parta ultio est: 25  
Peperi. Querelas verbaque incassum sero. —  
Non ibo in hostes, manibus excutiam faces,  
Coeloque lucem? Spectat hoc nostri sator

*Man  
d. 11  
11/11*

- Sol generis, et spectatur, et curru insidens  
 30 Per solita puri spatia decurrit poli?  
 Non redit in ortus, et remetitur diem?  
 Da, da per auras curribus patriis vehi!  
 Committe habenas, genitor, et flagrantibus  
 Ignifera loris tribue moderari iuga:  
 35 Gemino Corinthos littore opponens moras  
 Cremata flammis maria committet duo.  
 Hoc restat unum, pronubam thalamo feram  
 Ut ipsa pinum, postque sacrificas preces  
 Caedam dicatis victimas altaribus.  
 40 Per viscera ipsa quaere supplicio viam,  
 Si vivis, anime! si quid antiqui tibi  
 Remanet vigoris: pelle femineos metus,  
 Et inhospitalem Caucasum mente indue!  
 Quodcunque vidit Phasis aut Pontus nefas,  
 45 Videbit Isthmos. Effera, ignota, horrida,  
 Tremenda coelo pariter ac terris mala  
 Mens intus agitat; vulnera, et caedem, et vagum  
 Funus per artus. Levia memoravi nimis.  
 Haec virgo feci; gravior exurgat dolor:  
 50 Maiora iam me scelera post partus decent.  
 Accingere, ira, teque in exitium para  
 Furore toto! paria narrentur tua  
 Repudia thalamis! Quo virum linquis modo?  
 Hoc, quo secuta es. Rumpe iam segnes moras:  
 55 Quae scelere parta est, scelere linquenda est do-  
 mus

### CHORUS.

*Chorus e mulieribus Corinthiis Iasonis et Creusanenuptiis epithalamium praecinit.*

Ad regum thalamos numine prospero,  
 Qui coelum Superi, quique regunt fretum,  
 Adsint, cum populis rite faventibus!

Primus sceptriferis colla Tonantibus  
 Taurus celsa ferat tergore candido; 60  
 Lucinam nivei femina corporis  
 Intentata iugo placet. Et, asperi  
 Martis sanguineas quae cohibet manus,  
 Quae dat belligeris foedera gentibus,  
 Et cornu retinet divite copiam, *II 2. 6* 65  
 Donetur tenera mitior hostia.  
 Et tu, qui facibus legitimis ades, *I 3 h 1*  
 Noctem discutiens auspice dextera,  
 Huc incedē gradu marcidus ebrio,  
 Praecingens roseo tempora vinculo! 70  
 Et tu, quae gemini praevia temporis  
 Tarde, stella, redis semper amantibus:  
 Te matres avidae, te cupiunt nurus,  
 Quamprimum radios spargere lucidos.  
 Vincit virgineus decor 75  
 Longe Cceropias nurus;  
 Et quas Taygeti iugis  
 Exercet iuvenum modo,  
 Muris quod caret, oppidum;  
 Et quas Aonius latex, 80  
 Alpheosque sacer lavat.  
 Cedent Aesonio duci,  
 Si forma velit adspici,  
 Proles fulminis improbi,  
 Aptat qui iuga tigribus; 85  
 Nec non, qui tripodas movet,  
 Frater virginis asperae;  
 Cedet Castore cum suo  
 Pollux caestibus aptior.  
 Sic, sic, Coelicolae, precor, 90  
 Vincat femina coniuges,  
 Vir longe superet viros!  
 Haec cum femineo constitit in choro:  
 Unius facies praenitet omnibus.

- 95 Sic cum sole perit sidereus decor,  
 Et densi latitant Pleiadum greges,  
 Cum Phoebe solidum lumine non suo  
 Orbem circuitis cornibus adligat.  
 Ostro sic niveus puniceo color
- 100 Perfusus rubuit; sic nitidum iubar  
 Pastor luce nova roscidus adspicit.  
 Ereptus thalamis Phasidos horridis,  
 Effrenae solitus pectora coniugis  
 Invita trepidus prendere dextera,
- 105 Felix Aeoliam corripe virginem  
 Nunc primum, soceris, sponse, volentibus!  
 Concesso, iuvenes, ludite iurgio!  
 Hinc illinc, iuvenes, mittite carmina!  
 Rara est in dominos iusta licentia.
- 110 Candida thyrsigeri proles generosa Lyaei  
 (Multifidam iam tempus erat succendere pinum),  
 Excute solemnem digitis marcentibus ignem!  
 Festa dicax fundat convicia Fescenninus;  
 Solvat turba iocos. Tacitis eat illa tenebris,
- 115 Si qua peregrino nubit fugitura marito.

---

## ACTUS SECUNDUS.

### MEDEA, NUTRIX.

*Audito Hymenaeo furit Medea, quam sedare nutrix laborat, sed frustra.*

- MED. Occidimus: aures pepulithymenaeus meas!  
 Vix ipsa tantum, vix adhuc, credo malum.  
 Haec facere Iason potuit? erepto patre,  
 Patria atque regno, sedibus solam exteris
- 120 Deserere? Durus merita contempsit mea,  
 Qui scelere flammas viderat vinci et mare?

Adeone credit omne consumptum nefas?  
 Incerta, vecors, mente vesana feror  
 Partes in omnes, unde me ulcisci queam?  
 Utinam esset illi frater! Est coniux: in hanc 125  
 Ferrum exigatur! — Hoc meis satis est malis?  
 Si quod Pelasgae, si quod urbes barbarae  
 Novere facinus, quod tuae ignorant manus,  
 Nunc est parandum. Scelera te hortentur tua,  
 Et cuncta redeant: inclitum regni decus 130  
 Raptum, et nefandae virginis parvus comes  
 Divisus ense; funus ingestum patri,  
 Sparsumque ponto corpus; et Peliae senis  
 Decocta aheni membra. Funestum impie  
 Quam saepe fudi sanguinem! et nullum scelus 135  
 Irata feci; saevit infelix amor.  
 Quid tamen Iason potuit, alieni arbitri  
 Iurisque factus? — Debuit ferro obvium  
 Offerre pectus. — Melius, ah melius, dolor  
 Furiose, loquere! Si potest, vivat meus, 140  
 Ut fuit, Iason; sin minus, vivat tamen,  
 Memorque nostri muneri parcat meo.  
 Culpa est Creontis tota, qui sceptro impotens  
 Coniugia solvit, quique genitricem abstrahit  
 Gnatis, et arcto pignore adstrictam fidem 145  
 Dirimit. Petatur solus hic; poenas luat,  
 Quas debet! Alto cinere cumulabo domum!  
 Videbit atrum vorticem flammis agi  
 Malea, longas navibus flectens moras.  
 NUTR. Sile, obsecro, questusque secreto abditos 150  
 Manda dolori! Gravia quisquis vulnera  
 Patientem et aequo mutis animo pertulit,  
 Referre potuit. Ira, quae tegitur, nocet;  
 Professam perdunt odia vindictae locum.  
 MED. Levis est dolor, qui capere consilium potest, 155  
 Et clepere sese; magna non latitant mala.  
 Libet ire contra. NUTR. Siste furialem impetum,



Alumna: vix te tacita defendit quies.

<sup>1</sup> MED. Fortuna fortes metuit, ignavos premit.

160 NUTR. Tunc est probanda, si locum virtus habet.

MED. Nunquam potest non esse virtuti locus.

NUTR. Spes nulla monstrat rebus afflictis viam.

MED. Qui nil potest sperare, desperet nihil.

NUTR. Abiere Colchi; coniugis nulla est fides;

165 Nihilque superest opibus e tantis tibi.

MED. Medea superest; hic mare et terras vides,  
Ferrumque et ignes et deos et fulmina.

NUTR. Rex est timendus. MED. Rex meus fuerat  
pater.

NUTR. Non metuis arma? MED. Sint licet terra  
edita.

170 NUTR. Moriere. MED. Cupio. NUTR. Profuge!

MED. Poenituit fugae.

Medea fugiam? NUTR. Mater es. MED. Cui sim,  
vides.

NUTR. Profugere dubitas? MED. Fugiam; at ul-  
ciscar prius.

NUTR. Vindex sequetur. MED. Forsan inveniam  
moras.

NUTR. Compesce verba; parce iam, demens, minis,

175 Animosque minue: tempori aptari decet.

MED. Fortuna opes auferre, non animum, potest.

Sed cuius ictu regius cardo strepit?

Ipse est Pelasgo tumidus imperio Creon.

### CREON, MEDEA.

*Creon Medeam in exilium propere abire imperio urget; illa  
diei unius moram vix impetrat.*

CR. Medea, Colchi noxium Aeetae genus,

180 Nondum meis exportat e regnis pedem.

Molitur aliquid: nota fraus, nota est manus.

Cui parcit illa, quemve securum sinit?

Abolere propere pessimam ferro luem

Equidem parabam; precibus evicit gener.  
 Concessa vita est; liberet fines metu, 185  
 Abeatque tuta. Fert gradum contra ferox,  
 Minaxque nostros propius adfatus petit.  
 Arcete, famuli, tactu et accessu procul!  
 Iubete sileat! regium imperium pati  
 Aliquando discat. Vade veloci fuga, 190  
 Monstrumque saevum, horribile, iamdudum avehe!  
**MED.** Quod crimen, aut quae culpa multatur fuga?  
**CR.** Quae causa pellat, innocens mulier rogat.  
**MED.** Si iudicas, cognosce; si regnas, iube.  
**CR.** Aequum atque iniquum regis imperium feras. 195  
**MED.** Iniqua nunquam regna perpetuo manent.  
**CR. I,** querere Colchis. **MED.** Redeo. Qui advexit,  
 ferat.

**CR.** VOX constituto sera decreto venit.  
**MED.** Qui statuit aliquid parte inaudita altera:  
 Aequum licet statuerit, haud aequus fuit. 200  
**CR.** Auditus a te Pelia supplicium tulit?  
 Sed fare; causae detur egregiae locus.  
**MED.** Difficile quam sit animum ab ira flectere  
 Iam concitatum; quamque regale hoc putet,  
 Scepbris superbas quisquis admovit manus,  
 Qua coepit, iræ; regia didici mea.  
 Quamvis enim sim clade miseranda obruta,  
 Expulsa, supplex, sola, deserta, undique  
 Adflcta: quandam nobili fulsi patre,  
 Avoque clarum Sole deduxi genus.  
 Quodcunque placidis flexibus Phasis rigat;  
 Pontusque quidquid Scythicus a tergo videt,  
 Palustribus qua maria dulcescunt aquis;  
 Armata peltis quidquid exterret cohors  
 Inclusa ripis vidua Thermodontiis:  
 Hoc omne noster genitor imperio regit.  
 Generosa, felix, decore regali potens  
 Fulsi. Petebant tunc meos thalamos proci,

*Handwritten notes:*  
 205 in a  
 new edition  
 210  
 215  
 the original

- Qui nunc petuntur. Rapida Fortuna ac levis  
220 Praeceptisque regno eripuit, exilio dedit.  
Confide regnis, cum levis magnas opes  
Huc ferat et illuc casus. Hoc reges habent  
Magnificum et ingens, nulla quod rapiat dies,  
Prodesse miseris, supplices fido lare  
225 Protegere. Solum hoc Colchico regno extuli,  
Decus illud ingens, gloriae florem inclitum,  
Praesidia Achivae gentis et prolem deum,  
Servasse memet. Munus est Orpheus meum,  
Qui saxa cantu mulcet et silvas trahit;  
230 Geminique munus Castor et Pollux meum,  
Satique Borea; quique trans Pontum quoque  
Summota Lynceus lumine immisso videt;  
Omnesque Minyae: nam ducum taceo ducem,  
Pro quo nihil debetur; hunc nulli imputo:  
235 Vobis revexi ceteros, unum mihi.  
Incesse nunc, et cuncta flagitia ingero!  
Fatebor: obici crimen hoc solum potest,  
Argo reversa. Virgini placeat pudor,  
Paterque placeat: tota cum ducibus ruet  
240 Pelasga tellus; hic tuus primum gener  
Tauri ferocis ore flammanti occidet.  
Fortuna causam, qua volet, nostram premat;  
Non poenitet servasse tot regum decus.  
Quodcunque culpa praemium ex omni tuli,  
245 Hoc est penes te. Si placet: damna ream;  
Sed redde crimen. Sum nocens, fateor, Creon.  
Talem sciebas esse, cum genua attigi,  
Fidemque supplex praesidis dextrae peti.  
Terra hac miseriis angulum et sedem rogo,  
250 Latebrasque viles. Urbe si pelli placet  
Detur remotus aliquis in regnis locus.  
c.r. Non esse me, qui sceptrata violentus geram,  
Nec qui superbo miserias calcem pede,  
Testatus equidem videor haud clare parum

Generum exulem legendo, et adflictum, et gravi 255  
Terrore pavidum. Quippe te poenae expetit

Letoque Acastus, regna Thessalica obtinens.

Senio trementem debili atque aevo gravem

Patrem peremtum queritur, et caesi senis

Discissa membra, cum dolo captae tuo 260

Piae sorores impium auderent nefas.

Potest Iason, si tuam causam amoves,

Suam tueri: nullus innocuum cruor

Contaminavit; absuit ferro manus,

Proculque vestro purus a coetu stetit. 265

Tu, tu, malorum machinatrix facinorum,

Feminea cui nequitia ad audendum omnia,

Virile robur, nulla famae memoria est,

Egredere, purga regna; letales simul

Tecum aufer herbas! libera cives metu! 270

Alia sedens tellure sollicita deos!

MED. Profugere cogis? redde fugienti ratem,

Vel redde comitem! Fugere cur solam iubes?

Non sola veni. Bella si metuis pati:

Utrumque regno pelle. Cur sontes duos 275

Distinguis? Illi Pelia, non nobis iacet.

Fugam, rapinas adice, desertum patrem,

Lacerumque fratrem, quidquid etiamnum novus

Docet maritus coniuges: non est meum.

Toties nocens sum facta, sed nunquam mihi. 280

C.R. Iam exisse decuit. Quid seris fando moras?

MED. Supplex recedens illud extremum precor,

Ne culpa natos matris insontes trahat.

C.R. Vade: hos paterno, ut genitor, excipiam sinu.

MED. Per ego auspicatos regii thalami toros, 285

Per spes futuras, perque regnorum status,

Fortuna varia dubia quos agitat vice,

Precor: brevem largire fugienti moram,

Dum extrema natis mater infigo oscula,

Fortasse moriens. C.R. Fraudibus tempus petis. 290

**MED.** Quae fraus timeri tempore exiguo potest?  
**CR.** Nullum ad nocendum tempus angustum est  
 malis.

**MED.** Parvumne miserae temporis lacrimis negas?  
**CR.** Etsi repugnat precibus infixus timor,

295 Unus parando dabitur exilio dies.

**MED.** Nimis est; recidas aliquid ex isto licet  
 Et ipsa propero. **CR.** Capite supplicium lues,  
 Clarus priusquam Phoebus attollat diem,  
 Nisi cedis Isthmo. Sacra me thalami vocant,

300 Vocat precari festus Hymenaeo dies.

### CHORUS.

*Chorus in audaciam navigantium invectus primos nautas  
 dignum audacia sua retulisse praemium canit, Medeam.*

Audax nimium, qui freta primus  
 Rate tam fragili perfida rupit;  
 Terrasque suas post terga videns,  
 Animam levibus credidit auris;

Hor. I 3

305 Dubioque secans aequora cursu,  
 Potuit tenui fidere ligno,  
 Inter vitae mortisque vias  
 Nimium gracili limite ducto.

Nondum quisquam sidera norat;  
 310 Stellisque, quibus pingitur aether,  
 Non erat usus; nondum pluvias  
 Hyadas poterant vitare rates,  
 Non Oleniae lumina caprae,  
 Non quae sequitur flectitque senex

315 Arctica tardus plaustra Bootes;  
 Nondum Boreas, nondum Zephyrus  
 Nomen habebant. Ausus Tiphys  
 Pandere vasto carbasa ponto,  
 Legesque novas scribere ventis:

IV 513

320 Nunc lina sinu tendere toto,

Nunc prolato pede transversos  
 Captare Notos, nunc antennas  
 Medio tutas ponere malo;  
 Nunc in summo religare loco,  
 Cum iam totos avidus nimium 325

Navita flatus optat, et alto  
 Rubicunda tremunt suppara velo.  
 Candida nostri secula patres  
 Videre, procul fraude remota.  
 Sua quisque piger littora tangens, 330

Patrioque senex factus in arvo,  
 Parvo dives, nisi quas tulerat  
 Natale solum, non norat opes. 335  
 Bene dissepti foedera mundi  
 Traxit in unum Thessala pinus,

Iussitque pati verbera pontum;  
 Partemque metus fieri nostri  
 Mare sepositum.  
 Dedit illa graves improba poenas,  
 Per tam longos ducta timores: 340

Cum duo montes, claustra profundi,  
 Hinc atque illinc subito impuls  
 Velut aetherio gernerent sonitu;  
 Spargeret astra  
 Nubesque ipsas mare deprensum. 345

Palluit audax Tiphys, et omnes  
 Labente manu misit habenas;  
 Orpheus tacuit torpente lyra;  
 Ipsaque vocem perdidit Argo.  
 Quid, cum Siculi virgo Pelori, 350

Rabidos utero succincta canes,  
 Omnes pariter solvit hiatus?  
 Quis non totos horruit artus,  
 Toties uno latrante malo?  
 Quid, cum Ausonium dirae pestes 355

Voce canora mare mulcerent?

- Cum Pieria resonans cithara  
 Thracius Orpheus  
 Solitam cantu retinere rates  
 360 Paene coegit Sirena sequi.  
 Quod fuit huius pretium cursus?  
 Aurea pellis,  
 Maiusque mari Medea malum,  
 Merces prima digna carina.  
 365 Nunc iam cessit pontus, et omnes  
 Patitur leges. Non Palladia  
 Compacta manu regum referens  
 Inclita remos quaeritur Argo;  
 Quaelibet altum cymba pererrat.  
 370 Terminus omnis motus, et urbes  
 Muros terra posuere nova.  
 Nil, qua fuerat sede, reliquit  
 Pervius orbis.  
 Indus gelidum potat Araxen;  
 375 Albin Persae Rhenumque bibunt.  
 Venient annis secula seris,  
 Quibus Oceanus vincula rerum  
 Laxet, et ingens pateat tellus,  
 Tethysque novos detegat orbes,  
 380 Nec sit terris ultima Thule.

## ACTUS TERTIUS.

### NUTRIX, MEDEA.

*In vindictam praeceps fertur Medea, nutrice incassum eam dehortante.*

NUTR. Alumna, celerem quo rapis tectis pedem?  
 Resiste, et iras comprime, ac retine impetum!

Incerta qualis entheos cursus tulit,  
 Cum iam recepto Maenas insanit deo,  
 Pindi nivalis vertice, aut Nysae iugis: 385  
 Talis recursat huc et huc motu effero,  
 Furoris ore signa lymphati gerens.  
 Flammata facies spiritum ex alto citat;  
 Proclamat; oculos uberi fletu rigat;  
 Renidet. Omnis specimen adfectus capit: 390  
 Haeret, minatur, aestuat, queritur, gemit.  
 Quo pondus animi verget? ubi ponet minas?  
 Ubi se iste fluctus franget? Exundat furor.  
 Non facile secum versat aut medium scelus.  
 Se vincet: irae novimus veteres notas. 395  
 Magnum aliquid instat, efferum, immane, impium:  
 Vultum furoris cerno. Di fallant metum!  
 MED. Si quaeris, odio, misera, quem statuas modum:  
 Imitare amorem. Regias egon' ut faces  
 Inulta patiar? segnis hic ibit dies, 400  
 Tanto petitus ambitu, tanto datus?  
 Dum terra coelum media libratum feret,  
 Nitidusque certas mundus evolvit vices,  
 Numerusque arenis deerit, et solem dies,  
 Noctem sequentur astra; dum siccas polus 405  
 Versabit Arctos, flumina in pontum cadent:  
 Nunquam meus cessabit in poenas furor,  
 Crescetque semper. Quae ferarum immanitas,  
 Quae Scylla, quae Charybdis, Ausonium mare  
 Siculumque sorbens, quaeve anhelantem premens 410  
 Titana tantis Aetna fervebit minis? II 5, 25  
 Non rapidus amnis, non procellosum mare,  
 Pontusque Coro saevus, aut vis ignium  
 Adiuta flatu, possit inhibere impetum  
 Irasque nostras: sternam et evertam omnia! 415  
 Timuit Creontem ac bella Thessalici ducis?  
 Amor timere neminem verus potest.  
 Sed cesserit coactus, et dederit manus:



- Adire certe, coniugem extremo adloqui  
 420 Sermone potuit. Hoc quoque extimuit ferox.  
 Laxare certe tempus immitis fugae  
 Genero licebat. Liberis unus dies  
 Datus est duobus. — Non queror tempus breve:  
 Multum patebit. Faciet hic, faciet, dies,  
 425 Quod nullus unquam taceat! Invadam deos,  
 Et cuncta quatiam! **NUTR.** Recipe turbatum ma-  
 lis,  
 Hera, pectus! animum mitiga! **MRD.** Sola est quies,  
 Mecum ruina cuncta si video obruta.  
 Mecum omnia abeant! trahere, cum pereas, libet.  
 430 **NUTR.** Quam multa sint timenda, si perstas, vide  
 Nemo potentes adgredi tutus potest.

*I A S O N , M E D E A .*

*Iasonem, gravatim Medeam deserentem, seque excusantem,  
 aggreditur Medea opprobriis, precibus, simulata conciliatione*

- I A S.** O dura fata semper, et sortem asperam,  
 | Cum saevit, et cum parcit, ex aequo mala  
 Remedia quoties invenit nobis deus  
 435 Periculis peiora! Si vellem fidem  
 Praestare meritis coniugis: leto fuit  
 Caput obferendum; si mori nolim: fide  
 Misero carendum est. Non timor vicit virum,  
 | Sed trepida pietas: quippe sequeretur necem  
 440 Proles parentum. O sancta, si coelum incolis,  
 Iustitia, numen invoco ac testor tuum,  
 Gnati patrem vicere. Quin ipsam quoque,  
 Etsi ferox est corde nec patiens iugi,  
 Consulere natis malle quam thalamis reor.  
 445 Constituit animus precibus iratam adgredi.  
 Atque ecce! viso memet exiluit, furit:  
 Fert odia prae se, totus in vultu est dolor.  
**MRD.** Fugimus, Iason, fugimus. Hoc non est novum.

Mutare sedes; causa fugiendi nova est:  
 Pro te solebam fugere. Discedo, exeo.  
 Penatibus profugere quam cogis tuis,  
 Ad quos remittis? Phasin et Colchos petam  
 Patriumque regnum, quaeque fraternus cruor  
 Perfudit arva? Quas peti terras iubes?  
 Quae maria monstras? Pontici fauces freti,  
 Per quas revexi nobiles regum manus,  
 Adulterum secuta per Symplegadas?  
 Parvamne Iolcon, Thessala an Tempe petam?  
 Quascunque aperui tibi vias, clusi mihi.  
 Quo me remittis? Exuli exilium imperas,  
 Nec das. Eatur. Regius iussit gener:  
 Nihil recuso. Dira supplicia ingere:  
 Merui. Cruentis pellicem poenis premat  
 Regalis ira, vinculis oneret manus,  
 Clusamque saxo noctis aeternae obruat:  
 Minora meritis patiar. — Ingratum caput!  
 Revolvat animus igneos tauri halitus,  
 Interque saevos gentis indomitae metus  
 Armifero in arvo flammeum Aeetae pecus,  
 Hostisque subiti tela: cum iussu meo  
 Terrigena miles mutua caede occidit.  
 Adice expetita spolia Phrixiei arietis,  
 Somnoque iussum lumina ignoto dare  
 Insomne monstrum; traditum fratrem neci,  
 Et scelere in uno non semel factum scelus;  
 Iussasque natas, fraude deceptas mea,  
 Secare membra non revicturi senis.  
 Aliena quaerens regna, deserui mea.  
 Per spes tuorum liberum et certum larem,  
 Per victa monstra, per manus, pro te quibus  
 Nunquam peperci, perque praeteritos metus,  
 Per coelum et undas, coniugi testes mei,  
 Miserere! redde supplici felix vicem  
 Ex opibus illis, quas procul raptas Scythae

450

455

460

465

470

475

480

*afectus  
 h. 11  
 h. 11*

- 485 Usque a perustis Indiae populis agunt,  
 Quas quia referta vix domus gazas capit,  
 Ornamus auro nemora, nil exul tuli  
 Nisi fratris artus, hos quoque impendi tibi,  
 Tibi patria cessit, tibi pater, frater, pudor
- 490 Hac dote nupsi. Redde fugienti sua.  
 IAS. Perimere cum te vellet infestus Creon,  
 Lacrimis meis evictus, exilium dedit.  
 MED. Poenam putabam; munus, ut video, est fuga.  
 IAS. Dum licet abire, profuge, teque hinc eripe:
- 495 Gravis ira regum est semper. MED. Hoc suades  
 mihi,  
 Praestas Creusae: pellicem invisam amoves  
 IAS. Medea amores obicit? MED. et caedem et dolos.  
 IAS. Obiicere crimen quod potes tandem mihi?  
 MED. Quodcunque feci. IAS. Restat hoc unum in-  
 super,
- 500 Tuis ut etiam sceleribus fiam nocens.  
 MED. Tua illa, tua sunt illa: cui prodest scelus,  
 Is fecit. Omnes coniugem infamem arguant:  
 Solus tuere, solus insontem voca.  
 Tibi innocens sit, quisquis est pro te nocens.
- 505 IAS. Ingrata vita est, cuius acceptae pudet.  
 MED. Retinenda non est, cuius acceptae pudet.  
 IAS. Quin potius ira concitum pectus doma!  
 Placare natis! MED. Abdico, abiuro, abnuo.  
 Meis Creusa liberis fratres dabit?
- 510 IAS. Regina natis exulum adflctis potens.  
 MED. Ne veniat unquam tam malus miseris dies,  
 Qui prole foeda misceat prolem inclitam,  
 Phoebi nepotes Sisyphei nepotibus.  
 IAS. Quid, misera, meque teque in exitium trahis?
- 515 Abscede, quaeso! MED. Supplicem audivit Creon.  
 IAS. Quid facere possim, eloquere. MED. Pro me?  
 Vel scelus.  
 IAS. Hinc rex, et illinc. MED. Est et his maior metus.

Medea. Nos configere certemus; sine,  
 Sit pretium Iason. IAS. Cedo defessus malis.  
 Et ipsa casus saepe iam expertos time. 520  
 MED. Fortuna semper omnis infra me stetit.  
 IAS. Acastus instat, propior est hostis Creon.  
 MED. Utrumque profuge. Nolo ut in socerum manus  
 Armes; nec ut te caede cognata inquines,  
 Medea cogit: innocens mecum fuge. 525  
 IAS. Et quis resistet, gemina si bella ingruant,  
 Creo atque Acastus arma si iungant sua?  
 MED. His adice Colchos, adice et Aeeten ducem;  
 Scythas Pelasgis iunge: demersos dabo.  
 IAS. Alta extimesco sceptrum. MED. Ne cupias, vide. 530  
 IAS. Suspecta ne sint, longa conloquia amputa.  
 MED. Nunc summe toto Iupiter coelo tona!  
 Intende dextram! vindices flammam para,  
 Omnemque ruptis nubibus mundum quate!  
 Nec deligenti tela librentur manu 535  
 Vel me, vel istum: quisquis e nobis cadet,  
 Nocens peribit; non potest in nos tuum  
 Errare fulmen. IAS. Sana meditari incipe,  
 Et placida fare. Si quid ex soceri domo  
 Potest fugam levare: solamen pete. 540  
 MED. Contemnere animus regias, ut scis, opes  
 Potest soletque; liberos tantum fugae  
 Habere comites liceat, in quorum sinu  
 Lacrimas profundam. Te novi gnati manent.  
 IAS. Parere precibus cupere me, fateor, tuis; 545  
 Pietas vetat: namque istud ut possim pati,  
 Non ipse memet cogat et rex et socer.  
 Haec causa vitae est, hoc perusti pectoris  
 Curis levamen, spiritu citius queam  
 Carere, membris, luce. MED. Sic natos amat? 550  
 Bene est: tenetur; vulnere patuit locus. —  
 Suprema certe liceat abeuntem loqui  
 Mandata; liceat ultimum amplexum dare:

- Gratum est et illud. Voce iam extrema peto,  
 555 Ne, si qua noster dubius effudit dolor,  
 Maneant in animo verba. Melioris tibi  
 Memoria nostri sedeat; haec irae data  
 Oblitterentur. IAS. Omnia ex animo expuli;  
 Precorque, et ipsa fervidam ut mentem regas,  
 560 Placideque tractes: miseras lenit quies.  
 MED. Discessit. Itan' est? vadis oblitus mei  
 Et tot meorum facinorum? excidimus tibi?  
 Nunquam excidemus. Hoc age! omnes advoca  
 Vires et artes! Fructus est scelerum tibi,  
 565 Nullum scelus putare. Vix fraudi est locus:  
 Timemur. Hac adgredere, qua nemo potest  
 Quidquam timere! Perge! nunc aude, incipe,  
 Quidquid potest, Medea, quidquid non potest!  
 Tu, fida nutrix, socia moeroris mei  
 570 Variique casus, misera consilia adiuva!  
 Est palla nobis, munus aetheriae domus,  
 Decusque regni, pignus Aeetae datum  
 A Sole generis; est et auro textili  
 Monile fulgens; quodque gemmarum nitor  
 575 Distinguit aurum, quo solent cingi comae.  
 Haec nostra nati dona nubenti ferant,  
 Sed ante diris inlita ac tincta artibus.  
 Vocetur Hecate. Sacra luctifica adpara:  
 Statuantur arae, flamma iam tectis sonet.

## CHORUS.

*Canit Chorus, „Reiectae uxori quot amore dolores polluto,  
 notumque furens quid femina posset“, et cum ceteri Argonautae  
 poenas dederint violati maris, Iasoni bene precatur.*

- 580 Nulla vis flammae tumidique venti  
 Tanta, nec teli metuenda torti,  
 Quanta, cum coniux viduata taedis  
 Ardet et odit;

MEDEA. ACT. III.

241

Non, ubi hibernos nebulosus imbres  
Auster advexit; properatque torrens 585  
Ister, et iunctos vetat esse pontes,

Ac vagus errat;

Non, ubi impellit Rhodanus profundum;  
Aut ubi in rivos nivibus solutis  
Sole iam forti medioque vere 590

Tabuit Haemus.

Coeus est ignis stimulatus ira,  
Nec regi curat, patiturve frenos;  
Haud timet mortem: cupit ire in ipsos  
Obvius enses. 595

Parcite, o divi! veniam precamur,  
Vivat ut tutus, mare qui subegit.  
Sed furit vinci dominus profundi  
Regna secunda.

Ausus aeternos agitare currus 600  
Immemor metae juvenis paternae,  
Quos polo sparsit, furiosus ignes  
Ipse recepit.

Constitit nulli via nota magno.  
Vade, qua tutum populo priori;  
Rumpe nec sacro, violente, sancta  
Foedera mundi!

Quisquis audacis tetigit carinae  
Nobiles remos, nemorisque sacri  
Pelion densa spoliavit umbra; 610  
Quisquis intravit scopulos vagantes,  
Et tot emensus pelagi labores,  
Barbara funem religavit ora,  
Raptor externi rediturus auri:  
Exitu diro temerata ponti 615

Iura piavit.

Exigit poenas mare provocatum.  
Tiphys in primis domitor profundi  
Liquit indocto regimen magistro:

SEN. TRAG.

Q

- 620 Littore extremo procul a paternis  
Occidens regnis, tumuloque vili  
Tectus, ignotas iacet inter umbras.  
Aulis amissi memor inde regis  
Portubus lentis retinet carinas,  
625 Stare querentes.  
Ille vocali genitus Campœna,  
Cuius ad chordas modulante plectro  
Restitit torrens, siluere venti;  
Cui suo cantu volucris relicto  
630 Adfuit tota comitante silva,  
Thracios sparsus iacuit per agros;  
At caput tristi fluitavit Hebro:  
Contigit notam Styga Tartarumque,  
Non rediturus.  
635 Stravit Alcides Aquilone natos;  
Patre Neptuno genitum necavit,  
Sumere innumeras solitum figuras;  
Ipse post terrae pelagique pacem,  
Post feri Ditis patefacta regna,  
640 Vivus ardenti recubans in Oeta,  
Præbuit saevis sua membra flammis,  
Tabæ consumptus gemini cruoris,  
Munere nuptæ.  
Stravit Ancaëum violentus ictu  
645 Setiger. Fratres, Melagré, matris  
Impius mactas: morerisque dextra  
Matris iratae. Meruere cuncti;  
Morte quod crimen tener explavit  
Herculi magno puer inreptus?  
650 Raptus heu! tutas puer inter undas.  
Ite nunc fortes, perarate pontum,  
Fonte timendo.  
Idmonen, quamvis bene fata nosset,  
Condidit; sepi Libycis arenis,  
655 Omnibus verax, sibi falsus uni,

Concidit Mopsus, caruitque Thebis.  
 Ille si vere cecinit futura:  
 Exul errabit Thetidis maritus;  
 Igne fallaci nociturus Argis  
 Nauplios praecipit cadet in profundum;  
 Patrioque pendet crimine poenas [N] 7. 12. 660  
 Fulmine et ponto moriens Oileus.  
 Coniugis fatum redimens Phraesi,  
 Uxor, impendes animam marito!  
 Ipse, qui praedam spoliūque iussit 665  
 Aureum prima reveli carina,  
 Ustus accenso Pelias ahenō  
 Arsit angustas vagus inter undas  
 Iam satis, divi, mare vindicatis:  
 Parcite iusso! 670

## ACTUS QUARTUS.

### NUTRIX.

*Quid agat Medea, quid parat, narrat Nutrix.*

Pavet animus, horret; magna perniciēs adest.  
 Immane quantum augeſcit et ſemet dolor  
 Accendit ipſe, vimque praeteritam integrat.  
 Vidi furentem ſaepe, et adgreſſam deos  
 Coelum trahentem; maius his, maius parat 675  
 Medea monſtrum. Namque ut attonito gradu  
 Evaſit, et penetrale funeſtum attigit:  
 Totas opes effudit, et quidquid diu  
 Etiam ipſa timuit, promit; atque omnem explicat  
 Turbam malorum: arcana, ſecreta, abdita; 680  
 Et, triſte laeva comprecans ſacrum manu,  
 Peſtes vocat, quaſcunque ferventis creat



- Arena Libyae, quasque perpetua nive  
Taurus coercet frigore Arctoo rigens,  
685 Et omne monstrum. Tracta magicis cantibus  
Squamifera latebris turba desertis adest.  
Hic saeva serpens corpus immensum trahit,  
Trifidamque linguam exertat, et, quaerens quibus  
Mortifera veniat, carmine audito stupet,  
690 Tumidumque nodis corpus adgestis plicat,  
Cogitque in orbes. „Parva sunt,“ inquit, „mala,  
Et vile telum est, ima quod tellus creat:  
Coelo petam venena. Iamiam tempus est  
Aliquid movere fraude vulgari altius.  
695 Huc ille vasti more torrentis iacens  
Descendat anguis, cuius immensos duae,  
Maior minorque, sentiunt nodos ferae,  
Maior Pelasgis, apta Sidoniis minor!  
Pressasque tandem solvat Ophiuchus manus,  
700 Virusque fundat! Adsit ad cantus meos  
Lacessere ausus gemina Python numina!  
Et hydra, et omnis redeat Herculea manu  
Succisa serpens, caede se reparans sua!  
Tu quoque relictis pervigil Colchis ades,  
705 Sopite primum cantibus, serpens, meis!“  
Postquam evocavit omne serpentum genus:  
Congerit in unum frugis infaustae mala:  
Quaecunque generat invius saxis Eryx;  
Quae fert opertis hieme perpetua iugis  
710 Sparsus cruore Caucasus Promethei,  
Et quis sagittas divites Arabes linunt,  
Pharetraque pugnax Medus, aut Parthi leves;  
Aut quos sub axe frigido succos legunt  
Lucis Suevi nobiles Hercyniis.  
715 Quodcunque tellus vere nidifico creat;  
Aut, rigida cum iam bruma decussit decus  
Nemorum, et nivali cuncta constrinxit gelu;  
Quodcunque gramen flore mortifero viret,

Dirusve tortis succus in radicibus  
 Causas nocendi gignit: attrectat manu. 720  
 Haemonius illas contulit pestes Athos;  
 Has Pindus ingens; illa Pangaei iugis  
 Teneram cruenta falce deposuit comam;  
 Has aluit altum gurgitem Tigris premens;  
 Danubius illas; has per arentes plagas 725  
 Tepidis Hydaspes gemmifer currens aquis,  
 Nomenque terris qui dedit Baetis suis,  
 Hesperia pulsans maria languenti vado.  
 Haec passa ferrum est, dum parat Phoebus diem;  
 Illius alta nocte succisus frutex; 730  
 At huius ungui secta cantato seges.  
 Mortifera carpit gramina, ac serpentium  
 Saniem exprimit miscetque, et obscoenas aves,  
 Moestique cor bubonis, et raucae strigis  
 Exsecta vivae viscera. Haec scelerum artifex 735  
 Discreta ponit: his rapax vis ignium,  
 His gelida pigri frigoris glacies inest.  
 Addit venenis verba, non istis minus  
 Metuenda. Sonuit ecce! vesano gradu,  
 Canitque. Mundus vocibus primis tremit 740

MEDEA.

*Invocatis manibus et rite conceptis incantationibus, Medea  
 beneficium illitam pallam cum monili, aureoque crinali, dono mit-  
 tit ad Creusam per filios suos.*

Comprecor vulgus silentum, vosque ferales deos,  
 Et Chaos coecum, atque opacam Ditis umbrosi domum,  
 Tartari ripis ligatos squalidae Mortis specus!  
 Supplicis animae remissis currite ad thalamos novos!  
 Rota resistat membra torquens; tangat Ixion hu-  
 mum. 745

Tantalus securus undas hauriat Pirenidas.  
 Vos quoque, urnis quas foratis inritus ludit labor,

- Danaides, coite: vestras hic dies quaerit manus:  
 Gravior horum poena sedeat coniugis socero mei.  
 750 Lubricus per saxa retro Sisyphum volvat lapis.  
 Nunc meis vocata sacris noctium sidus veni,  
 Pessimos induta vultus, fronte non una minax!  
 Tibi more gentis vinculo solvens comam,  
 Secreta nudo nemora lustravi pede,  
 755 Et evocavi nubibus siccis aquas,  
 Egique ad inum maria, et Oceanus graves  
 Interius undas aestibus victis dedit;  
 Pariterque mundus lege confusa aetheris / III 5, 6  
 Et solem et astra vidit; et vetitum mare  
 760 Tetigistis, Ursae. Temporum flexi vices!  
 Aestiva tellus floruit cantu meo,  
 Messem coacta vidit hibernam Ceres.  
 Violenta Phasis vertit in fontem vada;  
 Et Ister, in tot ora divisus, truces  
 765 Compressit undas, omnibus ripis piger.  
 Sonuere fluctus, tumuit insanum mare,  
 Tacente vento. Nemoris antiqui domus  
 Amisit umbram vocis imperio meae.  
 Die relicto Phoebus in medio stetit;  
 770 Hyadesque nostris cantibus motae labant.  
 Adesse sacris tempus est, Phoebe, tuis!  
 Tibi haec cruenta sarta texuntur manu,  
 Novena quae serpens ligat:  
 Tibi haec, Typhoeus membra quae discors tulit,  
 775 Qui regna concussit Iovis.  
 Vectoris istic perfidi sanguis inest,  
 Quem Nessus expirans dedit.  
 Oetaeus isto cinere defecit rogos,  
 Qui virus Herculeum bibit.  
 780 Piae sororis, impiae matris, facem  
 Ultricis Althaeae vides.  
 Reliquit istas invio plumas specu  
 Harpyia, dum Zeten fugit

His adice pennas saeciae Stympthalidos,  
 Lernaea passae spicula.  
 Sonuistis, arae! Tripodas agnosco meos,  
 Favente commotos dea!  
 Video Triviae currus agiles,  
 Non quos pleno lucida vultu  
 Pernox agitat;  
 Sed quos facie lurida moesta,  
 Cum, Thessalicis vexata minis,  
 Coelum freno propiore legit.  
 Sic face tristem pallida lucem  
 Funde per auras!  
 Horrore novo terre populos;  
 Inque auxilium, Dictynna, tuum  
 Pretiosa sonent aera Corinthi!  
 Tibi sanguineo cespite sacrum  
 Solemne damus!  
 Tibi de medio rapta sepulcro  
 Fax nocturnos sustulit ignes;  
 Tibi mota caput  
 Flexa voces cervice dedi;  
 Tibi funereo de more iacens  
 Passos cingit vitta capillos;  
 Tibi iactatur  
 Tristis Stygia ramus ab unda;  
 Tibi nudato pectore, Maenias,  
 Sacro feriam brachia cultro.  
 Manet noster sanguis ad aras!  
 Adsuesce, manus, stringere ferrum,  
 Carosque pati posse cruores!  
 Sacrum laticem percussa dedi.  
 Quodsi nimium saepe vocari  
 Quereris: votis ignosce, precor!  
 Causa vocandi,  
 Persei, tuos saepius arcus  
 Una atque eadem semper, Iason.

785

790

795

800

805

810

815

I 5 5

- 820 Tu nunc vestes tinge Creusae,  
Quas cum primum sumserit, imas  
Urat serpens flamma medullas!  
Ignis fulvo clusus in auro  
Latet obscurus, quem mihi, coeli  
825 Qui furta luit viscere foeto,  
Dedit, et docuit condere vires  
Arte, Prometheus. Dedit et tenui  
Sulfure tectos Mulciber ignes;  
Et vivacis fulgura flammae  
830 De cognato Phaethonte tuli;  
Habeo, mediae dona Chimaerae,  
Usto tauri gutture raptas,  
Quas, permixto felle Medusae,  
Tacitum iussi servare malum.  
835 Adde venenis stimulos, Hecate,  
Donisque meis  
Semina flammae condita serva  
Fallant visus, tactusque ferant;  
Meet in pectus venasque calor;  
840 Stillent artus, ossaque fument,  
Vincatque suas flagrante coma  
Nova nupta faces!  
Vota tenentur: ter latratus  
Audax Hecate dedit, et sacros  
845 Edidit ignes face luctifera.  
Peracta vis est omnis: huc natos voca,  
Pretiosa per quos dona nubenti feras.  
Ite, ite, nati, matris infaustae genus,  
Placate vobis munere et multa prece  
850 Dominam novercam! Vadite, et celeres domum  
Referte gressus: ultimo amplexu ut fruar.

CHORUS.

*Furorem Medae Chorus timet, malitiam eius execratus.*

Quonam cruenta Maenas praeceps amore saevo  
 Rapitur? quod impotenti facinus parat furore?  
 Vultus citatus ira riget, et caput feroci  
 Quatiens superba motu regi minatur ultro. 855  
 Quis credat exulem?  
 Flagrant genae rubentes; pallor fugat ruborem:  
 Nullum vagante forma servat diu colorem.  
 Huc fert pedes et illuc, ut tigris orba natis  
 Cursu furente lustrat Gangeticum nemus 860  
 Frenare nescit iras Medea, non amores;  
 Nunc ira amorque causam iunxere: quid sequetur?  
 Quando efferet Pelasgis nefanda Colchis arvis  
 Gressum, metuque solvet regnum, simulque reges?  
 Nunc, Phoebe, mitte currus nullo morante loro! 865  
 Nox condat alma lucem! mergat diem timendum  
 Dux noctis Hesperus!

---

ACTUS QUINTUS.

NUNTIUS, CHORUS, NUTRIX, MEDEA,  
 IASON.

*Narrat nuntius, Creusam cum patre regiaque tota confla-  
 grasse pernicioso Medae munere. Medea filios suos trucidat,  
 et aufugit.*

NUNT. Periere cuncta! concidit regni status!  
 Gnata atque genitor cinere permixto iacent!

870 CHOR. Qua fraude capti? NUNT. Qua solent re-  
ges capi:

Donis. CHOR. In illis esse quis potuit dolus?

NUNT. Et ipse miror; vixque iam facto malo

Potuisse fieri credo. CHOR. Quis cladis modus?

NUNT. Avidus per omnem regiae partem fuit,

875 Ut iussus, ignis: iam domus tota occidit;

Urbi timetur. CHOR. Unda flammās opprimat.

NUNT. Et hoc in ista clade mirandum accidit:

Alit unda flammās; quoque prohibetur magis,

Magis ardet ignis; ipsa praesidia occupat.

880 NUTR. Effer citatū sede Pelopea gradum,

Medea! praeceptis quaslibet terras pete!

MEDEA. Egon' ut recedam? Si profugissem prius:

Ad hoc redirem. Nuptias specto novas!

Quid, anime, cessas? Sequere felicem impetum

885 Pars ultionis ista, qua gaudes, quota est?

Amas adhuc, furiosa, si satis est tibi

Coelebs Iason: quaere poenarum genus

Haud usitatum, iamque sic temet para:

Fas omne cedat, abeat expulsus pudor.

890 Vindicta levis est, quam ferunt purae manus:

Incumbe in iras, teque languentem excita,

Penitusque veteres pectore ex imo impetus

Violentus hauri! Quidquid admissum est adhuc,

Pietas vocetur. Hoc age, et faxo sciant,

895 Quam levia fuerint quamque vulgaris notae

Quae commodavi scelera. Prolusit dolor

Per ista noster. Quid manus poterant rudes

Audere magnum? quid puellaris furor?

Medea nunc sum; crevit ingenium malis.

900 Iuvat, iuvat rapuisse fraternal caput;

Artus iuvat secuisse, et arcano patrem

Spoliassē sacro; iuvat in exitium senis

Armasse natus. Quare materiam, dolor:

Ad omne facinus non rudem dextram adferes.

Quo te igitur, ira, mittis, aut quae perfido 905  
 Intendis hosti tela? Nescio quid ferox  
 Decrevit animus intus, et nondum sibi  
 Audet fateri. Stulta properavi nimis.  
 Ex pellice utinam liberos hostis meus  
 Aliquos haberet! Quidquid ex illo tuum est, 910  
 Creusa peperit. Placuit hoc poenae genus,  
 Meritoque placuit: ultimum agnosco scelus.  
 Anime, patrandum est! Liberi quondam mei,  
 Vos pro paternis sceleribus poenas date! —  
 Cor pepulit horror, membra torpescant gelu, 915  
 Pectusque tremuit. Ira discessit loco,  
 Materque tota coniuge expulsa redit.  
 Egon' ut meorum liberum ac proles meae  
 Fundam cruorem? Melius, ah, demens furor!  
 Incognitum istud facinus ac dirum nefas 920  
 A me quoque absit! Quod scelus miseri luent?  
 Scelus est Iason genitor, et maius scelus  
 Medea mater. — Occidant! non sunt mei. —  
 Pereant! Mei sunt; crimine et culpa carent. —  
 Sunt innocentes, fateor: et frater fuit. 925  
 Quid, anime, titabas? ora quid lacrimae rigant,  
 Variamque nunc huc ira, nunc illuc amor  
 Diducit, anceps aestus incertam rapit?  
 Ut saeva rapidi bella cum venti gerunt,  
 Utrinque fluctus maris discordes agunt, 930  
 Dubiumque pelagus fervet: haud aliter meum  
 Cor fluctuatur. Ira pietatem fugat,  
 Iramque pietas. Cede pietati, dolor!  
 Huc, cara proles, unicum afflictæ domus  
 Solamen, huc vos ferte, et infusus mihi 935  
 Coniungite artus! habeat incolumes pater,  
 Dum et mater habeat! — Urget exilium ac fuga.  
 Iam iam meo rapiuntur avulsi e sinu!  
 Flentes, gementes, oculis? — Pereant patri;  
 Perire matri. Rursus increscit dolor, 940



- Et fervet odium. Repetit invitam manum  
 Antiqua Erinnyes. Ira, qua ducis, sequor.  
 Utinam superbae turba Tantalidos meo  
 Exisset utero, bisque septenos parens  
 945 Gnatos tulissem! Sterilis in poenas fui.  
 Fratri patrique quod sat est, peperī duos.  
 Quonam ista tendit turba Furiarum impotens?  
 Quem quaerit, aut quo flammeos ictus parat?  
 Aut cui cruentas agmen infernum faces  
 950 Intentat? Ingens anguis excusso sonat  
 Tortus flagello. Quem trabe infesta petit  
 Megaera? cuius umbra dispersis venit  
 Incerta membris? Frater est! poenas petit.  
 Dabimus, sed omnes! Fige luminibus faces  
 955 Lania! perure! Pectus en, furiis patet! —  
 Discedere a me, frater, ultrices deas,  
 Manesque ad imos ire securas iube:  
 Mihi me relinque, et utere hac, frater, manu,  
 Quae strinxit ense. Victima manes tuos  
 960 Placamus ista. Quid repens adfert sonus?  
 Parantur arma, meque in exitium petunt.  
 Excelsa nostrae tecta conscendam domus  
 Caede inchoata. Perge tu mecum, comes!  
 Tuum quoque ipsa corpus hinc mecum aveham.  
 965 Nunc hoc age, anime! Non in occulto tibi est  
 Perdenda virtus; adproba populo manum.  
 IAS. Quicunque regum cladibus fidus doles,  
 Concurre, ut ipsam sceleris auctorem horridi  
 Capiamus, Huc, huc, fortis, armiferi, cohors,  
 970 Conferte tela! vertite ex imo domum!  
 MED. lamiam recepi sceptrā, germanum, patrem;  
 Spoliumque Colchi pecudis auratae tenent!  
 Rediere regna! rapta virginitas redit!  
 O placida tandem numina! o festum diem!  
 975 O nuptialem! Vade: perfectum est scelus;  
 Vindicta nondum. Perage, dum faciunt manus!

Quid nunc moraris, anime? quid dubitas? Potes.  
 Iam cecidit ira. Poenitet facti, pudet.  
 Quid, misera, feci? Misera, poeniteat licet,  
 Feci! — Voluptas magna me invitam subit, 980  
 Et, ecce, crescit! Deerat hoc unum mihi,  
 Spectator iste. Nihil adhuc factum reor.  
 Quidquid sine isto fecimus sceleris, perit.  
 IAS. En, ipsa tecti parte praecipiti imminet!  
 Huc rapiat ignes aliquis, ut flammis cadat 985  
 Suis perusta! MED. Congere extremum tuis  
 Gnatis, Iason, funus, ac tumulum strue:  
 Coniux socerque iusta iam functis habent,  
 A me sepulti. Gnatus hic fatum tulit;  
 Hic te vidente dabitur exitio pari. 990  
 IAS. Per numen omne, perque communes fugas,  
 Torosque, quos non nostra violavit fides,  
 Iam parce nato! Si quod est crimen, meum est: /  
 Me dedo morti; noxium macta caput!  
 MED. Hac, qua recusas, qua doles, ferrum exigam! 995  
 I nunc, superbe, virginum thalamos pete!  
 Relinque matres! IAS. Unus est poenae satis.  
 MED. Si posset una caede satiari manus:  
 Nullam petisset. Ut duos perimam: tamen  
 Nimium est dolori numerus angustus meo. 1000  
 In matre si quod pignus etiamnum latet,  
 Scrutabor ense viscera, et ferro extraham.  
 IAS. Iam perage coeptum facinus (haud ultra precor,)  
 Moramque saltem supplicis dona meis.  
 MED. Perfruere lento scelere; ne propera, dolor! 1005  
 Meus dies est: tempore accepto utimur.  
 IAS. Infesta, memet perime! MED. Misereri iubes.  
 Bene est: peractum est. Plura non habui, dolor,  
 Quae tibi litarem. Lumina huc tumida adleva,  
 Ingrate Iason! Coniugem agnoscis tuam? 1010  
 Sic fugere soleo: patuit in coelum via:  
 Squamosa gemini colla serpentes iugo

254 L. ANNAEI SENECAE MEDEA. ACT. V.

Submissa praebent. Recipe iam quatos, parens!  
Ego inter auras aliti curru vehar,  
Per alta vadens spatia sublime aetheris. 1015  
IAS. Testare, nullos esse, qua veheris, deos

that from the  
with the chosen  
of the for the  
the chosen have  
to a 3 the action  
the chosen place  
all elements.

No sense or machine here in the  
the scene of the day is in constant  
among the scenes after the in constant  
scene!  
The scene of the day is in constant  
When the - constant, but the Alexandria  
& over the than in Quil,  
in Singapur

AGAMEMNON.

---

DRAMATIS PERSONAE.

THYESTES.

CLYTAEMNESTRA.

NUTRIX.

AEGISTHUS.

CHORUS ARGIVARUM *sive* MYCENaeorum.

ORESTES, *muta persona.*

AGAMEMNON

CASSANDRA.

EURYATES.

ELECTRA.

STROPHIUS.

CHORUS ILIADUM.

PYLADES, *muta persona.*

---

## ARGUMENTUM.

Thyestis umbra, ulciscendi iniuriarum (de quibus vide Thyestis argumentum) cupida, filium Aegisthum in caedem Agamemnonis incitat. Ille itaque Agamemnonem victorem a Troia reducem in convivio impervia irretitum veste occidit, consilii caedisque particeps Clytaemnestra, quam absente marito Agamemnone corruperat. Cassandram deinde Agamemnoni amatam ab aris avulsam occidit. Electram, quod fratrem Orestem amandarat, carceri mancipari iubent.

---

## ALIUD ARGUMENTUM *HIERONYMI BALBI.*

- Polluti dolor hospitii atque iniuria raptae  
Tyndaridis bello geminos armarat Atridas,  
Collectaque manu Danaum maria alta secabant.  
Interea Aegisthi violente carpitur igni
- 5 Saeva Clytaemnestre, penitusque Agamemnona corde  
Expulit, et thalamos violavit iniqua iugales.  
At postquam, Phrygibus crudeli Marte subactis,  
Atrides patrias victor remeavit in oras:  
(O nulli sors fida diu!) qui mille carinas
- 10 Rexerat, atque Asiam decimo deleverat anno,  
Ante lares proprios exoptatosque penates  
Coniugis incestae manibus concisus ab atro  
Vulnere praecipitem fudit cum sanguine vitam.
-

## ACTUS PRIMUS.

### THYESTIS, UMBRA.

*Thyestis umbra ab inferis adveniens Aegisthum ad vindictam sibi ab oraculo promissam invitat.*

Opaca linquens Ditis inferni loca,  
Adsum profundo Tartari emissus specu,  
Incertus, utras oderim sedes magis:  
Fugio Thyestes Inferos, Superos fugo.  
Inhorret animus, et pavor membra excutit: 5  
Video paternos, imo fraternos lares.  
Hoc est vetustum Pelopiae limen domus.  
Hinc auspicari regium capiti decus  
Mos est Pelasgis; hoc sedent alti toro,  
Quibus superba sceptrata gestantur manu. 10  
Locus hic habendae curiae; hic epulis locus.  
Libet reverti. Nonne vel tristes lacus  
Adcolere satius? nonne custodem Stygis, *III 12, 27*  
Tergemina nigris colla iactantem iubis,  
Ubi ille celeri corpus evinctus rotae 15  
In se refertur; ubi per adversum inritus  
Redeunte toties luditur saxo labor;  
Ubi tondet ales avida foecundum iecur  
Et inter undas fervida exustus siti  
Aguas fugaces ore decepto adpetit, 20  
Poenas daturus coelitum dapibus graves.  
Sed ille nostrae pars quota est culpa senex?  
Reputemus omnes, quos ob infandas manus  
Quaesitor urna Gnoissius versat reos:  
Vincam Thyestes sceleribus cunctos meis; 25  
A fratre vincar. Liberis plenus tribus  
In me sepultis viscera exedi mea.

SEN. TRAG.

R

- Nec hactenus Fortuna maculavit patrem;  
 Sed, maius aliud ausa commisso scelus,  
 30 Gnatae nefandos petere concubitus iubet.  
 Non pavidus hausi dicta, sed cepi nefas.  
 Ergo ut per omnes liberos irem parens,  
 Coacta fati gnata fert uterum gravem,  
 Me patre dignum. Versa natura est retro.  
 35 Avo parentem, pro nefas! patri virum,  
 Gnatis nepotes miscui, nocti diem.  
 Sed sera tandem respicit fessos malis  
 Post fata demum sortis incertae fides:  
 Rex ille regum, ductor Agamemnon ducum,  
 40 Cuius secutae mille vexillum rates,  
 Iliaca velis maria texerunt suis,  
 Post decima Phoebi lustra devicto Ilio  
 Adest, daturus coniugi iugulum suae.  
 Iam iam natabit sanguine alterno domus;  
 45 Enses, secures, tela, divisum gravi  
 Ictu bipennis regium video caput!  
 Iam scelera prope sunt; iam dolus, caedes, cruor  
 Parantur epulae! Causa natalis tui,  
 Aegisthe, venit! Quid pudor vultus gravat?  
 50 Quid dextra dubio trepida consilio labat?  
 Quid ipse temet consulis, torques, rogas  
 An deceat hoc te? Respice ad matrem: decet.  
 Sed cur repente noctis aestivae vices  
 Hiberna longa spatia producunt mora?  
 55 Aut quid cadentes detinet stellas polo?  
 Phoebum moramur. Reddo iam mundo diem.

### CHORUS ARGIVARUM.

*Chorus e mulieribus Argivis seu Mycenaeis excelsam fortunam queritur instabilem, anxiam, periculis obnoxiam; metum itaque illi praefert.*

O regnorum magnis fallax

Fortuna bonis, in praecipiti  
Dubioque locas excelsa nimis!  
Nunquam placidam sceptrā quietem  
Certumve sui tenere diem;

60

Alia ex alia cura fatigat,  
Vexatque animos nova tempestas.

Non sic Libycis Syrtibus aequor  
Furit alternos volvere fluctus;

65

Non Euxini turgent ab imis  
Commota vadis unda, nivali  
Vicina polo,

Ubi, coeruleis immunis aquis,  
Lucida versat plaustra Bootes,  
Ut praecipites regum casus  
Fortuna rotat.

70

Metui cupiunt, metusque timent.

Non nox illis alma recessus  
Praebet tutos; non curarum

75

Somnus domitor pectora solvit.

II 4, 15

Quas non arces scelus alternum

Dedit in praeceps? impia quas non

Arma fatigant? Iura pudorque

Et coniugii sacra fides

80

Fugiunt aulas; sequitur tristis

Sanguinolenta Bellona manu,

Quaeque superbos urit Erinnyes,

Nimias semper comitata domos,

Quas in planum quaelibet hora

85

Tulit ex alto.

Licet arma vacent, cessentque doli:

Sidunt ipso pondere magna, — IV 6, 24

Ceditque oneri Fortuna suo.

Vela secundis inflata Notis

90

Ventos nimium timuere suos;

Nubibus ipsis inserta caput

Turris pluvio vapulat Austro;



- Densasque nemus spargens umbras  
 95 Annosa videt robora frangi;  
 Feriunt celsos fulmina colles;  
 Corpora morbis maiora patent;  
 Et cum in pastus armenta vagos  
 Vilia currant, placet in vulnus  
 100 Maxima cervix. Quidquid in altum  
 Fortuna tulit, ruitura levat.  
 Modicis rebus longius aevum est.  
 Felix, mediae quisquis turbae  
 Sorte quietus,  
 105 Aura stringit littora tuta,  
 Timidusque mari credere cymbam  
 Remo terras propiore legit!
- 

## ACTUS SECUNDUS.

### CLYTAEMNESTRA, NUTRIX.

*Sibi male conscia Clytaemnestra, atque adulteriipoenas, redeunte iam marito, verita, κατὰ νόμον λάσθαι statuit. Meditatur itaque Agamemnoni exitium; dissuadet nutrix.*

- CLYT. Quid segnis, anime, tua consilia expetis?  
 Quid fluctuaris? Clusa iam melior via est.  
 110 Licuit pudicos coniugis quondam toros  
 Et sceptras casta vidua tutari fide;  
 Periere mores, ius, decus, pietas, fides,  
 Et, qui redire, cum perit, nescit, pudor:  
 Da frena, et omnem prona nequitiam incita:  
 115 Per scelera semper sceleribus tutum est iter.  
 Tecum ipsa nunc evolve foemineos dolos,  
 Quod ulla coniux perfida atque impos sui  
 Amore coeco, quod novercales manus

Ausae; quod ardens impia virgo face,  
Phasiaca fugiens regna Thessalica trabe: 120

Ferrum, venena! vel Mycenaeas domos,  
Coniuncta socio, profuge furtiva rate!  
Quid timida loqueris furta et exilium et fugas?  
Soror ista fecit; te decet maius nefas.

NUTR. Regina Danaum et inclitum Ledaë genus, 125

Quid tacita versas, quidve, consilii impotens,  
Tumido feroces impetus animo geris?

Licet ipsa sileas, totus in vultu est dolor.

Proin quidquid est, da tempus ac spatium tibi.

Quod ratio non quit, saepe sanavit mora. 130

CLYT. Maiora cruciant, quam ut moras possim pati.

Flammae medullas et cor exurunt meum;

Mixtus dolori subdidit stimulos timor,

Invidia pulsat pectus. Hinc animum iugo

Premat Cupido turpis, et vinci vetat; 135

Et inter istas mentis obsessae faces,

Fessus quidem et delectus et pessumdatus,

Pudor rebellat. Fluctibus variis agor,

Ut, cum hinc profundum ventus, hinc aestus rapit,

Incerta dubitat unda, cui cedat malo. 140

Proinde omisi regimen e manibus meis

Quocunque me ira, quo dolor, quo spes feret,

Huc ire pergam; fluctibus dedimus ratem.

Ubi animus errat, optimum est casum sequi.

NUTR. Coeca est temeritas, quae petit casum du-  
cem. 145

CLYT. Cui ultima est fortuna, quis dubiam timet?

NUTR. Tuta est latetque culpa, si pateris, tua.

CLYT. Perlucet omne regiae vitium domus.

NUTR. Piget prioris, et novum crimen struis?

CLYT. Res est profecto stulta nequitiae modus. 150

NUTR. Quod metuit, auget, qui scelus scelere obruit.

CLYT. Et ferrum et ignis saepe medicinae loco est.

NUTR. Extrema primo nemo tentavit loco.

- CLYT. Rapienda rebus in malis praeceps via est.  
 155 NUTR. At te reflectat coniugis nomen sacrum.  
 CLYT. Decem per annos vidua respiciam virum?  
 NUTR. Meminisse debes sobolis ex illo tuae.  
 CLYT. Equidem et iugales filiae memini faces,  
 Et generum Achillem. Praestitit matri fidem!  
 160 NUTR. Redemit illa classis immotae moras,  
 Et maria pigro fixa languore impulit.  
 CLYT. Piget doletque! Tyndaris, coeli genus,  
 Lustrale classi Doricae peperit caput!  
 Revolvit animus virginis thalamos meae,  
 165 Quos ille dignos Pelopia fecit domo,  
 Cum stetit ad aras ore sacrifico pater  
 Quam nuptiales! Horrui Calchas suae  
 Responsa vocis et recedentes focos.  
 O scelera semper sceleribus vincens domus!  
 V 7.5 170 Cruore ventos emimus, bellum nece.  
 NUTR. Sed vela pariter mille fecerunt rates.  
 CLYT. Non est soluta prospero classis deo:  
 Eiecit Aulis implas portu rates.  
 Sic auspicatus bella non melius gerit.  
 175 Amore captae captus, immotus prece,  
 Sminthea tenuit spolia Phoebel senis,  
 Ardore sacrae virginis iam tum furens.  
 Non illum Achilles flexit indomitus minis;  
 Non ille, solus fata qui mundi videt,  
 180 In nos fidelis augur, in captas levis;  
 Non populus aeger, et relucens rogi:  
 Inter ruentis Graeciae stragem ultimam  
 Sine hoste victus marcet ac Veneri vacat,  
 Reparatque amores; neve desertus foret  
 185 A pellice unquam barbara coelebs torus,  
 Ablatam Achilli diligit Lyrnessida,  
 Nec rapere puduit e sinu avulsam viri.  
 En Paridis hostem! Nunc, novum vulnus gerens,  
 Amore Phrygiae vatis incensus furit;

Et post tropaea Troia ac versum Ilium 190

Captae maritus remeat et Priami gener.

Adeingere, anime: bella non levia adparas.

Scelus occupandum est! Pigra, quem expectas diem?

Pelopia Phrygiae scepra dum teneant nurus?

An te morantur virgines viduae domi, 195

Patrique Orestes similis? Horum te mala

Ventura moveant, turbo quis rerum imminet.

Quid, misera, cessas? En, adest gnatis tuis

Furens noverca! Per tuum, si aliter nequit,

Latus exigatur ensis, et perimat duos! 200

Misce cruorem! perde pereundo virum!

Mors misera non est commori cum quo velis.

NUTR. Regina, frena temet et siste impetum,

Et, quanta tentes, cogita! Victor venit

Asiae ferocis, ultor Europae; trahit 205

Captiva Pergama et diu victos Phrygas.

Hunc fraude nunc conaris et furto adgredi,

Quem non Achilles ense violavit fero,

Quamvis procacem torvus armasset manum;

Non melior Ajax, morte decreta furens; 210

Non sola Danaïs Hector et bello mora;

Non tela Paridis certa; non Memnon niger

Non Xanthus armis corpora immixtis gerens,

Fluctusque Simois caede purpureos agens;

Non nivea proles Cycnus aequorei dei; 215

Non bellicoso Thressa cum Rheso phalanx;

Non picta pharetras et securigera manu

Peltata Amazon? hunc domi reducem paras

Mactare, et aras caede maculare impia?

Ultrix inultum Graecia hoc facinus feret? 220

Equos et arma classibusque horrens fretum

Propone, et alto sanguine exundans solum,

Et tota captae fata Dardaniae domus

Regesta Danaïs! Comprime adfectus truces,

Mentemque tibimet ipsa pacifica tuam! 225

**AEGISTHUS, CLYTAEMNESTRA, NU-  
TRIX.**

*Clytaemnestram nutricis consiliis cedere paratam, iamque dubiam, superveniens Aegisthus avertit rursus atque in praecepta trahit.*

**AEGISTH.** Quod tempus animo semper ac mente  
horruī,

Adest profecto rebus extremum meis.

Quid terga vertis, anime? quid primo impetu

Deponis arma? Crede, perniciem tibi

230 Et dira saevos fata moliri deos

Oppone cunctis vile supplicii caput,

Ferrumque et ignes pectore adverso excipe!

**CLYT.** Aegisthe, non est poena sic nato mori.

**AEGISTH.** Tu nos, pericli socia, tu, Leda sata,

235 Comitare tantum: sanguinem reddet tibi

Ignavus iste ductor ac fortis pater.

Sed quid tremantes circuit pallor genas,

Iacensque vultus languido obtutu stupet?

**CLYT.** Amor iugalis vincit ac flectit retro.

240 Referamur illuc, unde non decuit prius

Abire! Vel nunc casta repetatur fides;

Nam sera nunquam est ad bonos mores via.

Quem poenitet peccasse, paene est innocens.

**AEGISTH.** Quo raperis amens? credis aut speras  
tibi

245 Agamemnonis fidele coniugium? Ut nihil

Subesset animo, quod graves faceret metus:

Tamen superba et impotens flatu nimis

Fortuna magno spiritus tumidos daret.

Gravis ille sociis stante adhuc Troia fuit:

250 Quid rere ad animum suapte natura truce

Troiam addidisse? Rex Mycenarum fuit;

Veniet tyrannus: prospera animos efferunt.

Effusa circa pellicum quanto venit

Turba adparatu! sola sed turba eminet,

Tenetque regem famula veridici dei. 255

Feresne thalami victa consortem tui?

At illa nolet. Ultimum est nuptae malum

Palam marita possidens pellex domum.

Nec regna socium ferre nec taedae sciunt.

CLYT. Aegisthe, quid me rursus in praeceps agis, 260

Iramque flammis iam residentem incitas?

Permisit aliquid victor in captas sibi?

Non coniugem hoc respicere, non dominam decet.

Lex alia solio est, alia privato in toro.

Quid, quod severas ferre me leges viro 265

Non patitur animus, turpis admissi memor?

Det ille veniam facile, cui venia est opus.

AEGISTH. Ita est? pacisci mutuam veniam licet?

Ignota tibi sunt iura regnorum haud nova.

Nobis maligni iudices, aequi sibi, 270

Id esse regni maximum pignus putant,

Si quidquid aliis non licet, solis licet.

CLYT. Ignovit Helenae: iuncta Menelao redit,

Quae Europam et Asiam paribus adflixit malis.

AEGISTH. Sed nulla Atriden venere furtiva abs-  
tulit, 275

Nec cepit animum coniugi obstrictum suae.

Iam crimen ille quaerit, et causas parat

Nil esse crede turpe commissum tibi:

Quid honesta prodest vita, flagitio vacans, 280

Ubi dominus odit? Fit nocens; non quaeritur

Spartamne repetes spreta et Eurotan tuum

Patriasque sedes profuga? Non dant exitum

Repudia regum. Spe metum falsa levas.

CLYT. Delicta novit nemo nisi fidus mea.

AEGISTH. Non intrat unquam regium limen fides. 285

CLYT. Opibus merebor, ut fidem pretio obligem.

**AEGISTH.** Pretio parata vincitur pretio fides.

**CLYT.** Surgit residuus pristinae mentis pudor.

Quid obstrepis? quid voce blandiloqua mala

290 **Consilia dictas? Scilicet nubam tibi**

**Regum relicto rege generosa exuli?**

**AEGISTH.** Et cur Atrida videor inferior tibi,

**Gnatus Thyestae? CLYT.** Si parum est, adde: „et  
nepos.“

**AEGISTH.** Auctore Phoebo gignor: haud generis  
pudet.

295 **CLYT.** Phoebum nefandae stirpis auctorem vocas,

Quem nocte subita frena revocantem sua

Coelo expulistis? Quid deos probo addimus?

Subripere doctus fraude geniales toros,

Quem venere tantum scimus illicita virum,

300 **Facesse propere, ac dedecus clarae domus**

**Asporta ab oculis: haec vacat regi ac viro.**

**AEGISTH.** Exilia mihi sunt haud nova; adsuevi  
malis.

Si tu imperas, regina: non tantum domo

Argisve cedo; ni moror iussu tuo

305 **Aperire ferro pectus aerumnis grave.**

**CLYT.** Siquidem hoc cruenta Tyndaris fieri sinam.

Quae iuncta peccat, debet et culpae fidem.

Secede mecum potius: ut rerum statum

Dubium ac minacem iuncta consilia explicent.

### **C H O R U S   A R G I V A R U M .**

*Chorus e virginibus Mycenaeis et Argivis canit Apollinis  
paeana ob partam victoriam; interserit autem Iunonis Palladis-  
que laudes et Dianae et Iovis.*

310 **Canite, o pubes inclita, Phoebum!**

Tibi festa caput turba coronat;

Tibi virgineas laurum quatiens

De more comas innuba fundit

Stirps Inachia;

Quaeque Erasini gelidos fontes,

315

Quaeque Eurotan, quaeque virenti

Tacitum ripa bibis Ismenon,

Tu quoque nostros, Thebais hospes,

Comitare choros, quam fatorum

Praescia Manto, sata Tiresia,

320

Latonigenas monuit sacris

Celebrare deos!

Arcus, victor Phoebe, relaxa,

Humeroque graves levibus telis

Pone pharetras; resonetque manu

325

Pulsa citata vocale chelys!

Nil acre velim magnumque modis

Intonet altis; sed quale soles

Leviore lyra flectere carmen

Simplex, lusus cum docta tuos

330

Musa recenset. Licet et chorda

Graviore sonas, quale canebas,

Cum Titanas fulmine victos

Videre dei; vel cum montes

Montibus altis superimpositi

335

Struxere gradus trucibus monstris,

Stetit imposita Pelion Ossa,

Pinifer ambo pressit Olympus.

Ades, o magni, soror et coniux,

Consors sceptri, regia Iuno:

340

Tua te colimus turba Mycenae.

Tu sollicitum supplexque tui

Numinis Argos sola tueris;

Tu bella manu pacemque regis;

Tu nunc lauros Agamemnonias

345

Accipe victrix! Tibi multifora

Tibia buxo solemne canit;

Tibi fila movent docta puellae

Carminum molli; tibi votivum



- 350 **Matres Graiae lampada iactant;**  
Ad tua coniux candida tauri  
Delubra cadit, nescia aratri,  
Nullo collum signata iugo.  
Tuque, o magni gnata Tonantis,  
355 **Inclita Pallas, quae Dardanias**  
Saepe petisti cuspide turres!  
Te permixto matrona minor  
Maiorque choro colit, et reserat  
Veniente dea templa sacerdos  
360 **Tibi nexilibus turba coronis**  
Redimita venit;  
Tibi grandaevi lassique senes  
Compote voto reddunt grates,  
Libantque manu vina trementi.  
365 **Et te, Triviam, nota memores**  
Voce precamur.  
Tu maternam sistere Delon,  
Lucina, iubes, huc atque illuc  
Prius errantem Cyclada ventis.  
370 **Nunc iam stabilis fixa terras**  
Radice tenet, respuit auras,  
Religatque rates, adsueta sequi.  
Tu Tantalidos funera matris  
Victrix numeras. Stat nunc Sipyli  
375 **Vertice summo flebile saxum,**  
Et adhuc lacrimas, moesta aeternum,  
Marmora manant antiqua novas.  
Colit impense femina virque  
Numen geminum.  
380 **Tuque ante omnes, pater ac rector,**  
Fulmine pollens, cuius nutu  
Simul extremi tremuere poli,  
Generis nostri, Iupiter, auctor,  
Cape dona libens, abavusque tuam  
385 **Non degenerem respice prolem!**

Sed, ecce, vasto concitus miles gradu  
 Manifesta properat signa laetitiae ferens  
 Namque hasta summo lauream ferro gerit,  
 Fidusque regi semper Eurybates adest.

---

## ACTUS TERTIUS.

### EURYBATES, CLYTAEMNESTRA.

*Eurybates narrat, Agamemnona reducem advenire, tempestatem a Pallade immissam, Naulisque dolo aggravatam; parantur diis victimae et convivium Agamemnoni, captivae adducuntur.*

EUR. Delubra et aras coelitum et patrios lares 390

Post longa fessus spatia, vix credens mihi,  
 Supplex adoro. Vota Superis solvite:

Telluris altum remeat Argolicae decus  
 Tandem ad penates victor Agamemnon suos.

CLYT. Felix ad aures nuntius venit meas. 395

Ubinam petitus per decem coniux mihi  
 Annos moratur? pelagus, an terras premit?

EUR. Incolumis, auctus gloria, laude inclitus  
 Reducem expetito littori impressit pedem.

CLYT. Sacris colamus prosperum tandem diem, 400

Et si propitios, attamen lentos, deos.

Tu pande, vivat coniugis frater mei,

Et pande, teneat quas soror sedes mea.

EUR. Meliora votis posco, et obtestor deos:

Nam certa fari sors maris dubii vetat. 405

Ut sparsa tumidum classis excepit mare:

Ratis videre socia non potuit ratem.

Quin ipse Atrides aequore immenso vagus

Graviora pelago damna quam bello tulit,

- 410 Remeatque victo similis, exiguas trahens  
Lacerasque victor classe de tanta rates.  
CLYT. Effare: casus quis rates hausit meas,  
Aut quae maris fortuna dispulerat duces?  
EUR. Acerba fatu poscis, infaustum iubens
- 415 Miscere laeto nuntium. Refugit loqui  
Mens aegra, tantis atque inhorrescit malis.  
CLYT. Exprome. Clades scire qui refugit suas,  
Gravat timorem: dubia plus torquent mala.  
EUR. Ut Pergamum omne Dorica cecidit face;
- 420 Divisa praeda est. Maria properantes petunt.  
Iamque ense fessum miles exonerat latus;  
Neglecta summas scuta per puppes iacent;  
Ad militares remus aptatur manus;  
Omnisque nimium longa properanti mora est.
- 425 Signum recursus regia ut fulsit rate,  
Et clara lentum remigem monuit tuba:  
Aurata primas prora designat vias,  
Aperitque cursus, mille quos puppes secent  
Hinc aura primo lenis impellit rates
- 430 Adlapsa velis; unda vix actu levi  
Tranquilla Zephyri mollis afflatu tremit  
Splendetque classe pelagus et pariter latet.  
Iuvat videre nuda Troiae littora,  
Iuvat relictis sola Sigei loca.
- 435 Properat iuventus omnis adductos simul  
Lentare remos; adiuvat ventos manu,  
Et valida nisu brachia alterno movet.  
Sulcata vibrant aequora et latera increpant,  
Dirimuntque canae caerulum spumae mare.
- 440 Ut aura plenos fortior tendit sinus:  
Posuere tonsas, credita est vento ratis:  
Fususque transtris miles aut terras procul,  
Quantum recedunt vela, fugientes notat;  
Aut bella narrat: Hectoris fortis minas,
- 445 Currusque, et emto redditum corpus rogo;

Sparsum cruore regis Herceum lovem.  
 Tum, qui iacente reciprocus ludit salo,  
 Tumidumque pando transilit dorso mare,  
 Tyrrhenus omni piscis exultat freto,  
 Agitatque gyros, et comes lateri adnatat, 450  
 Anteire naves laetus et rursus sequi;  
 Nunc prima tangens rostra lascivit chorus,  
 Millesimam nunc ambit et lustrat ratem.  
 Iam littus omne tegitur, et campi latent,  
 Et dubia parent montis Idaei iuga. 455  
 Et iam, quod unum pervicax acies videt,  
 Iliacus atra fumus adparet nota.  
 Iam lassa Titan colla relevabat iugo;  
 In astra iam lux prona, iam praeceps dies:  
 Exigua nubes sordido crescens globo 460  
 Nitidum cadentis inquinat Phoebi iubar.  
 Suspecta varius occidens fecit freta.  
 Nox prima coelum sparserat stellis; iacent  
 Deserta vento vela: tum murmur grave  
 Maiora minitans collibus summis cadit, 465  
 Tractuque longo littus ac petrae gemunt.  
 Agitata ventis unda venturis tumet:  
 Cum subito luna conditur, stellae latent,  
 In astra pontus tollitur, coelum perit;  
 Nec una nox est: densa tenebras obruit 470  
 Caligo, et omni luce subducta fretum  
 Coelumque miscet. Undique incumbunt simul,  
 Rapiuntque pelagus infimo eversum solo  
 Adversus Euro Zephyrus et Boreae Notus. 475  
 Sua quisque mittunt tela, et infesti fretum  
 Emoliantur (turbo convolvit mare):  
 Strymonius altis Aquilo contorquet nives,  
 Libycusque arenas Auster ad Syrtes agit.  
 Nec manet in Austro: fit gravis nimbis Notus,  
 Imbre auget undas; Euris Orientem movet, 480  
 Nabathaea quatiens regna et Eoos sinus.

- Quid rapidus ora Corus Oceano exserens?  
Mundum revelli sedibus totum suis,  
Ipsosque rupto crederes coelo deos  
485 Decidere, et atrum rebus induci chaos.  
Vento resistit aestus, et ventus retro  
Aestum revolvit. Non capit sese mare,  
Undasque miscent imber et fluctus suas  
Nec hoc levamen denique aerumnis datur,  
490 Videre saltem et nosse, quo pereant malo:  
Premunt tenebrae lumina, et dirae Stygis  
Inferna nox est. Excidunt ignes tamen,  
Et nube dirum fulmen elisa micat;  
Miserisque lucis tanta dulcedo est: male  
495 Hoc lumen optant. Ipsa se classis premit,  
Et prora prorae nocuit, et lateri latus.  
Illam dehiscens pontus in praeceps rapit  
Hauritque, et alto redditam revomit mari;  
Haec onere sidit; illa convulsum latus  
500 Submittit undis; fluctus hanc decimus tegit;  
Haec lacera et omni decore populato levis  
Fluitat; nec illi vela, nec tonsae manent,  
Nec rectus altus malus antennas ferens,  
Sed trunca toto puppis Ionio natat.  
505 Nil ratio et usus audet: ars cessit malis.  
Tenet horror artus; omnis officio stupet  
Navita relicto; remus effugit manus.  
In vota miseros ultimus cogit timor,  
Eademque Superos Troes et Danai rogant.  
510 Quid fata possunt! invidet Pyrrhus patri,  
Aiaci Ulysses, Hectori Atrides minor,  
Agamemno Priamo. Quisquis ad Troiam iacet,  
Felix vocatur, cadere qui meruit gradu,  
Quem fama servat, victa quem tellus tegit.  
515 „Nil nobile ausos pontus atque undae ferent?  
Ignava fortes fata consument viros?  
Perdenda mors est? Quisquis es nondum malis

Satiare tantis coelitum, tandem tuum  
 Numen serena! Cladibus nostris daret  
 Vel Troia lacrimas. Odia si durant tua, 520  
 Placetque mitti Doricum exitio genus:  
 Quid hos simul perire nobiscum iuvat,  
 Quibus perimus? Sistito infestum mare:  
 Vehit ista Danaos classis? et Troas vehit.“  
 Nec plura possunt: occupat vocem mare. 525  
 Ecce alia clades! fulmine irati Iovis  
 Armata Pallas, quidquid aut hasta minax,  
 Aut aegide et furore Gorgoneo potest,  
 Aut igne patrio, tentat: et coelo novae  
 Spirant procellae. Solus invictus malis 530  
 Luctatur Ajax. Vela cogentem hunc sua  
 Tenso rudente flamma perstrinxit cadens.  
 Libratur aliud fulmen; hoc toto impetu  
 Certum reducta Pallas excussit manu,  
 Imitata patrem. Transit Aiace[m] et ratem, 535  
 Ratisque partem secum et Aiace[m] tulit.  
 Nil ille motus, ardua ut cautes, salo  
 Ambustus extat, dirimit insanum mare,  
 Fluctusque rumpit pectore, et navem manu  
 Complexus in se traxit, et coeco mari 540  
 Conlucet Ajax; omne resplendet fretum.  
 Tandem occupata rupe furibundum intonat,  
 Superasse nunc se pelagus atque ignes. „Iuvat  
 Vicisse coelum, Palladem, fulmen, mare!  
 Non me fugavit bellici terror dei; 545  
 Et Hectorem una solus et Martem tuli;  
 Phoebea nec me tela pepulerunt gradu:  
 Cum Phrygibus istos vicinus. Tene horream?  
 Aliena inert[i] tela mittis dextera.  
 Quid, si ipse mittat?“ Plura cum auderet furens: 550  
 Tridente rupem subruit pulsam pater  
 Neptunus, imis exerens undis caput,  
 Solvitque montem; quem cadens secum tulit,

- Terraque et igne victus et pelago iacet.  
555 Nos alia maior naufragos pestis vocat.  
Est humilis unda, scrupulis mendax vadis,  
Ubi saxa rapidis clusa vorticibus tegit  
Fallax Caphareus; aestuat scopulis fretum,  
Fervetque semper fluctus alterna vice;  
560 Arx imminet praerupta, quae spectat mare  
Utrinque geminum. Pelopis hinc oras tui,  
Et Isthmon, arcto qui recurvatus solo  
Ionia iungi maria Phrixeis vetat;  
Hinc scelere Lemnon nobilem; hinc Chalcedona,  
565 Tardamque ratibus Aulin. Hanc arcem occupat  
Palamedis ille genitor, et clarum manu  
Lumen nefanda vertice e somno efferens  
In saxa duxit perfida classem face.  
Haerent acutis rupibus fixae rates;  
570 Has inopis undae brevia committunt vada;  
Pars vehitur huius prima, pars scopulo sedet;  
Hanc alia retro spatia relegentem ferit,  
Et fracta frangit. Iam timent terram rates,  
Et maria malunt. Cecidit in lucem furor.  
575 Postquam litatum est Ilio: Phoebus redit  
Et damna noctis tristis ostendit dies.  
CLY T. Utrumne doleam, laeter an reducem virum?  
Remeasse laetor; vulnus at regni grave  
Lugere cogor. Redde iam Graiis, pater  
580 Altisona quatiens regna, placatos deos!  
Nunc omne laeta fronde veletur caput;  
Sacrifica dulces tibia effundat modos;  
Et nivea magnas victima ante aras cadat.  
Sed ecce! turba tristis, incomtae comas  
585 Iliades adsunt, quas super celso gradu  
Effrena Phoebas entheas laurus quatit.

CHORUS ILIADUM, CASSANDRA.

*Chorus Iliadum Troiae fata casumque luget, Cassandra furore Phoebeo correpta, quae Agamemnoni imminent, vaticinatur.*

CHOR. Heu quam dulce malum mortalibus additum  
 Vitae dirus amor, cum pateat malis *III 10.5*  
 Effugium, et miseros libera mors vocet,  
 Portus aeterna placidus quiete! *III 10.4* 590  
 Nullus hunc terror nec impotens  
 Procella Fortunae movet,  
 Aut iniqui flamma Tonantis  
 (Pax alta); nullos civium coetus timet,  
 Aut minaces victoris iras; 595  
 Non maria asperis insana Coris;  
 Non acies feras, pulvereamque nubem,  
 Motam barbaricis equitum catervis;  
 Non urbe cum tota populos cadentes,  
 Hostica muros populante flamma, 600  
 Indomitumve bellum; perrumpet omne  
 Servitium contemtor levium deorum,  
 Qui vultus Acherontis atri,  
 Qui Styga tristem non tristis videt,  
 Audetque vitae ponere finem 605  
 Par ille regi, par Superis erit.  
 O quam miserum est nescire mori!  
 Vidimus patriam ruentem nocte funesta,  
 Cum Dardana tecta Dorici raperetis ignes!  
 Non illa bello victa, nec armis, 610  
 Ut quondam Herculea cecidit pharetra!  
 Quam non Pelei Thetidosque natus,  
 Carusque Pelidae nimium feroci,  
 Vicit, acceptis cum fulsit armis,  
 Fuditque Troas falsus Achilles;  
 Aut cum ipse Pelides animos feroces  
 Sustulit luctu, celeremque saltu



- Troades summis timuere muris,  
Perdidit in malis extremum decus,  
620 Fortiter vinci:  
Restitit annis Troia bis quinis, ) IV 7, 1  
Unius noctis peritura furto.  
Vidimus simulata dona moli immensae;  
Danaumque fatale munus  
625 Duximus nostra creduli dextra;  
Tremuitque saepe  
Limine in primo sonipes, cavernis  
Conditos reges bellumque gestans  
Et licuit versare dolos, ut ipsi  
630 Fraude sua capti caderent Pelasgi.  
Saepe commotae sonuere Parmae;  
Tacitumque murmur percussit aures  
Ut fremuit male subdolo parens Pyrrhus Ulyssi.  
Secura metus Troica pubes  
635 Sacros gaudet tangere funes.  
Hinc aequaevi gregis Astyanax,  
Hinc Haemonio desponsa rogo,  
Ducunt turmas; haec femineas,  
Ille viriles. Festae matres  
640 Votiva ferunt munera divis;  
Festi patres adeunt aras.  
Unus tota vultus in urbe est:  
Et, quod nunquam post Hectoreos  
Vidimus ignes, laeta est Hecabe.  
645 Quid nunc primum, dolor infelix,  
Quidve extremum deflare paras?  
Moenia, divum fabricata manu,  
Diruta nostra?  
An templa deos super usta suos?  
650 Non vacat istis lacrimare malis:  
Te, magne parens, flent Iliades.  
Vidi, vidi,  
Senis in iugulo telum Pyrrhi

Vix exiguo sanguine tingi!

CASS. Cohibet lacrimas, omne quas tempus petit, 655

Troades, et ipsae vestra lamentabili

Lugete gemitu funera: aerumnae meae

Socium recusant. Cladibus questus meis

Removete: nostris ipsa sufficiam malis.

CHOR. Lacrimas lacrimis miscere iuvat: 660

Magis exurunt,

Quos secretae lacerant curae.

Iuvat in medium deflere suos;

Nec tu, quamvis dura virago

Patiensque mali, 665

Poteris tantas flere ruinas.

Non, quae verno nobile carmen

Ramo cantat, tristis aedon,

Ityn in varios modulata sonos;

Non, quae tectis Bistonos ales 670

Residens summis

Impia diri furta mariti

Garrula deflet, lugere tuam

Poterit, digne conquesta, domum.

Licet ipse velit 675

Clarus niveos inter olores

Istrum cygnus Tanainque colens

Extrema loqui;

Licet alcyones Ceyca suum

Fluctu leviter plangente sonent, 680

Cum tranquillo, male confisae,

Credunt iterum pelago audaces,

Foetusque suos

Nido pavidæ titubante foveant;

Non, si, molles imitata viros, 685

Tristis laceret brachia tecum

Quae turritae turba parenti,

Pectora rauco concita buxo,

Furit, ut Phrygium lugeat Attin,

- 690 Non est lacrimis, Cassandra, modus,  
Quia quae patimur vicere modum.  
Sed cur sacratas deripis capiti infulas?  
Miseris colendos maxime Superos putem.  
CASS. Vicere nostra iam metus omnes mala.
- 695 Equidem nec ulla coelites placo prece;  
Nec, si velint saevire, quo noceant, habent.  
Fortuna vires ipsa consumsit suas.  
Quae patria restat, quis pater, quae iam soror  
Bibere tumuli sanguinem atque arae meum.
- 700 Quid illa felix turba fraterni gregis?  
Exhausta nempe! regia miseri senes  
Vacua relictis totque per thalamos vident  
Praeter Lacaenam ceteras viduas nurus.  
Tot illa regum mater et regimen Phrygum,
- 705 Foecunda in ignes Hecuba, fatorum novas  
Experta leges, induit vultus feros:  
Circa ruinas rabida latravit suas,  
Troiae superstes, Hectori, Priamo, sibi.  
CHOR. Silet repente Phoebas, et pallor genas
- 710 Creberque totum possidet corpus tremor;  
Stetere vittae: mollis horrescit coma;  
Anhela corda murmure incluso fremunt;  
Incerta nutant lumina, et versi retro  
Torquentur oculi; rursus immites rigent.
- 715 Nunc levat in auras altior solito caput,  
Graditurque celsa; nunc reluctantes parat  
Reserare fauces; verba nunc cluso male  
Custodit ore Maenas impatiens dei.  
CASS. Quid me furoris incitamus stimulis novi,
- 720 Quid mentis inopem, sacra Parnassi iuga  
Raptis? Recede, Phoebe: iam non sum tua.  
Extingue flammam pectori infixam meo!  
Cui nunc vagor vesana? cui bacchor furens?  
Iam Troia cecidit falsa: quid vates ago?
- 725 Ubi sum? Fugit lux alma, et obscurat genas

Nox alta, et aether abditus tenebris latet.  
 Sed ecce! gemino sole praeſulget dies,  
 Geminumque duplices Argos attollit domos.  
 Idaea cerno nemora! fatalis ſedet  
 Inter potentes arbiter paſtor deas. 730  
 Timete reges, moneo, furtivum genus  
 Agreſtis ille alumnus evertet domum  
 Quid iſta vecors tela feminea manu  
 Deſtricta praeſert? quem petit dextra virum  
 Lacaena cultu, ferrum Amazonium gerens? 735  
 Quae verſat oculos alia nunc facies meos?  
 Victor ferarum, colla ſublimis, iacet  
 Ignobili ſub dente, Marmaricus leo, — *Is* 3. 11  
 Morsus cruentos paſſus audacis leae,  
 Quid me vocatis ſoſpitem ſolam e meis, 740  
 Umbrae meorum? Te ſequor, tota pater  
 Troia ſepulte! Frater, auxilium Phrygum,  
 Terrorque Danaum, non ego antiquum decus  
 Video, aut calentes ratibus exuſtis manus;  
 Sed lacera membra, et ſaucios vinelo gravi 745  
 Illos lacertos. Te ſequor, nimium cito  
 Congreſſe Achilli, Troile! Incertos geris,  
 Deiphobe, vultus, coniugis munus novae!  
 Iuvat videre Tartari ſaevum canem;  
 Iuvat per ipſos ingredi Stygios lacus 750  
 Avidique regna Ditis! Haec hodie ratis  
 Phlegethontis atri regias animas vehet,  
 Victamque, victricemque. Vos, umbrae, precor;  
 Iurata Superis unda, te pariter precor,  
 Reſerate paulum terga nigrantis poli: 755  
 Levis ut Mycenae turba proſpiciat Phrygum!  
 Spectate miſeri: fata ſe vertunt retro.  
 Instant ſorores ſqualidae! Sanguinea iactant verbera;  
 Fert laeva ſemuſtas faces; turgentque pallentes genae,  
 Et veſtis atri funeris exesa cingit ilia. 760  
 Strepuntque nocturni metus; et oſſa vaſti corporis,

- Corrupta longinquo situ, palude limosa iacent.  
 Et ecce! defessus senex ad ora ludentes aquas  
 Non captat, oblitus sitis, moestus futuro funere;  
 765 Exultat et ponit gradus pater decoros Dardanus!  
 CHOR. Iam pervagatus ipse se fregit furor,  
 Caditque, flexo qualis ante aras genu  
 Cervice taurus vulnus incertum gerens.  
 Relevemus artus entheos. Tandem suos  
 770 Victrice lauru cinctus Agamemnon adit:  
 Et festa coniux obvios illi tulit  
 Gressus, reditque iuncta concordia gradu.
- 

## ACTUS QUARTUS.

AGAMEMNON, CASSANDRA.

*Agamemnoni reduci praedicit Cassandra fatum, nec creditur. Troad. vers. 34.*

- AGAM. Tandem revertor sospes ad patrios lares.  
 O cara, salve, terra! tibi tot barbarae  
 775 Dedere gentes spolia; tibi felix diu  
 Potentis Asiae Troia submisit manus.  
 Quid ista vates corpus effusa ac tremens  
 Dubia labat cervice? Famuli, attollite!  
 Refovete gelido latice! Iam recipit diem  
 780 Marcente visu. Suscita sensus tuos:  
 Optatus ille portus aerumnis adest.  
 Festus dies est. CASS. Festus et Troiae fuit.  
 AGAM. Veneremur aras. CASS. Cecidit ante aras  
 pater.  
 AGAM. Iovem precemur pariter. CASS. Herceum  
 Iovem?

AGAM. Credis videre te Ilium? CASS. Et Priamum  
simul. 785

AGAM. Hic Troian non est. CASS. Ubi Helena est,  
Troiam puto.

AGAM. Ne metue dominam famula .... CASS. Li-  
bertas adest.

AGAM. Secura vive. CASS. Mors mihi est securitas.

AGAM. Nullum est periculum tibimet. CASS. At ma-  
gnum tibi.

AGAM. Victor timere quid potest? CASS. Quod  
non timet. 790

AGAM. Hanc fida, famuli, turba, dum excutiat deum,  
Retinete, ne quid impotens peccet furor!

At te, pater, qui saeva torques fulmina

Pellisue nubes, sidera et terras regis,

Ad quem triumphi spolia victores ferunt: 795

Et te sororem cuncta pollentis viri,

Argolica Iuno, pecore votivo libens

Arabumque donis, supplice et fibra colam.

CHORUS ARGIVARUM.

*Chorus Argivarum Herculis laudes canit, nutritis scilicet Ar-  
gis, cuiusque sagittae fato poscebantur ad secundum Troiae ex-  
cidium.*

Argos nobilibus nobile civibus,

Argos iratae carum novercae, 800

Semper ingentes educas alumnos;

Imparem aequasti numerum deorum

Tuus ille bis seno meruit labore — 7. 31

Adlegi coelo magnus Alcides,

Cui lege mundi Iupiter rupta 805

Roscidae noctis geminavit horas,

Iussitque Phoebum

Tardius celeres agitare currus,

Et tuas lente remeare bigas,

- 810 Pallida Phoebe;  
 Retulitque pedem, nomen alternis  
 Stella quae mutat, seque mirata est  
 Hesperum dici;  
 Aurora movit ad solitas vias
- 815 Caput, et relabens imposuit senis / V 7.37  
 Humero mariti.  
 Sensit Ortus, sensit Occasus,  
 Hereulem nasci: violentus ille  
 Nocte non una poterat creari.
- 820 Tibi concitatus substitit mundus,  
 O puer magnum subitura coelum!  
 Te sensit Nemeaeus arcto  
 Pressus lacerto fulmineus leo,  
 Cervaque Parrhasis;
- 825 Sensit Arcadii populator agri;  
 Gemuitque taurus, Dictaea linquens  
 Horridus arva.  
 Morte foecundum domuit draconem,  
 Vetuitque collo pereunte nasci;
- 830 Geminosque fratres  
 Pectore ex uno, tria monstra, natos  
 Stipite incusso fregit insultans;  
 Duxitque ad ortus Hesperium pecus, 12.29  
 Geryonae spoliū triformis. III
- 835 Egit Threiciū gregem,  
 Quem non Strymonii gramine fluminis,  
 Hebrive ripis pavit tyrannus:  
 Hospitum dirus stabulis cruorem V 7.20  
 Praebuit saevis, tinxitque crudos
- 840 Ultimus rictus sanguis aurigae.  
 Vidit Hippolyte ferox pectore in medio rapi  
 Spoliū; et sagittis nube percussa  
 Stymphalis alto decidit coelo;  
 Arborque pomis fertilis aureis
- 845 Extimuit manus, insueta carpi,

Fugitque in auras leviorē ramo.  
 Audivī sonitum crepitante lamna  
 Frigidus custos nescius somni,  
 Linqueret cum iam nēmus omne fulvo  
 Plenus Alcides vacuum metallo. 850  
 Tractus ad coelum canis Inferorum  
 Triplici catena tacuit, nec ullo  
 Latravī ore, lucis ignotae  
 Metuens colorem. Te duce succidit  
 Mendax Dardaniae domus, 855  
 Et sensit arcus iterum timendos;  
 Te duce concidit totidem diebus  
 Troia, quot annis.

## ACTUS QUINTUS.

### CASSANDRA.

*Cassandra caedem Agamemnonis mentis oculis videt enarratque.*

Res agitur intus magna, par annis decem!  
 Eheu, quid hoc est? Anime, consurge, et cape 860  
 Pretium furoris: vicimus victi Phryges!  
 Bene est! resurgis, Troia! traxisti iacens  
 Pares Mycenae! terga dat victor tuus!  
 Tam clara nunquam providae mentis furor  
 Ostendit oculis: video, et intus sum, et fruor. 865  
 Imago visus dubia non fallit meos:  
 Spectemus. Epulae regia instructae domo,  
 Quales fuerunt ultimae Phrygibus dapes,  
 Celebrantur. Ostro lectus Iliaco nitet,  
 Merumque in auro veteris Assaraci trahunt; 870  
 Et ipse picta veste sublimis iacet,



- Priami superbas corpore exuvias gerens.  
Detrahere cultus uxor hostiles iubet,  
Induere potius coniugis fidae manu  
875 Textos amictus. Horreo atque animo tremo.  
Regemne perimet exul, et adulter virum?  
Venere fata: sanguinem extremae dapes  
Domini videbunt, et cruor Baccho incidet.  
Mortifera vinctum perfidae tradet neci  
880 Induta vestis: exitum manibus negat,  
Caputque laxi et invii cludunt sinus.  
Haurit trementi semivir dextra latus,  
Nec penitus adigit: vulnere in medio stupet.  
At ille, ut altis hispidus silvis aper,  
885 Cum casse vinctus tentat egressus tamen,  
Arctatque motu vincla, et incassum furit,  
Cupit fluentes undique et coecos sinus  
Dissicere, et hostem quaerit implicitus suum.  
Armat bipenni Tyndaris dextram furens;  
890 Qualisque ad aras colla taurorum pius  
Designat oculis, antequam ferro petat:  
Sic huc et illuc impiam librat manum.  
Habet; peractum est! pendet exigua male  
Caput amputatum parte; et hinc trunco cruor  
895 Exundat, illinc ora cum fremitu iacent.  
Nondum recedunt; ille iam exanimem petit,  
Laceratque corpus; illa fodientem adiuvat.  
Uterque tanto scelere respondet suis:  
Est hic Thyeste natus, haec Helenae soror.  
900 Stat ecce! Titan dubius emerito die,  
Suane currat, an Thyestaea via.

**ELECTRA, STROPHIUS, ORESTES**  
**et PYLADES, mutae personae.**

*Electra fratri suo Oresti subducto fugam suadet, eumque Strophio opportune occurrenti tradit abducendum; ipsa ad aram confugit*

**EL.** Fuge, o paternae mortis auxilium unicum,  
 Fuge, et scelestas hostium evita manus!  
 Versa domus est funditus, regna occidunt.  
 Hospes quis iste concitos currus agit? 905

Germane, vultus veste furabor tuos!  
 Quos, anime demens, refugis? Externos times;  
 Domus timenda est. Pone iam trepidos metus,  
 Oresta: amici fida praesidia intuo.

**STROPH.** Phocide relictâ Strophius, Elea inclitus 910  
 Palma revertor. Causa veniendi fuit  
 Gradari amico, cuius impulsum manu  
 Cecidit decenni Marte concussum Ilion  
 Quâenam ista lacrimis lugubrem vultum rigat,  
 Pavetque moesta? Regium agnosco genus. 915

Electra, fletus causa quâe laeta in domo est?  
**EL.** Pater peremtus scelere materno iacet;  
 Comes paternae quaeritur gnatus neci;  
 Aegisthus arces venere quaesitas tenet.

**STROPH.** O nulla longi temporis felicitas! 920

**EL.** Per te parentis memoriam obtestor mei,  
 Per sceptrâ terris nota, per dubios deos:  
 Recipe hunc Oresten, ac pium furtum occule!  
**STROPH.** Etsi timendum caesus Agamemnon docet:  
 Adgrediar, et te, Oresta, furabor libens. 925

Poscunt fidem secunda, at adversa exigunt.  
 Cape hoc decorum ludicri certaminis,  
 Insigne frontis! laeva victricem tenens  
 Frondem virenti protegat ramo caput;  
 Et ista donum palma Pisaei Iovis 930

- Velamen eadem praestet atque omen tibi.  
 Tuque o, paternis adsidens frenis comes,  
 Condisce, Pylade, patris exemplo fidem!  
 Vos, Graecia nunc teste veloces equi,  
 935 Infida cursu fugite praecipiti loca!  
 EL. Excessit, abiit; currus effreno impetu  
 Effugit aciem. Tuta iam opperiar meos  
 Hostes, et ultro vulneri opponam caput.  
 Adest cruenta coniugis victrix sui,  
 940 Et signa caedis veste maculata gerit.  
 Manus recenti sanguine etiamnum madent,  
 Vultusque prae se scelera truculenti ferunt.  
 Concedam ad aras. Patere me vittis tuis,  
 Cassandra, iungi paria metuentem tibi!

*CLYTEMNESTRA, ELECTRA, AEGISTHUS, CASSANDRA.*

*Electram ab ara detrahi et in carcerem coniici iubet Clytemnestra. Cassandra iugulatur.*

- 945 CLYT. Hostis parentis, impium atque audax caput,  
 Quo more coetus publicos, virgo, petis?  
 EL. Adulterorum virgo deserui domum.  
 CLYT. Quis esse credat virginem? EL. Gnatam  
 tuam.  
 CLYT. Modestius cum matre! EL. Pietatem doces!  
 950 CLYT. Animos viriles eorde tumefacto geris;  
 Sed agere domita feminam disces malo.  
 EL. Nisi forte fallor, feminas ferrum decet.  
 CLYT. Et esse demens te parem nobis putas?  
 EL. Vobis? quis iste est alter Agamemnon tuus?  
 955 Ut vidua loquere: vir caret vita tuus.  
 CLYT. Indomita post haec virginis verba impiae  
 Regina frangam; citius interea mihi  
 Edissere, ubi sit gnatus, ubi frater tuus.  
 EL. Exit Mycenae. CLYT. Reddenunc natum mihi

ÆL. Et tu parentem redde! CLYT. Quo latitat loco? 960

ÆL. Tuto quietus, regna non metuens nova

Dixi parenti satis. CLYT. At iratæ parum.

Morieris hodie! ÆL. Dummodo hac moriar manu.

Recedo ab aris. Sive tu iugulo iuvat

Mersisse ferrum: praebeo iugulum volens; 965

Seu more pecudum colla resecari placet.

Intenta cervix vulnus expectat tuum.

Scelus peractum est: caede respersam viri

Atque obsoletam sanguine hoc dextram abluere

CLYT. Consors pericli pariter ac regni mei, 970

Aegisthe, gradere! Gnata genitricem impie

Probris lacessit, abditum fratrem occulit.

ÆGISTH. Furibunda virgo, vocis infandae sonum,

Et aure verba indigna materna opprime!

ÆL. Etiam monebit sceleris infandi artifex, 975

Per scelera natus, nomen ambiguum suis,

Idem sororis gnatus et patris nepos?

CLYT. Aegisthe, cessas impium ferro caput

Demetere? Fratrem reddat, aut animam statim.

ÆGISTH. Abstrusa coeco carcere et saxo exigat 980

Aevum. Per omnes torta poenarum modos,

Referre, quem nunc occulit, forsán volet.

Inops, egens, inclusa, paedore obsita,

Vidua ante thalamos, exul, invisá omnibus,

Aethere negato, sero succumbet malis. 985

ÆL. Concede mortem! ÆGISTH. Si recusares, da-

rem.

Rudis est tyrannus, morte qui poenam exigit.

ÆL. Mortem aliquid ultra est? ÆGISTH. Vita, si

cupias mori.

CLYT. Abripite, famuli, monstrum, et avectam pro-

cul

Ultra Mycenás, último in regni angulo 990

Vincite septam nocte tenebrosi specus:

Ut inquietam virginem carcer domet.

At ista poenas capite persolvat suo,  
Captiva coniux, regii pellex tori.

995 Trahite, ut sequatur coniugem ereptum mihi:  
CASS. Ne trahite: vestros ipsa praecedam gradus.

Perferre prima nuntium Phrygibus meis  
Propero: repletum ratibus eversis mare;  
Captas Mycenae; mille ductorem ducum,

1000 Ut paria fata Troicis lucret malis,  
Periisse dono feminae stupro, dolo.  
Nihil moramur: rapite! quin grates ago.  
Tantum iuvat vixisse post Troiam, iuvat!  
CLYT. Furiosa, morere! CASS. Veniet et vobis  
furor.

*Merck (Hefen)*

# HERCULES OETAEUS.

---

## DRAMATIS PERSONAE.

**HERCULES.**

**HYLLUS.**

**ALCMENA.**

**CHORUS AETOLARUM MULIE-  
RUM.**

**NUTRIX.**

**DEIANIRA.**

**IOLE.**

**PHILOCTETES.**

**CHORUS OECHALIARUM VIRGI-  
NUM.**

**LICHAS** *muta persona.*

**IOLE et CHORUS OECHALIDUM**  
*sunt προτατικα πρόσωπα.*

---

## ARGUMENTUM.

Deianira, indigne ferens sibi praelatam Iolen Euryti regis Oechaliae filiam, Herculi tunicam mittit imbutam sanguine Centauri Nessi, sagitta Herculis hydræ felle tincta vulnerati; effiacissimum credens philtrum praesensque amoris remedium; quod illam monuerat moriens Nessus. Quam simul ac induisset in Cenaeo Euboeae promontorio sacrificaturus Hercules, ignem concipit virus, vestisque corpori adherentis aestus carnem ossaque absumit. Nessi fraude intellecta mortem sibi consciscit Deianira. Hercules, interfecto Licha, qui munus letale attulerat, mandat Philoctetæ, cui moriens arcum et sagittas tradit, exstrui sibi in monte Oeta pyram, in qua se cum clava ac leonis pello cremat. Alcmenae denique matri apparet, ipsamque consolatur iam in coelitum numerum adscriptus.

## ALIUD ARGUMENTUM HIERONYMI BALBI.

- Magnanimum Alciden, totum qui viribus orbem  
Presserat, unde oritur Titan, quaque aurea condit  
Lumina, maior Amor iuga sub sua misit evantem  
Namque Iolen toto concepit pectore; solam  
5 Ille Iolen poscit, Ioles quoque nomine gaudet  
At regina (suum quis enim celavit amorem?)  
Deianira novos persensit coniugis ignes:  
Fertur inops mentis, vernique ignara marito  
Infectam donat Nesseo sanguine vestem.  
10 Ille ubi funestus quaesitum munus in usus  
Induit: ecce! fluit virus, totosque per artus  
Contrahitur macies, serpitque per ossa venenum  
Vincitur Alcides, properatque abrumpere lucem,  
Ingentemque pyram, pereundi certus, in auras  
15 Extollit, flammisque rogi condensat anhelis;  
Tunc sese medio iecit moriturus in ignes.  
Solvitur in cineres corpus tenuesque favillas;  
Ast anima aethereum scandit sublimis in arcem.  
Unde hiemes ventosque et lucida sidera calcit
-

## ACTUS PRIMUS

### HERCULES.

*Scena haec prima cum choro sequente in Euboea statuitur, ubi Hercules, in Ceneae promontorio sacrificaturus, vota de coelo, quod rebus gestis meruisse se gloriatur, concipit. Reliquae Tragoediae scena est Trachinae*

Sator deorum, cuius excussum manu  
Utraeque Phoebi sentiunt fulmen domus,  
Secure regna: protuli pacem tibi.  
Quacunque Nereus porrigi terras vetat,  
Non est tonandum: perfidi reges iacent, 5  
Saevi tyranni; fregimus, quidquid fuit  
Tibi fulminandum. Sed mihi coelum, parens,  
Adhuc negatur? Parui certe Iove  
Ubique dignus; teque testata est meum  
Patrem noverca. Quid tamen nectis moras? 10  
Numquid timemur? numquid impositum sibi  
Non poterit Atlas ferre cum coelo Herculem?  
Quid astra, genitor, quid negas? Mors me tibi  
Certe remisit; omne concessit malum,  
Quod terra genuit, pontus, aer, Inferi. 15  
Nullus per urbes errat Argolicas leo;  
Stymphalis icta est; Maenali nulla est fera;  
Sparsit peremtus aureum serpens nemus.  
Et hydra vires posuit; et notos Hebro  
Cruore pingues hospitum fudigreges; 20  
Hostisque traxi spolia Thermodontiae.  
Vidi silentum fata; nec tantum redi;  
Sed trepidus atrum Cerberum vidit dies,  
Et ille solem. Nullus Antaeus Libys  
Animam resumit; cecidit ante aras suas 25



Busiris; una est Geryon sparsus manu,  
Taurusque populis horridus centum pavor.  
Quodcunque tellus genuit infestum, occidit,  
Meaque fusum est dextera. Iratis deis

- 30 Non licuit esse. Si negat mundus feras,  
Animum noverca; redde nunc nato patrem,  
Vel astra forti! Nec peto, ut monstres iter;  
Permitte tantum, genitor: inveniam viam.  
Vel si times, ne terra concipiat feras:

- 35 Properet malum quodcunque, dum terra Herculem  
Habet videtque: nam quis invadet mala?  
Aut quis per urbes rursus Argolicas erit  
Iunonis odio dignus? — In tutum meas  
Laudes redegi; nulla me tellus silet:

- 40 Me sensit Ursae frigidum Scythicae genus,  
Indusque Phoebo subditus, Cancro Libys.

Te, clare Titan, testor! occurri tibi,  
Quacunque fulges; nec meos lux prosequi  
Potuit triumphos; Solis excessi vices,

- 45 Intraque nostras substitit metas dies.  
Natura cessit; Terra defecit gradum;  
Lassata prior est Nox, et extremum Chaos  
In me incurrit. Inde ad hunc orbem redi,  
Unde omne retro est. Tulimus Oceani minas;

- 50 Nec ulla valuit quatere tempestas ratem,  
Quamcunque pressi. Pars quota est, quam pro-  
sequor?

Iam vacuus aether non potest odio tuae  
Sufficere nuptae; quasque devincam, feras  
Tellus timet concipere, nec monstra invenit.

- 55 Ferae negantur. Hercules monstri loco  
Iam coepit esse: quanta enim fregi mala,  
Quot scelera, nudus! Quidquid immane obstitit,  
Solae manus stravere. Nec iuvenis feras  
Timui, nec infans. Quidquid est iussum, leve est;

- 60 Nec ulla nobis segnis inluxit dies.

O quanta fudi monstra, quae nullus mihi  
 Rex imperavit! Institit virtus mihi  
 Iunone peior. Sed quid impavidum genus  
 Fecisse prodest? non habent pacem dei:  
 Purgata tellus omnis in coelo videt, 65  
 Quodcunque timuit: transtulit Iuno feras.  
 Ambit peremtus Cancer ardentem plagam,  
 Libyaeque sidus fertur, et messes alit.  
 Annum fugacem tradit Astraeae leo;  
 At ipse, iactans fervidam coelo iubam, 70  
 Austrum madentem siccatur, et nimbos rapit.  
 Invasit omnis ecce! iam coelum fera,  
 Meque antecessit. Victor e terris meos  
 Specto labores. Astra portentis prius  
 Ferisque Iuno tribuit: ut coelum mihi 75  
 Faceret timendum. Sparserit mundum licet,  
 Coelumque terris peius ac peius Styge  
 Irata faciat: dabitur Alcidae locus.  
 Si post feras, post bella, post Stygium canem,  
 Nondum astra merui: Siculus Hesperium latus 80  
 Tangat Pelorus; una iam tellus erit:  
 Illinc fugabo maria. Si iungi iubet:  
 Committat undas Isthmos, et iuncto salo  
 Nova ferantur Atticae puppes via.  
 Mutetur orbis: vallibus currat novis 85  
 Ister, novasque Tanais accipiat vias.  
 Da, da tuendos, Iupiter, saltem deos!  
 Illa licebit fulmen a parte auferas,  
 Ego quam tuebor. Sive glaciale polum,  
 Seu me tueri fervidam partem iubet: 90  
 Hac esse Superos parte securos puta.  
 Cirrhaea Paean templa et aetheriam domum  
 Serpente caeso meruit; at quoties iacet  
 Python in hydra? Bacchus et Perseus deis  
 Iam se intulere; sed quota est mundi plaga 95  
 Oriens subactus, aut quota est Gorgon fera?

- Quis astra natus laudibus meruit suis  
 Ex te et noverca? Quem tuſi, mundum peto.  
 Sed tu, comes laboris Herculei Licha,  
 100 Perfer triumphos, Euryti victos lares  
 Stratumque regnum! vos pecus rapite ocius,  
 Qua templa tollens ora Cenaei Iovis  
 Austro timendum spectat Euboicum mare.

**CHORUS OECHALIARUM VIRGINUM,  
 IOLK.**

*Iole Choro Oechalidarum mixta patriae excidium, suorum in  
 ternecionem, suam denique servitutem plangit.*

- CHOR. Par ille est Superis, cui pariter dies  
 105 Et fortuna fuit; mortis habet vices,  
 Lente cum trahitur vita gementibus.  
 Quisquis sub pedibus fata rapacia,  
 Et puppem posuit fluminis ultimi:  
 Non captiva dabit brachia vinculis,  
 110 Nec pompae veniet nobile ferentum.  
 Nunquam est ille miser, cui facile est mori.  
 Illum si medio decipiat ratis  
 Ponto, cum Borean expulſit Africus,  
 Aut Euris Zephyrum, qui mare dividant:  
 115 Non puppis lacerae fragmina colligit,  
 Aut littus medio sperat in aequore.  
 Vitam qui poterit reddere protinus,  
 Solus naufragium non poterit pati.  
 Nos turpis macies et lacrimae tenent,  
 120 Et crinis patrio pulvere sordidus.  
 Nos non flamma rapax, non fragor obruit:  
 Felices sequeris, Mors; miseros fugis:  
 Stamus. Nunc patriis messibus hic locus  
 Et silvis debitor, lapsaque sordidae  
 125 Fient templa casae. Iam gelidus Dolops  
 Hac ducet pecudes, qua tepet obrutus.

Stratae qui superest Oechaliae cinis.  
 Illo Thessalicus pastor in oppido,  
 Indocta referens carmina fistula,  
 Cantu nostra canet tempora flebili; 130  
 Et dum pauca deus secula contrahet,  
 Quaeretur, patriae quis fuerit locus.  
 Felix incolui non steriles focos,  
 Nec ieiuna soli iugera Thessali;  
 Ad Trachina vecor, saxa rigentia, 135  
 Et dumeta iugis horrida torridis,  
 Vix gratum pecori montivago nemus.  
 At si quas melior sors famulas vocat:  
 Illas aut volucer transferet Inachus;  
 Aut Dircaea colens moenia, qua fugit 140  
 Ismenos tenui flumine languidus.  
 Hic mater tumidi nupserat Herculis.  
 Quae cautes Scythiae, quis genuit lapis?  
 Num Titana ferum te Rhodope tulit,  
 Te praeruptus Athos, te fera Caspias, 145  
 Quae virgata tibi praebuit ubera?  
 Falsa est de geminis fabula noctibus,  
 Aether cum tenuit sidera longius,  
 Commisitque vices Lucifer Hespero,  
 Et solem vetuit Delia tardior: 150  
 Nullis vulneribus pervia membra sunt;  
 Ferrum sentit hebes, lentior est chalybs;  
 In nudo gladius corpore frangitur,  
 Et saxum resilit; fataque negligit,  
 Et mortem indomito corpore provocat. 155  
 Non illum poterant figere cuspides;  
 Non arcus Scythica tensus arundine;  
 Non quae tela gerit Sarmata frigidus,  
 Aut qui soliferae suppositus plagae  
 Vicino Nabathae vulnera dirigit 160  
 Parthus Gnossiacis certior ictibus.  
 Muros Oechaliae corpore propulit.

- Nil obstare valet; vincere quod parat,  
Iam victum est. Quota pars vulnere concidit?  
165 Pro fato potuit vultus iniquior,  
Et vidisse sat est Herculeas minas.  
Qui vastus, Briareus, qui tumidus, Gyges,  
Supra Thessalicum constitit aggerem,  
Ut coelo insereret vipereas manus,  
170 Hoc vultu riguit? Commoda cladibus  
Magnis magna patent: nil superest mali:  
Iratum miserae vidimus Herculem.  
IOLE. At ego infelix non templa suis  
Collapsa deis, sparsosve focos,  
175 Gnatiss mixtos arsisse patres,  
Hominique deos, templa sepulcris;  
Nullum querimur commune malum:  
Alio nostras Fortuna vocat  
Lacrimas; alias flere ruinas  
180 Mea fata iubent. Quae prima querar?  
Quae summa gemam? Pariter cuncta  
Deflere iuvat; nec plura dedit  
Pectora tellus, ut digna sonent  
Verbera fatis. Me vel Sipylum  
185 Flebile saxum fingite, Superi,  
Vel in Eridani ponite ripis,  
Ubi ~~v~~æsta sonat  
Phaethontiadum silva sororum!  
Me vel Siculis addite saxis,  
190 Ubi fata gemam, Thessala Siren;  
Vel in Edonas tollite silvas,  
Qualis gnatum Daulias ales  
Solet Ismaria flere sub umbra!  
Formam lacrimis aptate meis,  
195 Resonetque malis aspera Trachin.  
Cypria lacrimas Myrrha tuetur  
Raptum coniux Ceyca gemit;  
Sibi Tantalus est facta superstes;

Fugit vultus Philomela suos, Gnatumque sonat flebilis Atthis:	200
Cur mea nondum capiunt volucres Brachia plumas? Felix, felix, Cum silva domus nostra feretur, Patrioque sedens ales in agro Referam querulo murmure casus,	205
Volucremque lolen fama loquetur! Vidi, vidi Miseranda mei fata parentis, Cum letifero stipite pulsus, Tota iacuit sparsus in aula.	210
Proh, si tumulum fata dedissent, Quoties genitor quaerendus eras! Potuine tuam spectare necem, Nondum teneras vestite genas, Necdum forti sanguine, Toxeu?	215
Quid vestra queror fata, parentes, Quos in tutum mors aequa tulit? Mea me lacrimas fortuna rogat: Iamiam dominae captiva colos Fusosque legam. Proh saeve decor,	220
Formaque mortem paritura mihi, Tibi cuncta domus concidit uni, Dum me genitor negat Alcidae, Atque Hercules socer esse timet! Sed iam dominae tecta petantur.	225
CHOR. Quid regna tui clara parentis, Proavosque tuos respicis amens? Fugiat vultus fortuna prior. Felix, quisquis novit famulum Regemque pati,	230
Vultusque potest variare suos! Rapuit vires pondusque malis, Caus animo qui tulit aequo.	

## ACTUS SECUNDUS.

*NUTRIX, DEIANIRA, LICHAS, muta  
persona.*

*Furens zelotypia Deianira conspecta Iole vindictam meditat-  
atur vestemque venenatam Herculi mittit.*

- NUTR.** **O** quam cruentus feminas stimulat furor,  
**235** Cum patuit una pellici et nuptae domus!  
 Scylla et Charybdis, Sicula contorquens freta,  
 Minus est timenda; nulla non melior fera est.  
 Namque ut reluxit pellicis captae decus,  
 Et fulsit Iole, qualis innubis dies,  
**240** Purisve clarum noctibus sidus micat:  
 Stetit furenti similis ac torvum intuens  
 Herculea coniux, foeta ut Armenia iacens  
 Sub rupe tigris hoste conspecto exilit;  
 Aut, iussa thyrsus quaters, conceptum ferens  
**245** Maenas Lyaeum, dubia, quo gressus agat.  
 Haesit parumper; tum per Herculeos lares  
 Lymphata rapitur; tota vix satis est domus;  
 Incurrit, errat, sistit. In vultus dolor  
 Processit omnis; pectori paene intimo  
**250** Nihil est relictum. Fletus insequitur minas;  
 Nec unus habitus durat, aut uno furit  
 Contenta vultu: nunc inardescunt genae;  
 Pallor ruborem pellit, et formas dolor  
 Errat per omnes: queritur, implorat, gem t.  
**255** Sonuere postes: ecce! praecipiti gradu  
 Secreta mentis ore confuso exerit.  
**DEIAN.** Quamcunque partem sedis aetheriae pre-  
 mis,  
 Coniux Tonantis, mitte in Alciden feram,  
 Quae mihi satis sit! Si qua foecundum caput

HERCULES OETAEUS. ACT. II. 209

Palude tota vastior serpens movet, 260

Ignara vinci; si quid excessit feras

Immane, dirum, horribile, quo viso Hercules

Avertat oculos: hoc sinu immenso exeat

Vel si ferae negantur: hanc animam precor

Converte in aliquid! quodlibet possum malum 265

Hac mente fieri. Commoda effugiem mihi

Parem dolori: non capit pectus minas.

Quid excutis telluris extremas sinus,

Orbemque versas? quid rogas Ditem mala?

Omnes in isto pectore invenies feras, 270

Quas timuit: odiis accipe hoc telum tuis:

Ego sum noverca! Perdere Alciden potes:

Profer manus quocunque. Quid cessas, dea?

Utere furente! Quod iubes fieri nefas?

Reperi! Quid haeres? Ipsa iam cesses licet, 275

Haec ira satis est. NUTR. Pectoris sani parum,

Alumna, questus comprime et flammās doma!

Frena dolorem! coniugem ostende Herculis!

DEIAN. Iole meis captiva germanos dabit

Gnatis, Iovisque fiet e famula nurus? 280

Num flamma cursus pariter et torrens ferent,

Et Ursa pontum sicea coeruleum bibet?

Non ibo inulta! Gesseris coelum licet,

Totusque pacem debeat mundus tibi:

Est aliquid hydra potius, iratae dolor 285

Nuptae. Quis ignis tantus in coelum furit

Ardentis Aetnae? Quidquid est victum tibi, II 5, 25

Hic vincet ~~animas~~. Capta praeripiet toros?

Adhuc timebam monstra; iam nullum est malum.

Cessere pestes; in locum venit ferae 290

Invisa pellex. Summe proh rector deum,

Et clare Titan, Herculis tantum fui

Coniux timentis. Vota quae Superis tuli,

Cessere captae; pellici felix fui.

Illi meas audistis, o Superi, preces! 295



Incolumis illi remeat! O nulla dolor  
 Contente poena, quaere supplicia horrida,  
 Incogitata, infanda! Iunonem doce,  
 Quid odia valeant: nescit irasci satis.

7. 23 300 Pro me gerebas bella; propter me vagas  
 Achelous undas sanguine infecit suo,  
 Cum lenta serpens fieret, in taurum trucem  
 Nunc flecteret serpente deposita minas,  
 Et mille in hoste vinceret uno feras.

305 Iam displicemus, capta praelata est mihi.  
 Non perferetur: qui dies thalami ultimus  
 Nostri est futurus, hic erit vitae tuae.  
 Quid hoc? recedit animus, et ponit minas;  
 Iam cessit ira. Quid miser langues dolor?

310 Perdis furorem; coniugis tacitae fidem  
 Mihi reddis iterum. Quid vetas flammis ali?  
 Quid frangis ignes? Hunc mihi serva impetum! —  
 Pares eramus; non erat votis opus.

Aderit noverca, quae manus nostras regat,  
 315 Nec invocata. NUTR. Quod paras demens scelus?  
 Perimes maritum, cuius extremus dies  
 Primusque laudes novit, et coelo tenus  
 Erecta terras fama suppositas habet?  
 Rogos in istos terra consurget parens,

320 Domusque soceri prima et Aetolum genus  
 Sternetur omne; saxa iamdudum et faces  
 In te ferentur; vindicem tellus suum  
 Defendet omnis. Una quot poenas dabis?  
 Effugere terras crede et humanum genus

325 Te posse; fulmen genitor Alcidae gerit.  
 Iamiam minaces ire per coelum faces  
 Specta, et tonantem fulmine excusso diem!  
 Mortem quoque ipsam, quam putas tutam, time:  
 Dominatur illic patruus Alcidae tui.

330 Quocunque perges, misera, cognatos deos  
 Illi videbis. DEIAN. Maximum fieri scelus

Et ipsa fateor; sed dolor fieri iubet.

NUTR. Moriere. DEIAN. Moriar Herculis nempe  
incliti

Coniux, nec ullus nocte discussa dies  
Viduam notabit, nec meos pellex toros  
Captiva capiet. Ante ab occasu dies  
Nascetur, Indos ante glacialis polus,  
Scythasve tepida Phoebus inficiet rota,  
Quam me relictam Thessalae adspiciant nurus!

*ISM*

335

Meo iugales sanguine extingnam faces! 340

Aut pereat, aut me perimat! elisis feris

Et coniugem addat! inter Herculeos licet

Me quoque labores numeret: Alcidae toros

Moritura certe corpore amplectar meo.

Ire, ire ad umbras Herculis nuptam libet; 345

Sed non inultam. Si quid e nostro Hercule

Conceptit Iole: manibus evellam meis

Ante, et per ipsas pellicem invadam faces!

Me nuptiali victimam feriat die

Infestus, Iolen dum supra exanimem ruam! 350

Felix iacet, quicumque, quos odit, premit.

NUTR. Quid ipsa flammis pascis et vastum foves

Ultro dolorem, misera? quid cassum times?

Dilexit Iolen nempe, cum staret parens,

Regisque natam peteret. In famulae locum 355

Regina cecidit: perdidit vires amor,

Multumque ab illo traxit infelix status.

Illicita amantur; excidit, quidquid licet.

DEIAN. Fortuna amorem psior inflamat magis.

Amat vel ipsum, quod caret patrio lare, 360

Quod nudus auro crinis et gemma iacet;

Ipsas misericors fors an aerumnas amat.

NUTR. Hoc usitatum est Herculi, captas amat.

Dilecta Priami nempe Dardanii soror

Concessa famulo est. Adice, quot nuptas prius, 365

Quot virgines dilexit: erravit vagus.

- Arcadia nempe virgo, Palladios choros  
 Dum nectit, Auge, vim stupri passa excidit,  
 Nullamque amoris retinet Herculei notam.
- 370 Referam quid alias? Nempe Thespiades vacant,  
 Brevique in illas arsit Alcides face.  
 Hospes Timoli Lydiam fovit nurum,  
 Et amore captus ad leves sedit colos,  
 Udum feroci stamen intorquens manu.
- 375 Nempe illa cervix spolia deposuit ferae,  
 Crinemque mitra pressit, et famulus stetit,  
 Hirtam Sabaea marcidus myrrha comam.  
 Ubique caluit, sed levi caluit face;  
 Haerere amantes post vagos ignes solent.
- 380 Famulamne et hostis praeferet gnatum tibi?  
 DEIAN. Ut alta silvas forma vernantes habet,  
 Quas nemore nudo primus investit tepor;  
 At cum solutos expulit Boreas Notos,  
 Et saeva totas bruma decussit comas,
- 385 Deforme solis adspicis truncis nemus:  
 Sic nostra longum forma percurrens iter,  
 Deperdit aliquid semper, et fulget minus,  
 Nec illa venus est. Quidquid in nobis fuit  
 Olim petita, cecidit et partu labat;
- 390 Materque multum rapuit ex illo mihi,  
 Aetas citato senior eripuit gradu.  
 Vides, ut altum famula non perdat decus?  
 Cessere cultus penitus, et paedor sedet,  
 Tamen per ipsas fulget aerumnas decor,
- 395 Nihilque ab illa casus et fatum grave  
 Nisi regna traxit. Hic meum pectus timor,  
 Altrix, lacescit; hic rapit somnos pavor.  
 Praeclara totis gentibus coniux eram;  
 Thalamosque nostros invido voto nurus
- 400 Optabat omnis: quo nimis quisquis deos  
 Orabat illos. Naribus Argolicis fui  
 Mensura voti. Quem Iovi socerum parem,

Altrix, habebō? quis sub hoc mundo mihi  
 Dabitur maritus? Ipse, qui Alcidae imperat,  
 Facibus suis me iungat Eurystheus licet, 405  
 Minus est. Toro caruisse regnantis leve est;  
 Alto illa cecidit, quae viro caret Hercule.

NUTR. Conciliat animos coniugum partus fere.

DEIAN. Sic ipse forsam dividet partus toros.

NUTR. Famula illa trahitur interim donum tibi. 410

DEIAN. Hunc, quem per urbes ire praeclarum vides,  
 Et viva tergo spoſa gestantem ferae;  
 Qui regna miseris donat et celsis rapit,  
 Vasta gravatus horridam clava manum;  
 Cuius triumphos ultimi Seres canunt, 415

Et quisquis alius orbe conſepto iacet:  
 Levis est, nec illum gloriae stimulat decor.

Errat per orbem, non ut aequetur Iovi,  
 Nec ut per urbes magnus Argolicas eat;  
 Quod amet, requirit; virginum thalamos petit. 420

Si qua est negata, rapitur; in populos furit;  
 Nuptas ruinis quaerit; et vitium impotens  
 Virtus vocatur. Cecidit Oechalia inclita,

Unusque Titan vidit atque unus dies  
 Stantem et cadentem. Causa bellandi est amor. 425

Toties timebit, Herculi gnatam parens  
 Quoties negabit: hostis est, quoties socer  
 Fieri recusat; si gener non est, furit.

Post haec quid istas innocens servo manus,  
 Donec furem simulet, ac saeva manu 430

Intendat arcus, neque natumque opprimat?  
 Sic coniuges expellit Alcides suas;  
 Haec sunt repudia! Nec potest fieri nocens:

Terris videri sceleribus causam suis  
 Fecit novercam. Quid stupes, segnis furor? 435

Scelus occupandum est! perge, dum fervet manus!

NUTR. Perimes maritum? DEIAN. Pellicis certe  
 meae.

NUTR. At love creatum. DEIAN. Nempe et Alcmena satum.

NUTR. Ferrone? DEIAN. Ferro. NUTR. Si nequis? DEIAN. Perimam dolo.

440 NUTR. Quis iste furor est? DEIAN. Quem meus confux docet.

NUTR. Quem nec noverca potuit, hunc perimes virum?

DEIAN. Coelestis ira quos premit, miseros facit; Humana nullos. NUTR. Parce, miseranda, et time!

DEIAN. Contempsit omnes ille, qui mortem prius.  
445 Libet ire in enses! NUTR. Maior admissio tuus, Alumna, dolor est: culpa par odium exigit.

Cur saeva modicis statuis? Ut laesa es, dole.

DEIAN. Leve esse credis pellicis nuptae malum? Quidquid dolorem pascit hunc, nimium puta.

450 NUTR. Amorne clari fugit Alcidae tibi?

DEIAN. Non fugit, altrix; remanet, et penitus se det

Fixus medullis (crede); sed magnus dolor Iratus amor est. NUTR. Artibus magicis fere Coniugia nuptae precibus admixtis ligant.

455 Vernare iussi frigore in medio nemus, Missumque fulmen stare; concussi fretum Cessante vento; turbidum explicui mare, Et sicca tellus fontibus patuit novis; Habuere motum saxa. Discussi fores:

460 Umbrae stetistis; et mea iussi prece Manes loquuntur. Sonuit infernus canis; Nox media solem vidit, et noctem dies. Mare, terra, coelum et Tartarus servit mihi; Nihilque leges ad meos cantus tenent:

465 Flectemus illum; carmina invenient iter.

DEIAN. Quas Pontus herbas generat, aut quas Thessala

Sub rupe Pindus, aut ubi inveniam malum,

Cui cedat ille? Carmine in terras mago  
 Descendat astris luna desertis licet,  
 Et bruma messes videat, et cantu fugax 470  
 Stet deprehensum fulmen, et versa vice  
 Medius coactis ferveat stellis dies:

Non flectet unum. NUTR. Vicit et Superos amor.  
 DEIAN. Vincetur uni fors an et spoliū dabit, IV 7.23  
 Amorque summus fiet Alcidae labor. 475

Sed te per omne coelitus numen precor,  
 Per hunc timorem: quidquid arcani adparo,  
 Penitus recondas, et fide tacita premas!  
 NUTR. Quid istud est, quod esse secretum petis?  
 DEIAN. Non tela sunt, non arma, non ignis mi-

nax. 480

NUTR. Praestare fateor posse me tacitam fidem,  
 Si scelere careat: interim scelus est fides.  
 DEIAN. Circumspice, agendum, ne quis arcana aucupet,  
 Partemque in omnem vultus inquirens eat.

NUTR. En, locus ab omni tutus arbitrio vacat! 485

DEIAN. Est in remoto regiae sedis loco  
 Arcana tacitus nostra defendens specus.  
 Non ille primos accipit soles locus,  
 Non ille seros, cum ferens Titan diem  
 Lassam rubenti mergit Oceano rotam; 490  
 Illic amoris pignus Herculei latet.

Altrix, fatebor: Nessus est auctor mali,  
 Quem gravida Nephele Thessalo genuit duci,  
 Qua celsus astris inserit Pindus caput,  
 Ultraque nubes Othrys eductus riget. 495

Namque ut, subactus Herculis clava horridi,  
 Achelous, omnes facilis in species dari, — V 7.12  
 Tandem peractis omnibus patuit feris,  
 Unoque turpe subdidit cornu caput:

Me coniugem dum victor Alcides habet, 500  
 Repetebat Argos. Forte per campos vagus  
 Evenos, altum gurgitem in pontum ferens,

- Par paene summis turbidus silvis erat.  
Transire Nessus vorticem solitus vadis  
505 Pretium poposcit; meque iam dorso ferens,  
Qua iungit hominem spina deficiens equo,  
Frangebatur ipsas fluminis tumidi minas.  
Iam totus undis Nessus exierat ferox,  
Medioque adhuc errabat Alcides vado,  
510 Vasto rapacem vorticem scindens gradu.  
Ast ille ut esse vidit Alciden procul:  
„Tu praeda nobis,” inquit, „et coniux eris!“  
Prohibetur undis: meque complexus ferens  
Gressum citabat. Non tenent undae Herculem:  
515 „Infide vector,” inquit, „immixti licet  
Ganges et Ister vallibus iunctis eant,  
Vincemus ambo; consequar telo fugam!“  
Praecessit arcus verba. Cum longum ferens  
Arundo vulnus tenuit haerentem fugam,  
520 Mortemque fixit: ille, iam quaerens diem,  
Tabum fluentem vulneris dextra excipit,  
Traditque nobis ungulae insertum suae,  
Quam forte saeva sciderat avulsam manu  
Tum verba moriens addit. „Hoc,” inquit, „magae  
525 Dixere amorem posse defigi malo  
Hoc docta Mycale Thessalas docuit nurus,  
Unam inter omnes luna quam sequitur magas  
Astris relictis. Illitas vestes dabis  
Hac, inquit, ipsa tabe, si pellex tuos  
530 Invisa thalamos tulerit, et coniux levis  
Aliam parenti dederit altisono nurum.  
Hoc nulla lux adspiciat, hoc tenebrae tegant  
Tantum remotae: sic potens vires suas  
Sanguis tenebit.” Verba deprensit quies,  
535 Mortemque lassus intulit membris sopor.  
Tu, quam meis admittit arcanis fides,  
Perge, ut nitentes virus in vestes datum  
Mentem per artus adeat, et tactu intimas

Intret medullas. NUTR. Ocius iussa exequar,  
 Alumna; precibus tu deum invictum advoca, 540  
 Qui certa tenera tela dimittit manu.

DEIAN. Te, te precor, quem mundus et Superi ti-  
 ment

Et aequor, et, qui fulmen Aetnaeum quatis,  
 Timende matri teliger saevae puer:  
 Intende certa spiculum velox manu, 545

Non e sagittis levibus; e numero, precor,  
 Graviore profer, quod tuae nondum manus  
 Misere in aliquem: non levi telo est opus,  
 Ut amare possit Hercules. Rigidas manus  
 Intende, et arcum cornibus iunctis para! 550

Nunc, nunc sagittam prome, qua quondam horridus  
 Iovem petisti, fulmine abiecto deus  
 Cum fronte subito tumuit, et rapidum mare  
 Taurus puellae vector Assyriae scidit.  
 Immitte amorem! vincat exempla omnia! 555

Amare discat coniugem! Si quas decor  
 Ioles inussit pectori Herculeo faces,  
 Extingue totas: perbibat flammās mei.  
 Tu fulminantem saepe domuisti Iovem,  
 Tu furva nigri sceptrā gestantem poli, 560

Turbæ ducem maioris, et dominum Stygis:  
 Tuque, o noverca gravior irata deus,  
 Cape hunc triumphum, solus et vince Herculem:  
 NUTR. Prolata vis est, quaeque Palladia colu  
 Lassavit omnem texta famularem manum. 565

Nunc congeratur virus, ut vestis bibat  
 Herculeā pestem; precibus augebo malum.  
 In tempore ipso gnavus occurrit Lichas.  
 Celanda vis est dira: ne pateant doli.

DEIAN. O, quod superbae non habent unquam do-  
 mus, 570

Fidele semper regibus nomen, Licha,  
 Cape hos amictus, nostra quos nevit manus,



- Dum vagus in orbem fertur, et victus mero  
 Tenet feroci Lydiam gremio nurum,  
 575 Nunc poscit Iolen. Sed iecur fors horridum  
 Flectam merendo : merita vicerunt malos.  
 Non ante vestes induat coniux, iube,  
 Quam ture flammās pascat et placet deos,  
 Cana rigentem populo cinctus comam.  
 580 Ipsa in penates regiones gressus feram,  
 Precibusque amoris horridi matrem colam.  
 Vos, quas paternis extuli comites focis,  
 Calydoniae, deflete lugendam vicem

CHORUS AETOLARUM MULIERUM.

*Mulieres Calydoniae Deianirae sortem deflent; ambitionem, avaritiam, luxum, ceteraque mortalium studia inania detestantur; priorem fortunam laudant*

- Flemus casus, Oenei, tuos,  
 585 Comitum primos turba per annos;  
 Flemus dubios, veneranda, toros  
 Nos Acheloi tecum solitae  
 Pulsare vadum, cum iam tumidas  
 Vere peracto poneret undas,  
 590 Gracilisque gradu serperet aequo,  
 Nec praecipitem volveret amnem  
 Flavus rupto fonte Lycormas;  
 Nos Palladias ire per aras,  
 Et virgineos celebrare choros;  
 595 Nos Cadmeis orgia ferre  
 Tecum solitae condita cistis,  
 Cum iam pulso sidere brumae  
 Tertia soles evocat aestas,  
 Et spiciferae concessa deae  
 600 Attica mystas claudit Eleusin.  
 Nunc quoque, casum quemcunque times,  
 Fidas comites accipe fati:

Nam rara fides,  
 Ubi iam melior fortuna ruit.  
 Tu quicumque es, qui sceptrā tenes, | III m. 5, 21 605  
 Licet omne tua vulgus in aula  
 Centum pariter limina pulset:  
 Cum tot populis stipatus eas,  
 In tot populis vix una fides.  
 Tenet auratum limen Erinnys; 610  
 Et cum magnae patuere fores,  
 Intrans Fraudēs, cautique Dolī,  
 Ferrumque latens; cumque in populos  
 Prodire parant, comes Invidia est.  
 Noctem quoties summovet Eos, 615  
 Regem toties credite nasci.  
 Pauci reges, non regna colunt.  
 Plures fulgor concitat aulae.  
 Cupit hic regi proximus ipsi  
 Clarus latas ire per urbes: 620  
 Urit miserum gloria pectus.  
 Cupit hic gazis implere famem;  
 Nec tamen omnis plaga gemmiferi  
 Sufficit Istri, nec tota sitim  
 Lydia vincit, nec, quae Zephyro 625  
 Subdita tellus stupet aurato  
 Flumine clarum radiare Tagum; | III 10.7  
 Nec, si totus serviat Hebrus,  
 Ruraque dives cingat Hydaspes,  
 Intraque suos currere fines  
 Spectet toto flumine Gangem.  
 Avidis, avidis natura parum est.  
 Colit hic reges regumque lares,  
 Non ut presso vomere semper  
 Nunquam cesset curvus arator; 635  
 Vel mille secent arva coloni:  
 Solos optat, quas ponat, opes.  
 Colit hic reges, calcet ut omnes

Heronius  
 (Pfeiler) III 10, 8  
 630

- Perdatque alios, nullumque levet;  
 640 Tantum ut noceat, cupit esse potens.  
 Quota pars moritur tempore fati!  
 Quos felices Cynthia vidit,  
 Vidit miseros enata dies.  
 Rarum est felix idemque senex.  
 645 Caespes Tyrio mollior ostro III 4.1  
 Solet imparidos ducere somnos;  
 Aurea rumpunt tecta quietem,  
 Vigilesque trahit purpura noctes.  
 O si pateant pectora ditum! — IV 2.9  
 650 Quantos intus sublimis agit  
 Fortuna metus! Bruttia Coro  
 Pulsante fretum mitior unda est.  
 Pectora pauper secunda gerit.  
 Tenet e patula pocula fago,  
 655 Sed non trepida tenet illa manu.  
 Carpit faciles vilesque cibos,  
 Sed non strictos respicit enses;  
 Aurea miscet pocula sanguis.  
 Coniux modico nupta marito  
 660 Non disposito clara monili  
 Gestat pelagi dona rubentis; | III 3.3  
 Nec gemmiferas detrahit aures IV 8.11  
 Lapis Eoa lectus in unda  
 Nec Sidonio mollis aheni  
 665 Repetita bibit lana rubores;  
 Nec Maeonia distinguit acu,  
 Quae Phoebeis subditus kuris  
 Legit Eois Ser arboribus.  
 Quaelibet herbae tinxere colores,  
 670 Quas indoctae nevere manus;  
 Sed non dubios fovet illa toros;  
 Sequitur dira lampade Erinnys  
 Quarum populi coluere diem.  
 Nec sibi felix pauper habetur

Nisi felices cecidisse videt.	675
Quisquis medium defugit iter, Stabili nunquam tramite curret. Dum petit unum præbere diem, Patrioque puer constitit axe, Nec per solitum decurrit iter,	680
Sed Phoebeis ignota secat Sidera flammis errante rota, Secum pariter perdidit orbem. Medium coeli dum sulcat iter: Tenuit placitas Daedalus oras,	685
Nullique dedit nomina ponto; Sed dum volucres vincere veras Icarus audet, patriasque puer Despicit alas, Phoeboque volat Proximus ipsi:	690
Dedit ignoto nomina ponto. Male pensantur magna ruinis. Felix alius magnusque sonet; Me nulla vocet turba potentem. Stringat tenuis littora puppis,	695
Nec magna meas aura phaselos Iubeat medium scindere pontum. Transit tutos Fortuna sinus, Medioque rates quaerit in alto, Quarum feriunt suppara nubes.	700
Sed quid pavido territa vultu, Qualis Baccho saucia Thyas, Fertur rapido regina gradu? Quae te rursus fortuna rotat, Miseranda, refer. Licet ipsa neges:	705
Vultus loquitur, quodcunque tegis.	

## ACTUS TERTIUS.

## DEIANIRA, CHORUS.

*Deianiram, periculo veneni ad solem expositi flammisque  
concipientis facto, consilii sui poenitet.*

- DEIAN. Vagus per artus errat excussos tremor;  
Erectus horret crinis; impulsis adhuc  
Stat terror animis, et cor attonitum salit,  
710 Pavidumque trepidis palpitat venis iecur.  
Ut fractus Austro pontus etiamnum tumet,  
Quamvis quiescat languidis ventis dies:  
Ita mens adhuc vexatur excusso metu.  
Semel profecto premere felices deus  
715 Cum coepit, urget; hos habent magna exitus.  
CHOR. Quis tam impotens, o misera, te casus ro-  
tat?

- DEIAN. Ut missa palla est tabe Nessea illita,  
Thalamisque moerens intuli gressum meis:  
Nescio quid animus timuit, et fraudem struit.  
720 Libet experiri. Solibus virus ferum  
Flammisque Nessus sanguinem ostendi arcuit.  
Hic ipse, fraudes esse, praemonuit dolus;  
Et forte nulla nube respersus iubar  
Laxabat ardens fervidum Titan diem.  
725 Vix ora solvi patitur etiamnum timor:  
Medios in ignes solis et clarum facem,  
Quo tincta fuerat palla vestisque inlita,  
Abiectus horret sanguis, et Phoebi coma  
Tepefactus ardet. Vix quo monstrum eloqui.  
730 Nives ut Eurus solvit, aut tepidus Notus,  
Quas vere primo lubricus perdit Mimas;

# HERCULES OCTAEUS. ACT. III. 313

Utque involutos frangit Ionio salo  
 Opposita fluctus Leucas, et lassus tumor  
 In littore ipso spumat; aut coelestibus  
 Adpersa tepidis tura laxantur focis: 735  
 Sic languet omne velus, et perdit comam;  
 Quin ipsa tellus spumeos motus agit,  
 Et quidquid illa tabe contactum est, labat.  
 Dumque ista miror: causa mirandi perit,  
 Timensque tacita sequitur, et quassat caput. 740  
 Gnatum paventem cerno et ardenti pede  
 Gressus ferentem. Prome, quid portes novi!

## HYLLUS, DEIANIRA, NUTRIX.

*Intellecto ex Hylo funesti muneris malo, Deianira sibi mortem consciscit.*

HYL. I, profuge! quaere, si quid ulterius patet  
 Terris, freto, sideribus, Oceano, Inferis!  
 Ultra labores, water, Alcidae fuge! 745

DEIAN. Nescio quod animus grande praesagit malum.

HYL. Regna, triumphas, templa Iunonis pete:

Haec tibi patent; delubra praeclusa omnia.

DEIAN. Effare, qui me casus insontem premat. — I 5, 27

HYL. Decus illud orbis atque praesidium unicum, 750

Quem fata terris in locum dederant Iovis,

O mater, abiit. Membra et Herculeos toros

Urit lues nescio qua. Qui domuit feras,

Ille, ille victor vincitur, moeret, dolet.

Quid quaeris ultra? DEIAN. Miserias properant

suas 755

Audire miseri. Fare: quo posita in statu

Iam nostra domus est? O lares, miseri lares,

Nunc vidua, nunc expulsa, nunc feror obruta!

HYL. Non sola moeres Herculem; toto iacet

Mundo gemendus. Fata ne, mater, tua 760

Privata credas: iam genus totum obstrepit;

Hunc eiulatum, quem gemis, cuncti gemunt;  
Commune terris omnibus pateris malum.

Luctum occupasti: prima, non sola, Herculem,

765 Miseranda, moeres. DEIAN. Quam prope a leto  
tamen,

Ede, ede, quaeso, iaceat Alcides meus.

HYL. Mors refugit illum, victa quae in regno suo

Semel est; nec audent fata tam vastum nefas

Admittere. Ipsas forsitan trepida colus

770 Clotho manu proiecit, et fatum Herculis  
Timet peragere. Proh diem! infandum diem!

Hocne ille summo magnus Alcides erit?

DEIAN. Ad fata et umbras atque peiorem polum

Praecedere illum dicis, an possum prior

775 Mortem occupare? Fare, si nondum occidit!

HYL. Euboica tellus vertice immenso tumens

Pulsatur omni latere; Phrixum mare

Scindit Caphareus; servit hoc Austro latus;

At qua nivosi patitur Aquilonis minas,

780 Euripus undas flectit instabilis vagas,  
Septemque cursus volvit, et totidem refert,  
Dum lassa Titan mergat Oceano inga.

Hic rupe celsa, nulla quam nubes ferit,

Annosa fulgent templa Cenaei Iovis.

785 Ut stetit ad aras omne votivum pecus,  
Totumque tauris gemuit auratis nemus:

— Spolium leonis sordidum tabo exuit,  
Posuitque clavae pondus, et pharetra graves  
Laxavit humeros. Veste tum fulgens tua,

790 Cana revinctus populo horrentem comam,  
Succendit aras. „Accipe has,” inquit, „focis,  
Non false, messes, genitor; et largo sacer  
Splendescat ignis ture, quod Phoebum colens  
Dives Sabaeis colligit truncis Arabs! —

795 Pacata tellus,” inquit, „et coelum, et freta:  
Feris subactis omnibus victor redi:

Depone fulmen.“ Gemitus in medias preces,  
 Stupente et ipso, cecidit; hinc coelum horrido  
 Clamore complet. Qualis impressa fugax  
 Taurus bipenni vulnus et telum ferens 800  
 Delubra vasto trepida mugitu replet;  
 Aut quale mundo fulmen emissum tonat:  
 Sic ille gemitus sidera et pontum ferit,  
 Et vasta Chalcis sonuit, et voces Cyclas  
 Excepit omnis; hinc petrae Capharides, 805  
 Hinc omne voces reddit Herculeas nemus.  
 Flentem videmus. Vulgus antiquam putat  
 Rabiem redisse: tum fugam famuli petunt.  
 At ille vultus ignea torquens face,  
 Unum inter omnes quaerit et sequitur Lichan. 810  
 Complexus aras ille tremebunda manu,  
 Mortem metu consumsit, et parvum sui  
 Poenae reliquit. Dumque tremebundum manu  
 Tenuit cadaver: „Hac manu, hac,“ inquit, „ferar,  
 O fata, victus? Herculem perimit Lichas? 815  
 Ecce alia clades: Hercules perimit Lichan.  
 Facta inquinantur: fiat hic summus labor.“ *7. 24*  
 In astra missus fertur, et nubes vago  
 Spargit cruore. Talis in coelum exilit  
 Arundo Getica visa dimitti manu, 820  
 Aut quam Cydon excussit; inferius tamen  
 Et tela fugient. Truncus in pontum cadit,  
 In saxa cervix; funus ambobus iacet.  
 „Resistite,“ inquit: „non furor mentem abstulit;  
 Furore gravius istud atque ira malum est. 825  
 In me iuvat saevire.“ Vix pestem indicat,  
 Et saevit: artus ipse dilacerat suos,  
 Et membra vasta carpit avellens manu:  
 Exuere amictus quaerit. Hoc solum Herculem  
 Non posse vidi; trahere conatus tamen 830  
 Et membra traxit: corporis palla horridi  
 Pars est, et ipsam vestis immiscet cutem.





HERCULES OETAeus. ACT III. 317

Eligere nescis, anime, cui telo incubes?  
 Utinam esset, utinam fixus in thalamis meis  
 Hercules ensis! huic decet ferro immori. — 870

Una perire dextera nobis sat est?  
 Coite gentes! saxa et incensas faces  
 Iaculetur orbis; nulla nunc cesset manus.  
 Corripite tela: vindicem vestrum abstuli.  
 Impune saevi sceptrâ iam reges gerent; 875

Impune iam nascetur indomitum malum;  
 Reddentur arae cernere adsuetae hostiam  
 Similem colenti. Sceleribus feci viam;  
 Ego vos tyrannis, regibus, monstris, feris,  
 Saevisque rapto vindice opposui deis. 880

Cessas, Tonantis socia? non spargis facem,  
 Imitata fratrem, et mittis ereptam Iovi,  
 Meque ipsa perdis? Laus tibi erepta inclita est,  
 Ingens triumphus: aemuli, Iuno, tui  
 Mortem occupavi. NUTR. Quid domum impulsam  
 trahis? 885

Erroris est hoc omne, quodcunque est, nefas.  
 Haud est nocens, quicunque non sponte est nocens.  
 DEIAN. Quicunque facto ignoscit et parcit sibi,  
 Errare meruit: morte damnari placet.

NUTR. Nocens videri, qui mori quaerit, cupit. 890

DEIAN. Mors innocentes sola deceptos facit.

NUTR. Titana fugies? DEIAN. Ipse me Titan fugit.

NUTR. Vitam relinques? DEIAN. Miseram, ut Al-  
 den sequar.

NUTR. Superest, et auras ille coelestes trahit.

DEIAN. Vinci Hercules cum potuit, hinc coepit  
 mori. 895

NUTR. Gnatum relinquens, fataque abruptes tua?

DEIAN. Quamcunque natus sepelit, haec vixit diu?

NUTR. Virum sequeris. DEIAN. Praegredi castae  
 solent.

NUTR. Si te ipsa damnas: scelere te, misera, arguis.

- 900 **DEIAN.** Nemo nocens sibi ipse poenas abrogat.  
**NUTR.** Multis remissa est vita, quorum error nocens.  
Non dextra, fuerat. Fata quis damnat sua?  
**DEIAN.** Quinque fata iniqua sortitus, fugit.  
**NUTR.** Hic ipse Megaren nempe confixam suis  
905 Stravit sagittis atque natorum indolem,  
Lernaea figens tela furibunda manu.  
Ter parricida factus ignovit tamen  
Sibi: nam furoris fonte Cinyphio scelus  
Sub axe Libyco tersit, et dextram abluit.  
910 Quo, misera, pergis? quid tuas damnas manus?  
**DEIAN.** Damnat meas devictus Alcides manus:  
Placet scelus punire. **NUTR.** Si novi Herculem:  
Aderit cruenti forsitan victor mali,  
Dolorque fractus cedit Alcidae tuo.  
915 **DEIAN.** Exedit artus virus, ut fama est, hydrae,  
Immensa pestis coniugis membra abstulit.  
**NUTR.** Serpentis illi virus enectae autumas  
Haud posse vinci, qui malum et vivum tulit?  
Elisit hydram, dente cum infixo stetit  
920 Media palude, victor, effuso obrutus  
Artus veneno. Sanguis hunc Nessi opprimet,  
Qui vicit ipsas horridas Nessi manus?  
**DEIAN.** Frustra tenetur ille, qui statuit mori.  
Proinde lucem fugere decretum est mihi.  
925 Vixit satis, quicumque cum Alcide occidit.  
**NUTR.** Per has aniles ecce! te supplex comas,  
Atque ubera ista paene materna obsecro:  
Depone tumidas pectoris laesi minas,  
Mortisque dirae expelle decretum horridum!  
930 **DEIAN.** Quicumque misero forte dissuadet mori,  
Crudelis ille est. Interim poena est mori,  
Sed saepe donum: pluribus venia obfuit.  
**NUTR.** Defende saltem dexteram, infelix, tuam;  
Fraudisque facinus esse, non nuptae, sciant.  
935 **DEIAN.** Defendar illic: Inferi absolvent ream;

A me ipsa damnor. Purget has Pluton manus.  
 Stabo ante ripas, immemor Lethe, tuas,  
 Et umbra tristis coniugem excipiam meum  
 Sed tu, nigrantis regna qui torques poli,  
 Para laborem! Scelera quae quisque ausus est, 940  
 Hic vicit error; Iuno non ausa Herculem est  
 Eripere terris. Horridam poenam para!  
 Sisyphia cervix cesset, et nostros lapis  
 Impellat humeros. Me vagus fugiat latex,  
 Meamque fallax unda deludat sitim. 945  
 Merui manus praebere turbinibus tuis,  
 Quaecunque regem Thessalum torques, rota!  
 Effodiat avidus hinc et hinc vultur fibras.  
 Vacet una Danais: has ego explebo vices:  
 Laxate manes! Recipe me comitem tibi, 950  
 Phasiaca coniux! peior haec, peior tuo  
 Utroque dextra est scelere, seu mater nocens,  
 Seu dira soror es. Adde me comitem tuis,  
 Threicia coniux, sceleribus! Gnatam tuam,  
 Althaea mater, recipe! nunc veram tuam 955  
 Agnosce prolem! Quid tamen tantum manus  
 Vestrae abstulerunt? Claudite Elysium mihi,  
 Quaecunque fidae coniuges nemoris sacri  
 Lucos tenetis! Si qua respersit manus  
 Viri cruore, nec memor castae facis 960  
 Stricto cruenta Belias ferro stetit:  
 In me suas agnoscat et laudet manus.  
 In hanc abire coniugum turbam libet;  
 Sed et illa fugiet turba tam diras manus.  
 Invicte coniux, innocens animus mihi, 965  
 Scelestas manus est. Proh nimis mens credula!  
 Proh Nesse fallax, atque semiferi doli!  
 Auferre cupiens pellici, eripui mihi.  
 Recede, Titan, tuque, quae blanda tenes  
 In luce miseros, vita: cariturae Hercule 970  
 Lux vilis ista est. Exigam poenas tibi,

- Reddamque vitam! Fata an extendo mea,  
 Mortemque, coniux, ad tuas servo manus?  
 Virtusne superest aliqua, et armatae manus  
 975 Intendere arcum tela missurum valent;  
 An arma cessant, teque languenti manu  
 Non audit arcus? Si potest letum dare:  
 Animosa, coniux, dexteram expecto tuam:  
 Mors differatur. Frange, ut insontem Lichan;  
 980 Alias in urbes sparge, et ignotum tibi  
 Emitte in orbem! perde, ut Arcadiae nefas,  
 Et quidquid aliud restitit! Ab illis tamen,  
 Coniux, redisti. HYL. Parce iam, mater, precor.  
 Ignosce fati! Error a culpa vacat.  
 985 DEIAN. Si vera pietas, Hylle, quaerenda est tibi:  
 Iam perime matrem! Pavida quid renuit manus?  
 Quid ora flectis? Hoc erit pietas scelus.  
 Ignave, dubitas? Herculem eripui tibi;  
 Haec, haec peremit dextra, cui debes patri  
 990 Avum Tonantem. Maius eripui decus,  
 Quam luce tribui. Si tibi ignotum est nefas  
 A matre disce. Seu tibi iugulo placet  
 Mersisse ferrum, sive maternum libet  
 Invadere uterum: mater intrepidum tibi  
 995 Praebeat animum. Non erit totum scelus  
 A te peractum: dextera sternar tua,  
 Sed mente nostra. Gnatus Alcidae times?  
 Ita nulla peragas iussa, nec frangens mala  
 Erres per orbem; si qua nascetur fera:  
 1000 Referas parentem. Dexteram intrepidam para!  
 Patet ecce! plenum pectus aerumnis: feri.  
 Scelus remitto. Dexteræ parent tuæ  
 Eumenides ipsæ. Verberum crepuit sonus:  
 Quænam ista, torquens angue vipereo comam,  
 1005 Temporibus atras squalidis pinnas quatit?  
 Quid dira me flagrante persequeris face  
 Megaera? Poenas poscis Alcidae? Dabo.

HERCULES OETAEUS. ACT. III. 321

Iamne Inferorum, diva, sedere arbitri? III 12. 40  
Sed, ecce, diras carceris video forēs!

Quis iste saxum immane detritis gerit 1010

Iam senior humeris? Ecce, iam vectus lapis

Quaerit relabi! Membra quis praebet rotae?

Hic, ecce, pallens dira Tisiphone stetit,

Causam poposcit! Parce verberibus, precor,

Megaera, parce! sustine Stygias faces: 1015

Scelus est amoris. Sed quid hoc? Tellus labat,

Et aula tectis crepuit excussis! Minax

Unde iste coetus? Totus in vultus meos

Decurrit orbis, hinc et hinc populi fremunt,

Totusque poscit vindicem mundus suum. 1020

Iam parcite, urbes! — Quo fugam praeceps agam?

Mors sola portus dabitur aerumnis meis.

Testor nitentis flammeam Phoebi rotam,

Superosque testor: Herculem in terris adhuc

Moritura linquo. HYL. Fugit attonita. Hei mi-  
hi! 1025

Peracta iam pars matris est: statuit mori

Nunc nostra superest, mortis auferre impetum.

O misera pietas! si mori matrem vetas:

Patri es scelestus; si mori pateris: tamen

In matre peccas. Surgit hinc illinc nefas. 1030

Inhibenda tamen est, verum et eripiam scelus.

CHORUS.

*Sumta ab Herculis robore labefactato occasione, Chorus omnia interitui obnoxia, nihil natum aeternum canit; quam sententiam ab auctore Orpheo commendat, eiusque artem obiter celebrat.*

Verum est, quod cecinit sacer

Thressae sub Rhodopes iugis,

Aptans Pieriam chelyn,

Orpheus, Calliopae genus:

SEN. TRAG.

X

1035

- Aeternum fieri nihil.  
 Illius stetit ad modos III 12, 8  
 Torrentis rapidi fragor;  
 Oblitusque sequi fugax  
 1040 Amisit liquor impetum;  
 Et dum fluminibus mora est.  
 Defecisse putant Geten  
 Hebrum Bistones ultimi.  
 Advexit volucrem nemus,  
 1045 Et silva residens venit;  
 Aut si quae aera pervolat,  
 Auditis vaga cantibus  
 Ales deficiens cadit.  
 Abrupit scopulos Athos,  
 1050 Centauros obiter ferens,  
 Et iuxta Rhodopen stetit  
 Laxatam nive candidus.  
 Et quercum fugiens suam,  
 Ad vatem properat Dryas.  
 1055 Ad cantus veniunt suis III 12, 8  
 Ipsae cum latebris ferae;  
 Iuxtaque pavidum pecus  
 Sedit Marmaricus leo; IV 3. 11  
 Nec damae trepidant lupos,  
 1060 Et serpens latebras fugit,  
 Tunc oblita veneni.  
 Quin per Taenarias fores  
 Manes cum tacitos adit: III 12, 19  
 Moerentem feriens chelyn.  
 1065 Cantu Tartara flebili  
 Et tristes Erebi deos  
 Vicit, nec timuit Stygis - III 12, 20  
 Iuratos Superis lacus.  
 Haesit non stabilis rota - III 12, 24  
 1070 Victo languida turbine;  
 Increvit Tityi iecur, III 12, 26

Dum cantus volucres tenet;		
Audito quoque navita		
Inferni ratis aequoris		
Nullo remigio venit.		
Tum primum Phrygius senex.	Q 12. 37	1075
Undis stantibus immemor		
Excussit rabidam sitim,		
Nec pomis adhibet manus;		
Sed cum linqueret Inferos	id. 45	
Orpheus carmina fundens	III 12. 21	1080
Et vinci lapis improbus,		
Et vatem potuit sequi.		
Consumtas iterum deae		
Suppleant Eurydices colos;		
Sed dum respicit immemor	id. 46	1085
Nec credens sibi redditam	id. 50	
Orpheus Eurydicen sequi.	III 12. 43, 58	
Cantus praemia perdidit;		
Quae nata est iterum, perit.		1090
Tum solamina cantibus		
Quaerens, flebilibus modis	III 12. 7	
Haec Orpheus cecinit Getis:		
Leges in Superos datas,	II 3. 18	
Et qui tempora digerens		1095
Quatuor praecipitis deus		
Anni disposuit vices.		
Nulli non avidi colus		
Parcas stamina nectere.		
Quod natum est, poterit mori.	II 3. 13	1100
Vati credere Thracio	III 12. 6	
Devictus iubet Hercules.		
Iamiam legibus obrutis		
Mundo cum veniet dies:		
Australis polus obruet,		1105
Quidquid per Libyam iacet,		
Et sparsus Garamas tenet;		



- Arctous polus obruet,  
 Quidquid subiacet axibus,  
 1110 Et siccus Boreas ferit.  
 Amisso trepidus polo  
 Titan excutiet diem;  
 Coeli regia concidens  
 Ortus atque obitus trahet;  
 1115 Atque omnes pariter deos  
 Perdet mors aliqua et chaos;  
 Et Mors fata novissima  
 In se constituet sibi.  
 Quis mundum capiet locus?  
 1120 Discedet via Tartari,  
 Fractis ut pateat polis?  
 An quod dividit aethera  
 A terris spatium, sat est  
 Et mundi nimium malis?  
 1125 Quis tantum capiet nefas  
 Fati? quis superis locus  
 Pontum, sidera, Tartara,  
 Regna unus capiet tria?  
 Sed quis non modicus fragor  
 1130 Aures attonitas movet?  
 Est, est Hercules sonus!
- 

## ACTUS QUARTUS.

### HERCULES, CHORUS.

*Euulans Hercules conqueritur, indigne ferens, se indigna morte perire, femineis scilicet dolis.*

HERC. **C**onverte, Titan clare, anhelantes equos!  
 Emitte noctem: pereat hic mundo dies,

Quo morior; atra nube inhorrescat polus  
 Obsta novercae! Nunc, pater, coecum chaos 1135  
 Reddi decebat; hinc et hinc compagibus  
 Ruptis uterque debuit frangi polus.  
 Quid parcis astris? Herculem amittis, pater.  
 Nunc partem in omnem, Iupiter, specta poli,  
 Ne quis gigas Thessalica iaculetur iuga, 1140  
 Et fiat Othrys pondus Encelado leve!  
 Laxabit atri carceris iamiam fores  
 Pluton superbus; vincula excutiet patri,  
 Coelumque reddet. Ille, qui pro fulmine  
 Tuisque facibus natus in terris eram, 1145  
 Ad Styga revertor. Surget Enceladus ferox,  
 Mittetque, quo nunc premitur, in Superos onus.  
 Regnum omne, genitor, aetheris dubium tibi  
 Mors nostra faciet. Antequam spolium tui  
 Coelum omne fiat, conde me tota, pater, 1150  
 Mundi ruina! frange, quem perdis, polum!  
 CHOR. Non vana times, gnate Tonantis:  
 Iam Thessalicam Pelion Ossam  
 Premet, et Pindo congestus Athos  
 Nemus aethereis inseret astris. 1155  
 Vincet scopulos inde Typhoeus,  
 Et Tyrrhenam feret Inarimen;  
 Feret Aetnaeos inde caminos *IL 5. 25*  
 Scindetque latus montis aperti,  
 Nondum Enceladus fulmine victus. 1160  
 Iam te coeli signa sequentur.  
 HERC. Ego, qui relictâ morte, contemta Styge,  
 Per media Lethes stagna cum spolio redi,  
 Cum paene trepidis excidit Titan equis;  
 Ego, quem deorum regna senserunt tria, 1165  
 Morior; nec ullus per meum stridet latus  
 Transmissus ensis; haud meae telum necis  
 Saxum est, nec instar montis abrupti latus,  
 Aut totus Othrys; non truci rictu gigas

- 1170 Pindo cadaver obruit toto meum:  
Sine hoste vincor; quodque me torquet magis  
O misera virtus! summus Alcidae dies  
Nullum malum prosternit; impendo, hei mihi,  
In nulla vitam facta! Proh mundi arbiter,
- 1175 Superique, quondam dexteræ testes meae,  
Proh cuncta tellus, Herculis vestri placet  
Mortem perire? Dirus o nobis pudor!  
O turpe fatum! femina Herculeae necis  
Auctor feretur; auctor Alcides quibus?
- 1180 Invicta si me cadere feminea manu  
Voluere fata, perque tam turpes colos  
Mea mors cucurrit: cadere potuissem, hei mihi,  
Iunonis odio: feminae caderem minis,  
Sed coelum habentis. Si nimis, Superi, fuit:
- 1185 Scythico sub axe genita domuisset meas  
Vires Amazon. Feminae cuius manu  
Iunonis hostis vincor? Hinc gravior tui,  
Noverca, pudor est! Quid diem hunc laetum vo-  
cas?
- Quid tale tellus genuit iratae tibi?
- 1190 Mortalis odia femina excessit tua.  
Adhuc ferebas esse te Alcidae imparem;  
Victa es duobus: pudeat irarum deos.  
Utinam meo cruore satiasset suos  
Nemeaea rictus pestis, aut centum anguibus
- 1195 Vallatus hydram tabe pavissem mea!  
Utinam fuisset praeda Centauris datus,  
Aut inter umbras, victus, aeterno miser  
Saxo sederem, spolia cum traxi ultima. V 7.29  
Fato stupente! Nunc ab inferna Styge
- 1200 Lucem recepi, lucis evici moras;  
Ubique me mors fugit, ut telo inclito  
Mortis carerem. Proh feri victi et ferae!  
Non me triformis sole conspecto canis III 12.30  
Ad Styga reduxit; non sub Hesperio polo

**HERCULES OETAeus ACT. IV. 327**

**Ibera vicit turba pastoris feri; 1205**

**Non gemina serpens; perdidit mortem, hei mihi,  
Toties honestam; titulus extremus quis est?**

**CHOR. Viden', ut laudis conscia virtus**

**Non Lethaeos horreat amnes?**

**Pudet auctoris, non morte dolet. 1210**

**Cupis extremum finire diem**

**Vasta tumidi mole gigantis,**

**Et montiferum Titana pati,**

**Rabidaeque necem debere ferae;**

**Sed tua causa est miseranda magis, 1215**

**Quod nulla fera est, nullusque gigas:**

**Iam quis dignus necis Herculeae**

**Superest auctor, nisi dextra tua?**

**HERC. Heu! qualis intus scorprios, quis fervida**

**Plaga revulsus cancer infixus meas 1220**

**Urit medullas? Sanguinis quondam capax**

**Tumidi iecur pulmonis arentes fibras**

**Distendit; ardet felle siccato iecur,**

**Totumque lentus sanguinem avexit vapor.**

**Primam cutem consumsit; hinc aditum nefas 1225**

**In membra fecit, abstulit costis latus,**

**Exedit artus penitus, et totas malum**

**Hausit medullas: ossibus vacuis sedet.**

**Nec ossa durant ipsa, sed compagibus**

**Discussa ruptis mole conlapsa fluunt. 1230**

**Defecit ingens corpus, et pesti satis**

**Herculea non sunt membra. Proh, quantum est  
malum,**

**Quod esse vastum fateor! o dirum nefas!**

**En cernite, urbes, cernite ex illo Hercule**

**Quid iam supersit! Herculem agnoscis, pater? 1235**

**Hisne ego lacertis spolia Nemeaei mali**

**Elisa pressi? tensus hac arcus manu**

**Astris ab ipsis detulit Stympthalidas?**

**His ego citatam gressibus vici feram,**

- 1240 Radiante clarum fronte gestantem caput?  
His fracta Calpe manibus emisit fretum?  
His tot ferae, tot scelera, tot reges iacent?  
His mundus humeris sedit? haec moles mea est!  
Haecne illa cervix? has ego opposui moras
- 1245 Coelo ruenti? quis mea custos manu III, 2, 29  
Trahetur ultra Stygius? ubi vires prius  
In me sepultae! Quid patrem adpello Iovem?  
Quid per Tonantem vindico coelum miser?  
Iamiam meus credetur Amphitryon pater.
- 1250 Quaecunque pestis viscere in nostro lates,  
Procede: quid me vulnere occulto petis?  
Quis te sub axe frigido pontus Scythes,  
Quae pigra Tethys genuit, aut Maurum premens  
Ibera Calpe littus? O dirum malum,
- 1255 Utrumne serpens squalidum crista caput  
Vibrans, an aliquod es mihi ignotum malum?  
Numquid cruore es genita Lernaee ferae,  
An te reliquit Stygius in terris canis?  
Omne es malum nullumque. Quis vultus tibi est!
- 1260 Concede saltem scire, quo peream malo.  
Quaecunque pestis, sive quaecunque es fera:  
Palam timeres. Quis tibi in medias locum  
Fecit medullas? Ecce, derepta cute  
Viscera manus detexit; ulterior tamen
- 1265 Inventa latebra est. O malum simile Herculi!  
Unde iste fletus? unde in has lacrimae genas?  
Invictus olim vultus et nunquam malis  
Lacrimas suis praebere consuetus (pudet!)  
Iam flere didicit. Quis dies fletum Herculis,
- 1270 Quae terra vidit? Siccus aerumnas tuli.  
Tibi illa virtus, quae tot elisit mala,  
Tibi cessit uni! primo et ante omnes mihi  
Fletum abstulisti! durior saxo horrido  
Et chalybe vultus et vaga Symplegade
- 1275 Rictus meos infregit, et lacrimam expulit!

## HERCULES OETAEUS. ACT. IV. 329

Flentem, gementem, summe proh rector poli,  
 Me terra vidit; quodque me torquet magis,  
 Noverca vidit. Urit ecce! iterum fibras;  
 Incaluit ardor. Unde nunc fulmen mihi?  
 CHOR. Quid non possit superare dolor? 1280  
 Quondam Getico durior Haemo,  
 Nec Parrhasio lentior axe,  
 Saevo cessit membra dolori;  
 Fessumque movens per colla caput  
 Latus alterno pondere flectit; 1285  
 Fletum virtus saepe resorbet.  
 Sic Arctoas laxare nives  
 Quamvis tepido sidere Titan  
 Non tamen audet, vincitque faces  
 Solis adusti glaciale iubar. 1290

### HERCULES, ALCMENA.

*Lamentantem Herculem solatur Alcmena.*

HERC. Convertite vultus ad meas clades, pater!  
 Nunquam ad tuas confugit Alcides manus;  
 Non, cum per artus hydra foecundum meos  
 Caput explicaret. Inter infernos lacus  
 Possessus atra nocte cum Fato steti, 1295  
 Nec invocavi. Tot feras vici horridas,  
 Reges, tyrannos; non tamen vultus meos  
 In astra torsi: semper haec nobis manus  
 Votum spopondit. Nulla me propter sacro  
 Micuere coelo fulmina; hic aliquid dies 1300  
 Optare iussit. Primus audierit preces,  
 Idemque summus. Unicum fulmen peto.  
 Giganta crede: non minus coelum mihi  
 Adserere potui; dum patrem verum puto,  
 Coelo peperci. Sive crudelis, pater, 1305  
 Sive es misericors: commoda gnato manum!  
 Propera ante mortem, et occupa hanc laudem tibi!

- Vel, si piget, manusque detrectat nefas:  
Emitte Siculo vertice arduentes, pater,
- 1310 Titanas in me, qui manu Pindum ferant,  
Aut te, Ossa, qui me monte proiecto opprimant!  
Abrumpat Erebi claustra, me stricto petat  
Bellona ferro. Mitte Gradivum truncem!  
Armetur in me dirus: est frater quidem.
- 1315 Sed ex noverca. Tu quoque Alcidae soror  
Tantum ex parente, cuspidem in fratrem tuum  
Iaculare, Pallas! Supplices tendo manus  
Ad te, noverca: sparge tu saltem, precor,  
Telum! perire feminae possum manu.
- 1320 Iam fracta, iam satiata, quid pascis minas?  
Quid quaeris ultra? Supplicem Alciden vides.  
Et nulla tellus, nulla me vidit fera  
Te deprecantem; nunc mihi irata quidem  
Opus est noverca. Nunc tuus cessat dolor?
- 1325 Nunc odia ponis? parcis, ubi votum est mori?  
O terra et urbes, non facem quisquam Herculi,  
Non arma tradet? tela subtrahitis mihi?  
Ita nulla saevas terra concipiat feras  
Post me sepultum, nec meas unquam manus
- 1330 Imploret orbis; si qua nascentur mala,  
Nascatur alius: undeque infelix caput  
Mactate saxis; vincite aerumnas meas!  
Ingrate cessas orbis? excidimus tibi?  
Adhuc malis ferisque suppositus fores,
- 1335 Nisi me tulisses. Vindicem vestrum malis  
Eripite, populi! Tempus hoc vobis datur  
Pensare merita! mors erit pretium omnium.  
AL. CM. Quas misera terras mater Alcidae petam?  
Ubi natus, ubinam est? Certa si visus notat,
- 1340 Reclinis ecce! corde anhelanti aestuat;  
Gemit: peractum est. Membra complecti ulti-  
mum,  
O gnate, liceat spiritus fugiens meo





1375 **ALCM.** Compesce lacrimas saltem, et aerumnas  
doma,

Malisque tantis Herculem indomitum refer,  
Mortemque vince, quod soles; vince Inferos!

**HERC.** Si me catenis horridus vinctum suis  
Praeberet avidae Caucasus volucris dapem:

1380 Scythia gemente flebilis gemitus mihi  
Non extitisset. Si vagas Symplegades  
Utraque premerent rupe: redeuntis minas  
Ferrem ruinae. Pindus incumbat mihi  
Atque Haemus et qui Thracios fluctus Athos

1385 Frangit, Iovisque fulmen excutiens Mimas!  
Non ipse si in me, mater, hic mundus ruat,  
Superque nostros flagret incensus toros  
Phoebeus axis, degener mentem Herculis  
Clamor domaret. Mille decurrant ferae,

1390 Pariterque lacerent; hinc feris clangoribus  
Aetheria me Stympthalis, hinc taurus minax  
Cervice tota pulset; et quidquid fuit  
Solum quoque ingens, surgat hinc illinc simul!  
Artusque nostros dirus immittat Sinis;

1395 Sparsus silebo. Non ferae excutient mihi,  
Non arma gemitus; nil, quod impelli potest.  
**ALCM.** Non virus artus, gnate, femineum coquit;  
Sed dura series operis et longus tibi  
Pavit cruentos forsitan morbos labor.

1400 **HERC.** Ubi Morbus, ubinam Pestis, aut si aliquid  
mali

Adhuc in orbe est? Veniat! — Huc aliquis mihi  
Intendat arcus! — Nuda sufficiet manus.

Procedat, agendum, huc! **ALCM.** Hei mihi, sen-  
sum quoque

Excussit illi nimius impulsus dolor.

1405 Removete, quaeso, tela, et infestas, precor,  
Rapite hinc sagittas: igne suffusae genae  
Scelus minantur. Quas petam latebras anus?

Dolor iste furor est: Herculem solus domat. —  
 Cur deinde latebras aut fugam vecors petam?  
 Obire forti meruit Alcmene manu. 1410  
 Vel scelere pereat, antequam letum mihi  
 Ignavus aliquis mandet, ac turpis manus  
 De me triumphet. Ecce, lassatus malis  
 Sopore fessas adligat venas dolor,  
 Gravique anhelum pectus impulsu quatit 1415  
 Favete, Superi! si mihi gnatum inclitum  
 Miserae negatis: vindicem saltem, precor,  
 Servate terris! abeat excussus dolor,  
 Corpusque vires reparet Herculeum suas!

*HYLLUS, ALCMENA, HERCULES,  
 PHILOCTETES, muta persona.*

*Reversus Hyllus nuntiatur Herculi, Deianiram, postquam se  
 Nessi dolo deceptam compererit, sibi mortem conscivisse.*

HYL. Proh lux acerba, proh capax scelerum dies! 1420  
 Nurus Tonantis occidit; gnatus iacet;  
 Nepos supersum. Scelere materno hic perit;  
 Fraude illa capta est. Quis per annorum vices,  
 Totoque in aevo poterit aerumnas senex  
 Referre tantas? Unus eripuit dies 1425  
 Parentem utrumque! Cetera ut sileam mala,  
 Parcamque fatis: Herculem amitto patrem.  
 ALCM. Compesce voces, inclitum Alcidae genus,  
 Miseraeque fato similis Alcmenae nepos:  
 Longus dolorem forsitan vincet sopor. 1430  
 Sed ecce! lassam deserit mentem quies,  
 Redditque morbo corpus, et luctus mihi.  
 HERC. Quid hoc? rigenti cernitur Trachin iugo,  
 An inter astra positus evasi genus  
 Mortale tandem? Quis mihi coelum parat? 1435  
 Te, te, pater, iam video! placatam quoque  
 Specto novercam. Qui sonus nostras ferit

- Coelestis aures! Iuno me generum vocat.  
 Video nitentem regiam clari aetheris,  
 1440 Phoebique tritam flammae zonam rota! —  
 Cubile video noctis hinc; tenebrae vocant.  
 Quid hoc? quis axem cludit et ab ipsis, pater,  
 Deducit astris? Ora Phoebus modo  
 Afflabat axis: tam prope a coelo fui;  
 1445 Trachina video. Quis mihi terras dedit?  
 Oete modo infra steterat, ac totus fuit  
 Suppositus orbis: tam bene excideras, dolor.  
 Cogis fateri ... Parce, et hanc vocem occupa!  
 Haec, Hylle, dona matris; hoc munus parat.  
 1450 Utinam liceret stipite ingesto impiam  
 Effringere animam, quale Amazonium malum  
 Circa nivalis Caucasi domui latus!  
 O cara Megare, tunc, cum furerem, mihi  
 Coniux fuisti? Stipitem atque arcus date!  
 1455 Dextra inquinetur: laudibus maculam imprimam:  
 Summus legatur femina Hercules labor.  
 HYL. Compesce diras, genitor, irarum minas:  
 Habet; peractum est; quas petis poenas, dedit:  
 Sua peremta dextera mater iacet.  
 1460 HERC. Recte dolori est: manibus irati Herculis  
 Occidere meruit; perdidit comitem Lichas.  
 Saevire in ipsum corpus exanime impetus  
 Atque ira cogit. Cur minis nostris caret?  
 Ipsum cadaver pabulum accipiant ferae!  
 1465 HYL. Plus misera laeso doluit; hinc aliquid quo-  
 que  
 Detrahare velles. Occidit dextra sua,  
 Tuo dolore. Plura, quam poscis, tulit.  
 Sed non cruentae sceleribus nuptae iaces,  
 Nec fraude matris; Nessus hos struxit dolos,  
 1470 Ictus sagittis qui tuis vitam exspuit.  
 Cruore tincta est palla semiferi, pater,  
 Nessusque nunc has exigit poenas sibi.

# HERCULES OETAeus. ACT. IV. 335

**HERC.** Habet; peractum est; fata se nostra explicant.

Lux ista summa est: quercus hanc sortem mihi

Fatidica quondam dederat, et Parnassio 1475

Cirrhæa quatiens templa mugitu nemus:

„Dextra peremti, victor Alcide, viri

„Olim iacebis; hic tibi emenso freta

„Terrasque et umbras finis extremus datur.

Nil querimur ultra: decuit hunc finem dari, 1480

Ne quis superstes Herculis victor foret.

Nunc mors legatur clara, memoranda, inclita,

Me digna prorsus: nobilem hunc faciam diem.

Caedatur omnis silva, et Oetaeum nemus

Concipiat ignes; Herculem accipiat rogos, 1485

Sed ante mortem. Tu genus Poeantium,

Hoc triste nobis, iuvenis, officium adpara!

Herculea totum flamma succendat diem.

Ad te preces nunc, Hylle, supremas fero.

Est clara captas inter, in vultu genus 1490

Regnumque referens, Euryto virgo edita,

Iole; tuis hanc facibus et thalamis para.

Victor cruentus abstuli patriam, lares,

Nihilque miserae praeter Alciden dedi;

Et iste rapitur. Penset aerumnas suas. 1495

Iovis nepotem foveat et gnatum Herculis.

Tibi illa pariat, quidquid ex nobis habet.

Tuque ipsa planctus pone funereos, precor,

O cara genitrix; vivit Alcides tibi:

Virtute nostra pellicem feci tuam 1500

Credi novercam. Sive nascente Hercule

Nox illa certa est, sive mortalis meus

Pater est; licet sit falsa progenies mihi:

Materna culpa cesset et crimen Iovis:

Merui parentem: contuli coelo decus. 1505

Natura me concepit in laudes Iovis.

Quin ipse, quanquam Iupiter, credi meus

Pater esse gaudet. Parce iam lacrimis, parens:

- Superba matres inter Argolicas eris.  
 1510 Quid tale Iuno genuit? Aetherium gerens  
 Sceptrum, et Tonanti nupta, mortali tamen  
 Coelum tenens invidit: Alciden suum  
 Dici, esse voluit. Perage nunc, Titan, vices  
 Solus relictus: ille, qui vester comes  
 1515 Ubique fueram, Tartara et Manes peto.  
 Hanc tamen ad imos perferam laudem inclitam,  
 Quod nulla pestis fudit Alciden palam,  
 Omnesque pestes vicit Alcides palam.

CHORUS.

*Solem orat, ut toti mundo Herculis mortem nuntiet. Herculis apotheosin praedicit, Iovemque precatur, ut vel nulli prodicantur tyranni, feras, monstra, vel redeat Hercules maiorum vindex.*

- O decus mundi, radiato Titan,  
 1520 Cuius ad primos Hecate vapores  
 Lassa nocturnae levat ora bigae,  
 Dic sub Aurora positis Sabaeis,  
 Dic sub Occasu positis Iberis,  
 Quique ferventi quatuntur axe,  
 1525 Quique sub plastro patiuntur Ursae,  
 Dic, ad aeternos properare Manes  
 Herculem et regnum canis inquieti,  
 Unde non unquam remeavit ullus!  
 Sume, quos nubes radios sequantur;  
 1530 Pallidus moestas speculari terras,  
 Et caput turpes nebulae pererrent.  
 Quando, proh Titan, ubi, quo sub axe  
 Herculem in terris alium sequeris?  
 Quas manus, orbis miser, invocabis,  
 1535 Si qua sub Lerna numerosa pestis  
 Sparget in centum rabiem dracones;  
 Arcadum si quis populis vetustis

Fecerit silvas aper inquietas;  
 Thraciae si quis Rhodopes alumnus  
 Durior terris Helices nivosae 1540  
 Pascet humano stabulum cruore?  
 Quis dabit pacem populo timenti,  
 Si quid irati Superi per urbes  
 Iusserint nasci? iacet omnibus par,  
 Quem parem tellus genuit Tonanti. 1545  
 Planctus immensas resonet per urbes,  
 Et, comas nullo cohibente nodo,  
 Feminae exertos feriant lacertos;  
 Solaque, obductis foribus deorum,  
 Tempia securae pateant novercae 1550  
 Vadis ad Lethen Stygiumque littus,  
 Unde te nullae referent carinae;  
 Vadis ad Manes miserandus, unde  
 Morte devicta tuleras triumphum?  
 Umbra nudatis venies lacertis, 1555  
 Languido vultu, tenuique collo;  
 Teque non solum feret illa puppis.  
 Non tamen viles eris inter umbras;  
 Aeaconque inter geminosque Cretas  
 Facta discernes, series tyrannos. 1560  
 Parcite, o dites, inhibete dextras:  
 Laudis est, purum tenuisse ferrum;  
 Dumque regnabas, minimum procellis  
 In tuas urbes licuisse Fatl.  
 Sin locum virtus habet inter astra: 1565  
 Sedis Arctoeae spatium tenebis,  
 An, gravis Titan ubi promit aestus?  
 An sub Occasu tepido nitebis,  
 Unde commisso resonare ponto  
 Audies Calpen? Loca quae sereni 1570  
 Deprimes coeli? quis erit recepto  
 Tutus Alcida locus inter astra?  
 Horrido tantum procul a Leone

- Det pater sedes calidoque Cancro:  
 1575 Ne tuo vultu tremefacta leges  
 Astra conturbent, trepidetque Titan.  
 Vere dum flores venient tepenti, — IV 6. 25-27  
 Et comam silvis hiemes recident,  
 Vel comam silvis revocabit aetas,  
 1580 Pomaque autumnno fugiente cedent,  
 Nulla te terris rapiet vetustas.  
 Tu comes Phoebo, comes ibis astris!  
 Ante nascetur seges in profundo,  
 Vel fretum dulci resonabit unda; IV 6. 11-12  
 1585 Ante descendet glacialis Ursae  
 Sidus, et Ponto vetito frustur,  
 Quam tuas laudes populi quiescant.  
 Te, pater rerum, miseri precamur; III 6. 3  
 Nulla nascatur fera, nulla pestis;  
 1590 Non duces saevos miseranda tellus  
 Horreat; nulla dominetur aula,  
 Qui putet solum decus esse regni,  
 Semper intensum tenuisse ferrum.  
 Si quid in terris iterum timetur,  
 1595 Vindicem terrae petimus relictæ.  
 Hem, quid hoc? mundus tonat! Ecce, moeret,  
 Moeret Alciden pater. An deorum  
 Clamor, an vox est timidæ novercae?  
 Hercule an viso fugit astra Iuno?  
 1600 Passus an pondus titubavit Atlas?  
 An magis diri tremuere Manes  
 Herculem, et visum canis inferorum  
 Fugit abruptis trepidus catenis?  
 Fallimur: laeto venit, ecce, vultu,  
 1605 Quem tulit Poëas, humerisque tela  
 Gestat et notas populis pharetras,  
 Herculis heres!

## ACTUS QUINTUS.

## CHORUS, PHILOCTETES.

*Philoctetes Herculis mortem atque funus nunciat.*

CHOR. Effare casus, iuvenis, Herculeos, precor,  
Vultuque quonam tulerit Alcides necem.

PHIL. Quo nemo vitam. CHOR. Lactus adeone  
ultimes 1610

Invasit ignes? PHIL. Esse iam flammam nihil  
Ostendit ille, qui sub hoc mundo, Hercules,  
Virtute vinci docuit indomita omnia.

CHOR. Inter vapores quis fuit forti locus?

PHIL. Quod unum in orbe vicerat nondum ma-  
lum, 1615

Et flamma victa est; haec quoque accessit feris;  
Inter labores ignis Herculeos abít.

CHOR. Edissere, agedum! flamma quo victa est  
modo?

PHIL. Ut omnis Oeten moesta corripuit manus:  
Huic fagus umbras perdit, et toto facit 1620

Succisa trunco; flectit hic pinum ferox  
Astris minantem, et nube de media vocat;  
Ruitura cautes movit, et silvam trahit  
Secum minorem. Chaonis quondam loquax  
Stat vasta late quereus et Phoebum vetat, 1625

Ultraque totos porrigit ramos nemus;  
Gemit illa multo vulnere impresso minax,  
Frangitque cuneos; resilit incussus chalybs,  
Vulnusque ferrum patitur, et rigidum est parum.  
Commota tandem est; tum cadens latam sui 1630  
Duxit ruinam. Protinus radios locus



- Admisit omnes: sedibus pulsae suis  
Volucres pererrant nemore succiso diem,  
Quaeruntque lassis garrulae pennis domos.
- 1635 Iamque omnis arbor sonuit, et sacrae quoque  
Sensere quercus horridam ferro manum,  
Nullique priscum profuit luco nemus.  
Adgeritur omnis silva, et alternae trabes  
In astra tollunt Herculi angustum rogam.
- 1640 Rapt alta flammis pinus et robur tenax,  
Et brevior ilex; silva sed complet rogos  
Populea salva, frontis Herculeae nemus.  
At ille, ut ingens nemore sub Nasamonio  
Aeger reclinare pectore immugit leo,
- 1645 Fertur. Quis illum credat ad flammis rapti?  
Vultus potentis astra, non ignes, erat.  
Ut pressit Oeten, ac suis oculis rogam  
Lustravit omnem: fregit impositus trabes,  
Arcumque poscit. „Accipe haec,“ inquit, „sate
- 1650 Poeante, dona; munus Alcidae cape!  
Has hydra sensit; his iacent Stympthalides,  
Et quidquid aliud eminus vici malum.  
Virtute felix iuvenis, has nunquam irritas  
Mittes in hostem; sive de media voles
- 1655 Auferre volucres nube: descendunt aves,  
Et certa praedae tela de coelo fluent.  
Nec fallit unquam dexteram hic arcus tuam:  
Librare telum didicit, et certam dare  
Fugam sagittis; ipsa non fallunt iter
- 1660 Emissa nervo tela. Tu tantum, precor,  
Adcommoda ignes et faciem extremam mihi! —  
Hic nodus,“ inquit, „nulla quem capiet manus,  
Mecum per ignes flagret. Hoc telum Herculem  
Tantum sequatur. Hoc quoque acciperes,“ ait,
- 1665 „Si ferre posses. Adiuvet domini rogam.“  
Tum rigida secum spolia Nemeaei mali  
Arsura poscit. Latuit in spolio rogam

# HERCULES OETAEUS. ACT. V. 341

Ingemuit omnis turba, nec lacrimas dolor  
 Cuiquam remisit. Mater in luctum furens  
 Diduxit avidum pectus, atque utero tenus 1670  
 Exerta vastos ubera in planctus ferit;  
 Superosque et ipsum vocibus pulsans Iovem  
 Implevit omnem voce feminea locum.  
 „Deforme letum, mater, Herculeum facis:  
 Compesce lacrimas,“ inquit. „Introrsus dolor 1675  
 Feminæ abeat. Iuno cur lætum diem  
 Te flente ducat? Pellicis gaudet suæ  
 Spectare lacrimas. Contine infirmum iecur  
 Mater: nefas est ubera atque uterum tibi  
 Laniare, qui me genuit.“ Et dirum fremens 1680  
 Qualis per urbes duxit Argolicas canem,  
 Cum victor Erebi Dite contempto redit,  
 Tremente Fato, talis incubuit rogo.  
 Quis sic triumphans lætus in curru stetit  
 Victor, quis illo gentibus vultu dedit 1685  
 Leges tyrannus, quanta pax obitus tulit?  
 Haesere lacrimæ; cecidit impulsus dolor  
 Nobis quoque ipsis; nemo morituro ingemit;  
 Iam flere pudor est. Ipsa, quam sexus iubet  
 Moerere, siccis hæsit Alcmene genis; 1690  
 Stetitque nato pæne iam similis parens.  
 CHOR. Nullasne in astra misit ad Superos preces  
 Arsurus, aut in vota respexit Iovem?  
 PHIL. Iacuit sui securus, et, coelum intuens,  
 Quaesivit oculis, arce an ex aliqua pater 1695  
 Despiceret illum. Tum manus tendens ait:  
 „Quacunque parte prospicis gnatum, pater,  
 Te, te, pater, quem nocte commissæ dies  
 Quaesivit unus, si meas laudes canit  
 Utrumque Phœbi litus, et Scythiæ genus, 1700  
 Et, omnis, ardens ora, quam torret dies;  
 Si pace tellus plena, si nullæ gemunt  
 Urbes, nec aras impias quisquam inquinat;

- Si scelera desunt: spiritum admitte hunc, precor,  
 1705 In astra! Nec me mortis infernae locus,  
 Nec moesta nigri regna conturbant Iovis;  
 Sed ire ad illos umbra, quos vici, deos,  
 Pater, erubescō. Nube discussa diem  
 Pande, ut deorum vultus ardentem Herculem  
 1710 Spectet. Lieet tu sidera et mundum neges,  
 Ultro, pater: cogere. Si voces dolor  
 Abstulerit ullas: pande tum Stygios lacus,  
 Et redde Fatis! adproba gnatum prius!  
 Ut dignus astris videar, hic faciet dies.  
 1715 Leve est, quod actum est; Herculem hic, geni-  
 tor, dies  
 Inveniet, aut damnabit.“ Haec postquam edidit:  
 Flammas poposcit. „Hoc age, Alcidae comes,  
 Non segnis,” inquit: „corripe Oetaeam facem.  
 Noverca cernat, quo feram flammās modo.  
 1720 Quid dextra tremuit? num manus pavida impium  
 Scelus refugit? Redde iam pharetras mihi,  
 Ignave, iners, inermis! En nostros manus  
 Quae tendat arcus! Qui sedet pallor genis?  
 Animo faces invade, quo Alciden vides  
 1725 Vultu iacere! respice arsurum, miser!  
 Vocat ecce! iam me genitor, et pandit polos.  
 Venio, pater!“ Vultusque non idem fuit.  
 Tremente pinum dextera ardentem impuli.  
 Refugit ignis, et reluctantur faces,  
 1730 Et membra vitant; sed recedentem Hercules  
 Insequitur ignem. Caucasum, aut Pindum, aut  
 Athon  
 Ardere credas: nullus erumpit sonus;  
 Tantum ingemiscit ignis. O durum recur!  
 Typhon in illo positus immanis rogo  
 1735 Genuisset ipse, quique convulsam solo  
 Imposuit humeris. Ossan Enceladus ferox;  
 At ille medias inter exurgens faces

## HERCULES OCTAEUS. ACT. V. 343

Semiustus ac laniatus , intrepidus , rubens:  
 „Nunc , o parens Herculea , sic stare ad rogam  
 Te, mater,“ inquit, „si decet fieri Herculem.“ 1740  
 Inter vapores positus et flammae minas,  
 Immotus , inconcussus , in neutrum latus  
 Correpta torquens membra, adhortatur, monet,  
 Gerit aliquid ardens. Omnibus fortem addidit  
 Animum ministris; urere ardentem putes. 1745  
 Stupet omne vulgus; vix habent flammae fidem:  
 Tam placida frons est, tanta maiestas viro.  
 Nec properat url; cumque iam forti datum  
 Leto satis pensavit; igniferas trabes  
 Hinc inde traxit, minima quas flamma occupat, 1750  
 Totasque in ignem vertit, et qua plurimus  
 Exundat ignis, recipit intrepidus, ferox.  
 Nunc ora flammis implet (ast illi graves  
 Luxere barbae); cumque iam vultum minax  
 Adpeteret ignis, lamberent flammae caput: 1755  
 Non pressit oculos. Sed quid hanc moestam intuor  
 Sinu gerentem? Reliquias magni Herculis  
 Cineremque iactans squalida Alcmene gemit.

## ALCMEHA, PHILOCTETES.

*Suam ex Herculis morte cladem Alcmene dolet.*

ALCM. Timete, Superi, fata: tam parvus cinis  
 Hercules est: huc ille decrevit gigas. 1760  
 O quanta, Titan, in nihil moles abit!  
 Anilis, heu me, recipit Alciden sinus!  
 Hic tumulus illi est. Ecce, vix totam Hercules  
 Complevit urnam! quam leve est pondus mihi,  
 Cui totus aether pondus incubuit leve! 1765  
 Ad Tartara olim regnaque, o gnate, ultima  
 Rediturus ibas; quando ab inferna Styge  
 Remeabis iterum? non ut et spoliū trahas,  
 Rursumque Theseus debeat lucem tibi;

- 1770 Sed quando solus? Mundus impositus tuas  
Compescet umbras, teque Tartareus canis  
Inhibere poterit? Quando Taenareas fores  
Pulsabis, aut quas mater ad fauces agar,  
Qua mors aditur? — Vadis ad Manes, iter
- 1775 Habiturus unum. Quid diem questu tero?  
Quid misera duras vita? quid lucem hanc tenes?  
Quem parere rursus Herculem possum Iovi?  
Quisnam parentem gnatus Alcmenen suam  
Tantus vocabit? O nimis felix, nimis,
- 1780 Thebane coniux, Tartari intrasti loca  
Florente nato; teque venientem Inferi  
Timuere forsán, quod pater tantum Herculis  
Vel falsus aderas. Quas petam terras anus,  
Invisa saevis regibus, si quis tamen
- 1785 Rex est relictus saevus? Hei miserae mihi!  
Quicumque caesos ingemunt gnati patres,  
A me petent supplicia; me cuncti obruent.  
Si quis minor Busiris, aut si quis minor  
Antaeus urbes fervidae terret plagae:
- 1790 Ego praeda ducar. Si quis Ismarius greges  
Thracis cruenti vindicat: carpent greges  
Mea membra diri. Forsitan poenas petet  
Irata Iuno: totus uretur dolor.  
Secura victo tandem ab Alcide vacat;
- 1795 Pellex supersum, supplicia de qua exigat.  
Ne parere possem, fecit hic natus mihi  
Uterum timendum. Quae petam Alcмене loca?  
Quis me locus, quae regio, quae mundi plaga  
Defendet, aut quas mater in latebras agar
- 1800 Ubique per te nota? Si patriam petam  
Laresque miseros: Argos Eurystheus tenet.  
Marita Thebes regna et Ismenon petam,  
Thalamosque nostros, in quibus quondam Iovem  
Dilecta vidi, proh nimis felix, nimis,
- 1805 Si fulminantem et ipsa sensissem Iovem?

Utinam meis visceribus Alcides foret  
 Exemtus infans! Nunc datum est miserae, datum,  
 Videre natum laude certantem Iovi:  
 Ut et hoc daretur scire, quid fatum mihi  
 Eripere posset! Quis memor vivet tui, 1810  
 O gnate, populus? Omne iam ingratum est genus.  
 Petam Cleonas? Arcadum populos petam,  
 Meritisque terras nobiles quaeram tuis?  
 Hic dira serpens cecidit; hic ales fera;  
 Hic rex cruentus: hic tua fractus manu, 1815  
 Qui te sepulto possidet coelum, leo.  
 Si grata terra est: populus Alcmenen tuam  
 Defendat omnis. Thracias gentes petam,  
 Hebrique populos? Haec quoque est meritis tuis  
 Defensa tellus: stabula cum regno iacent; 1820  
 Hic pax cruento rege prostrato data est:  
 Ubi enim negata est? Quod tibi infelix anus  
 Quaeram sepulcrum? De tuis totus rogis  
 Contendat orbis. Reliquias magni Herculis  
 Quis populus, aut quae templa, quae gentes colent? 1825  
 Quis iam petet, quis poscet Alcmenes onus?  
 Quae tibi sepulcra, gnate, quis tumulus sat est?  
 Hic, totus orbis; fama erit titulus tibi.  
 Quid, anime, trepidas? Herculis cineres tenes.  
 Complectar ossa: reliquiae auxilium dabunt; 1830  
 Erunt sat haec praesidia: terrebunt tuae  
 Reges vel umbrae. PHIL. Debitos gnato quidem  
 Compesce fletus, mater Alcidae incliti!  
 Non est gemendus; nec gravi urgendus nece,  
 Virtute quisquis abstulit fatis iter. 1835  
 Aeterha virtus Herculem fieri vetat.  
 Fortes vetant moerere, degeneres iubent.  
 ALCM. Sedabo questus? Vindicem amisi parens  
 Terrae atque pelagi, quaque purpureus dies  
 Utrumque clara spectat Oceanum rota. 1840  
 Quot misera in uno condidi gnatos parens?

- Regno carebam, regna sed poteram dare.  
 Una inter omnes terra quas matres gerit,  
 Votis peperci; nil ego a superis peti  
 1845 Incolume nato: quid dare Herculeus mihi  
 Non poterat ardor? quis deus quidquam mihi  
 Negare poterat? vota in hac fuerant manu:  
 Quidquid negaret Iupiter, daret Hercules.  
 Quid tale genitrix ulla mortalis tulit?  
 1850 Deflevit aliqua mater, et toto stetit  
 Succisa foetu, bisque septenos greges  
 Deplanxit una; gregibus aequari meus  
 Quot ille poterat? Matribus miseris adhuc  
 Exemplar ingens decrat; Alcmeno dabo.  
 1855 Cessate matres, pertinax si quas dolor  
 Adhuc iubet lugere, quas luctus gravis  
 In saxa vertit! cedite his cunctae malis!  
 Agedum, senile pectus, o miserae manus,  
 Pulsate! et una funeri tanto sat est  
 1860 Grandaeva anus defecta, quod totus brevi  
 Iam quaeret orbis? Expedi in planctus tamen  
 Defessa quamquam brachia! Invidiam ut deis  
 Lugendo facias, advoca in planctum genus.

## ALCMENA.

*Tristis Alcmena naeniam canit.*

- Flete Alcmenen,  
 1865 Magnique Iovis plangite natum,  
 Cui concepto lux una perit,  
 Noctesque duas contulit Eos:  
 Ipsa quiddam plus luce perit.  
 Totae pariter plangite gentes,  
 1870 Quarum saevos ille tyrannos  
 Iussit Stygias penetrare domos,  
 Populisque madens ponere ferrum!  
 Flotum meritis reddite tantis!

HERCULES OETAEUS. ACT. V. 347

Totus, totus personet orbis!	
Fleat Alciden coerula Crete,	1875
Magno tellus cara Tonanti!	
Centum populi brachia pulsant!	
Nunc Curetes, nunc Corybantes,	
Arma Idaea quassate manu:	
Armis illum lugere decet.	1880
Nunc nunc funus plangite verum:	
Iacet Alcides non minor ipso,	
Creta, Tonante.	
Flete Herculeos, Arcades, obitus,	
Nondum Phoebe nascente genus!	1885
Iuga Parthenii Nemeaeque sonent,	
Feriantque graves Maenala planetus.	
Magno Alciden poscite gemitu:	
Stratus vestris setiger agris; IV 7.25	
Alesque sequi iussa sagittas,	1890
Totum pennis velata diem.	
Flete, Argolicae, flete, Cleonae:	
Hic terrentem moenia quondam	
Vestra leonem	
Fregit nostri dextera nati.	1895
Date Sithoniae verbera matres,	
Gelidusque sonet planctibus Hebrus!	
Flete Alciden,	
Quod non stabulis nascitur infans,	
Nec vestra greges viscera carpunt!	1900
Fleat Antaeo libera tellus, — IV 7.25	
Et rapta fero plaga Geryonae!	
Mecum miserae plangite gentes!	
Audiat ictus utraque Tethys!	
Vos quoque, mundi turba citati,	1905
Flete Herculeos, numina, casus:	
Vestrum Alcides cervice meus	
Mundum, Superi, coelumque tulit,	
Cum stelligeri vector Olympi	



- 1910 Pondere liber spiravit Atlas.  
Ubi nunc vestrae, Iupiter, arces?  
Ubi promissi regia mundi?  
Nempe Alcides mortalis obit,  
Nempe sepultus. Quoties telis  
1915 Facibusque tuis ille pepercit!  
Quoties ignis spargendus erat!  
In me saltem iaculare facem,  
Semelenque puta! Iamne Elysias,  
O gnate, domus, iam littus habes,  
1920 Ad quod populos Natura vocat;  
An post raptum Styx atra canem  
Praeclusit iter; teque in primo  
Limine Ditis fata morantur?  
Quis nunc Umbras, gnate, tumultus  
1925 Manesque tenet?  
Fugit abducta navita cymba,  
Et Centauris Thessala motis  
Ferit attonitos ungula Manes,  
Anguesque suos hydra sub undis  
1930 Territa mersit,  
Teque labores, o gnate, timent?  
Fallor, fallor, vesana parens,  
Nec te Manes Umbraeque timent:  
Non Argolico rapta leoni  
1935 Fulva pellis contacta iuba  
Laevos operit dura lacertos,  
Vallantque feri tempora dentes;  
Donum pharetrae cessere tuae,  
Telaque mittet iam dextra minor:  
1940 Vadis inermis, gnate, per umbras,  
Ad quas semper mansurus eris!

## ALCMENA, HERCULES.

*Solatur lugentem matrem Hercules in deorum collegium translatus.*

HERC. Quid me tenentem regna siderei poli,  
Coeloque tandem redditum, planctu iubes  
Sentire fatum? Parce: nam virtus mihi  
In astra et ipsos fecit ad Superos iter. 1945

ALCM. Unde sonus trepidas aures ferit?  
Unde meas inhibet lacrimas fragor?  
Agnosco, agnosco: victum est Chaos!  
A Styge, nate, redis iterum mihi,  
Fractaque non semel est Mors horrida! 1950  
Vicisti rursum Noctis loca,  
Puppis et infernae vada tristia;  
Pervius est Acheron iam languidus,  
Et remeare licet soli tibi.

Nec te Fata tenent post funera! 1955

An tibi praecluserit Pluton iter,  
Et pavidus regni metuit sibi?  
Certe ego te vidi flagrantibus  
Impositum silvis, cum plurimus  
In coelum fureret flammae metus 1960  
Arsisti certe; cur ultima

Non tenuere tuas umbras loca?  
Quid timuere tui manes, precor?  
Umbra quoque es Diti nimis horrida?

HERC. Non me gementis stagna Cocyti tenent, 1965

Non puppis umbras furva transvexit meas:  
Iam parce, mater, questibus! Manes semel  
Umbrasque vidi; quidquid in nobis tui  
Mortale fuerat, ignis invitus tulit;  
Paterna coelo pars data est, flammis tua. 1970  
Proinde planctus pone, quos gnato paret  
Genitrix inertī; luctus in turpes eat.

**350 L. ANN. SEEN. HERCUL. OETAeus. ACT. V**

- Virtus in astra tendit, in mortem timor  
Praesens ab astris, mater, Alcides cano.  
1975 Poenas cruentus iam tibi Eurystheus dabit:  
Curru superbum vecta transcendes caput.  
Me iam decet subire coelestem plagam:  
Inferna vici rursus Alcides loca.  
A. L. C. M. Mane parumper! — Cessit, ex oculis abit,  
1980 In astra fertur. Fallor, an vultus putat  
Vidisse natum? Misera mea incredula est.  
Es numen, et te mundus aeternus tenet:  
Credo triumphis. Regna Thebarum petam,  
Novumque templis additum numen canam.

**CHORUS.**

*Herculi inter deos relato adspirat Chorus, novumque numen  
adorat.*

- 1985 Nunquam Stygias fertur ad umbras  
Inclita virtus. Vivite, fortes!  
Vos Lethaeos saeva per amnes  
Nec fata trahent; sed cum summas  
Exiget horas consumpta dies:  
1990 Iter ad Superos gloria pandet.  
Sed tu, domitor magne ferarum,  
Orbisque simul pacator, ades!  
Nunc quoque nostras respice terras;  
Et si qua novo bellua vultu  
1995 Quatiet populos terrore gravi:  
Tu fulminibus frange trisulcis!  
Fortius ipso genitore tuo  
Fulmina mittere.

# O C T A V I A.

---

## DRAMATIS PERSONAE.

*OCTAVIA.*

*NUTRIX OCTAVIAE.*

*CHORUS ROMANORUM.*

*SENECA.*

*PRAEFECTUS.*

*POPPAEA.*

*AGRIPPINA.*

*NERO.*

*NUNTIUS.*

---

## ARGUMENTUM.

Claudius Drusus Caesar Messalinae, quae illi Britannicum et Octaviam pepererat, quod Silio nupsisset, mori iussae, Agrippinam filiam fratris sui Germanici, viduam Cn. Dom. Aenobarbi Neronis, superinduxit; cuius filio Neroni Octaviam suam in matrimonium dedit. Claudio et Britannico veneno sublati, Nero Imp. Octaviam, quam oderat, repudiat, Poppaeam Sabinam ducit. Cuius divortii causa commoti populi tumultum multa caede reprimi, et Octaviam in Pandatarium ablegatam interfici iubet

---

## ALIUD ARGUMENTUM HIERONYMI BALBI.

- Impia sors, vario versans mortalia cursu,  
Proh pudor! indignum ad fastigia celsa Neronem  
Vexerat, et rerum latas donarat habenas.  
Huic sata Dardania generosa Octavia stirpe  
5 Iuncta fuit diris avibus thalamoque sinistro:  
Ille etenim, infami Poppaeae raptus amore,  
Connubium antiquum sprevit tedasque iugales.  
Hoc facinus crebris soboles Romana querelis  
Increpat, infestaque Neronem voce lacessit.  
10 Heu, nihil est saevi violentius aure tyranni:  
Ille ardet stimulis, totusque immersus in iras  
Uxorem egregiam morti devovit acerbae.  
Tum vero exoritur questus iuvenumque senumque,  
Ore madent lacrimis, totam dolor occupat urbem.
-

# ACTUS PRIMUS.

## OCTAVIA.

*Vitae pertaesa miseras suas deflet Octavia.*

Iam vaga coelo sidera fulgens  
Aurora fugat;  
Surgit Titan radiante coma,  
Mundoque diem reddit clarum.  
Age, tot tantis onerata malis, 5  
Repete adsuetos iam tibi questus,  
Atque aequoreas vince Halcyonas,  
Vince et volucres Pandionias:  
Gravior namque his fortuna tua est.  
Semper genitrix deflenda mihi, 10  
Prima meorum causa malorum,  
Tristes questus natae exaudi,  
Si quis remanet sensus in Umbris!  
Utinam ante manu grandaeva sua  
Mea rupisset stamina Clotho, 15  
Tua quam moerens vulnera vidi,  
Oraque foedo sparsa cruore!  
O lux semper funesta mihi,  
Tempore ab illo  
Nox es tenebris invisae magis! 20  
Tulimus saevae iussa novercae,  
Hostilem animum, vultusque truces.  
Illa illa meis, tristis Erinnyes,  
Thalamis Stygios praetulit ignes;  
Teque extinxit, miserande pater, 25  
Modo cui totus paruit orbis  
Ultra Oceanum,  
Cuique Britanni terga dedere,  
Ducibus nostris ante ignoti,

SEN. TRAG.

Z

II 2.4

30 Iurisque sui. Coniugis, heu me!  
 Pater, insidiis oppressa iaces,  
 Servitque domus cum prole tua  
 Capta tyranno!

### NUTRIX OCTAVIAE.

*Propter abominas suae Octaviae calamitatem sublimis et muliericae vitae conditionem execratur.*

Fulgore primo captus et fragili bono  
 35 Fallacis aulae quisquis attonitus stupet:  
 Subito labantis ecce! Fortunae impetu,  
 Modo praepotentem, cernat eversam domum  
 Stirpemque Claudii, cuius imperio fuit  
 Subiectus orbis, paruit liber diu  
 40 Oceanus, et recepit invitus rates.  
 En, qui Britannis primus imposuit iugum,  
 Ignota et ante classibus texit freta,  
 Interque gentes barbaras tutus fuit  
 Et saeva maria, coniugis scelere occidit,  
 45 Mox illa nati; cuius extinctus iacet  
 Frater venenis; moeret infelix soror,  
 Eademque coniux; nec graves luctus valet  
 Ira coacta tegere. Crudelis viri  
 Secreta refugit semper; atque odio pari  
 50 Ardens maritus mutua flagrat face.  
 Animum dolentis nostra solatur fides  
 Pietasque frustra: mutat immitis dolor  
 Consilia nostra; nec regi mentis potest  
 Generosus ardor, sed malis vires capit.  
 55 Heu, quam nefandum prospicit noster timor  
 Scelus, quod utinam numen avertat deum!

## OCTAVIA, NUTRIX

*Lugentem Octaviam nutrix consolatur, et a vindicta, quam cogitat, dehortatur.*

o c t. O mea nullis aequanda malis  
 Fortuna! Licet repetam luctus,  
 Electra, tuos! Tibi moerenti  
 Caesum licuit flere parentem; 60  
 Scelus ulcisci vindice fratre,  
 Tua quem pietas hosti rapuit,  
 Texitque fides;  
 Me crudeli sorte parentes  
 Raptos prohibet lugere timor, 65  
 Fratrisque necem deflare vetat,  
 In quo fuerat spes una mihi,  
 Totque malorum breve solamen.  
 Nunc, in luctus servata meros,  
 Magni resto nominis umbra. 70  
 N U T R. Vox, heu, nostras perculit aures  
 Tristis alumnae! Cessas thalamis  
 Inferre gradus, tarda senectus?  
 o c t. Excipe nostras lacrimas, nutrix,  
 Testis nostri fida doloris! 75  
 N U T R. Quis te tantis solvet curis,  
 Miseranda, dies?  
 o c t. Qui me Stygias mittet ad umbras.  
 N U T R. Omina, quaeso, sint ista procul!  
 o c t. Non vota meos tua nunc casus, 80  
 Sed fata regunt. N U T R. Dabit afflictæ  
 Meliora deus tempora mitis.  
 Tu modo blando vince obsequio  
 Placata virum. o c t. Vincam saevos  
 Ante leones tigresque truces,  
 Fera quam saevi corda tyranni.  
 Odit genitos sanguine claro,

7, 15

85



**Spernit Superos hominesque simul;  
Nec fortunam capit ipse suam,**

**90** Quam dedit illi per scelus ingens  
Infanda parens. Licet ingratum  
Dirae pudeat munere matris  
Hoc imperium cepisse; licet  
Tantum munus morte rependat:

**95 Feret hunc titulum post fata tamen  
Femina longo semper in aevo.**

**NUTR.** Animi retine verba furentis!

**Temere emissam comprime vocem!**

**o c r. Toleranda quævis patiar: haud unquam  
queant**

**100 Nisi morte tristi nostra finiri mala.**

**Genitrice caesa, per scelus rapto patre,  
Orbata fratre, miseriis, luctu obruta,  
Moerore pressa, coniugi invisâ, ac meae  
Subiecta famulae, luce non grata fruor,**

**105 Trepidante semper corde, non mortis metu,  
Sed sceleris. Absit crimen a fatis meis,  
Mori iuvabit: poena nam gravior nece est  
Videre tumidos et truces miserae mihi  
Vultus tyranni, iungere atque hosti oscula;**

110 Timere natus, cuius obsequium meus  
Haud ferre posset fata post fratris dolor,  
Scelere interemti, cuius imperium tenet  
Et morte gaudet auctor infandae necis.  
Quam saepe tristis umbra germani meis

**115 Offertur oculis, membra cum solvit quies,  
Et fessa fletu lumina oppressit sopor!  
Modo facibus atris armat infirmas manus,  
Oculosque et ora fratris infestus petit;  
Modo trepidus idem refugit in thalamos meos:**

**120 Persequitur hostis, atque inhaerenti mihi  
Violentus ensem per latus nostrum rapit.  
Tunc tremor et ingens excutit somnos pavor.**

Renovatque luctus et metus miserae mihi.  
 Adice his superbam pellicem, nostrae domus  
 Spoliis nitentem; cuius in munus suam 125  
 Stygiae parentem natus imposuit rati,  
 Quam dira post naufragia superato mari  
 Ferro interemit, saevior pelagi fretis.  
 Quae spes salutis post nefas tantum mihi?  
 Inimica victrix imminet thalamis meis; 130  
 Odioque nostri flagrat, et pretium stupri  
 Iustae maritum coniugis captat caput.  
 Emergere undis, et fer auxilium tuae  
 Natae invocanti, genitor; aut Stygios sinus  
 Tellure rupta pande, quo praeceps ferar! 135  
 N U T R. Frustra parentis invocas manes tui,  
 Miseranda, frustra, nulla cui prolis suae  
 Manet inter umbras cura; qui nato suo  
 Praeferre potuit sanguine alieno satum,  
 Genitamque fratris coniugem captus sibi 140  
 Toris nefandis flebili iunxit face.  
 Hinc orta series facinorum, caedes, doli,  
 Regni cupido, sanguinis diri sitis:  
 Mactata soceri concidit thalamis gener  
 Victima, tuis ne fleret hymenaeis potens. 145  
 Proh facinus ingens! feminae est munus datus  
 Silanus, et cruore foedavit suo  
 Patrios penates, criminis ficti reus.  
 Intravit hostis hei mihi! captam domum  
 Dolis novercae, Principis factus gener, 150  
 Idemque natus, iuvenis infandi ingeni  
 Capaxque scelerum, dira cui genitrix facem  
 Accendit, et te iunxit invitam metu;  
 Tantoque victrix facta successu ferox  
 Ausa imminere est orbis imperio sacri. 155  
 Quis tot referre facinorum formas potest,  
 Et spes nefandas feminae, et blandos dolos  
 Regnum petentis per gradus scelerum omnium?

- Tum sancta Pietas extulit trepidos gradus,  
160 Vacuumque Erinys saeva funesto pede  
Intravit aulam, polluit Stygia face  
Sacros penates, iura naturae furens  
Fasque omne rupit: miscuit confux viro  
Venena saeva; cecidit atque eadem sui  
165 Mox scelere nati. Tu quoque extinctus iaces,  
Deflende nobis semper infelix puer,  
Modo sidus orbis, columen Augustae domus,  
Britannice, heu me! nunc levis tantum cinis  
Et tristis Umbra; saeva cui lacrimas dedit  
170 Etiam noverca, cum rogis artus tuos  
Dedit cremandos, membraque et vultus deo  
Similes volanti flamma fervens abstulit.  
o c t. Extinguat et me, ne manu nostra cadat.  
N U T R. Natura vires non dedit tantas tibi.  
175 o c t. Dolor, ira, moeror, miseriae, luctus dabunt.  
N U T R. Vince obsequendo potius immitem virum.  
o c t. Ut fratrem ademtum scelere restituat mihi?  
N U T R. Incolumis ut sis ipsa, labentem ut domum  
Genitoris olim sobole restituas tua.  
180 o c t. Expectat aliam Principis sobolem domus;  
Me dira miserī fata germani trahunt.  
N U T R. Confirmet animum civium tantus favor.  
o c t. Solatur iste nostra, non relevat, mala.  
N U T R. Vis magna populi est. o c t. Principis ma  
ior tamen.  
185 N U T R. Respiciet ipse coniugem. o c t. Pellex vetat.  
N U T R. Invisa cunctis nempe. o c t. Sed cara est viro.  
N U T R. Nondum uxor est. o c t. Iam fiet, et geni-  
trix simul.  
N U T R. Iuvenilis ardor impetu primo furit;  
Languescit idem facile, nec durat diu  
190 In venere turpi, ceu levis flammae vapos:  
Amor perennis coniugis castae manet.  
Violare prima quae toros ausa est tuos,

Animumque domini famula possedit diu,  
Iam metuit eadem. OCT. Nempe praelatam sibi  
Subiecta et humilis; atque monumenta extruit 195  
Quibus timorem fassa testatur suum.

NUTR. Et hanc levis fallaxque destituet deus  
Volucer Cupido. Sit licet forma eminens  
Opibus superba: gaudium capiet breve.  
Passa est similes ipsa dolores 200

Regina deum,  
Cum se formas vertit in omnes  
Dominus coeli divumque pater,  
Et modo pennas sumsit oloris,  
Modo Sidonii cornua tauri, 205

Aureus idem fluxit in imbri.  
Fulgent coelo sidera Ledae;  
Patrio residet Bacchus Olympo;  
Deus Alcides possidet Heben,  
Nec Iunonis iam timet iras, 210

Cuius gener est, qui fuit hostis.  
Vicit sapiens tamen obsequium  
Coniugis altae pressusque dolor:  
Sola Tonantem tenet aethereo  
Secura toro maxima Iuno; 215

Nec mortali captus forma  
Deserit altam Iupiter aulam.  
Tu quoque, terris altera Iuno,  
Soror Augusti coniuxque, graves  
Vince dolores! 220

OCT. Iungentur ante saeva sideribus freta, + IV 6. 220  
Et ignis undae, Tartaro tristi polus,  
Lux alma tenebris, roscidae nocti dies,  
Quam cum scelesti coniugis mente impia  
Mens nostra, semper fratris extincti memor. 225

Utinam nefandi Principis dirum caput  
Obruere flammis Coelitum rector paret,  
Qui saepe terras fulmine infesto quatit,

- Mentisque nostras ignibus terret sacris,  
 230 Novisque monstris! Vidimus coelo iubar  
 Ardens cometam pandere, infestam facem  
 Qua plaustra tardus noctis aeterna vice  
 Regit Bootes, frigido Arctoo rigens.  
 En! ipse diro spiritu saevi ducis  
 235 Polluitur aether; gentibus clades novas  
 Minantur astra, quas regit dux impius.  
 Non tam ferum Typhona neglecto Iove  
 Irata tellus edidit quondam parens;  
 Haec gravior illo pestis: hic, hostis deum  
 240 Hominumque, templis expulit Superos suis,  
 Civesque patria; spiritum fratri abstulit;  
 Hausit cruorem matris; et lucem videt,  
 Fruiturque vita, noxiamque animam trahit!  
 Proh summe genitor, tela cur frustra iacis  
 245 Invicta toties temere regali manu?  
 In tam nocentem dextra cur cessat tua?  
 Utinam suorum facinorum poenas luat  
 Nero, ipse divo Domitio genitus patre,  
 Orbis tyrannus, quem premit turpi iugo  
 250 Morumque vitiis nomen Augustum inquinat.  
 N U T R. Indignus ille, fateor, est thalamis tuis:  
 Sed cede fati atque fortunae tuae  
 Alumna, quaeso; neve violenti move  
 Iram mariti. Forsitan vindex deus  
 255 Existet aliquis, laetus et veniet dies  
 O C T. Gravi deorum nostra iam pridem domus  
 Urgetur ira, prima quam pressit Venus,  
 Furore miserae dira genitricis meae:  
 Quae nupta demens nupsit incesta face,  
 260 Oblita nostri, coniugis, legum immemor.  
 Illo soluta crine, succincta anguibus,  
 Ultrix Erinnyes venit ad Stygios toros,  
 Raptasque thalamis sanguine extinxit faces;  
 Incendit ira Principis pectus truci

## OCTAVIA. ACT. I.

361

Caedem in nefandam. Cecidit infelix parens 265  
 Heu! nostra ferro, meque perpetuo obruit  
 Extincta luctu. Coniugem traxit suum  
 Natumque ad umbras; prodidit lapsam domum.  
 NUTR. Renovare luctus parce cum fletu pios,  
 Manes parentis neve sollicita tuae, 270  
 Graves furoris quae sui poenas dedit.

## CHORUS.

*Poppaea nuptias detestatur Chorus Octaviae favens. Degenerem, lentam nimis et servilem Romanorum arguit patientiam, et in scelera Neronis invehitur.*

Quae fama modo venit ad aures,  
 Utinam falso credita perdat  
 Frustra toties iactata fidem,  
 Nec nova nostri coniux thalamos 275  
 Principis intret, teneatque suos  
 Nupta penates Claudia proles!  
 Edat partu pignora pacis,  
 Qua tranquillus gaudeat orbis,  
 Servetque decus Roma aeternum! 280  
 Fratris thalamos sortita tenet  
 Maxima Iuno;  
 Soror Augusti sociata toris  
 Cur a patria pellitur aula?  
 Sancta quid illi prodest pietas, 285  
 Divusque pater?  
 Quid virginitas castusque pudor?  
 Nos quoque nostri sumus immemores  
 Post fata ducis, cuius stirpem  
 Prodimus, aevi suadente metu. 290  
 Vera priorum virtus quondam  
 Romana fuit, verumque genus  
 Martis in illis sanguisque viris.  
 Illi reges hac expulerunt

295 Urbe superbos;

Ultique tuos sunt bene manes,  
Virgo, dextra caesa parentis,  
Ne servitium paterere grave,  
Nec proba ferret praemia victrix

300 Dira libido.

Te quoque bellum triste secutum est,  
Mactata tua miseranda manu,  
Nata Lucreti,  
Stuprum saevi passa tyranni!

305 Dedit infandi sceleris poenas

Cum Tarquinio Tullia coniux,  
Quae per caesi membra parentis  
Egit saevos impia currus,  
Laceroque seni violenta roges,

310 Nata, negavit.

Haec quoque nati videre nefas  
Secula maius, cum Tyrrenum  
Rate ferali Princeps captam  
Fraude parentem misit in aequor.

315 Properant placidos linquere portus

Iussi nautae; resonant remis  
Pulsata freta:

Fertur in altum provecta ratis,  
Quae resoluta robore labens

320 Pressa dehiscit, sorbetque mare.

Tollitur ingens clamor ad astra,  
Cum femineo mixtus planctu.

Mors ante oculos dira vagatur;  
Quaerit leti sibi quisque fugam:

325 Alii lacerae puppis tabulis

Haerent nudi, fluctusque secant;  
Repetunt alii littora nantes;  
Multos mergunt fata profundo.  
Scindit vestes Augusta suas,

330 Laceratque comas,

Rigat et moestis fletibus ora.  
 Postquam spes est nulla salutis:  
 Ardens ira iam victa malis:

„Haec,“ exclamat, „mihi pro tanto  
 Munere reddis praemia, nate?

335

Hac sum, fateor, digna carina,  
 Quae te genui, quae tibi lucem  
 Atque imperium nomenque dedi  
 Caesaris, amens.

Exere vultus Acheronte tuos,  
 Poenisque meis pascere, coniux:  
 Ego causa tuae, miserande, necis,  
 Natoque tuo funeris auctor.

340

En, ut merui,  
 Ferar ad manes inhumata tuos,  
 Obruta saevis aequoris undis! “

345

Ferunt fluctus ora loquentis;  
 Ruit in pelagus,  
 Rursumque salo pressa resurgit;  
 Pellit palmis cogente metu  
 Fata, et cedit fessa labori.

350

Mansit tacitis in pectoribus  
 Spreta tristi iam morte fides:  
 Multi dominae ferre auxilium  
 Pelago fractis viribus audent,  
 Brachia quamvis lenta trahentem  
 Voce hortantur, manibusque levant.  
 Quid tibi saevi fugisse maris  
 Profuit undas?

355

Ferro es nati moritura tui,  
 Cuius facinus vix posteritas,  
 Tarde semper credula, credet.  
 Furit, ereptam pelagoque dolet  
 Vivere matrem

360

Impius, ingens geminatque nefas:  
 Ruit in miserae fata parentis,

365



- Patiturque moram sceleris nullam.  
 Missus peragit iussa satellites:  
 Reserat dominae pectora ferro.  
 370 Caedis moriens illa ministrum  
 Rogat infelix,  
 Utero dirum condat ut ense.  
 „Hic est, hic est fodiendus,“ ait,  
 „Ferro, monstrum qui tale tulit!“  
 375 Post hanc vocem,  
 Cum supremo mixtam gemitu,  
 Animam tandem per fera tristem  
 Vulnere reddit.

---

## ACTUS SECUNDUS.

### SENECA.

*Philosophus, seculi sui vitia detestatus, prisci aevi simplicitatem laudat, utque omnia in dies in deteriora ruerint commemorat.*

- Q**uid me, potens Fortuna, fallaci mihi  
 380 Blandita vultu, sorte contentum mea  
 Alte extulisti, gravius ut ruerem edita  
 Receptus arce, totque prospicerem metus?  
 Melius latebam procul ab invidiae malis  
 Remotus inter Corsici rupes maris,  
 385 Ubi liber animus et sui furis mihi  
 Semper vacabat, studia recolenti mea.  
 O quam iuvabat, quo nihil maius parens  
 Natura genuit, operis immensi artifex,  
 Coelum intueri, solis et cursus sacros,  
 390 Mundique motus, salis et alternas vices,  
 Orbemque Phoebes, astra quem cingunt vaga,  
 Lateque fulgens aetheris magni decus!

Qui si senescit, tantus in coecum chaos  
 Casurus iterum : nunc adest mundo dies  
 Supremus ille, qui premat genus impium 395  
 Coeli ruina : rursus ut stirpem novam  
 Generet renascens melior ; ut quondam tulit  
 Iuvenis, tenente regna Saturno poli.  
 Tunc illa virgo, nominis magni dea,  
 Iustitia, coelo missa cum sancta Fide 400  
 Terris, regebat mitis humanum genus.  
 Non bella norant, non tubae fremitus truces,  
 Non arma gentes ; cingere assuerant suas  
 Muris nec urbes. Pervium cunctis iter,  
 Communis usus omnium rerum fuit ; 405  
 Et ipsa tellus laeta foecundos sinus  
 Pandebat ultro, tam piis felix parens  
 Et tuta alumni. Alia sed soboles minus  
 Conspecta mitis. Tertium sollers genus  
 Novas ad artes extitit, sanctum tamen ; 410  
 Mox inquietum, quod sequi cursu feras  
 Auderet arces ; fluctibus tectos graves  
 Extrahere pisces rete ; vel calamo levi  
 Decipere volucres ; premere subiectos iugo  
 Tauros feroces ; vomere immunem prius 415  
 Sulcare terram, laesa quae fruges suas  
 Interius alte condidit sacro sinu.  
 Sed in parentis viscera intravit suae  
 Deterior aetas : eruit ferrum grave  
 Aurumque ; saevas mox et armavit manus ; 420  
 Partita fines regna constituit, novas  
 Extruxit urbes ; tecta defendit suis  
 Aliena telis, aut petit praedae imminens.  
 Neglecta terras fugit et mores feros  
 Hominum, et cruenta caede pollutas manus, 425  
 Astraea virgo, siderum magnum decus.  
 Cupido belli crevit atque auri fames.  
 Totum per orbem maximum exortum est malum,

Luxuria, pestis blanda; cui vires dedit

430 Roburque longum tempus atque error gravis.

Collecta vitia per tot aetates diu

In nos redundant. Seculo premimur gravi,

Quo scelera regnant, saevit impietas furens,

Turpi libido venere dominatur potens,

435 Luxuria victrix orbis immensas opes

Iampridem avaris manibus, ut perdat, rapit.

Sed ecce! gressu fertur attonito Nero,

Trucique vultu. Quid ferat, mente horreo.

### NERO, PRAEFECTUS, SENECA.

*In cassum monet suam Neronem philosophus, qui tyrannicis institutis pertinaciter insistit, proximunque diem nuptiis cum Poppaea destinat.*

NERO. Perage imperata: mitte, qui Plauti mihi

440 Sullaeque caesi referat abscissum caput.

PRAEF. Iussa haud morabor: castra confestim  
petam.

SEN. Nihil in propinquos temere constitui decet

NERO. Iusto esse facile est, cui vacat pectus metu.

SEN. Magnum timoris remedium clementia est.

445 NERO. Extinguere hostem maxima est virtus  
ducis.

SEN. Servare cives maior est patriae patri.

NERO. Praecipere mitem convenit pueris senem.

SEN. Regenda magis est fervida adolescentia.

NERO. Aetate in hac satis esse consilii reor.

450 SEN. Ut facta Superi comprobent semper tua!

NERO. Stulte verebor, ipse cum faciam, deos.

SEN. Hoc plus verere, quod licet tantum tibi.

NERO. Fortuna nostra cuncta permittit mihi.

SEN. Crede obsequenti parcius; levis est dea.

455 NERO. Inertis est nescire, quid liceat sibi.

SEN. Id facere, laus est, quod decet; non, quod licet.

NERO. Calcat iacentem vulgus. SEN. Invisum  
opprimit.

NERO. Ferrum tuetur principem. SEN. Melius fides.

NERO. Decet timeri Caesarem. SEN. At plus diligi.

NERO. Metuant necesse est... SEN. Quidquid expri-  
mitur, grave est. 460

NERO. Iussisque nostris pareant. SEN. Iusta impera.

NERO. Statuam ipse. SEN. Quae consensus efficiat  
rata.

NERO. Despectus? Ensis faciet. SEN. Hoc absit nefas.

NERO. An patiar ultra, sanguinem nostrum peti,  
Inultus et contemptus ut subito opprimar? 465

Exilia non fregere summos procul

Plautum atque Sullam, pertinax quorum furor

Armat ministros sceleris in caedem meam.

Absentium cum maneat etiam ingens favor

In urbe nostra, qui fovet spes exulum; 470

Tollantur hostes ense suspecti mihi.

Invisa coniux pereat, et carum sibi

Fratrem sequatur. Quidquid excelsum est, cadat.

SEN. Pulchrum eminere est inter illustres viros,  
Consulere patriae, parcere afflictis, fera 475

Caede abstinere, tempus atque irae dare,

Orbi quietem, seculo pacem suo.

Haec summa virtus; petitur hac coelum via.

Sic ille patriae primus Augustus parens

Complexus astra est, colitur et templis deus. 480

Illum tamen Fortuna iactavit diu

Terra marique per graves belli vices,

Hostes parentis donec oppressit sui.

Tibi numen incruenta summittit suum,

Et dedit habenas imperi facili manu, 485

Nutuque terras, maria, subiecit tuo.

Invidia tristis victa consensu pio

Cessit. Senatus equitis accensus favor

Plebisque votis, atque iudicium patrum est.

- 490 Tu pacis auctor, generis humani arbiter,  
Electus; orbem tu sacra specie regis,  
Patriae parens; quod nomen ut serves petit,  
Suosque cives Roma commendat tibi.

N E R O. Munus deorum est, ipsa quod servit mihi

- 495 Roma et Senatus; quodque ab invitis preces  
Humilesque voces exprimit nostri metus.  
Servare cives principi et patriae graves,  
Claro tumentes genere, quae dementia est,  
Cum liceat una voce suspectos sibi

- 500 Mori iubere? Brutus in caedem ducis,  
A quo salutem tulerat, armavit manus.  
Invictus acie, gentium domitor, Iovi  
Aequatus altos saepe per honorum gradus,  
Caesar nefando civium scelere occidit.

- 505 Quantum cruoris Roma tunc vidit sui,  
Lacerata toties! Ille, qui meruit pia  
Virtute coelum, divus Augustus, viros  
Quot interemit nobiles, iuvenes, senes,  
Sparsos per orbem, cum suos mortis metu

- 510 Fugerent penates et triumphum ferrum ducum,  
Tabula notante deditos tristi neci?  
Exposita rostris capita caesorum patres  
Videre moesti; flere nec licuit suos,  
Non gemere, dira tabe polluto foro,

- 515 Stillante sanie per putres vultus gravi.  
Nec finis hic cruoris aut caedis stetit:  
Pavere volucres et feras saevas diu  
Tristes Philippi; hausit et Siculum mare  
Classes, virosque saepe cedentes. Suis

- 520 Concussus orbis viribus. Magnus ducum  
Superatus acie, puppibus Nilum petit  
Fugae paratis, ipse periturus brevi.  
Hausit cruorem incesta Romani ducis  
Aegyptus iterum, nunc leves umbras tegit.

Illic sepultum est impie gestum diu	525
Civile bellum; condidit tandem suos	
Iam fessus enses victor, hebetatos feris	
Vulneribus, et continuit imperium metu.	
Armis fideque militis tutus fuit,	
Pietate nati factus eximia deus,	530
Post fata consecratus et templis datus.	
Nos quoque manebunt astra, si saevo prior	
Ense occuparo, quidquid infestum est mihi,	
Dignaque nostram sobole fundaro domum.	
SEN. Implebit aulam stirpe coelesti tuam	535
Generata divo, Claudiae gentis decus,	
Sortita fratris, more lunonis, toros.	
NERO. Incesta genitrix detrahit generi fidem,	
Animusque nunquam coniugis iunctus mihi.	
SEN. Teneris in annis haud satis clara est fides,	540
Pudore victus cum tegit flammam amor.	
NERO. Hoc equidem et ipse credidi frustra diu,	
Manifesta quamvis pectore insociabili	
Vultuque signa proderent odium mei;	
Tandem quod ardens statuit ulcisci dolor,	545
Dignamque thalamis coniugem invenit meis	
Genere atque forma, victa cui cedat Venus,	
Iovisque coniux, et ferox armis dea.	
SEN. Probitas fidesque coniugis, mores, pudor,	
Placeant marito: sola perpetuo manent,	550
Subiecta nulli, mentis atque animi bona;	
Florem decoris singuli carpunt dies.	
NERO. Omnes in unam contulit laudes deus.	
Talemque nasci fata voluerunt mihi.	
SEN. Recedat a te, temere ne credas, amor.	555
NERO. Quem submovere fulminis dominus nequit,	
Coeli tyrannum, saeva qui penetrat freta	
Ditisque regna, detrahit Superos polo?	
SEN. Volucrum esse amorem fingit immitem deum	
Mortalis error, armat et telis manus,	560

- Arcusque sacros miscuit saeva face;  
 Genitumque credit Venere, Vulcano satum.  
 Vis magna mentis, blandus atque animi calor  
 Amor est; iuventa gignitur; luxu, otio  
 565 Nutritur inter laeta Fortunae bona.  
 Quem si fovere atque alere desistas, cadit,  
 Brevisque vires perdit extinctus suas.  
 NERO. Hanc esse vitae maximam causam reor,  
 Per quam voluptas oritur. Interitu caret,  
 570 Cum procreetur semper humanum genus  
 Amore grato, qui truces mulcet feras.  
 Hic mihi iugales praeferat taedas deus,  
 Iungatque nostris igne Poppaeam toris.  
 SEN. Vix sustinere posset hos thalamos dolor  
 575 Videre populi; sancta nec Pietas sinat!  
 NERO. Prohibebor unus facere, quod cunctis licet?  
 SEN. Maiora populus semper a summo exigit.  
 NERO. Libet experiri, viribus fractus meis  
 An cedat animis temere conceptus favor.  
 580 SEN. Obsequere potius civibus placidus tuis!  
 NERO. Male imperatur, cum regit vulgus duces.  
 SEN. Nil impetrare cum valet, iuste dolet.  
 NERO. Exprimere ius est, ferre quod nequeunt  
 preces?  
 SEN. Negare durum est. NERO. Principem cogi  
 nefas.  
 585 SEN. Remittat ipse. NERO. Fama sed victum  
 feret.  
 SEN. Levis atque vana. NERO. Sit licet, multos  
 notat.  
 SEN. Excelsa metuit. NERO. Non minus carpit  
 tamen.  
 SEN. Facile opprimetur. Merita te divi patris,  
 Aetasque frangat coniugis, probitas, pudor!  
 590 NERO. Desiste tandem, iam gravis nimium mihi,  
 Instare! Liceat facere, quod Seneca improbat.

Et ipse populi vota iam pridem moror,  
 Cum portet utero pignus et partem mei.  
 Quin destinamus proximum thalamis diem?

## ACTUS TERTIUS.

## AGRIPPINA.

*Ab Inferis prodit Agrippina, facies exitiales praeferens  
 nuptiis Poppaeae et Neronis, cuius mortem praedicit.*

**T**ellure rupta Tartaro gressum extuli, 595

Stygiam oruenta praeferens dextra facem  
 Thalamis soelestis. Nubat his flammis meo

Poppaea nato iuncta, quas vindex manus  
 Dolorque matris vertet ad tristes rogos.

Manet inter umbras impiae caedis mihi 600

Semper memoria, Manibus nostris gravis  
 Adhuc inultis, reddita et meritis meis

Funesta merces puppis, et pretium imperi  
 Nox illa, qua naufragia deflevi mea.

Comitum necem, natiq; crudelis nefas 605

Deflere votum fuerat; haud tempus datum est  
 Lacrimis; sed ingens scelere geminavit nefas.

Peremta ferro, foeda vulneribus, sacros  
 Intra penates spiritum effudi gravem,

Erepta pelago, sanguine extinxi meo 610

Nec odia nati, saevit in nomen feras

Matris tyrannus: obrui meritum cupit;

Simulacra, titulos destruit, mortis metu,

Totum per orbem, quem dedit poenam in meam

Puero regendum noster infelix amor. 615

Extinctus umbras agit at infestus meas,

Flammisque vultus noxios coniux petit,

Instat, minatur, imputat fatum mihi

Tumulumque nati; poscit auctorem necis.

Iam parce: dabitur. Tempus haud longum peto: 620



- Ultrix Erinnyis impio dignum parat  
 Letum tyranno, verbera, et turpem fugam,  
 Poenasque, quis et Tantali vincat sitim,  
 Dirum laborem Sisyphei, Tityi alitem,  
 625 Ixionisque membra rapientem rotam.  
 Licet extruat marmoribus atque auro tegat  
 Superbus aulam; limen armatae ducis  
 Servent cohortes; mittat immensas opes  
 Exhaustus orbis; supplices dextram petant  
 630 Parthi cruentam; regna, divitias, ferant  
 Veniet dies tempusque, quo reddat suis  
 Animam nocentem sceleribus, iugulum hostibus,  
 Desertus et destructus et cunctis egens.  
 Heu, quo labor, quo vota ceciderunt mea?  
 635 Quo te furor provexit attonitum tuus  
 Et fata, nate, cedat ut tantis malis  
 Genitricis ira, quae tuo scelere occidit?  
 Utinam, antequam te parvulum in lucem edidi  
 Aluique, saevae nostra lacerassent ferae  
 640 Viscera! sine ullo scelere, sine sensu, innocens,  
 Meus, occidisses; iunctus atque haerens mihi  
 Semper quietam cerneret sedem Inferum,  
 Proavos, patremque, nominis magni viros  
 Quos nunc pudor luctusque perpetuus manet  
 645 Ex te, nefande, meque, quae talem tuli.  
 Quid tegere cesso Tartaro vultus meos,  
 Noverca, coniux, mater infelix meis?

## OCTAVIA, CHORUS.

*Octavia dissimulata tristitia faventem sibi populum orat, ne divortium sui lugeat. Chorus tamen ipsius vicem dolet.*

- OCT. Parcite lacrimis urbis festo  
 Laetoque die:  
 650 Ne tantus amor nostrique favor  
 Principis acres suscitet iras,

Vobisque ego sim causa malorum!

Non hoc primum pectora vulnus

Mea senserunt; graviora tuli.

Dabit hic nostris finem curis

655

Vel morte dies. Non ego saevi

Cernere cogar coniugis ora,

Non invisos intrare mihi

Thalamos famulae;

Soror Augusti, non uxor, ero.

660

Absint tantum tristes poenae,

Letique metus. —

Scelerum diri, miseranda, viri,

Potes haec, demens, sperare memor?

665

Hos ad thalamos servata diu,

Victima tandem funesta cades.

Sed quid patrios saepe penates

Respicias udis confusa genis?

Propera tectis efferre gradus!

Linque cruentam principis aulam!

670

CHOR. En illuxit suspecta diu

Fama toties iactata dies!

Cessit thalamis

Claudia diri pulsa Neronis,

Quos iam victrix Poppaea tenet,

675

Cessat pietas dum nostra, gravi

Compressa metu, segnisque dolor.

Ubi Romani vis est populi,

Fregit claros quae saepe duces,

Dedit invictae leges patriae,

680

Fasces dignis civibus olim,

Iussit bellum pacemque, feras

Gentes domuit,

Captos reges carcere clausit?

Gravis, en, oculis undique nostris

685

Iam Poppaeae fulget imago,

Iuncta Neroni!

Affligat humo violenta manus  
 Similes nimium vultus dominae,  
 690 Ipsamque toris detrahat altis;  
 Petat infestis mox et flammis  
 Telisque feri Principis aulam!

## ACTUS QUARTUS.

## NUTRIX, POPPAEA.

*Territa Poppaea nutrici narrat somnium; quam illa vana interpretatione solatur.*

NUTR. **Q**uo trepida gressum coniugis thalamis  
 Effers, alumna, quodve secretum petis  
 695 Turbata vultu? cur genae fletu madent? III 12  
35  
 Certe petitus precibus et votis dies  
 Nostris refulsit. Caesari iuncta es tuo  
 Taeda iugali, quem tuus cepit decor,  
 Et culpa Senecae tradidit vinctum tibi  
 700 Genitrix amoris, maximum numen, Venus.  
 O qualis altos, quanta, pressisti toros,  
 Residens in aula! Vidit attonitus tuam  
 Formam Senatus, tura cum Superis dares,  
 Sacrasque grato spargeret aras mero,  
 705 Velata summum flammeo tenui caput;  
 Et ipse lateri iunctus atque haerens tuo  
 Sublimis inter civium laeta omnia  
 Incessit, habitu atque ore laetitiam gerens  
 Princeps superbo. Talis emersam freto  
 710 Spumante Peleus coniugem accepit Thetin,  
 Quorum toros celebrasse Coelestes ferunt,  
 Pelagique numen omne consensu pari.  
 Quae subita vultus causa mutavit tuos?  
 Quid pallor iste, quid ferant lacrimae, doce.

## OCTAVIA. ACT. IV.

375

POP. Confusa tristi proximae noctis metu

715

Visuque, nutrix, mente turbata feror,  
Defecta sensu. Laeta nam postquam dies  
Sideribus atris cecidit, et nocti polus.

Inter Neronis iuncta complexus mei

Somno resolvor; nec diu placida frui

III 10.4

720

Quiete licuit: visa nam thalamos meos

Celebrare turba est moesta; resolutis comis

Matres Latinae flebiles planctus dabant;

Inter tubarum saepe terribilem sonum

Sparsam cruore coniugis genitrix mei

725

Vultu minaci saeva quatiebat facem.

Quam dum sequor, coacta praesenti metu:

Diducta subito patuit ingenti mihi

Tellus hiatu; lata quo praeceps, toros

Cerno iugales pariter et miror meos,

730

In quis resedi fessa. Venientem intuo

Comitante turba coniugem quondam meum

Natumque; properat petere complexus meos

Crispinus, intermissa libare oscula:

Irrupit intra tecta cum trepidus mea,

735

Ensemque iugulo condidit saevum Nero.

Tandem quietem magnus excussit timor;

Quatit ora et artus horridus nostros tremor,

Pulsatque pectus; continet vocem timor,

Quam nunc fides pietasque produxit tua.

740

Heu, quid minantur Inferum manes mihi,

Aut quem cruorem coniugis vidi mei?

NUTR. Quaecunque mentis agitat infestus vigor,

Ea per quietem sacer et arcanus refert

Veloxque sensus. Coniugem, thalamos, rogos

745

Vidisse te miraris, amplexu novi

Haerens mariti? Sed movent laeto die

Pulsata palmis pectora, et fusae comae.

Octaviae discidia planxerunt sacros

Intra penates fratris, et patrium larem.

750

Fax illa, quam secuta es, Augustae manu  
 Praelata, clarum nomen invidia tibi  
 Partum ominatur. Inferum sedes toros  
 Stabiles futuros spondet aeternae domus.

- 755 Iugulo quod ensem condidit Princeps tuus:  
 Bella haud movebit, pace sed ferrum teget.  
 Recollige animum; recipe laetitiam, precor,  
 Timore pulso! redde te thalamis tuis!  
 r o p. Delubra et aras petere constitui sacras,
- 760 Caesis litare victimis numen deum,  
 Ut expientur noctis et somni minae,  
 Terrorque in hostes redeat attonitus meos.  
 Et vota pro me suscipe, et precibus piis  
 Superos adora, manet ut praesens metus

### CHORUS.

*Laudat Chorus Poppaeae formam.*

- 765 Si vera loquax fama Tonantis  
 Furta et gratos narrat amores,  
 Quem modo Ladae pressisse sinum  
 Tectum plumis pennisque ferunt;  
 Modo per fluctus raptam Europen
- 770 Taurum tergo portasse trucem:  
 Quae regit, et nunc deseret astra;  
 Petet amplexus, Poppaea, tuos,  
 Quos et Ladae praeferre potest,  
 Et tibi, quondam cui miranti
- 775 Fulvo, Danaë, fluxit in auro.  
 Formam Sparte iactet alumnae  
 Licet, et Phrygius praemia pastor:  
 Vincet vultus haec Tyndaridos,  
 Qui moverunt horrida bella,
- 780 Phrygiaeque solo regna dedere.  
 Sed quis gressu ruit attonito,  
 Aut quid pectore portat anhelo?

## NUNTIUS, CHORUS.

*Motum populi nuntiat ob repudiatam Octaviam nuptias-  
que Poppaeae.*

NUNT. Quicumque tectis miles exsultat ducis,  
Defendat aulam, cui furor populi imminet!  
Trepidi cohortes, ecce! Praefecti trahunt 785  
Praesidia ad urbis; victa nec cedit metu  
Concepta rabies temere, sed vires capit.

CHOR. Quis iste mentes agitat attonitas furor?

NUNT. Octaviae favore percussae agmina  
Nunc efferata per nefas ingens ruunt. 790

CHOR. Quid ausa facere, quove consilio, doce.

NUNT. Reddere penates Claudiae Divi parant,  
Torosque fratris, debitam partem imperi.

CHOR. Quos iam tenet Poppaea concordī *sed?*

NUNT. Hic urit animos pertinax nimium favor,  
Et in furorem temere praecipites agit.

Quaecunque claro marmore effigies stetit

Aut aere fulgens, ora Poppaeae gerens,

Afflicta vulgi manibus, et saevo iacet

Eversa ferro; membra per partes trahunt 800

Deducta laqueis; obruunt turpi diu

Calcata coeno. Verba conveniunt feris

Immixta factis, quae timor recipit meus.

Sepire flammis Principis sedem parant

Populi, nisi irae coniugem dedat novam, 805

Reddat penates Claudiae victus suos.

Ut noscat ipse civium motus, mea

Voce haud morabor iussa Praefecti exequi.

CHOR. Quid fera frustra bella movetis? *4.8*

Invicta gerit tela Cupido. 810

Flammis vestros obruet ignes,

Quibus extinxit fulmina saepe,

Captumque Iovem coelo traxit.

- Laesi tristes dabit poenas  
 815 Sanguine vestro: non est patiens  
 Fervidus irae facilisque regi.  
 Ille ferocem iussit Achillem  
 Pulsare lyram; fregit Danaos,  
 Fregit Atridem; regna evertit  
 820 Priami; claras diruit urbes;  
 Et nunc animus, quid ferat, horret,  
 Vis immitis violenta dei.

## ACTUS QUINTUS.

### NERO, PRAEFECTUS.

*Aestuans ira Nero propter tumultum populi in ipsum sac-  
 viri iubet, et Octaviam veluti motus causam, deportatam in  
 Pandatarium, interfici.*

- NERO. O lenta nimium militis nostri manus,  
 Et ira patiens post nefas tantum mea,  
 825 Quod non cruor civilis accensas faces  
 Extinguit in nos, caede nec populi madet  
 Funerea Roma, quae viros tales tulit!  
 Admissa sed iam morte puniri parum est:  
 Graviores meruit impium plebis scelus;  
 830 At illa, cui me civium subicit furor,  
 Suspecta coniux et soror semper mihi,  
 Tandem dolori spiritum reddat meo,  
 Iramque nostram sanguine extinguat suo;  
 Mox tecta flammis concidant urbis meis;  
 835 Ignes, ruinae, noxium populum premant,  
 Turpisque egestas, saeva cum luctu fames.  
 Exsultat ingens seculi nostri bonis  
 Corrupta turba, nec capit elementiam  
 Ingrata nostram, ferre nec pacem potest;  
 840 Sed inquieta rapitur hinc audacia,  
 Hinc temeritate fertur in praeceps sua.

Malis domanda est, et gravi semper iugo  
 Premenda; ne quid simile tentare audeat,  
 Contraque sanctos coniugis vultus meae  
 Attollere oculos. Fracta per poenas metu 845  
 Parere discet Principis nutu sui.

Sed adesse cerno, rara quem pietas virum  
 Fidesque castris nota praeposuit meis.

PRAEF. Populi furorem caede paucorum, diu  
 Qui restiterunt temere, compressum affero. 850

NERO. Et hoc sat est? sic miles audisti ducem?  
 Compescis? haec vindicta debetur mihi?

PRAEF. Cecidere motus impii ferro duces.

NERO. Quid illa turba, petere quae flammis meos  
 Ausa est penates; Principi legem dare; 855

Abstrahere nostris coniugem caram tuis;

Violare, quantum licuit, incesta manu

Et voce dira? debita poena vacat?

PRAEF. Poenam dolor constituet in cives tuos?

NERO. Constituet, aetas nulla quam famae eximat. 860

PRAEF. Quam temperet non ira, non noster timor?

NERO. Iram expiabit prima quae meruit meam.

PRAEF. Quam poscat, ede: nostra ne parcat manus.

NERO. Caedem sororis poscit et dirum caput.

PRAEF. Horrore victum trepidus adstrinxit rigor. 865

NERO. Parere dubitas. PRAEF. Cur meam dam-  
 nas fidem?

NERO. Quod parcis hosti. PRAEF. Femina hoc  
 nomen capit?

NERO. Si scelera cepit. PRAEF. Estne, qui son-  
 tem arguat?

NERO. Populi furor. PRAEF. Quis regere demen-  
 tes valet?

NERO. Qui concitare potuit. PRAEF. Haud quen-  
 quam reor. 870

NERO. Mulier, dedit natura cui primum malo  
 Animum, ad nocendum pectus instruxit dolis;



Sed vim negavit: ut ne inexpugnabilis  
 Esset, sed aegras frangeret vires timor,  
 875 Vel poena; quae iam sera damnatam premit,  
 Diu nocentem. Tolle consilium ac preces,  
 Et imperata perage: devectam rate  
 Procul in remotum littus interim iube:  
 Tandem ut residat pectoris nostri tumor.

## CHORUS, OCTAVIA.

*Chorus perniciosum multis favorem populi fuisse canit,  
 mox dira fata mulierum domus Caesareae commemorat.*

- 880 CHOR. O funestus multis populi  
 Dirusque favor, qui cum flatu  
 Vela secundo ratis implevit,  
 Vexitque procul, languidus idem  
 Deserit alto saevoque mari!
- 885 Flevit Gracchos miseranda parens,  
 Perdidit ingens quos plebis amor  
 Nimiusque favor genere illustres,  
 Pietate, fide, lingua claros,  
 Pectore fortes, legibus acres.
- 890 Te quoque, Livi, simili leto  
 Fortuna dedit,  
 Quem neque fascēs texere sui,  
 Nec tecta domus. Plura referre  
 Prohibet praesens exempla dolor.
- 895 Modo cui patriam reddere cives  
 Aulam et fratris voluere toros,  
 Nunc ad poenam letumque trahi  
 Flentem, miseram, cernere possunt.  
 Bene paupertas humili tecto
- 900 Contenta latet:  
 Quatiunt altas saepe procellae,  
 Aut evertit Fortuna domos.
- OCT. Quo me trahitis? quodve tyrannus

Aut exilium regina iubet,	
Si mihi vitam fracta remittit	905
Tot iam nostris et victa malis?	
Si caede mea cumulare parat	
Luctus nostros: invidet etiam	
Cur in patria mihi saeva mori?	
Sed iam spes est nulla salutis:	910
Fratris cerno miseranda ratem.	
Haec est, cuius vecta carina	
Quondam genitrix, nunc et thalamis	
Expulsa soror miseranda vehar.	
Nullum Pietas nunc numen habet,	915
Nec sunt Superi;	
Regnat mundo tristis Erinnyes.	
Quis mea digne deflare potest	
Mala? quae lacrimis nostris questus	
Reddet aëdon? cuius pennas	920
Utinam miserae mihi Fata darent!	
Fugerem luctus ablata meos	
Penna volucris, procul et coetus	
Hominum tristes, caedemque feram.	
Sola in vacuo nemore, et tenui	925
Ramo pendens, querulo possem	
Gutturæ moestum fundere murmur.	
CHOR. Regitur fatis mortale genus,	
Nec sibi quidquam spondere potest	
Firmum et stabile:	930
er quae casus volvit varios	
Semper nobis metuenda dies.	
Animum firment exempla tuum,	
Iam multa domus quae vestra tulit.	
Quid saevior est Fortuna tibi?	935
Tu mihi primum	
Tot natorum memoranda parens,	
Nata Agrippae, nurus Augusti,	
Caesaris uxor, cuius nomen	

- 940 Clarum toto fulsit in orbe, II 7. 11  
 Utero toties enixa gravi  
 Pignora pacis; mox exilium,  
 Verbera, saevas passa catenas,  
 Funera, luctus, tandem letum,
- 945 Cruciata diu.  
 Felix thalamis Livia Drusi  
 Natisque ferum ruit in facinus  
 Poenamque suam.  
 Iulia, matris fata secuta,
- 950 Post longa tamen tempora ferro  
 Caesa est, quamvis crimine nullo.  
 Quid non potuit quondam genitrix  
 Tua, quae rexit Principis aulam,  
 Cara marito, partuque potens?
- 955 Eadem, famulo subiecta suo,  
 Cecidit diri militis ense.  
 Quid, cui licuit regnum in coelum  
 Sperare, parens tanta Neronis?  
 Non funesta violata manu
- 960 Remigis ante,  
 Mox et ferro lacerata diu,  
 Saevi iacuit victima nati?  
 o c r. Me quoque tristes mittit ad Umbras  
 Ferus et Manes, ecce, tyrannus!
- 965 Quid iam frustra miseranda moror?  
 Rapite ad letum,  
 Quibus in nos ius Fortuna dedit!  
 Testor Superos — Quid agis, demens?  
 Parce precari, quibus invisa es,
- 970 Numina divum! Tartara testor,  
 Erebiue deas scelerum ultrices, III 12. 32.  
 Et te, genitor, dignum tali  
 Morte et poena,  
 Non invisa est mors ista mihi.
- 975 Armate ratem, date vela fretis,

Ventisque petat puppis rector  
Pandatariae littora terrae!

CHOR. Lenes aurae, zephyrique leves,  
Tectam quondam nube aetheria

Qui vexistis raptam saevae

980

Virginis aris Iphigeniam,

Hanc quoque tristi procul a poena

Portate, precor, templa ad Triviae!

Urbe est nostra mitior Aulis,

Et Taurorum barbara tellus:

985

Hospitis illic caede litatur

Numen Superum;

Civis gaudet Roma cruore.

---

## Karl Tauchnitzsche Stereotyp-Ausgaben

Jeder Band ist einzeln zu haben.

## I. Griechische Autoren. M.

Aeschyli Tragoediae . . .	—90
Anacreontis Carmina . . .	—45
Anthologia Graeca, 3 Voll. .	3.42
Apollonii Rhodii Argonautica .	—60
Aristophanis Comoediae, 3 V.	2.70
Babrii Fabulae . . .	—50
Euripidis Tragoediae, 4 Voll.	3.—
Hesiodi Carmina . . .	—30
Homeri Ilias, 2 Voll. . .	1.50
Homeri Odyssea, 2 Voll. . .	1.50
Orphica, Procli, Musaei et Callimachi Carmina . . .	—90
Pindari Epinicia . . .	—90
Poetae Graeci Gnomici . . .	—60
Quinti Smyrnaei, Tryphiodori, Tzetzae et Coluthi Carmina de reb. Troianis	1.20
Sophoclis Tragoediae, 2 V.	1.50
Theocritus, Bion et Moschus	—60

Aeliani Varia Historia, Heraclides Ponticus et Nicolaus Damascenus . . .	—90
Aeschinis oratoris Opera . . .	—90
Aesopicae Fabulae . . .	—60
Antonini Commentarii . . .	—60
Apollodorus . . .	—75
Appiani Romanae Hist., 4 V.	3.60
Aristotelis Opera omnia, 16 V.	16.—
Arriani Expeditio Alexandri	1.20
Athenaeus Deipnosoph., 4 V.	7.20
Demosthenis Opera, 5 Voll.	4.50
Demosthenis Or. Philipp. .	—45
Dio Cassius, 4 Voll. . .	6.—
Diodorus Siculus, 6 Voll. .	9.—
Diogenes Laertius, 2 Voll. .	3.—
Dionysius Halicarn., 6 Voll.	6.—
Herodiani Hist. Romana . .	—90
Herodotus, 8 Voll. . .	2.70
Iosephus, 6 Voll. . .	9.—
Isaei Orationes . . .	1.—
Isocrates, 2 Voll. . .	2.10
Luciani Opera, 4 Voll. . .	4.80
Lysiae Orationes . . .	—90
Pausaniae Gr. Descriptio, 3 V.	3.—
Philo Iudaeus, 8 Voll. . .	12.—
Platonis Opera, 8 Voll. . .	9.—
Plutarchi Vitae parall., 9 V.	8.10
Plutarchi Moralia, 6 Voll. .	9.15
Polybii Historiae, 4 Voll. .	6.—

Ptolemaei Geographia, 3 Voll.	5.50
Stobaei Florilegium, 3 Voll. .	7.—
Strabo, 3 Voll. . .	4.50
Theophrastus, Epictetus, Cebes.	—30
Thucydides, 2 Voll. . .	2.10
Xenophonis Opera, 6 Voll. .	2.90

## II. Lateinische Autoren.

Catullus, Tibullus Propertius	—90
Horatius . . .	—75
Lucani Pharsalia . . .	1.—
Lucretius Carus . . .	1.50
Martialis Epigrammata . . .	1.20
Ovidii Opera, 3 Voll. . .	2.70
Palingenii Zodiacus vitae . .	1.50
Persius et Iuvenalis . . .	—45
Phaedrus cum Gudian, Aviani et Faerni fabulis . . .	—50
Phaedri Fabulae . . .	—30
Plauti Comoediae, 4 Voll. .	3.60
Senecae Tragoediae . . .	1.50
Silius Italicus . . .	1.50
Terentius . . .	—90
Virgilius . . .	1.20

Ammianus Marcellinus . . .	2.25
Aurelius Victor . . .	—45
Caesar, Iul., de bello Gallico	—75
Caesar, Iul., de bello civili .	—45
Ciceronis Opera, 11 Voll. .	23.25
Cornelius Nepos . . .	—30
Curtius Rufus . . .	1.20
Erasmus, Roterd., 2 Voll. .	2.10
Eutropius . . .	—30
Florus . . .	—30
Gellii Noctes Atticae . . .	2.—
Iustinus . . .	—75
Livii Opera, 6 Voll. . .	5.75
Muretus, Orationes, 2 Voll.	2.40
— —, Epistolae . . .	1.50
Plinii Historia Naturalis, 5 V.	9.—
Plinii Epistolae . . .	1.20
Pomponius Mela . . .	—45
Quintilianus, 2 Voll. . .	1.80
Sallustius . . .	—45
Senecae Opera philos., 5 V.	6.—
Suetonius . . .	—90
Taciti Opera, 2 Voll. . .	2.10
Valerius Maximus . . .	1.35
Velleius Paterculus . . .	—50
Vitruvius . . .	1.—









